





803

رسالة بهائية

طريق نقشیه سالک‌رینه اصول و آداب ذکر تعلیم  
ایچون قلمه آلمش کوزل برکت‌بدر .

معارف نظارت جلیله سنک ۹۹۱ نومرولی فی ۱۷ ربیع الآخر  
سنه ۱۳۰۴ وفی ۳۰ کانون اول سنه ۱۳۰۲ تاریخی  
رخصتنامه سیله

( بحریه ) مطبعه سنده طبع اولنمشدر

سنه ۱۳۰۶

|                           |
|---------------------------|
| Süleymaniye U Kütüphanesi |
| Hasan Hüsnü Paşa          |
| Yazma No: 803             |

۸۰۲





جد بی غایه و شکر بی غایه اول مظهر مکونات و موجد معدومات اولان  
مقدر اقدار و خالق مختار حضرتلرینه اولسونکه نوع انسانی فصاحت  
نطقیه ممتاز و عالیله سرفراز ایدوب مسجود ملائکه عظام و محسود شیاطین  
لثام ایتدی \*

### (قطعه)

شرف علم و ادبیه آدم \* اولدی جمله ملکه اول مسجود  
ادبی ترک ایلله ابلیس لثیم \* اولدی درگاه خدادن مطرود

وصلاة و سلام دخی اول شمس رسالت شامله و ختم نبوت کامله اولان  
نبی مجتبی و رسول مقتدی حضرتلرینه اولسونکه انلر عالمدن ظلمت ضلالتی  
افنا ایدوب انوار هدایتی ابتدا ایتدی و رحمت رضوان دخی اول اقرار  
شریعت غرا و اول انجم طریقت زهرا اولان آل عبا و اصحاب وفا  
حضراتنه اولسونکه انلر دخی الله تعالی به هجرت و رسولنه نصرت  
ایدوب اظهار شعار دین و اشعار احکام بقین ایتدیلر \*

### (نظم)

شمس آفاق رسالتدر رسول مجتبی \* آسمان شرعتک آل عبا اقراریدر  
جمله اصحابی شعار، دینی اظهار ایتده \* برج احکام یقینک انجم انصاریدر

نثر — اما بعد معلوم اوله که الله تعالی ارواح انسانییه بی عالم لاهوتده  
جوهر نوردن احسن تقویم اوزره خلق ایتدی، تشکیم بیوردی [لقد  
خلقنا الانسان فی احسن تقویم] صکره اول ارواح انواریه بی فوق عرشه  
اسکان ایدوب مظهر ذاتی و صفاتی ایتدی و انلری اول عرش پرینده نیجه  
مدت مقام مشاهده سنده مقیم ایتدی و اول مقام مشاهده اول ارواح  
اول رتبه کلمات علمیه و اداب عبودیه ایلله موصوف اولدیلر که جمیع  
مخلوقاتدن اعلم و اکرم اولوب خلافته مستحق اولدیلر، انکی چون الله تعالی دن  
[انی جاعل فی الارض خلیفه] وعده مظهر اولدیلر، صکره الله تعالی  
حضرتلری انلری بر یوزینه خلیفه ایتک ایچون خاکدن انلره بر قالب رعنا  
ور جسد مستثنی ایجاد و تصویر ایتدی، تشکیم قرآنده بیوردی [هو الذی  
خلقکم من طین] صکره اول ارواحی فوق عرشدن آلوب عالم جبروته  
انزال ایتدی و عالم جبروتدن عالم ملکوته انزال ایتدی و عالم ملکوتدن  
عالم ملکه انزال ایتدی که اول جسد تیره داند، تشکیم اشارت ایدوب بیوردی  
[ثم ردناه اسفل سافلین] صکره اول ارواح نورانیه نیک ذاتلرنده اولان  
نورانیلری و نشأتلرنده اولان علم و معرفتلی تیره دان جسده تعلق و تعشق  
سببیه ظلمت طبیعت بشریه ایلله محسوف و کسافت جسدیت عنصریه ایلله  
مکسوف اولوب ذاتلرنده اولان نورانیت محسوف و نشأتلرنده اولان علم  
و معرفت منسوخ اولدی، تشکیم الله تعالی بیوردی [و اخرجکم من بطون  
امهاتکم لاتعلمون شیئا] صکره بیه الله تعالی اول ارواحی نشئه اصلیه لرینه  
رجعت و محمد اعلازینده خودت ایتسونلر ایچون کتابلر انزال ایلدی و اول  
کتابلرده مجاهدات حسنات و اعمال صالحات بیان ایلدیکه، هر کیم انلری  
ایشلر ایلرینه ظلمت طبیعتدن خلاص و کسافت جسددن نجات بولوب نشئه



اصلیه سنه رجعت و نورانیت ذاتیه سنه عودت ایدوب حق تعالی به کمال معرفت و جنبانیه وصلت ایدر ، نیکیم الله تعالی بیوردی [ غن کان یرجو لقاء ربه فلیعمل عملا صالحا ] .

( نظم )

خلق ایدوب احسن تقویم ایله ارواحی خدا  
ایلدی مهتد مأوالرینی عرش برین  
ایدیچک آنلره عرش اوزره خدا عرض جمال  
اولدیلر ذات وصفاتینه مرایای کزین  
صکره ایجاب ایدوبن حکمت صنع باری  
ایده انسان ایله بوروی زمینی تزیین  
حکمت بالغه سی صنعی ایتدی اظهار  
خاکدن روحلر ایچون بر جسد ایتدی تدوین  
الدی حق روحلری ایندردی فضای عرشدن  
خاکدان جسد ، نیکه قودی راز حزین  
بو ایکی ضدی خدا عشق ایله تالیف ایتدی  
ایده لر تاکه عبودیتنه وضع جبین  
روحلر اولدقدن مقارن جسده ایتدی کناه  
ایتدیرر آدمه البسه کناه ، سوء قرین  
جسد تیره وطن ایسده روح غربتده  
حق تعالی اوله ارواحه بو غربتده معین  
ذکر وطاعت ایدرک قید جسدن بکهم  
اوله لم روح معلا ایله الله یقین

نثر — الله تعالی کتب منزلده بیان ایلدیکه مجاهدات حسنه و عبادات صالحه قتی چوق طریق اوزره در ، اکا بناء دینلدی « الطرق الی الله بعدد انقاس الخلاق » لکن اول طرق موصله بیننده تصفیه روحه

انسب و وصول حقه اقرب اولان طریق ( طریق ذکر ) در ، زیرا حضرت علی کرم الله وجهه رسول الله صلی الله علیه و سلمدن حق تعالی به اقرب طریق طلب ایلدکده رسول الله ( اقرب طریق الی الله ، طریق ذکر در ) بیوردیلر و آنلره اول وقت طریق ذکر تلمیقین ایلدیلر و بیوردیلرکه ( ابن آدم اوزرینه بر ساعت مرور ایتسه و اول ساعت اللهم ذکر ایتسه ، اولکیمه جنته کیرسه بیله اول ساعت ایچون تحسیر ایدرکه نیچون الله تعالی بی انده ذکر ایتمدم ) وینه بیوردیلرکه [ لیس لقوله لا اله الا الله جزاء الا النظر الی وجه الله تعالی والجنة جزاء الاعمال ] وینه بیوردیلر [ ان القلوب تصدوا کایصدوا الحدید وجلاءها ذکر الله ] والله تعالی بیوردی [ ولذکر الله اکبر ] الله تعالی ذکرك اکبری ایله مؤکد حکم ایتسی ذکرك عند الله افضل اعمال اولدوغن اقتضا ایدر ، انکیچون الله تعالی عبادندن ذکرك کثرتنی طلب ایلدی و عبادک ذکرینی ذکرینه سبب ایتدی و بیوردی [ واذکروا الله ذکرا کثیرا ] واذکرونی اذکرکم [ ایدمی قولک بر عملیکه الله تعالی ذکرتنه سبب اوله آندن افضل و انفع عمل اولورمی ! وینه حدیث قدسیده بیوردی « انا جلیس من ذکرنی » و بو حدیث شریفدن مستفاد اولان بوکه ذاکر ذکر ایله الله تعالی به اوله کمال قریبت و تمام انسیت تحصیل ایدرکه اول قریبت وانسیتک لازمی اولان جلوس که حق تعالی نک شانه محال ایکن حق تعالی انی ذاته اسناد ایتدی ، ایدمی طالب رضاء الله وراغب لقاء الله اولان کیمسه ذکره ملازمت ایتمک کر کدرکه رضاء الله نائل و لقاء الله واصل اوله .

( نظم )

حق سون ذکرك ایدر اکثار \* دائم ایدر کندینه ذکرین شعار  
ذاکر ایدر ذکر ایله حقه جلیس \* ذاکره ذکر ایله اولورحق انیس  
ذاکر اولور ذکر ایله مذکورحق \* ذاکر اولور ذکر ایله منظورحق  
قلبنه ذکر ایله ویرنلر جلا \* آنلر اولور آینه کبریا  
ذکر ایله ذاکر ایریشور قریبه \* ذکر ایله داخل اولور اولحضرت



ذاکر ایدر ذکر ایله کسب فنا \* ذکر ایله اللهه ایدر انما  
 دلده قومز ذکر صدادن اثر \* ذاکری اول حب سوادن کسر  
 ذکر ای او کیم ایلیسه ورد زبان \* آکا اولور سر حقیقت عیان  
 مرغ صفت ذکر ایله ذاکر اوچر \* ذکر ایله اول جله هوادن پکر  
 ذاکره ذکر ایله کلور وجد و حال \* ذاکر اولور ذکر ایله اهل وصال  
 ذکر ایله درگاه خدا فتح اولور \* ذکر ایله اهواء نفس قدح اولور  
 ذکر ایله اللهه بولنر لقا \* آنلر ایمش حقه یقین اولیا  
 ذکر خدایی قومه دلدن صقین \* تا اوله سن سنده خدایه یقین

نثر — طریق ذکر ایکیدر . بری ( طریق ذکر جهری ) و بری  
 ( طریق ذکر خفی ) در . طریق ذکر خفی ذکر جهری بدن افضلدر .  
 زیرا رسول الله صلی الله علیه وسلم بیوردی « خیر الذکر خفی وخیر الرزق  
 ما یکنی » و ذکر خفی دخی ایکیدر . بر طریق ( لساناً اخفا ایله ذکر )  
 و بر طریق ( قلبه ذکر ) در و بو قلب ایله ذکر لسان ایله اخفاء ذکر در  
 افضلدر . زیرا الله تعالی افضل انبیا اولان نبیسنه بونسلکه امر ایلدی  
 و بیوردی [ واذکر ربک فی نفسک تضرعاً وخیفۃ ] و رسول الله صلی الله  
 علیه وسلم بیوردی « الذکر الذی لاتعمعه الحفظۃ سبعون ضعفا » و طریق  
 ذکر قلبی دخی درت طریق اوزره در . اولکی طریقه ( اسم جلالی قلبیه  
 حبس نفس ایدرک ذکر ایدرلر ) ایکنجی طریقه ( کلمۃ توحیدی حبس نفس  
 ایتیمه رک قلبیه ذکر ایدرلر ) اوچنجی طریق ( کلمۃ توحیدی حبس نفس  
 ایدرک قلبیه ذکر ایدرلر ) اما کلمۃ توحیدی تصویرده فکرلرینی تحریک  
 ایتدکری کی رأسلرینی دخی فکرلرینه تبعیتله تحریک ایدرلر . در دنجی  
 طریقه ( کلمۃ توحیدی حبس نفس ایله ذکر ایدرلر ) اما اعضالرینی اصلاً  
 تحریک ایتزلر و اوایله ذکرلرینی اخفا ایدرلر که برکیمسه آنلرک ذکرلرینه واقف  
 و مطلع اولمز . بو طریق ایسه دیگر اوچ طریقه دن افضلدر . زیرا بو طریق  
 ریاضیسمه دن مصون و اطلاع اغیاردن محفوظدر . بو طریقه اولان ( کیفیت  
 ذکر قلبی ) خضر علیه السلامک خواجه عبد الخالق بغدادی ینه تلقین

ایتدیکی وجه اوزره باقیدر . اصلاً انک اوزرینه بر شی زیاد و نقصان  
 اولماشددر . بو طریقک اساسی دخی متابعت سنت و عمل عزیمت و اجتناب  
 بدعت و دوام عبودیت و جذبه محبت ذاتیه در بو طریقک نسبتی نسبت  
 جامعدر . زیرا بو طریقه سلوک احدیت ( ذات حق ) ایله در . آنک ایچون  
 دیمشلددر که ( بو طریقه بر قدم وضع ایتک سائر طریقلره بیک قدم وضع  
 ایتکدن افضلدر ) و بو طریقه دخی جذبه محبت ذاتیه ایله فقط تجلی احدیت  
 ذاتیهله تحقق بولنور اما سائر طریقه تعلق اسماء افعال اولنور . آندن صکره  
 تخلیق افعال صفات اولنور . آندن صکره تجلی ذات احدیت بولنور .  
 بو طریقک بدایتده نهایتی درک اولنور . آنکچون بو طریقک بدایتده واصل  
 اولنرلر سائر طریقک نهایتده واصل اولنلردن چوقدر ؛ بو اجدندر که  
 بو طریقه ( طریق اندماج ) و ( طریق اجمال ) دنیلدی و آنکچون بو طریقه  
 بی حساب خواجکان عظام و مشایخ کرام ظهور ایدوب اکثریسی اوقاد  
 ارکان واقطاب دوران اولدیلر و خلافت محمدیه ایله ملک و ملکوتده تصرف  
 ایتدیلر .

### ( نظم )

طریق نقشبندی اهلنک فیضی خدادندر  
 اولارک نسبتی جله رسول مجتادندر  
 ابوبکر وعلیدر بو طریقک شاه سرداری  
 شیوخ خواجکانی هب کبار اولیادندر  
 بو یولده اتباع سنت اولدی باعث وصلت  
 جمیع بدعتی ترک ایتمه بونده اهتدادندر  
 عزیمتله عمللر ایشلیوب رخصتدن الچکمک  
 بو یولده سالک بویله سلوک ایتک دوادندر  
 طریق جذبه در بونده ایرر تیر منزله سالک  
 که بونده سالکک سیری طریق اختفادندر



دوام ذکر ایله صمت اولدی نقشبندیلر کاری  
 آنکچون بونلرک فیضی همان قلبی جلادندر  
 طریق نقشبندک جلهسی آسان درر صانه  
 بویولده جان فدا ایتک شروط ابتدادندر  
 حذر قیل دل اوزاته کل کروه نقشبندانه  
 یقین ییلکم اولاره طعن ایدنلر اشقیادندر

نثر — باخصوص بو طریقت علیه ده (قطبانیت عظمی) و (ولایت کبری) ایله ظهور ایدن «خواجه بهاء الدین نقشبند حضرتلری» که برکات همتلریله سالکله عرفان و نسیمات فیوضاتیله عالمه جان کلشدر و طاعت و عبادتلیله روی زمینی کلزار و کشف و کرامتلیله سقف آسمان زرنکار اولمشدر، بو ذره ناجیه اول شمس ولایتک طریقتنه انتساب وین وبرکتلرندن استجلاب ایچون دأب طریققلرینی ذکر و بعض کرامتلیرک جمع ایدوب بورسالیته ترتیب ایتدم؛ امیدم ایدرم که قصورمی عفو ایدوب خدمتی قبول ایدلر، زیرا اوله عالی جاهک خدمت و صفلی مشکلدن.

(نظم)

من نتوانم که کنم وصف تو \* تو که شدی درره حق سربلند  
 غریبانمکه قصورات من \* عفو کنی ای شه من نقشبند

بورسالیته ایکی باب اوزره تقسیم ایتدم.  
 اولکی باب (خواجه حضرتلرینک آداب طریققلری) بیاننده اولوب  
 (بر مقدمه) ایله بش (فصله) تقسیم ایتدم.

ایکنجی باب دخی (خواجه حضرتلرینک مناقب سنیهلرینی و کرامات علیه لرینی) شامل اولوب آنی دخی بر (مقدمه) ایله بش (فصله) تقسیم ایتدم و بورسالیته اسمی مسما سنه مطابق اولسون ایچون و خواجه حضرتلرینه دخی نسبت سبیلله سالکله عندنده بهادار و عارفلر نزدنده عظیم المقدار اولسیچون اسمنه (بهائیه) تسمیه ایتدم.

(باب اول)

مقدمه — معلوم اوله که طریق تقرب حق سبحانه و تعالی یه سلوک ایدن کیسه ده بو شروط بولنق لازمدر، تا که سلوککنده وصول مقام و حصول مرام اکا میسر اوله، ایدمی سالکله اوله لازمدر که حق تعالی یی بوصفتلر ایله اعتقاد ایدوب بو اعتقاد اوزرینه ثابت و راسخ اوله، تا کیم نفس و شیطان طرفندن اوهام و خیالات ایله ضلالتله دوشوب هلاک اولیه، پس ایدمی الله تعالی یی بویله اعتقاد ایده یعنی «الله تعالی واجب الوجود و خالق جمیع موجودات وحی و علیم و قادر و قیومدر، سمیع و بصیر و فعال لما یریددر، متکلم و مریددر، واحد احددر، و فرد و صمددر، ذات و صفاتده مثلی و خلق ایتدوکی عالمده شریک و نظیری و خلق و ایجادنده معین و ظهیری یوقدر، قدیمدر، ابتداسی یوقدر، باقیدر انتهایسی یوقدر، تبدل و تغیر اکا طاری اولمز، قابل انقسام و تجزئ دکلدر، محل امکان حدوث اولمز و زمان و مکانده و جهت ارکانده قائم اولمز، الوان و اشکالدن منزهدر، حس و ابصار و عقول افکار ایله درک اولمز، انجق نور ایمان و کشف عرفان ایله درک اولنور، حقیقتنی کننیدن غیری ییلور یوقدر، جمیع علویاته و سفلیاته قریبیتی مساویدر، جمیع کائناتی محیط اولوب احاطه سی تحدید طریق اوزره دکلدر، جمیع اشیایی ذره بذره ییلور و بیانی مخلوقک بیانی کبی دکلدر، جمیع مخلوق ایله معیتی وار، لکن معیتی حلول و امتزاج و مقارنت و اتصال اوزره دکلدر، جمیع اشیانک بلا مقارنته عینیدر، و بلا مابینته غیریدر، جمیع مخلوقک عظمتلری آنک عظمتی عندنده ذره دکلدر، جمیع موجودات آنمکله قائمدر، خاطره هر نه کلور سه آنک غیریدر.

بو صفتلر اوزره حق تعالی یی سالکله بیتمک کرکدر، تا کیم سلوک اثناسنده یرامز لغه دوشوب هلاک اولیه.

(نظم)

واحد و فرد و صمد اولدی اله \* اکا بو حسن نظام اولدی کواه



جمله معدوم ایکن اولدر موجود \* جمله موجود ایکن اولدر معبود  
یوق ایکن ایلدی عالمی وار \* ایتدی عالمی صنعتن اظهار  
باطن اولدقده اودر ظاهر اولان \* اول اولدقده اودر آخر اولان  
هم سمیع هم دخی حی همده بصیر \* هم علم هم متکلم و قدیر  
قادر و قیوم و خلاق اولدر \* جمله مخلوقنه رزاقده اودر  
عالمه قرب و جهتدن عاری \* ایدن عالمی اولدر یاری  
حالد صانع انی اشباهه \* ساریدر صانع انی ارواحه  
جمله عالمی انکله قائم \* جمله مخلوقنه اولدر عالم  
اتحاد ایلز اول احیایه \* اشتباهی یوق انک اشیایه  
ذات پاکنده تعین بولدی \* خلقی هب مظهر اسماء قیلدی  
اولدی ذاتی کی اسماسی قدیم \* باقیدر تا به ابد فیضی عیم  
وار ایکن عالمی ایلر اعدام \* دی به من بونده آکا کیمسه کلام  
جنسله قص ایلز اولز محدود \* بصیر و حسن ایلز مشهود  
کشف ایدر نور بصیرتله آتی \* کیم وجودندن اولورسه فانی  
بوله کورسندده وجودکده فنا \* اوله سک ما صدق (ثم دنی)

نثر — دخی حق تعالی به تقرب قصد ایدن سالکده توبه نصوح  
لازمدر؛ زیرا الله تعالی چرکاب معاصی ایلز ملوث اولان کسه بی سوزن و آتی  
درگاه پاکنده قبول ایتمز؛ تا کیم اول کسه آب توبه ایلز پاک اولمیه؛ حدیث  
شریفده «ان الله طيب لا يقبل الاطيبا» وارد اولمش الله تعالی دخی [ان الله  
يحب التوابين ويحب المتطهرين] بیورمشدر؛ پس ایتدی الله تعالی به تقرب  
ایچون توبه مراد ایدن کسه به لازمدرکه بر دعوتی مستجاب اولور و لیک  
بحضورینه کیدوب جمیع ایتدیکی معاصینک صغیر و کبیرندن توبه ایدوب  
طاعات و عباداته تشبث و تمسکه نیت ایده و جمیع ایتدیکی غفلاتدن دخی توبه  
ایدوب اخلاق حیده ایلز اتصاف ایده؛ آندن صکره بر دخی اول قبایحی  
ایتمکه اوله عزیمت ایده که آنلره عودت ایتمک هندنده محال اوله؛ دایما  
خوف اوزره اولوب آنلری ایشلدیکنک ندامت و پشیمانلنی خاطرندن چیقیمه.

### (نظم)

توبه درر هر عملك احسنی \* توبه درر مغفرتك معدنی  
نادم اولوب جرمکه كل توبه قیل \* دیمه کیم جرمکه سور حق بنی  
جرمی اولور آدمه حقه حجاب \* ترك ایده کور حقه حجاب اولانی  
بارکه قربی کناه ستر ایدر \* توبه در اول بارکهك روزنی  
توبه ایدوب معصیتکدن صاقین \* سالک معصیت اولور رهزنی  
توبه اولوب فلک یم مغفرت \* جمله عملاردر آنک یملکینی  
مغفرتك قائمه کنارنده كل \* توبه ایلز مغفرتنه صال سنی  
مغفرت آیلز طهارتلتوب \* قرب خدایه واروب اول معنی

نثر — حق تعالی به وصلت طلب ایدن کیمسه به لازمدرکه الله تعالی به  
محبت ایچون محبت جان و جسمی و محبت ماسوایی ترك ایدوب الله تعالی بی  
طلب و ارادته صادق اوله؛ جمیع علایق دنیویه و اخرویه بی قلبندن  
اخراج ایدوب فقر و فاقه بی اختیار ایده و عزت دنیادن امراض ایلز ناس  
عندنده اولان منزلندن فارغ اولورق فضل و مالتی حق یولنده بذل ایده؛  
وزهد و تقوی ایلز متصف اوله؛ ناسدن عزالت ایده؛ بر شیخ کامل بولوب  
آندن اخذ انابت ایدوب حکمنه تسلیم و مجلسنه مداوم؛ خدمتده قائم اوله.  
اگر بر کیمسه طالب رضاء الله و راغب لقاء الله اولوبده بو شروط انده  
بولنغزایسه مقصودینه نائل و مطلوبینه واصل اوله من.

### (نظم)

جانه باقر حق یولنده طالب دیدارلر  
حقندن اوزکه غیری به میل ایلز هشیارلر  
پایینی خار مغیلان سوادن حفظ ایدر  
شاهراه کعبه وصله کیدن رهوارلر  
وصلت درگاه حق اولز میسر سالک  
آکا رهبر اولسه طرف اولان سالارلر



وارینی معشوقه بذل ایلر وصالن استمز  
حق معشوقه رعایت ایلین ابرارلر  
ترک تجرید ایلله بو بولده سبکبار اول یوری  
ایرمدی سر منزله بونده کران رفتارلر  
فقر وفاقه خلعتین کی اکنکه قیل افتخار  
طور کی تا کیم پسندیده ایده اختیارلر  
جان و باشندن یکوب چوکان کونی لعب ایدر  
عرصة میدان عشق ایچره کیرن شطارلر  
عاشق شوریده اول اما ادب کوزله صقین  
طرد ایدرلر باب خدمتدن شنی دلدارلر  
دلدله کیرله وصلنی یارکله سترایت سرکی  
ظاهرا بیکنه اول کیم دویمسون اغیارلر  
پروبالین عشق و شوقیله یاقوبده کیتدیلر  
لامکان عالم قدسه کیدن طیارلر  
خواب غفلتدن کوزک آج اول خدایه منتظر  
کشف ایدر نور خدایی کوزلین بیدارلر  
فانی اول کج بو وجود کدن بقا بول حق ایلله  
سرکه ظاهر اوله حقندن سنک اسرارلر

### فصل اول

بوفصل طریقت علیه نك رسول محترم صلی الله تعالی علیه وسلمدن  
صورت تلقیسیله شروط مشیختی و ذکر قلبینک کیفیت تلقینی بیاننده در .  
معلوم اولسونکه چنکه رسول الله صلی الله تعالی علیه وسلمدن حضرت  
علی (کرم الله وجهه) الله تعالی حضرت تهرینه اقرب طریق طلب ایلدکده  
رسول الله (صلی الله علیه وسلم) جواب ویرمیوب وحیه منتظر اولدیلر ایدی؛  
اول وقت جبریل امین حضرتلری حق تعالی جانبندن کلوب (یا رسول الله

اقرب طریق ذکر در) دیو خبر ویره رک رسول الله صلی الله علیه وسلمه  
کلمه توحیدی تلقین طریق اوزره اوچ کره ذکر ایتدیلر و رسول الله دخی  
اوچ کره تلقین طریق اوزره ذکر ایتدیلر؛ صکره رسول الله (صلی الله  
علیه وسلم) علی (کرم الله وجهه) بی اول منوال اوزره اوچ کره ذکر  
ایدرک تلقین ایلدیلر، اندن صکره سائر اصحاب حضرتلریله دخی اجتماع  
وانفراد اوزره تلقین ایدوب، «جئنا من الجهاد الا صغر الی الجهاد  
الا کبر» بیوردیلر؛ بو کلام شریفلرندن معلوم اولورکه ذکر الله اشتغال  
نفسله جهاددر، نفسله جهاد ایه جهاد اکبردر، زیرا نفس عدو اللهدر،  
انی هلاک ایتدیکه اللهه دوست اولوب قریت اولنر، لیکن حضرت علیدن  
مقدم رسول الله (صلی الله علیه وسلم) غار هجرتده ابو بکر (رضی الله تعالی  
عنه) حضرتلرینه طریق ذکر خفی بی لسانا تلقین ایدوب نسبت محبت  
ذاتییه و جذبه جذبات رحانییه بی افاضه و احسان ایدوب «ما صب الله  
فی قلبی شیئا الا وقد صبته فی صدر ابی بکر» بیوردیلر، اولوقت ابو بکر  
حضرتلری برخدمت عظیمده بولندیکه اول عنایتیه لایق اولوب جمیع  
صحابیدن افضل اولدیلر، نتم «ما طلعت الشمس وما غربت علی افضل من  
ابی بکر بعد النبیین» وینه حدیث شریفده وارد اولدی «لیس فضل ابی بکر  
علیکم بکثرة الصلاة او بکثرة الصيام بل بشی یوقر فی قلبه» حدیث شریفلری  
بو خدمتی ایما ایدر .

ابوبکر حضرتلرینک قلبنده وقر ایدن شی غار هجرتده رسول الله  
(صلی الله علیه وسلم) انلره افاضه ایلدیکه نسبت محبت ذاتیه و جذبه جذبات  
رحانییه ایدی . رسول الله حضرتندن صکره ابوبکر حضرتلری خلیفه حق  
اولدقده اول نسبت محبت ذاتیه و جذبه رحانییه بی ذکر لسانه اخفا طریق  
اوزره بعض صحابی به تلقین و افاضه ایتدیلر و بعض صحابی دخی بعض تابعینه  
تلقین و افاضه ایلدیلر، اول نسبت علیه اسلوب محرره اوزره کابراً عن  
کابراً اولیاء عظام و مشایخ کرام بیننده تسلسل ایتدی، تا کیم خواجه عبد  
الخالق غجدوانی حضرتلرینه حضرت خضر علیه السلام ذکر قلبی بی حبس



نفس طریق ایلہ تعلیم ابتدی، اندن صکره خواجه حضرتلری اخفاطریقیلہ ذکر لسانی ترک ایدوب ذکر قلبی به حبس نفس طریقیلہ مشغول اولدیلر و سالکری دخی ذکر قلبی ایلہ تسلیم و تربیه ابتدیلر، بوندن معلوم اولدیکه بو طریقت علیده اولان ذکر قلبی حضرت خضر علیه السلامدن ونسبت ذاتیه وجذبہ رحانیه دخی ابوبکر حضرتلرندن تسلسل ایتشدیر، انکیچون بو طریقت علیہ ابوبکر حضرتلرینه نسبت اولنور و بو طریقه (طریق جذبہ) ونسبتہ (نسبت ذاتیه) دنیلور. آنکیچون بو طریقت علیہنک مرشد و مربیلری بعض سالکری اجمالا جذبہ ایلہ تربیه ایدوب حقه ایصال ایلرلر و تلقین ذکر ایدوب سلوکه تفصیلا تربیه ایدوب حقه ایصال ایلرلر؛ لکن جذبہ ایلہ تربیه مرینک قوه تصرفه مینیدر، جذبہ ایلہ تربیه ده سالک بلاتعب ولا نصب حقه واصل اولوب سلوک و مجاهده ایلہ طریقهده تعوق و تکلف کورمز و سلوک ایلہ طریقهده تطویل ایتمز، اما کرکدرکه اول سالک وصولندن صکره تفصیلا سلوک مجاهدهیه مشغول اوله، تاکییم طریق سلوک نه اولدیغنی بیلوب اول دخی سالکری سلوک ایلہ تربیهیه قادر اوله.

اگر جذبہ ایلہ واصل اولان ابتدایه عودت ایدوب سلوک ایتمز ایسه احوال طریقتی بیلوب ناقص قالور و سالکری دخی تربیه و تسلیم ایده مز، اگر ایدر ایسه جذبہ ایلہ تربیه ایدر، یوخسه سلوک ایلہ تربیه ایده مز، حتی ایدیم دیسه سالکری الحاده القا ایدر.

### (نظم)

بدرقه قرب خدا جذبہ در \* رهبر ارباب هدا جذبہ در  
کاشف اسرار کنوز رموز \* فاتح ابواب عطا جذبہ در  
قید سوادن پکورن سالکی \* رابطه اهل فنا جذبہ در  
جمله عباداته موازی اولان \* موصله باب رضا جذبہ در  
خاطرلر نقشنی دلدن سیلن \* روحه جلا قلبیه صفا جذبہ در

درد فراق ایلہ اولان خسته یه \* روحه فزاداد شفا جذبہ در  
سعی ایلہ کل جذبہیه ایت ارتقا \* سلم ارباب لقا جذبہ در  
جذبہ طریقینه کیرن طالبک \* دلدل مطلوب رسا جذبہ در  
حضرت صدیقی سرفراز ایدن \* عز مقامات علا جذبہ در  
میل محبت طلب شوق عشق \* وجد و غرام ایلہ جدا جذبہ در  
رفرف اولان وصلت ایچون عاشقه \* مرتبه (نم دخی) جذبہ در

نثر — مشیختک شروط ادابی بونلردر.

شیخ مربی اولان کیسه بر شیخ کاملدن تربیه کوروب حقه واصل اولدقده احکام شریعتیه عالم و احوال طریقتله عامل اولوق کرکدر، اسرار حقیقتی کشف ایدرک الله تعالی یه واصل اولوق کرکدر، طریقتده اولان مزالی و مهالکه مطلع اولوق کرکدر، سالکری عقبات طریقهده تحملله قادر و صابر کرکدر، که تاکییم سالکله مشقت طریقی چکدر میوب آسانلق ایلہ منزل مقصوده ایرشدیره، نفس و شیطانک طریقی حیلله و مکرلرینه دخی عالم کرکدر، تاکییم نفس و شیطانک حیل و مکرندن سالکری حفظ ایدوب سلامتله حقه ایصال ایده و طریق افاضهیه تمامیلله کوروب و بیلوب سالکری استعدادلرینه کوره تربیه و تسلیمکه قادر اوله، تاکییم کندوسی سالکک تربیه و سلوکلرنده زحمت چکیمیه، الباس خلع صاحبی دخی اولوق کرکدر، تاکییم استعدادی اولین سالکله الباس استعداد ایده و سالکری حضور و ضیئته حفظ و حراسته قادر اوله و تصرف روحانیت ایلہ سالکری حضورده تربیه ایدر کی غیبتده دخی تربیهیه قادر اوله و اخلاق الله ایلہ موصوف اولوب اداب رسول الله ایلہ مؤدب اوله، اقوال و افعال و احوالی جمله میران شرع اوزره اولوب اداب عبودیتیه راضی و متابعت سنن سنیهیه ساغی اوله، بدع و رخصلردن مجتنب و احوط امور ایلہ عامل اوله، حظوظاتی ترک ایدوب عین و مشاقی اختیار ایده و فقر ایلہ متصف اوله، تاکییم سالکار دخی عین و مشاقده و فقر



وفاقه ده اکا اقتدا ایدلر ' دائم کتاب اللهی و حدیث رسول اللهی پیشوا  
ایدوب هرامورنده کتاب وسنته اقتدا و هر حالده التجا ایده ' اسرار حقیقی  
دخی کتاب وسنته تطبیق ایده ' زیرا ارباب حقیقت هندنده کتاب و حدیث  
پیشوا ایتمینه طریقته اقتدا اولمز ' زیرا امر طریقت کتاب وسنت ايله  
مقید و مؤیددر .

بوشروط و اداب ايله شیخ اولان کیمسه تحقیق ایتدیکنندن صکره تربیه  
ناسه دخی رسول الله ( صلی الله علیه وسلم ) جانبندن خلافت ايله مآذون  
اوله ' پس ایدی بر شیخ که بوشروط و ادابله موصوف اولمیه ' اکا  
طریقته اقتدا جائز دکلدر ' زیرا اول شیخ سالکی سلامت ايله حقه ایصال  
ایده من ' بلکه سالک حقدن انقطاعنه سبب اولور ' لکن بوزمانه ده  
بوشروط ايله متصف اولان شیخ قتی نادر در ' بلکه وجودی وجود عنقا  
کبیدر .

### ( نظم )

شیخ اویله کرک کیم اوله شرع اوزره فعالی  
وعظ و حکمی جامع اوله جله مقالی  
افعال طریقته اوله شویله مجاهد  
نادر بولنه اهل سلوک ایچره مثالی  
عرفان ايله ملو اوله کنجینه صدری  
اسرار حقیقتله اوله حقه وصالی  
الایش دنیادن اوله پاک و مزکا  
عنقا کی منزل ایدینه عز معالی  
مقبول اوله اطواری انک انس ايله جنبه  
محبوب اوله سیرته دخی جله خصالی  
ظاهرده اوله زهد و عبادتله مشغول  
باطنده انک حق مشاهد اوله بالی

اول رتبه اوله قوت قدسیه به مالک  
بر همت ايله ایلیم اول قلع جبالی  
سالکری غیبتده ایده حفظ و حراست  
رفع ایده کوکلرده اولان دام عضالی  
عارف اوله اول منزلقه راه سلوکه  
تمیز ایده اول نصح هدایتله ضلالی  
عالم اوله حالات فنا ايله بقایه  
فرق ایده تجلی جلال ايله جمالی  
کشف ایلیم سالکله احوال سلوکی  
فتح ایلیم طالبله ابواب نوالی  
ملک ملکوت ایچره ایده بویله تصرف  
ممکن اوله اول ایشلکه امر محالی  
برکیمسه اگر قابل فیض اولسه اصلا  
بر نظره ده ارشاده آنی اوله مجالی  
شیخلردن اولوب نسبت عرفانی مسلسل  
اسماء طریقته اوله فضل و کالی  
حق ايله اوله قرب ولایتله مقرب  
خلق ايله اوله تاج خلافت ايله عالی  
مآذون اوله اول تربیه روح نبیدن  
تأیید اوله انواع کرامتله بو حالی  
بوجه صفات اولسه بر شیخ ده موجود  
البتده اولور حکم مشیختدن او خالی

کیفیت تلقین ذکر طریق نقشبندی .

اگر بر طالب طریق جناب حق تعالی به سلوک مراد ایتسه آکا لازمدر که  
اولا بر شیخ کامل بولوب آندن اخذ طریق ایده ' آندن صکره آنی رهبر  
و پیشوا ایدینوب طریقته آنک رفاقتله سلوک ایده ' زیرا طریق جناب حق



غایت خطرناک و محل هلاکدر؛ سالک آندہ بر رفیق مشفقہ و بر عارف  
رسوم طریقہ مقارن اولدجقہ حق تعالینک وصلتنہ ہدایت بولمز \* بلکہ  
اول سالک ضلالتہ دوشوب ہلاک اولور؛ آنک ایچون «الرفیق ثم الطريق»  
من لم يأخذ الطريق من الرجال فينتقل من محال الى محال \* لم يكن له شيخ  
فشیخہ الشیطان» دیشدر .

پس اجمدی معلوم اولسونکہ سالک بر شیخ کامل بولدقدہ آندن اخذ طریقک  
و تلقن ذکرک سنت اوزرہ کیفیتی بودرکہ شیخ اولان کیمسہ سالکہ استخارہ  
ایله امر ایدروکندی دخی استخارہ ایدر \* اگر استخارہ لری موافق اولورسہ  
سالکہ غسل ایله امر ایدر \* تکم رسول الله (صلى الله عليه وسلم) توبہ  
ایدن کیمسہ لری اولیله امر بیوررلر ایدی؛ غسلدن صکرہ سالک ایکی رکعت  
نماز قیلہ و نمازدن صکرہ یتش کرہ (استغفر الله العظيم) و یوز کرہ دخی  
(سبحان الله وبحمده) دیہ و حق تعالینک رضامتی ایچون برشی دخی تصدیق  
ایده \* صکرہ شیخک حضورینہ کیده؛ شیخ دخی انی مواجہہ سندہ دیز اوزرینہ  
اجلاس ایده \* صکرہ شیخ مریدہ جیع معاصینک کبیر و صغیر لردن و جیع  
عقلادن و اخلاق ذمیرہ لردن توبہ نصوح ابتدرہ \* زیرا بر کیمسہ نک یوز  
معصیتی اولسہ طقسان طغوزندہ توبہ ایدوب برندن توبہ ایتسہ اول کیمسہ  
تائب دیناز؛ پس اجمدی نقیر و قطمیر معصیتلردن سالکہ توبہ ایتک لازمدر  
اندن صکرہ شیخ اول سالکک ذمتدہ حقوق عباد وار ایسہ اول حقوق  
اصحابہ اسفردادہ و یاخود استخلاہ آندن عہد الہ \* اندن صکرہ مریدک  
صاغ النی مصافحہ ایدر کی ایله طوتہ؛ اندن صکرہ سالکک اوزرینہ  
فرض و لازمدرکہ جیع احکام شریعتک و جیع سنن رواتب و نوافلک  
ایشلہ سنہ عہد اخذ ایده و عزیمت ایله عمل ایتک و رخصت لری ترک ایتک  
و جیع بدعتلردن احتراز ایتک دخی عہد اخذ ایده \* آندن صکرہ بوآیت  
کریمہ بی تبرکا قرائت ایده [ان الذين يبايعونك انما يبايعون الله]  
الی آخرہ \* صکرہ شیخ و مرید بو استغفاری اوج کرہ اوقوبہ (استغفر الله  
العظيم الذي لا اله الا هو الحی القيوم) غفار الذنوب و اتوب الیہ و اسالہ

الثوبۃ عید ظالم لایکک لنفسہ ضرا ولا نفعاً ولا موتاً ولا حیواً ولا نشوراً)  
صکرہ شیخ و مرید اللربنی دیزلری اوزرینہ وضع ایدوب کوزلربنی یومدر  
صکرہ شیخ اسم جلالی قلبیلہ مریدک قلبیلہ تلقین طریق اوزرہ اوج کرہ  
ذکر ایده \* اندن صکرہ مرید دخی اوج کرہ قلبیلہ تلقن طریق اوزرہ ذکر  
ایده \* اندن صکرہ شیخ و مرید دخی معا اللربنی قالدیروب شیخ دعا ایده  
و مرید آمین دیہ و دعائک تمامندہ اللربنی بوزلربنہ سوردر .

کلمۃ توحیدک کیفیت تلقینی دخی اسم جلالک کیفیتی کی ایسده لکن کلمۃ  
توحیدی تلقینسده شیخ و مرید حبس نفس ایدر \* آندن صکرہ مریدہ  
لازمدرکہ توبہ سی اوزرینہ ثابت قدم اولوب شیخیلہ ابتدوکی عہد و میثاق  
حفظ ایده \* اگر ایتزسہ نقض عہد ایدوب [الذين ينقضون عهد الله من بعد  
ميثاقه] آیت کریمہ سنک نمحنده داخل و شیخ جانبدن دخی اکا اولان طریق  
فیض و فتوح منسد اولوب بر دخی اول مرید تجدد عہدہ محتاج اولور؛ زیرا  
فیض طریقت حفظ عہد ایله جاری و ساری اولور .

### (نظم)

سالک \* خدایہ ایرمز اگر رهبر اولسہ  
ارشاد ایدر طریق اکا برار اولسہ  
کیم حقہ ایریشور اگر اولزسہ مرشدی  
حق نیجه بولور کشتی پیغمبر اولسہ  
صانمہ کہ دار قدسہ کبرر ایستین کشتی  
اهوان بارکهدن انی ایستر اولسہ  
لابق اولورمی خدمت بزم ملوکہ هیچ  
ارباب توینلہ اوکیم پرور اولسہ  
آدم کیدری راه خطر ناکہ بیلدن  
اکا رفیق راهنا سرور اولسہ  
سالک بو بولده مظهر همت اولورمی هیچ  
درکاه شیخ کاملہ رو کستر اولسہ



ای دل اواره کز مه یوری شیخه پک یایش  
پیلدم بویولده فائده یوق یاور اولسه

### فصل ثانی

بوفصل لطائف روحله اسم جلالک وحبس نفس ایله کلمه توحیدک ذکر  
ومراقبهک کیفیتی بیاننده در \*

معلوم اوله که بو طریقت علیهک اهلایسی عندنده (لطایف روح انسانی)  
آلتی اولوب بشی عالم امردن وبری عالم خلقنددر \*

عالم امردن اولان لطائفک اعلی مرتبه سی (اخفی) اندنصکره (خفی)  
اندنصکره (سر) اندنصکره (روح) اندنصکره (قلب) در \*

عالم خلقدن اولان لطیفه (نفس ناطقه) در وعالم امردن اولان  
لطائف عالم خلقدن اولان لطیفه دن اشرف والطفدر وعالم امردن اولان  
لطایفک دخی اعلاسی اسفلندن اشرف والطفدر وبو عالم امردن اولان  
لطائف بربرلینه جوفنده ظرفله مظهر وفک ترتیبی کبدر \* لکن مظهر وف  
اولان ظرفنده خلاف اوزره اوسع واعظمدر \*

لطایف عالم امرک بدن انسانده برر محلی واردر. اخفانک تعلق صدرک  
وسطنده وخفینک تعلق صدرک صاغ جانبنده وسرک تعلق صدرک صول  
جانبنده وروحک تعلق صاغ ممکنک تحتنده در \* عالم خلقدن اولان نفس  
ناطقهک دخی تعلق فوق راسده اولان ام دماغدر \* فقط بولطائفک بومحله  
تعلقری حلول وبریان اوزره دکل \* بلکه تدبیر وتصرف اوزره در \*

لطائفک اعلا مرتبه سی اولان اخفانک حضرت حقّه \* وادنی  
مرتبه سی اولان نفس ناطقهک جسده اتصالی واردر \* نتکیم حق تعالی  
حضرتلری حدیث قدسیده «الا ان فی الجسد قلبا و فی القلب قواد و فی القواد  
سر و فی السر خفیاً و فی الخفی اخفی وانا فی الاخفی» پیوردیلر \* لکن حق

تعالیه اولان اتصال مخلوقاتله اولان اتصاله مقیس دکلدر \* نتکیم حضرت  
مولانا قدس سره پیوردیلر \*

### (مشوی)

اتصالی بی تکلیف بی قیاس \* هست رب الناس راباجان ناس

نثر — بولطائف ایله ذکر الله ایتمک بو طریقت علیهیه مخصوصدر \*  
زیرا بو طریقتک اهلایسی و مسک و مریلری سالکری مرتبه روحدن  
تسلیم و روحی اصالت اوزره تصفیه ایدوب نفس ناطقه بی ضمنا تزکیه  
ایدرلر \* سائر طرق جهریه اهلایسی ایسه نفس ناطقه بی اصالت اوزره تزکیه  
ایدوب روحی ضمنا تصفیه ایدرلر \* انکیچون طرق جهریه اهلایسی مراتب  
نفس اعتبار ایدرلر \* نتکیم طریق نقشبندیه اهلایسی روحده مراتب  
ابتدکری کبی که بو اعتبارلرک ایکسی دخی امر اعتباریدر \* همان بویکی  
ناطقهک مقصودی روحی کالات اصلیه سنه ایرشدیروب حق پیلدرمکدر \*

معلوم اوله که بو طریقت علیهیه ابتدا (قلبی) تصفیه ایدرلر \* صکره  
(روحی) و صکره (سری) و صکره (خفی) بی و صکره (اخفا) بی و صکره  
(نفس ناطقه) بی تزکیه ایدرلر \*

ایمدی اسم جلالی قلب ایله ذکرک کیفیتی بودر که \* ذکر مراد ایدن کیمسه  
ظهارت کامله ایله بر طاهر محله ایکی دیزی اوزرینه نمازده اوتورر کبی  
جلوس ایده \* صکره شقتینی بربرینه ضم ایده ولساننی دخی سقف خلقه الصاق  
ایده \* وکوزلرینی دخی غمض ایدوب اعضاسنی دخی حرکاتدن منع ایده \* جمیع  
قوی و حواسنی احکامنده تعطیل ایلده \* صکره شیخک روحانیه توجه  
ایدوب اندن استمداد ایده \* اندن صکره صول ممسنک تحتنده قلب صنو  
بریدن اولان قلب حقیقی به لفظه جلالی حروف نورانیه و قلم تصور ایله  
نقش ایده \* و اول لفظ شریفک معناسی اولان ذات اقدس حضرت واجب



الوجوده توجه ایدوب اول توجهه اوله مشغول اوله که کنندن ذهول  
 و ماسوادن نسیان ایدرک بو حال اوزره ذکره مشغول اوله، تنکم حق تعالی  
 بو کیفیت ایله ذکره اشارت ایدوب [واذکر ربک اذا نسیت] بیور مشلردر .  
 ذا کر ایسته بو کیفیت اوزره ذکره مداومت ایده، تا کیم ذکر قلبنده رسوخ  
 بولوب قلبه صفت اصلیه سنه رجوع استعدادی حاصل اوله و قلبک نوری  
 دخی عقیق رنکنده (احمر) صافی ظهور ایده، اولوقت ذا کر قلبی ذکر دن  
 منع ایدیم دیسه منع ایده من، اولحالک ظهورنده شیخک اذنیله ذا کر ذکرینی  
 روحه نقل ایده و روح ایله دخی صاغ ممهک نمکنده ذکره مشغول اوله،  
 تا کیم روحده دخی ذکر رسوخ بولوب روح دخی صفت اصلیه سنه  
 رجوع ایده، اندن دخی نور (اصفر) ظاهر اولوب روح تصفیه بوله  
 و اولحالک ظهورنده شیخک اذنیله ذا کر روحدن ذکره سره نقل ایده و سر  
 ایله صدرك صول جانبنده ذکره مشغول اوله، تا کیم سرده دخی ذکر رسوخ  
 بولوب ذا کر ذکرده فانی اولوب سر دخی صفت اصلیه سنه رجعت ایده  
 و سر دن دخی (نور ابض) ظاهر اوله و اول حالک ظهورنده ینه شیخک  
 اذنیله ذا کر ذکرینی خفی به نقل ایده و خفی ایله دخی صدرك صاغ جانبنده  
 ذکره مشغول اوله، تا کیم خفیده دخی ذکر رسوخ بولوب (نور اخضر)  
 خفیدن ظهور ایدوب خفی دخی صفوت ذاتیه سنه رجوع ایده، اندن دخی  
 شیخک اذنیله ذکره اخفایه نقل ایده، اخفی ایله دخی صدرك وسطنده ذکره  
 مشغول اوله، تا کیم اخفاده دخی ذکر رسوخ بولوب (نور اسود) برآق  
 اخفاده ظهور ایده؛ وگاه اولور که اخفاده (نور ابض) صافی ظهور ایدر  
 و اول (نور اسود) که اخفاده ظهور ایدر حقیقته نور وجود انسانیدر  
 طرف الهیدن منطمس اولشدر؛ اخفانک حقیقته نوری (نور ابض)  
 صافیدر و بو ایکی نوردن قنغیسی ظهور ایدر سه اخفی صفوت اصلیه سنه  
 رجوع ایشدر، اولوقت ذا کر ینه شیخک اذنیله ذکره نفس ناطقه به نقل ایده  
 و نفس ناطقه ایله دخی فوق رأسده اولان ام دماغده ذکر ایده، تا کیم  
 (سلطان ذکر) ظهور ایدوب آثار ذکر ذا کرک جمیع اجزاء بدننه ساری  
 اولوب ظلت طبیعت و کدورات عنصرت و کثافت جسمانیه بالکلیه محترق

و مضحک اوله، و اجزاء بدنن آثار ذکر اولر به ظهور ایده که ذا کر جمیع  
 اجزاء بدنن ذکره استماع ایده و قنغی اجزاسیله ذکر ایدیم دیسه ذکر  
 ایده، اندن صکره سائر اشیای خارجیه ده دخی استماع ایدر، اولوقت  
 انده نفس ناطقه نک (نور اذرق) ظاهر اولور و بو احوالک ظهورنده شیخ  
 اول ذا کره کلمه توحیدی حبس نفس طریقیله تلقین ایدر، تنکم سابقده کلمه  
 توحیدک کیفیت تلقینی ذکر اولمشیدی، اندن صکره اول ذا کر کلمه توحیدی  
 حبس نفس ایله ذکره مشغول اولور .

بو کلمه توحیدی تلقینک فائده سی بودر که ذا کر کلمه توحید ایله جذبه  
 قیومیت ذاتیه بی تحصیل ایدوب مراقبه مستعد اوله، زیرا اسم جلال ایله  
 انجیق جذبه معیت ذاتیه تحصیل اولور و کلمه توحید ایله جذبه قیومیت  
 و جذبه قیومیت ایله دخی مراقبه تحصیل اولور، مراقبه ایله دخی فنا تام  
 حاصل اولور. اول فنای تام ایله ذا کر واصل حق اولوب خطر سلو کردن  
 سلامته ایریشوب واصل الی الله اولور .

و دخی معلوم اولسونکه ذا کر اسم جلالی ذکر ایله لطائفه مشاهده  
 ایتدیکی انواری انوار آلهیه ظن ایدوب انلر ایله مقید اولوب قالمسون،  
 زیرا انلردخی انوار الهیه نک جابلردن اولوب انوار الهیه آنلرک  
 ماوراسنده اولدیغندن بونورلر ایله تقید، ذا کره حقل تجلیسندن محروم  
 ایدر .

### (نظم)

ذکر ایلیرک پرده ظلمتلی رفع ایت \* تا کم اوله انوار لطافت سکا پیدا  
 زنهار صقین انوار لطائفه لره باقه \* حقل اوله سنده تجلیسی هویدا

نثر — معلوم اوله که انوار لطائف هر ذا کره ظهور ایتک لازم  
 دکلدر، زیرا بعض ذا کر ابتدای امرده محو وجود بشریه ایدوب آنده  
 (نور اسود) ظهور ایدر، اندن غیری ظهور ایتز و اول نور اسوددن



عبور ایدرسه حق تعالینک نورینی مشاهده ایدر و بولطائف انواریه نک  
ظهوری و صفوت اصلیه لرینک حصولی بوشرط ایله درکه اگر ذاکر ذکرینی  
حضور اوزره ایضا و قلبی قیودات و علایقدن تجرید و فرائض و سنی  
کمال حضور اوزره ادا ایدر و جمیع وقتی ذکره صرف ایلرسه ظهور ایلر  
یوقسه اولور اولماز ذکر ایله بوخصائص ظهور ایتمز .

بز اسم جلالک لطائفه صورت انتقالی آتی الذکر نظمه ذکر ایتدک  
تا که ذاکرده کمال اطلاع حاصل اولوب اول لطایفه ذکرک انتقالانده  
ترتیبه رعایت ایده ، زیرا ذاکر لطائفه ذکرک ترتیبی اوزره خصایصنی  
اظهار ایدرک انتقال ایتمز ایسه ذاکر اول لطایفی کالیه تصفیه ایتمش اولماز  
ولطایف دخی کالیه تصفیه اولنمسه حبس نفس ایله کلمه توحیدی ذکرده  
مشقت و زحمت چکر و بلکه کلمه توحیدک نتیجه سی انده ظهور ایتمز .

### (نظم)

قلبیکه ذکر ایت ای همام \* اسم جلالی صبح شام  
ذکره حضور اوزره مدام \* ایله کمال اعتصام  
نقل ایله روحه ذکرینی \* روحکده ایله فکریکی  
دفع ایلدکده سریکی \* سر جانبینه قبل خرام  
سر کله ذکرینی متصل \* شوق ایله طورمه ایله کل  
ذکرکدن اوله منفصل \* تا بولنجه سر نظام  
سردن خفییه ذکرینی ویر \* ذکرکنده ایله مستقر  
اولسون ذکردن مستنیر \* بولسون اوده اعلا مقام  
ذکرینی خفیدن آل پکور \* اخفاده طورمه ذکرینی سور  
اخفاده کی اول کوزلونور \* ذکرکله ایتسون ارتسام  
نقل ایله ذکرینی نفسه تا \* ایتسون اوده ذکرک ادا  
رفع اولیحق اندن صدا \* ذکرک بولور انده ختام  
سلطان ذکر ایتسه ظهور \* اولسه وجودک غرق نور  
اجزاء جسمک بی قصور \* ذکرینی ایدرلر التزام

بو نعمتک بیل قدرینی \* ایله خدانک شکرینی  
اسم جلالک ذکرینی \* قیل سن لطایفه تمام

نثر — اگر لطایفه ذکر اولنان خصایص ظهور ایدوب و ذاکر  
دخی شیخدن غائب اولوب ذکرینی نقله بر وجهله اذن ممکن اولمسه باطنده  
شیخک روحانیتدن استیذان ایدوب ذکرینی لطایفه اولیه نقل ایده ، تا کیم  
نتیجه ذکرانده ظهور ایده ، زیرا بویولده واسطه هر حائده لازمدر .

کلمه توحیدک دخی کیفیت ذکرینی بودرکه ذکر مراد ایدن کیمسه اغیاردن  
خالی بر محل طاهرده طهارت کامله اوزره ایکی دیزلری اوزرینه قبلهیه متوجها  
جلوس ایدوب اسم جلالده ابتدایی کبی لسانی سقف خلقه الصاق ایدوب  
و شفتیننی بر برینه ضم ایله شیخه توجه ایدوب روحانیتدن استمداد ایده ،  
صکره جوفنه توجه ایدوب ( لا ) نک کر سینی فوق سرده قلم تصور ایله  
رسم ایدوب ساقلرینی رأسنده اولان آم دماغه مد ایده ( اله ) بی دخی آم  
دماغدن تصور ایله آلوب کتف یمینه تنزیل ایده ، و ( الا الله ) ی کتف  
یمیندن تصور ایله صوک جانبندن قلب صنوبری به تنزیل ایدوب نفس محبوب  
ایله قلب صنوبری به ضرب ایده و بو تصور انده اصلا بر عضوینی تحریک ایتیه  
و کلمه توحیدی بو کیفیت اوزره اولیه تصور ایده که اول تصور دن بر ( لا  
معکوس ) تصویری حاصل اوله و کلمه توحیدک معانیسندن دخی ( لامقصود  
الا الله ) معناسنی ملاحظه ایده ، زیرا اهل طریق کلمه توحیده اوج معنا  
ویردیلر ، مبتدی ایچون ( لامعبود الا الله ) و متوسط ایچون ( لامقصود  
الا الله ) و منتهی ایچون ( لاموجود الا الله ) در ، بو مقامه ( لامقصود الا  
الله ) معناسنی مناسب اولوب ذاکر بو معنایی ملاحظه ایتک کرکدر و بو  
ملاحظه ده ذاکر زیاده اهتمام ایده ، زیرا ذاکرده ملاحظه اولمسه ذکردن  
فائده اولمز ، بلکه ضرر حاصل اولور ، زیرا اکثری ذاکرلرک پریشان  
اولوب مقصوده واصل اولمدقلری ذکرینی غفلت اوزره ایتدکلرندندر ، هر بار  
ذاکرک جوفنده نفسی تضییق ایتدکده اوتاردن بر وتر اوزره وقف ایدوب  
« محمد رسول الله » ی دخی ملاحظه ایده و اندن صکره نفسینی اطلاق ایده



و اطلاق ایدرکن ( الهی انت مقصودی و رضاك مطلوبی ) جمله سنی  
ملاحظه اید و محمد رسول اللهی حق تعالی به وسیله اتخاذ ادب ند  
تحت متابعت ادخال قصد اید بوجهی ملاحظه كن فائده سی ایکی نفسك  
بینی حفظ ایدوب قلبی خواتردن تخلص ایتكدر ، اگر بوموال اوزره  
ذاكرك اوتارده وقفی یكری بره بالغ اولورسه نتیجه ذكر حاصل اولور  
و نتیجه ذكر نفی طرفنده نفی وجود بشریت حاصل اولوب واثبات طرفنده  
اثر جذبه قیومیت ظاهر اولمقدر ، نتم « اذا تم التوحید ظهرت الجذبه  
فنی ماسوی الله وبقی ماهومن الله سبحانه و تعالی » دنلش وکلام قدیمه [ ماعندكم  
ینفد وما عند الله باقی ] آیت کریمه سبله بوکا رمز و اشارت بیورلشدر .

اگر اوتارده وقف یكری بره بالغ اولوب نتیجه ذكر حاصل اولورسه  
ذاكرك آداب ذكرده تقصیر ننددر ؛ اول ذاكره لازمدرکه اول امره عودت  
ایدوب آداب ذكره رعایت اید یعنی ذكره باشیدن باشلايه .  
آداب ذكر بونلردر \*

ذاكر ذكرینی حضور اوزره ایدوب معناسنی ملاحظه ده اهتمام اید  
وجیع ماسوای دنیوی و اخروی وجیع علم و اعمالی نفی جانبنده ملاحظه اید  
ونفی بشریه به زیاده سعی اید وجیع خواتری دخی خیر وشر قلبندن سلب  
اید واثبات جانبنده احذیت حق ملاحظه ایدوب نفسنی اول ملاحظه ده  
افنا اید و ملاحظه علوم و مطالعه کنی ترك اید و بحث و مجادله ایتیه و مجلس  
هله و محل وعظه حاضر اولیه و توحیده ، عقله نظر ایتیه و توحیدینی دخی  
معقوله تعلیق ایتیه ، زیرا بونلر جناب حق توجیه جابدر و صلوة مفروضه یی  
وسنن و رواتبی اوقاتنده حضور تام و تعدیل ارکان اوزره ادا اید ،  
زیرا حدیث قدسیده « لم یقرب المتقربون الی بمثل ما افترضته علیهم »  
بیورلشدر . بوندن صکره خلقدن عزات ایدوب جیع اوقاتنی کلمه توحیدك  
ذكرینه صرف اید .

### ( نظم )

کیدر پرواز ایدوب تاجانب مولایه بی پروا  
جناحك بیرینی لا ایلله اول بیرینی آلا  
سوا قیدینه کیم دوشسه بویولده منزله ایرمز  
اگر قید سوای ایتسه قلبندن اول افنا

نثر — ذاكر ذكره مراعات ادب ایلله ذكرك نتیجه سنی تحصیل ایدرسه  
شیخ اولان کیمسه مراقبه یی تعلیم ایدر و اول دخی مراقبه به مشغول اولوب  
ذكری ترك ایدر ، لکن لسانله کل یوم اقل مرتبه بش یک کره کلمه توحیدی  
اخفا ایلله ذكر اید ، تا کیم قلبندن محسوسات حواس و ساطیله عارض  
اولان حجب تعلقاتی ذكر لسانیه ازاله ایدوب قلبنده کی سر وحدت ظاهر  
اولوب مراقبه سی دخی مشاهده به تحویل اوله ، زیرا مشاهده به مانع اولان  
حجب تعلقات و نقوش کائناتدرکه مرآت قلب انلر ایلله محجوب و مکدر اولوب  
اسرار وحدتی کورمز و بیتلز .

### ( نظم )

کوکل مجموعه سنده درج اولان معنای توحیدی  
لسان ذكر ایلله مشغول اولنلر ایلدی اظهار  
مکدر اولسه مرآت کوکل ترك تعلقدن  
اولور توحید ایلله صیقل بولورسه مظهر اسرار

نثر — بوندن صکره معلوم اولسونکه مراقبه ایکی نوعدر ، بر نوعی  
( مراقبه عوام ) و بر نوعی ( مراقبه خواص ) در ؛ مراقبه عوام بودرکه  
طالب حق اولان کیمسه حق تعالینك امر ایتدیکنی اشلیوب نهی ایتدیکنندن  
اجتناب اید و هر حالده حق تعالی انك جیع احواله اطلاعی ملاحظه  
ایدوب کندی ایلله اولان معیت قیومیتنه ایمان یقین اید و بوملاحظه دن اصلا  
خافل اولیه .



رسول الله (صلى الله عليه وسلم) افنديز بومراقبه يه اشارت ايدوب  
«افضل ايمان المرء ان يعلم ان الله معه حيث كان» بيورديلر ومراقبه نك  
ايگي نوعنه دخی «الاحسان ان تعبد الله تعالى كالك تراه وان لم تكن تراه  
فانه براك» خبر صحیحيله اشارت ایلدیلر .

### (نظم)

کوزه در خالقنی هرگز اونوتیز عاقل  
عربی ضایع ایدوب اولز او حقدن غافل  
نظر ایت چشم بصیرتله جناب حقه  
اوله بردمده نظارتدن اوسمتنه زاهل

نثر — مراقبه خواص دخی بودرکه سالک اولان کیمسه جذبه محبت  
ایله حق تعالینک سر احدیتی دوام اوزره کوررکبی جمیع اشیاده ملاحظه  
ایده واول ملاحظهده اشیادن اکا نسیان کله ، تکیم خواجه بهاء الدین  
(قدس سره) «المراقبة نسيان رؤية المخلوق بدوام النظر الى الخالق»  
بیوردیلر .

بومراقبه لرك اولكي نوعی (عين يقين) مرتبه سی وایکنجی نوعی  
(حق اليقين) ك اول مرتبه سی اولوب بومراقبه مشاهده موصولدر .

بومراقبه نك کیفیت اشتغالی بودرکه مراقبه قصد ایدن کیمسه اصوات  
خلایقندن خالی بر محل طاهرده طهارت کامله اوزره جلوس ایده وجمیع  
موجوداتی عرشدن فرشه دك معدوم فرض ایده وخطرینی دخی جمیع قیوداندن  
تجريد ایده ، صکره جذبه محبت ایله جمال اقدس احدیته قلبنده جمیع  
لطایف ایله توجه ایدوب اول جمال احدیتی استهلاک طریق اوزره ملاحظه  
ایدرك اول ملاحظهده مستقر اوله ، تاکیم آنده مستهلاک اوله .

«تفكر ساعة خير من عبادة الثقلين» حدیث جلیلی ذکر اولنان  
مراقبه يه اشارتدر .

بومراقبه يه سالک مداومت ایدرك مراقبه اکر آنده ملکه اولور ایسه  
اول سالک هر حالده وهرشیده جمال احدیتی مراقبه يه قادر اولور وبر حال  
انی مراقبه دن الها ایتمز وقرآنده دخی بوکا اشارت اولندی [رجال لاتلهیهم  
تجارة ولا یبع عن ذکر الله] .

بومراقبه يه مداومتك طریق بودرکه سالک خاطرینی جمیع خواطر  
وشواغلندن تجريد ایتدکدن صکره مراقبه يه مشغول اوله ، تاکیم  
خاطرینه خواطر هجوم ایدنجیه دك ، وچانکه خاطرینه خواطر هجوم وغلبله  
ایدر ، انلری بروجله دفع ایده ، یا ذکر لسانیه یا ذکر قلبیه یاخود وقوف  
قلی ایله ، هر نه وجهله اولور ایسه دفع ایدوب مراقبه يه مشغول اوله ،  
تاکیم یتنه خواطر غلبه ایدنجیه دك ، چانکیم خواطر غلبه ایدر یتنه بروجله  
انلری دفع ایدوب مراقبه يه مشغول اوله وبو حال اوزره مراقبه يه مداومت  
ایده ، تاکیم خواطر بالکلیه منتفی اولوب خاطری خواطر دن سلامت بولوب  
اندن صکره دوام اوزره مراقبه يه مشغول اولوب ردخی خواطر خاطرینه  
تزاحم ایتیه ، لکن کر کدرکه اول سالک دائم غفلتدن اعراض ایدوب حضور  
مع الله التزام ایده ومراقبه دن منفک اولیوب جانب حق اشتیاق وعشق ایله  
ملاحظه ایده واهل غفلتدن عزت ایده وصمت وسکوت ملازمت ومقتضیات  
بشریه دن اعراض ایده واستغفاری لسانندن اکسک ایتیه وهر اشیاده  
حق تعالینک انوارنه ناظر واسرارنه مراقب اوله وهر عملده تجلیسنه راغب  
اوله ، زیرا [هو الظاهر والباطن وهو بكل شیء محیط] در ، پس ایدمی  
سالک دائم حق تعالی یه هر حالده عشق ومحبت وانس ایدوب مراقبه سنه  
دوام ایتک لازمدر .

### (نظم)

کرك سالکله دائم حق ایله انس ایده جانده  
کوررکبی مراقب اولق استرحق هر آنده



اگر سالکده اولمزه بورتبه حقه قریب  
اوله دائم انک حق جانبه میلی وجدانده

### فصل ثالث

بوفصل وقوف قلبینک وحفظ نسبتک ورابطه محبتک وصحبت شیخک  
بیاننده در \*

معلوم اولسونکه بو طریقت علیهک الی رکنی اولوب اول رکن  
بونلردر؛ ذکر ۱، مراقبه ۲، وقوف قلبی ۳، حفظ نسبت ۴، رابطه  
محبت ۵، صحبت شیخ ۶.

بورکنلردن بری نقصان اولور ایسه سالک بو طریقت علیهک سربینه  
کالیله واقف اوله من، پس ایلمدی اول رکنلری بیان ایتک بورسالده.  
لازم اولدی.

ذکر ایله مراقبهک بیانی مرور ایتشدی، اما وقوف قلبینک بیانی  
بودرکه وقوف قلبی جمیع تعلقات و قیوداتدن وجیع معقولات و معلوماتدن  
وجیع خواطر و هواجسدن وجیع افکار و اوهامدن تجرد و تخلی ایدوب  
توجه تام ایله قلبه توجه ایده، صکره عین بصیرتله حقیقت قلبه نظر ایدوب  
طوره واسرار حقلک ظهورینه قلبنده منتظر اوله، شکم رسول الله (صلی الله  
تعالی علیه وسلم) [قلب المؤمن کمرأة اذا نظر فیها نجلی ربه] بیورمشلردر.

### (نظم)

قلبدر آینه اسرار آله \* کورر اسراری ایدن قلبه ننگه

نثر - بوندن صکره معلوم اولسونکه الله تعالی هرکشینک حقیقت  
قلبیه درج ایتشدر، صکره اول حقیقتی صفات نفسانیه ایله ستر ایلدی  
اگر برکیمه صفات نفسانیه سنی قلبندن تجرید ایدوب قلبیه توجه ایتسه

حقیقتنی بیلدکدن صکره «ریسنی» بیلور، زیرا حدیث شریفده «من عرف  
نفسه فقد عرف ربه» بیورمشدرکه بو حدیث شریفده نفسدن مراد حقیقت  
انساندرکه حق تعالی آنی قلبیه درج ایتدی؛ اگر برکیمه قلبیه توجهده  
مداومت ایتسه حقیقتنی کشف ایدر و حقیقتنی کشف ایتدکده حق تعالینک  
اسراری اکا منجلی اولور، زیرا حقیقت انسانی حق تعالی مظهر ذات  
واسمائی ایتشدر.

### (نظم)

کاشف کرم مظاهر اسمائی بیلسکه \* عارف کرم حقایق اشیائی بیلسکه  
اولنکیمه کیم حقیقت نفسینی بیلیه \* همکنیدر اوکیمه به مولایی بیلسکه

نثر - ودخی معلوم اولسونکه قلب مؤمن خزان ملکوتدن  
بو خزینه در، حق تعالی اول خزینه به لطایف رغبتی وزواخر رهبتی وانوار  
وحدتی واسرار ربوبیتی وضع ایتدی و صکره انلره دخی خواطر و نفس  
ووساوس شیطانی مجاب ایتدی، اگر برکیمه قلبی خواطر ووساوسدن  
تجرید و تطهیر ایدوب عین بصیرتله حقیقت قلبیه نظر ایدرسه، خزینه قلبنده  
اولان لطائف رغبت، زواخر رهبت، انوار وحدت، اسرار ربوبیت  
اکا منکشف و منجلی اولوب انواع کرامتله ایله الله تعالی انی مکرم و محترم  
ایدر.

### (نظم)

روح انسانی خدا ایلدی کندی حریمی  
قودی انده نقدر وار ایسه سیر قدیمی  
قلبی درگاه معلاسی ایدوب اول حریمک  
کوزلیان کیمسه اودرگاههی کورر چوق کرمی  
جمله عارفله ایلر ن ایشدی حقه  
اوله درگاه او کیم عالمه صیغز عظمی



اولیجی شیخه میان بسته خدمت ' سالک  
انی همتله ایدر شیخی طریقتده کبیر  
حفظ نسبتله ایرر اهل ارادت وصله  
اولور انواع کراماته طریقتده جدیر  
امر شیخی کوزدوب حکمته تسلیم اولانک  
نفس شیخ ایله البده اولور صعبی یسیر  
شیخه صدق ایله ربط ایتسه درون سالک  
اکا هر برده اعانته اولور شیخی مجیر  
شیخه که صدقه وار سنده اطاعت ایت  
انقیادنده انک نفسکی قیل عبد اسیر

نثر - طرق علیه ده (رابطه محبت) دیدکری مریدک شیخه اولان  
محببتدن عبارتدر ' اگر مریده بورابطه اولسه مرید شیخندن استفاضه  
ایده من ' زیرا استفاضه سبب رابطه محبتدر ' انکیچون رابطه جمیع طرق  
علیه ده رکن اولدی .

طریقت نقشبندیه ده رابطه محبتی درت طریق اوزره ملاحظه ایدرلر '   
اولکی طریق بودر که مرید شیخک صورتنی قلبنده محبت طریقیله تصور  
ایده واول تصورده کندینی افنا ایده ' عاشق معشوقک صورتنی تصور  
ایدوب کندینی معشوقک تصورنده افنا ایتدیکی کی ' بورابطه سببیه شیخک  
روحانیتی مریدک باطننده حاضر اولوب مریدک باطنی اول روحانیتک انواریه  
منور اولوب شیخک بعض کالاتی مریده انصباغ طریقیله حاصل اولور .

بورابطه مرید مداومت ایتسه تدریج ایله مرید دخی شیخ کی کامل  
اولور ' زیرا رابطه محبت محبی محبوبک صفاتنه ادخال ایدر ' تنکم  
[ المحبة دخول صفات المحبوب علی البدل من صفات المحب ] دنمشدر .

ایکنجی طریق بودر که مرید شیخک روحانیتنه محبت طریق اوزره توجه  
ایدر واول توجهده بر رتبه مستغرق اولور که بشریتندن ذهول ایدر واولخالده

شیخک روحانیتی مریدک باطننده تصرف ایدوب مریدک اوصاف بشریه سنی ازاله  
ایدر و تدریج ایله مرید شیخک اوصاف روحانیه سببیه موصوف اولور و بو  
رابطه به محبت ایدوب شیخدن بدل اوله رق کاله ایریشور .

اوچنجی طریق بودر که مرید شیخک روحانیتی دائرة نورانیه شکلنده  
ملاحظه ایدوب کندینی اول دائرتهک وسطنده ملاحظه ایده واول  
ملاحظه ده استغراق ایده که کندیدن بالکیه غائب اوله واول غیبتده شیخک  
روحانیتک نورانیتی انعکاس طریقیله مریدک قلبنه انطباع وانتقاش ایدر  
واول نورانیتدن مریدک قلبنه دخی بر نورانیت فرعیه حاصل اولور و تدریج  
ایله اول نورانیت مریده دخی اصلیه اولور ' مرید دخی شیخندن بدل کامل  
وواصل اولور .

دردنجی طریق بودر که مرید شیخک صورتک روحانیتیله بیله مواجهه سنده  
ملاحظه ایدر و شیخک حضورنده ایتدیکی تأدب کی اول صورت فرضیه تک  
دخی حضورنده تأدب ایدر واول صورته توجه ایدوب اول توجهده مستمر  
اولور ' تنکم اول صورت مفروضه دن اکا بر فیض نورانیت فیضان ایدر  
و بورابطه ایله مرید شیخک حضورنده تحصیل ایتدیکی افاده بی تحصیل ایدر '   
لکن مریده بواعتقاد لازمدر که شیخک صورتندن روحانیتی آیرلر وهرقنده  
تصور اولور ایه روحانیتی صورتیه بیله امداد واعانت ایده و شیخده  
دخی تصرف روحانیت لازمدر که غیبتنده مریدینی تربیه و تصرفه قادر اوله  
اگر مرید شیخک حضورنده رابطه ایدر سه نفسی شیخدن فانی ایده و مرید  
شیخک حضورنده بویله رابطه ایتسه ' شیخ اول مریدی بر لحظه ده مقام  
مشاهده به ایصال ایده یلور .

معلو اولسونکه بورابطه لک مریده فائده ویرملری محبتیه مقارن اولور  
ایسه در ' اگر محبتیه مقارن اولر ایه فائده ویرمن ' بلکه ضرر ویرر  
و محبت دخی موهبه حقدر ' اکتسابی دکلدر ' بلکه محبتیه تکلف زدنقیب  
اولوب بعه ایراث ایدر .



## ( نظم )

ایت رابطه شیخه مدام \* جنبه ایله اعتصام  
اولطاعتده صبح وشام \* احسانه اول مستحق  
شیخه همان قیل اقتدا \* عهدین طوتوب ایله وفا  
بول حق یولنده ارتقا \* اول واصل درگاه حق  
شخی تصور ایله طور \* قلبکدن انی آیمه دور  
دائم انکله قیل حضور \* سرندن آل شیخک سبق  
جنبه شیخک فانی اول \* عشقنده سرگردانی اول  
علم لدنک کانی اول \* درسن اوقی اندن ورق

نثر — ارکان سلوکدن اولان صحبت مشایخ جمیع طرقدده الزم لوازم  
واعزم عزایمدر ، ریزا مشایخک اکثریا مریدلرینه افاده وافاضه لری صحبت  
ایله اولمشددر ، رسول الله ( صلی الله تعالی علیه وسلم ) حضرتلری دخی  
اصحاب کرام حضرتانه قتی چوق طریق ایله افاده وافاضه بیوردیلر اما صحبت  
ایله افاده وافاضه لری انلره زیاده اولدیغندن ( اصحاب ) ایله تسمیه  
اولنوب ( صحابی ) ایله صحبتیه نسبت اولندی ، صحبت ایله افاضه وافاده سنت  
رسول الله اولدیغیچون مشایخ نقشبندیه حضرتانی دخی صحبت اختیار ایدوب  
( طریقنا طریق الحبه والخیر فی الجمعیة ) دیدیلر و بیوردیلر که سالکله  
طریقنده صحبت سنت مؤکده در بلکه فرضدر ، فرضدن بعض کره الزم  
اولور ، زیرا فرض قضا اولنور اما صحبت قضا اولنمز ، انکیچونکه عارفلر صحبتلری  
الله تعالیکنک تجلیاتندن اقتضا و قتیله نشأت ایدر و وقت ایسه مرور ایدر  
طورماز و تجلیات دخی تکرر ایتمز ، انکیچون فوت اولان صحبت تدارک اولنمز .

طریق تقرب الهیده سالکک بعض مقامدن عبورلری و بعض مقامه  
وصوللری فرائض وسنن و نوافله اشتغال ایله ممکن اولمزده انجق صحبت  
ایله ممکن اولور ، اولوقت صحبت عبادتدن الزم اولور ، اولوقت صحبتیه مسارعیت  
ایتمک سالکله فرض اولور ، تکیم رسول الله ( صلی الله تعالی علیه وسلم ) صحابیدن

برینی صحبت ایتمک ایچون آدم کوندروب چاغردیلر و اول کسه ( صلاتی ادا ایدر  
کلیم ) دبوب صلاته مشغول اولدی و صلاتی ادادن صکره حضور رسول  
الله کتدی و رسول الله اکا بیوردیلر که ( نیچون اجابتی تأخیر ایتمک ) انلردخی  
دیدیلر که ( صلاتی ادا ایچون تأخیر ایتم ) و رسول الله ( صلی الله تعالی علیه  
وسلم ) اکا عتاب ایدوب ( بنم دعوتیه اجابت ایدوب صحبتیه کلک سکا صلاته  
اشتغالدن الزم ایدی ) بیوردیلر ! بعض کره اولور که عارفلر سالککری  
بر صحبت ایله حقه ایصال ایدرلر ، انکیچون عارفلر سالککرینه ( اصبحوا  
مع الله فان لم تطیقوا فاصبحوا مع من یحب مع الله لتو صلکم صحبتیه الی  
حبیه الله عزو جل ) دیه امر ایدرلر .

دخی عرفاء صادق ، مشایخ فاضله ، قوه نطقیه مالک ، انفاس  
قدسیهیه صاحب اولان ذوات کرام که احیاً اموات ایتمکله قادرلردر ، صحبتلریله  
سالککک قلبلرنده اولان حجب مانع لری محو و ازاله ایدوب سالککله حقی  
مشاهده ایتدرلر و سالککک انلردن خبری اولمز ، انلر جواسیس قلوب  
و نوامیس نفوسلردر ، سالککری نه درلو طریقله حقه ایصال مراد ایدرلر سه  
انکله ایصاله قادر اولورلر ، اگر دنیلور سه که نه حکمتدر عارفلر صحبتلرنده  
بو حالتلر اولوب سائر علماء ظاهریه نک و وعظ حکایه کولرک صحبتلرنده بو حالتلر  
اولمز ، بلکه انلرک صحبتلری غفلته باعث و تفرقهیه بادیدر ؛ اکا جواب  
بودر که انلردن صادر اولان صحبتلر عالم فرقدن ظهور ایدر ، انکیچون  
انلرک صحبتلری تفرقه و غفلت ایراث ایدر ، هر یقان دخی انلرک صحبتلری  
وعظ و نصیخته دائر ایسه ده ، اما عارف باللهلرک صحبتلری عالم جمعدن و مقام  
قدرتدن و حضرت قریتدن نشأت ایدر ، انکیچون صحبت عارفان قرب  
و شهود و فوز و فور ایراث ایدر ، هر نقدر انلرک صحبتلری ظاهرده و وعظ  
و نصیخته دائر اولمز ایسه ده ، پس امدی عارفلرک صحبتلری سائر ناسک  
کلاملریله قیاس اولنمز .

## ( نظم )

دم عیسی کبی صحبتله در عارفلرک فیضی  
حیات جاودانی بخش ایدر انلر کلامندن



عجمی فیض ایدر سه سالکه صحبتله عارفله  
اولارک صحبتی نشأت ایدر قدرت مقامندن

نثر — ودخی معلوم اولسونکه عارفله صحبتله فیض ابراث ایتدیکی  
کبی نظرلری دخی فیض ابراث ایدر ، زیرا عارفله نظرلری حق تعالینک  
نظرندن تفرع ایتشدیر ، بلکه عین نظر حقدیر ، تکیم حدیث قدسیده  
[ وبی بصر وبی ينطق ] الی اخر الحدیث بیورمشدر ، بلکه حق تعالی سائر  
مخلوقک جمله سنه انسان ایله معانظر ایدوب رحمت وحایت ایدر .

نقل اولنورکه برکون نجم الدین کبری حضرتلرینه بر حال ال ویردی ،  
واولحال ایله برکله نظر ایتدی ایدی ، اول کلپده اول عزیزک نظرلی  
برکاتنده چوق حالات سنیه وچوق صفات علیه ظهور ایتدیکه اولوقتک  
انسانی انده متحیر اولدیلر .

دخی نقل اولنورکه سید احمد بدوی حضرتلرینک ولایتلرندن و قدرت  
روحانیتلرندن ایدیکه اگر برسالک انلره استفاضه نیتیه کلسه همان اولسالکی  
برنظر علیه ایله مقام ولایتیه ایصال ایدوب خلافت ویرلر ایدی و بواول  
نظردرکه خواجه حافظ شیرازی آنی بویتله تنی ایتدیلر .

### ( بیت )

آنان که خاک را بنظر کیمیا کنند \* آیا بود که کوشه چشمی بما کنند

### ( نظم )

یارب اولورمی برنظر اولیا بکا \* بن خاکیده ایده نظرلی عین کیمیا  
یوق فیض حقه قابلیته بنده اقتدار \* تا ایر منجه همت مردان کبریا  
اکسیر خاصه برنظره مظهر اولمدن \* ممکن دکل جنبانه اللهک ارتقا

نثر — ودخی عارفله نظرلری فیض ابراث ایتدیکی کبی عارفله

وجوهنه دخی نظر فیض ابراث ایدر ، زیرا حق تعالی حضرتلری عارفله  
حجاب بشریه بی رفع ایدوب اسرار ذات وصفاتی انلرک وجوهنده بیان  
واظهار ایتشدیرکه عارفله یوزندن سائر ناسی هدایت ایده ، زیرا حق تعالی  
عارفله واسطه سیله عوام ناسی هدایت ایدر و عوام ناس دخی عارفله  
واسطه سیله ناسی هدایت ایدر ، حق بیلورلر و عارفله واسطه سیله حق  
مشاهده ایدرلر و بو طریق ایله درکه انبیا و اولیا حضراتی ناسی هدایت و ایرشاد  
ایدرلر ، ایدی انبیا و اولیانک یوزینی کورمک حق کورمک کبی اولدیغنه [ ان  
لله عباد اذا رؤوا اذکر والله ] حدیث شریفنده اشارت بیورلمشدر .

نقل اولندیکه ابوتراب نخشی ( قدس سره ) یه برسالک حکایه دیدیکه ( بنده یه  
الله تعالی کل یوم یتش کره تجلی ایدر ) و ابوتراب دخی بیوردیکه ( اول یتش  
کره تجلیدن ابویزید بسطای بی بر کره کورمک سکایکدر ) و سالک دخی دیدیکه  
( سن بکا ابویزیدی کوستره بیلورمیسین ) ابوتراب دخی ( کوستریرم ) دیوب  
اولسالکی آلوب ابویزید یولنده او طور دیلر و ابویزیده منتظر اولدیلر ، ابو  
یزید کلوب پکرکن ابوتراب سالکه دیدیکه ( ابویزید بوکلن کیمسه در ) چن  
سالک ابویزیدک یوزینه نظر ایلدکده نعره اوروب یه دوشوب وفات ایلدی  
و ابوتراب دخی ابویزیده قصه بی نقل ایلدی و دیدیکه نه سردرکه اول کیمسه  
دیمش ایدیکه « الله تعالی کل یوم بنده یه یتش کره تجلی ایلر » سنک وجهکه  
برنظره تحمل ایده مدی « ابویزید دخی دیدیکه ( انده اولان تجلی تجلی اسماء  
ایدی و بنده کی تجلی تجلی ذاتر و تجلی اسماءک مظهری تجلی ذاتی به تحمل  
ایده من و اول سالک مظهر تجلی اسماء اولمق سبیلله تجلی ذاتی بنم یوزمده  
مشاهده ایتدکده اکا دخی مظهر اولمق دیله دی ، لکن وعاء استعدادی تنک  
اولمغله عدم تحملدن هلاک اولدی ، زیرا سبجات تجلیاته تحمل اوعیه  
استعدادینک وسعته موقوف ) در .

### ( نظم )

اولور سالکله ظاهر خدانک نور اسمایی  
جمال پاکنک زیرا ولیردر مرایایی



وجوه اولیایه دقت اوزره قیل نظر تا کیم  
سکا ظاهر اوله انلر یوزندن حق تجلاسی

نثر — ایدی طریقتده صحبت اعظم ارکان وصولدر، اگر صحبتک  
آدابنه رعایت اولنور ایسه، اگر آدابنه رعایت اولنمز ایسه صحبتک فائده سی  
اولمز، بلکه ضرری اولور.

ایدی صحبتک آدابنی بیلک لازم اولدی، آداب صحبت ایسه بونلردر.

مرید شیخک صحبتنه واصل اولمزدن اول غسل ایده، میسراوله ماز ایسه  
تجدید وضوء ایده، ایکی رکعت نماز قیله و فقرایه دخی برشی، تصدق ایده  
و کناهلرندن و اخلاق ذمیمه دن توبه ایده و قلبنی خواطردن و تعلقاتدن تخلیه  
ایده، صکره شیخک حضورینه دخوله استیذان ایده، اگر اذن اولور ایسه  
نیت خالصه ایله تعظیم اوزره شیخک حضورینه داخل اوله و تأدب ایدرک  
کیده، شیخک یدینی تقبیل ایده، صکره رجعت قهقری ایله رجوع ایدوب  
صف نعالده واقف اوله و اگر شیخ جلوس ایله امر ایدرسه امر ایتدیکی  
محله جلوس و تواضع اوزره یدینی صدرینه القا ایده، شیخدن اذن اولدجه  
کلام سویلیه و شیخک یوزینه سببیز نظر ایتیه و محو وجود ایدوب سکوت  
اوزره اوتوره، خاطرینی اوهام و خیالاتدن حفظ ایده و شیخک صحبتنی کوش  
جان ایله استماع ایده و کلامنی حسن قبول ایله قبول ایده، شیخدن اگر  
ظاهر شرعه مخالف کلام صادر اولور ایسه او کلامی توجیهده قصوری  
فهمنه اسناد ایدوب (شیخمک کلامی شرعه موافقدر لکن بن فهم ایده مدم)  
دیه؛ شیخک اصلا بروجله اقاوال و افعال و احوالنه اعتراض ایتیبوب  
جمله سنی حق اعتقاد ایدوب تحسین ایده و اگر شیخک صحبتندن کندویه  
شبهه عارض اولور ایسه صبر ایدوب اولوقت شیخه سؤال ایتیه و صکره  
اول شبهه اکا کشف اولمز ایسه مناسب بروقتده آنی شیخه سؤال ایده  
و شیخک جمله کلامی انطاق حق دیو اعتقاد ایده و کلمات صحبتی حفظ  
صکره خلوتنده ملاحظه ایدرک مقتضاسیجه عمل ایده و صحبتک

تمامندن صکره مجلسده چوق طور میوب کتمکه شیخدن اذن طلب ایده، اگر  
شیخ اذن ویرر ایسه قالقوب تذلل و تضرع ایله شیخک الی و دیزی تقبیل  
ایدوب قهقری رجعت ایلیه و صکره طوغری خلوتنه کیده ایکی رکعت  
خلوتنده صلاة شکر قیلهرق شیخه دعا ایلیه.

### (نظم)

ادبدر باعث وصلت خدایه \* ادبدر زاد اولان راه هدایه  
ادبله مجلس شیخه کیرنلر \* بولورلر انده فیض بی نهیایه  
ادبله دکلین شیخک کلامن \* طریقتده بولورلر اول یوجه پایه  
طریقتدن غرض انجق ادبدر \* ادب اولدی حقیقت ایچره مایه  
ادبله شیخه خدمت ایدنلر \* ایرشدی فوق عرشه صالیدی سایه

### فصل رابع

بوفصل سالکله حال سلو کلرنده حاصل اولان احوال و مقاماتی  
و خواجکان حضراتک کلمات قدسیه لرینی بیاننده در.

معلوم اولسونمکه سالک مبتدیلرک سلو کلری اثناسنده اوچ درلوچا بلری  
واردر، اولکی جابلری شهوات حادثه درکه اولشهوات سالکری مشتهیانه  
جذب ایدر، حقدن محجوب ایدر، ایکنجی جابلری عادات مألوفه درکه  
انلر سالکری حقدن رد ایدوب معتاد اولان اموره تعلیق و تقيید ایدر،  
اوچنجی جابلری اسباب موثوقه درکه سالک بوجا بلرک اوزرنده توقف  
واقامت ایدوب مسبب اولان حق تعالی حضرتندن محجوب اولورلر و نفس  
و شیطان دخی بوجا بلرک و راسنده سالکله بیک درلو مکر و حيله ایدرلر.

ایدی سالکله واجبدرکه بوجا بلری ذکر و توحید و اجتهاد شدید ایله  
ازاله ایدوب حقدن محجوب اوایه.



## ( نظم )

دوشمه صقین هوایه اویوب قید شهوته  
شهوت بو بولده سالککه بیک بر جابدر  
عادته میل ایدوب صقین اول ایتمه اعتبار  
عادته میل ایدنلره وصلت صعبادر  
اسبابی پرده ایله چشم بصیرته  
اسباب مسببک یوزینه هب نقادر

نثر — ودخی سالک متوسطلرک اثناء سلوکلرنده ایکی درلو جابلری  
واردر، اولکی جابلری ظلمانیلردرکه انلره اخلاق ذمیه نفسانییه درکه  
( کبر، عجب، حسد، حقد ) کی و بو جابلری سالک کندی نفسندن ریاضت  
وتوحید ایله ازاله ایتدیکه صفات حیده روحانیه لریله متصف اولمز، نفسی  
دخی تزکیه بولماز .

ایکنجی جابلری و ( تواضع، مرآت، عفت، سخاوت ) کی جیب  
نورانیه روحانیه در، سالکله دخی لازمدرکه بوجیب نورانیه یی ذکر  
وتوحید ایله ازاله ایدوب انوار صفات ربانیه ایله انصباغ واتصاف وتحقق  
ایده واکر سالک بوجیب ظلمانیه ونورانیه یی دفع ایدوب انوار صفات  
ربانیه ایله انصباغ واتصاف وتحقق ایدر ایسه ( ولایت صغری ) رتبه سنه  
ایریشوب ( مقام مکاشفه ) یه دخول ایدر، لکن جباب وجود امکانی باقیدر .

## ( نظم )

رفع ایت جباب ظلمتی نفس عنوددن  
روحک صفاتی ظاهر اوله سنده چون شفق  
روحک جبابی دخی رفع ایله سعی ایدوب  
ایتسون او حالده ساکا بجلی صفات حق

صکره صفات حق ایله تحقیق  
تاکیم حدیث قدسی اوله سنده ماصدق

نثر — یقن سالک مقام مکاشفه یه داخل اولور، اکا ( توحید افعال )  
اول مقامده حاصل اولور و جمیع افعال عبادی دخی حق تعالیدن ییلور و بو آیت  
کریمه نکه سری اکا کشف اولور « واللہ خلقکم و ما تعلمون » اول مقامده دخی  
زیاده مجاهده ایدوب محو صفات روحانیت نورانیه ایدر ایسه اکا توحید  
صفات ربانیه حاصل اولور، اول مقامده جمیع صفات خلابی ورب تعالینک  
صفاتی کورر و بو حدیث شریفک معناسی انده ظهور ایدر و سری دخی اکا  
کشف اولور [ فاذا احببته کنت سمعه الذی یسمع به و یبصره الذی یبصر به  
ولسانه الذی ینطق به و یده الذی یبطش بها و رجله الذی یمشی بها ] بو مقامده  
دخی مجاهده ایدوب نفی وجود امکانی ایدر ایسه اکا توحید وجود واجب  
الوجود حاصل اولور و بو توحید ذات واجب الوجود ایله توحیدات  
ثالثه که ( توحید افعال، توحید صفات، توحید ذات ) جمله سی تمام اولور  
و سالک دخی حقیقتده موحد اولور و ( ولایت کبری ) مقامنه داخل اولور .

ظن اولنسونکه بو توحید ثلاثه آسانلق ایله حاصل اولور، بونلری  
تحصیلده کر کدرکه سالک دخی روحنی مراقبه دائمه ایله تصفیه و نفسنی مجاهده  
کثیره ایله تزکیه ایده، جسمنی دخی ریاضت شاقه ایله اذابه ایدوب فنا  
ایدر فناده اثار بشریتدن انده برائر قالمیه، اندنصکره دخی عنایت حقه  
مظهر اولق کر کدرکه اول سعادت نائل اولوب اول دولته واصل اوله  
یوخسه نه ممکندرکه برکیمسه سروحدت دیدکلرینی تشکر غفل و تخیل  
فکر ایله و مطالعه کتب صوفیه ایله فهم ایدوب مشاهده ایده .

## ( نظم )

خفیدر سر وحدت فکرت عقل ایله فهم اولمز  
شکار ایتک نه ممکن عنکبوتک مرغ عنقابی



صاقین وحدت مقامی و همایه ادراك اولور صاعه  
نه ممکن ایلله ذره احاطه عرش اعلائی

نثر — ودخی معلوم اوله که سالکه اثناء سلوکنده ایکی غیبت حاصل  
اولور ، اولکی غیبت ( غیبت صغری ) و ( فنای مفید ) دخی دیرلر  
و بوغیبتک معناسی بودر که سالک غلبه وجد ایلله صفات حواسندن زائل  
اولوب جله حواسی معطل اولور ، بوغیبتدن سالکه بعض وقت افاقت  
کلوب نفسنه ینه رجعت ایدر .

ایکنجی غیبت ( غیبت کبری ) و ( فنای مطلق ) دخی دیرلر ، بوغیبتک  
دخی معناسی سالک احکام حواس جلیتدن بالکلیه پاک اولوب بردخی  
احکام حواس جلیت طبیعت رجعت ایتمز ، بو مقامده سرحدیته واقف  
اولور ، وجود وحدتی مشاهده ایدر ، اولوقت سالکه لازمدر که مبصرانه  
تعلیق نظر ایتیموب عین بصیرتله انوار وحدتی جمیع اشیاده مشاهده یه سعی  
ایده و اگر سالکه حجاب کونیه غلبه ایدوب سر وحدتی ملاحظه اکا  
متعسر اولورسه اول سالکه لازمدر که حق تعالینک نظرینک جمیع مخلوقات  
من غیر جهت تعلقی ملاحظه ایدر ، زیرا حق تعالی جهته ملاحظه اولمندی  
کی نظری دخی جهته ملاحظه اولمیز ، اگر سالک حق تعالینک نظرینک جمیع  
مخلوقات تعلقی بویله ملاحظه ایدوب انک اوزرینه اهتمام ایدرسه اول  
سالکک نظری بصیرتدن وجود جمیع مخلوقات محو اولوب سر وحدت  
وجود اکا ظاهر اولور و اول سالک دخی بو ملاحظه اوزرینه مداومت  
ایدرسه سر وحدتی جمیع مخلوقات مشاهده سنده رسوخ بولوب بردخی اول  
مشاهده دن ذاهل و غافل اولمز و برزخ تلویندن خلاص اولوب مقام تمکینه  
ترقی ایدر و حقیقتده موحد و موصل حق اولور .

### ( نظم )

حواسین حکمی کل ایلله تعطیل \* بصیرتله اوله سن حقه واصل

نقوش کائناتی محو ایدرسک \* اولور نقاش نقشک سکا ظاهر  
وجود خلقی سلب ایتسک نظر دن \* اولورسک وحدتک سرینه باصر

نثر — معلوم اولسونکه طریق وصلت حق تعالیده او چ تجرید  
لازمدر .

اولکی تجرید بودر که دنیایی و دنیایه متعلق جمیع عملاری ترک ایتکدر ،  
بو تجرید ایلله سالک جمیع اشغال ماسوادن فارغ و آزاده اولوب جمیع هنک  
طلب حقه قصر و جمیع وقتی عباداته صرف ایدر ، بو تجرید سالکه لازمدر ،  
زیرا بو تجرید اولمدیقه سالک حق طلبده صادق اولمز .

ایکنجی تجرید دخی بودر که سالک جمیع صفات جلیت طبیعت دن پاک  
اولمقدر ، بو تجرید دخی سالکه لازمدر ، زیرا صفات جلییه نجاست  
معنویه لر در ، انلر ایلله طریق مقدس کعبه معنویه سلوک اولمز و بو طریق  
سلوک انجیق تجرد معنوی و طهارت معنویه ایلله اولور و صفات جلییه  
نفسدن ازاله ایلله تجرید معنوی و طهارت معنویه اولور ، کعبه صوریه ده  
تجرد صوری و طهارت صوری لازم اولدینی کی .

اوچنجی تجرید دخی صفات جزئیة مخلوقیه دن تصفیه ایتکدر و بو تجرید  
دخی سالکه لازمدر ، تا کیم حرم حضرت احدیته انکیچون دخول میسر  
اوله ، زیرا صفات مخلوقیت انینیت اقتضا ایدر و انینیت اقتضا ایدن  
ذات و صفات حضرت احدیته توسع ایتمز .

### ( نظم )

صفاتکدن تجرد قبل طهارتدن طوتون احرام  
تجرده طهارتسنز بو یولده هیچ رواج اولمز  
که کور تجرید تو بین ایتیموب باغلانمندن احرام  
حریم کعبه یه بر کیمسه یه کبرمک مباح اولمز



نثر — ودخی معلوم اولسونکه سلوک ائناسنده سالک او یح فنا  
حاصل ولور .

اولکی فنا فنا افعالدر ، بو فناک صاحبنه حق تعالی فعالیت صفاتیله  
تجلی ایدر و اول تجلی سببیله اول سالک جمیع افعال عبادی حق تعالیدن  
مشاهده ایدوب و اول افعالی جمله حق تعالی به اسناد ایدر و اول وحدانیت  
فاعلیت حق تعالی بی جمیع افعالده مشاهده سببیله « لافاعل الا الله » دیوب  
کلمه توحیدده حق تعالینک فاعلیتی اثبات ایدر .

ایکنجی فنا فنا صفاتدر ، بوفناک صاحبنه حق تعالی قیومیت صفاتیله  
تجلی ایلر و اول تجلی سببیله اول سالک حق تعالینک قیومیتی جمیع اشیاده  
مشاهده ایدر و حق تعالینک سائر صفاتی دخی صفات خلأقده مشاهده  
ایدوب مثلاً [ لا حی الا الله ولا سمیع الا الله ولا بصیر الا الله ] دیوب الله  
تعالینک صفاتی توحیدده اثبات ایدر .

اوچنجی فنا فنا ذاتدر ، بوفناک صاحبنه حق تعالی احدیت ذاتیله تجلی  
ایلر و اول تجلی سببیله اول سالک حق تعالینک وجودینی جمیع ذواتده مشاهده  
ایدوب و جمیع ذواتی عدم اصلیه لرنده مشاهده ایدر « ولا موجود الا الله »  
دیوب توحیدده حق تعالینک وجودینی اثبات ایدر ، مخلوقاتک وجودینی  
نقی ایدر و اول سالکک اقیه سنی تمام ایدوب و اصل حق اولور و حق ایله  
بقا بولور و بو اقیه بی محی الدین عربی ( قدس سره ) اشارت ایدوب  
بیوردی « من شهد الخلق لافعل لهم فقد فاز ومن شهدهم لاحیاء لهم فقد  
حاز ومن شهدهم عین العدن فقد وصل »

### (نظم)

خدایه باعث وصلت فنادر  
تجلی کعبه سینه رهقادر

صقنکیم عقل وحسه اولمه مغرور  
بویولده عقل وحس هب بندپادر

نثر — معلوم اولسونکه بو اوچنجی فناک صاحبنه مظهر تجلی  
احدیت ذات الهیه اولق سببیله حق تعالینک انوار وجود احدیت ذاتی  
جمیع وجود ذوات کائناتده مشاهده ایدوب « مافی الوجود سوی الله »  
کلامنی سویلر و بو کلامی سویلک ایله مواخذه اولنر .

### (نظم)

وجود کائناتی ایلوب حق وجهنه مرآت  
جمال پاکنی اهل شهوده ایلدی اظهار  
اگر شک ایلوب ارباب غفلت دوشمه انکاره  
قرده سیر ایدوب انوار شمسی ایتمه سین انکار

نثر — سالک یقن اول انوار وجود احدیت ذات حقه مستغرق  
اولدقده جمیع مشاعر و تدارکی و جمیع اعضا و حواسی اول انوار ایله  
منصبع اولور و اول انوار ایله انوار وجود احدیت ذات الهیه بی مشاهده  
ایدورک اول وقت اول سالک حق رویق حقت رویق اولور و کلامی  
دخی حقت کلامی اولور ، زیرا اول مقام مقام جعفر \* انده غیریت اولماز ،  
تکیم اول مقامده دنیلدی .

### (یت)

اعادتنی طرفاً اداها به \* فکان البصیر بها طرفاً

### (نظم)

بکا برکوز اعاده ایله یارب \* جالک کورمه اولسون مجالم  
حق کورمک بکا اولز مبهر \* اوله بنلکله کوزده ایچی حالم



نثر — اول مقامده سالک حق تعالی بی معرفتی دخی حق تعالینک معرفتی اولور، نته کیم اول مقامده دیلیدی (لایعرف الله الا الله) واول سالک اولوقت توحیدی دخی حقت توحیدی اولور، یعنی الله تعالینک کندی ذاتی ابتدیی توحیدی کبی اولور واول مقامده اول سالکه بویه توحید ایتک واجب اولور (لاموجود الا الله) زیرا اول مقام جمع الجمع مقامیدر، آنده حقدن اوزکه موجود اولمز، اگر حق تعالی اول سالک دوام فناسک مراد ایدر ایسه بردخی انی وجود امکانیه رد ایتمز وانی اول مقام جمع الجمعده ستر و حفظ ایدوب اصلا مقام جمعدن چقمز وکلای جمله کلام جمعدر وآنک جمیع امورنده حق تعالی متصرف اولور.

(نظم)

فناده سالک اولسه دوا می \* اولور محفوظ چقمز اولمادن  
ایدنلر حضرت حقدیه قیامی \* حقیقتده چیقار ارض وسمادن

نثر — اگر الله تعالی اول سالک صحو وبقاسنی مراد ایدر سه اکا نور یقین احسان ایدوب کندی صفتلریله انی موصوف ابد واول سالک الله تعالینک نور و صفاتیله بقا بولوب وجود کثرت امکانیه رجعت ایدر ولکن اکا کثرتی رؤیت ووحدی مشاهده حجاب اولمز واول سالک حق تعالی بی جمیع مظاهرده مشاهده قادر اولور، ظاهر ایله مظهری تمیز ایدوب ایکسینک دخی حقنه رعایت و آداب رغبت ایدر واول کیمسه دخی سالک ترک تربیه لرینه و طالبلرک ارشادینه اهل اولور، وحقک فائبی ورسول اللهک تابعی اولور ورسول اللهک سنتی اوزره خلقی حق تعالی حضرتنه دعوت ایدر. عارف اسرار احدیت، عالم آداب عبودیت اولوب حق تعالینک هر حالده رضاسنه داعی وادابنه مراعی اولور.

(نظم)

عارف جمال حق مظاهرده سیر ایدر  
عارفلرک بصائرینک هیچ حجابی یوق

عارف شهودی حاجب ایدنر مظاهره  
رؤیتده چشم عارفک اصلا نقابی یوق  
دائم حقوقی کوزلمه در شانی عارفک  
حقه رعایت ایلمه دن اجتنابی یوق  
عارفلرک مراعی خدانک رضاسیدر  
هیچ انلرک خلاف رضا ارتکابی یوق

نثر — بوندنصرکه معلوم اولسونکه خواجکان حضراتنک آداب طریقته بیوردقلری کلمات قدسیه اون برکله در.

اولکی کله «یاد کرد» در، بولکه خواجکان عندنده کلمه توحیدی حبس نفس ایله ذکر ایتکدن عبارتدر، زیرا خواجکان حضراتی سالک لری قلبلرینی تصفیه ایچون کلمه توحیدی حبس نفس ایله تلقین ایتدکده (یاد کرده مشغول ایتدک) دیرلر ایدی، اول اجلدن یاد کرد کلمه سی بو طریقته کلمه توحیدی حبس نفس ایله ذکر کردن کنایه اولدی.

خواجکان حضراتی بیوررلرکه «سالک یاد کرده مشغول اولدقده کرکدرکه جمیع اوقاتنی یاد کرده صرف ایده، تا کیم قلبنده اولان عجب موانع دفع اولوب قلب صورت اصلیه سنه رجعت ایده وقلبه مرموز اولان تجلیلرک انواری ظاهر اوله، زیرا حدیث شریفده (ان القلوب تصدو واکما تصدوا الحدید وجلانها ذکر الله) وارد اولمشدر، کلمه توحید کبی قلبه جلا ویرر ذکر اولمز، زیرا کلمه توحید نفی ایله اثباتدن مرکبدر، نفی ایله صدای قلب زائل اولور واثبات ایله جلا قلب حاصل اولور، اندنصرکه تجلیلرک انواری قلبده ظهور ایدر.

(نظم)

یاک اولسه اگر ذکر ایله قلب ایچره سویدا  
انوار تجلیلر اولور آنده هویدا



ذکر ایله سویداییده سن ایلیه کور پاک  
انوار تجلیلر اوله آنده ده پیدا

نثر — ایکنجی کله « وقوف عددی » در ، بوکله « کله توحیدی  
حبس نفس ایله ذکر ایدرکن عدد اوتاردن ( پروتر ) اوزرینه وقف ایدوب  
نفسی اطلاق ایتکدن » عبارتدر .

وقوف عددینک فائده سی قلب خواطر دن سالم اولوب ذکر ی حضور  
ایله ایتکدر ، یوقسه وقوف عددی حبس نفسده شرط دکلدر ، بلکه  
بعض ذا کرله وقوف عددی تفرقه ویر .

خواجکان ( قدست اسرارهم ) حضراتنک « وقوف عددی یکر می بره  
بالغ اولدقه نتیجه ذکر حاصل اولور » دیدکری نتیجه نک حصولی بورتبه یه  
مخصوص دیمه دکلدر ، زیرا بعض ذا کره یکر می بر عددده بالغ اولمازدن مقدم  
نتیجه حاصل اولور واکر ذا کرک وتر اوزره وقوفی یکر می بر عددده بالغ  
اولوب نتیجه حاصل اولماز ایسه اول ذا کر آداب ذکرده تقصیرات  
ایتمشدر ، یوقسه البته وتر اوزرینه وقوف بومرتبه یه بالغ اولدقه نتیجه  
ذکر ظهور ایدر ، نتیجه ذکر ایسه بشریتک انفاسی وجذبه قیومیتک  
ظهور ایدر ، اکر بومرتبه یه وقوف بالغ اولوب ذکر ظهور ایتسه اول  
ذا کرک آداب ذکرده قصوری واردر ، اول ذا کر ابتداء امره عودت  
ایدوب آدابه رعایت ایدرک ذکره مشغول اولق کرکدر .

### ( نظم )

ذکر ایتین وقوف ایله ایرمز نتیجه یه \* زینهار صقین سن ایله ذکر ی وقوفسن  
اولز جناب حضرت حقه تقری \* طاعت یولنده سالک اولور سه عکوفسن

نثر — اوچنجی کله « بازگشت » در ، بوکله « ذا کر حبس نفس ایله  
ذکر ایتدکه عدد وتر اوزرینه وقوف ایدوب نفسی اطلاق ایدرکن ( الهی  
انت مقصودی و رضاک مطلوبی ) کلامنی ملاحظه ایتکدن » عبارتدر .

بوکلامی ملاحظه دن فائده بودر که ذا کر بوملاحظه سببیه ایکی نفسک  
مابیننی خواطرک دخولدن حفظ ایتش اولور ، نفسک مابیننی حفظ ایدر ،  
آنکله ذکر قوت بولوب تأثیری قلبه زیاده اولور .

بوکلامک برخاصه سی ده بودر که ذا کر بونی ملاحظه ایتک ایله حق  
تعالی مقصودیت صفتیه ذا کرک قلبنده تجلی ایلرده ذا کرک عشق جانب حقه  
زیاده اولور .

برخاصه سی دخی بودر که ذا کرک ذکرده اخلاصی اولسه بوکلامی ملاحظه  
سببیه حق تعالی آکا اخلاص احسان ایدر ، بر فائده سی دخی بودر که بوکلام  
اکر ایکی نفسک مابیننده ملاحظه اولنسه ذکرک مابیننه غفلت تحلیل ایدر  
و ذکرک مابیننه غفلت تحلیل ایتسه ذکرده دوام حضور اولماز و ذکرده  
دوام حضور اولسه ذا کر ذکرده فنا بولمز و ذا کر ذکرده فنا بولسه  
ذکرک نتیجه سی حاصل اولمز ؛ آنکچون بو طریقت علیه ده بوکلامی ایکی  
نفسک مابیننده ملاحظه امر لازم اولدی .

### ( نظم )

بنم مقصودم اولدک سن الهی \* رضاک اولدی مرادم قبله کاهی  
بودعوای بنم سن ایله تصدیق \* که سنسین جمله دعوائک کواهی

نثر — در دنجی کله « هوش دردم » در ، بوکله « سالک دوام  
انفاسنه دخول و خروجده اطلاع حاصل ایتسه ، انفاسنی غفلتدن حفظ ایدر  
و انفاسنی غفلتدن حفظ ایتک بو طریقتده اعلا مرتبه در ، زیرا انفاسنی  
حفظ ایتک حضوره سببدر و حضور ایسه بو طریقتده رکن اعظمدر ؛  
برکیمسه انفاسنه دخول و خروجده مطلع اولسه انفاسنی ضایع قیامش  
اولور ، انفاسنی ضایع قیلان نفسنه مالک اولمز ، انفاسنه مالک اولیان  
ضالانده قالوب هلاک اولور ؛ نتکیم شیخ شهاب الدین ( قدس سره )



حضرتلرینک « من لم يملك انفاسه لم يملك نفسه ومن لم يملك نفسه فيكان من الهالكين » بیوردقلری بوسری ایضاح ایدر .

هوش دردمک فائده سی اولدر که جمیع نفسلر منبع وحدانیت ومعدن معرفت وموضع فیوضات اولان قلب حقیقینک محلی اولان قلب صنوبرینک اوزرندن مرور وعبور ایلر ، آنکیچون انفاست ممدحیاتدر ؛ برکیمسه انفاستنه دخول وخروجه مطلع اولسه ، حق تعالیکنک اسرارندن بر سره البته مطلع اولور واول نفس نفس رحن اولور که [ انی اجد نفس الرحمن من قبل الیمن ] حدیث شریفی بوکا اشارتدر .

### ( نظم )

آله غفلتله نفس ایتمه صاقین خسراتی  
آلان انفاسی حضور اوزره ییلور سحانی  
اعرف ناس ، خبر وپردی نفس سرندن  
شم ایدوب سمت یمندن نفس رجانی

نثر — بر نفس یوقدر که آنده رایحه وحدانیت حق سبحانه و تعالی اولیه وبرکیمسه انفاسنی اخذ واطلاق ایلسه البته اول رایحه وحدانیتدن شم ایدر ودخی معلوم اولسونکه عبد معبودینه نفس ایله ابتدیی عبادتدن افضل عبادت اولمز ونفس ایله دخی ابتدیی معصیتدن اقبیح معصیت اولمز ، زیرا عبد بر نفس ایله بر عبادت ایدر که اول عبادتی آنی اعلای علیینه رفع ایدر وبر نفس ایله دخی بر معصیت ایشلر که اول معصیت آنی اسفل سافلینه رد وتنزیل ایدر ؛ آنکیچون اولیاء الله عنده حفظ انفاسدن الزم وافضل عمل اولمز ، نته کیم جنید ( قدس سره ) حضرتلری ( ما احسن النفس بالندامة وهو اکبر من عبادة الكون وافضل الاعمال الانفاس بالایمان واقبح الاعمال الانفاس بالكفر ) بیورمشلردر .

بشنجی کله « نگاه داشت » در ، نگاه داشت کله سی « قلبی خواطر دن حفظ ایتمکدن » کنایه در ، معلوم اوله که حق تعالی قلبی مرآت جمال ذات

وآنلری مظهر انوار اسماء وصفات وخواطری دخی قلبک مشاهده سنه حجاب ایلدی ؛ اکر برکیمسه قلبی خواطرک دخولندن حفظ ایتمسه حقلک ، جمال ذاتی وانوار اسماء وصفاتی مشاهده ایده من ؛ ایدمی ، سالیکه قلبی خواطر دن حفظ ایتمک لازم اولوب اکر بر سالک جد وسعی ایدوب قلبی خواطر دن ربع ساعت ویانصف ساعت حفظ ایدرسه البته اولسالک جمال ذاتی وانوار ذات وصفاتی مشاهده ایدر ؛ لکن قلبی خواطر دن بومقدار حفظ ایتمک قتی صعبدر ، قتی چوق مجاهده ایله حاصل اولور ، آنکیچون طریقتده قلبی خواطر دن حفظ ایتمک اعلی مقام اولدی .

معلوم اوله که قایه حجاب اولان خواطر آلتی نوعدر ، ۱ ( هواجس ) در .  
بوهواجس نفس جانبندن قلبده ظهور ایدر ، ۲ ( وساوس ) در .  
بووساوس شیطان جانبندن قلبه القا اولنور ، ۳ ( الهامات ) در .  
بونلر دخی ملک جانبندن قلبه القا اولنور ، ۴ ( واردات ) در .  
حقندن قلبه سنوخ ایلر ، ۵ صور ( کائنات ) در .  
بونلر دخی حواس جانبندن اولوب قلبه دخول ایلر ، ۶ ( معقولات ) در .  
بونلرده عقل جانبندن قلبه خطور ایلر ، بو خواطرک مجموعی سالک مبتدی به کوره حجابدر .

ایمدی سالک مبتدی اثناء سلوکنده قلبی بوخواطرک مجموعندن تجرید ایتمک ومجموعنک دخولندن حفظ ایتمک رکدر کیم جمال ذاتی مشاهده وانوار تجلیات اسماء وصفاتی مکشفه ایده ، چنکه سالک مقام مشاهده واصل اولور ، آنک مشاهده سنه خواطر حجاب اولماز ، زیرا اولسالک خواطرده دخی جمال الهی انوار اسماء وصفاتی مشاهده ایدر ، نته کیم مظاهر خارجیه ده مشاهده ایتدیکی کبی ، قلبی خواطر دن حفظ ایتمک طریقی بودر که سالک محسوساته حواسنی تعلقندن منع ایده ، زیرا اکثری خواطر سمع وبصر طریقیله قلبه دخول ایدر وعقلنی دخی معقولات تعلقندن حفظ ایدوب مطالعه کبی شیلری ترک ایده ، شیخنک امر ایتدیکی امره مشغول اوله ، کله توحید ایله قلبی دائم تخلیه ایدرک استغفار ایله حقه



توجه ایده، ناسدن عزات و کلام سویلکدن کف لسان ایده و قلبنه دائم  
ناظر اولوب خواطری قلبندن طرح ایده و اعمال دنیویه بی ترک ایده،  
و قلبنی اشغال ایدن اموردن احتراز ایده.

### (نظم)

ایلکل جله مجاری حواسی مسدود  
جسمی صوم و ریاضاته ايله تضییق  
اولمه سین سیل خواطرله قلبک کرداب  
ایتمسون چند شیاطین آنی سرداب  
جمله معلوم ايله معقولی فراموش ايله  
اوله انوار تجلی ايله روحک شاداب

نثر — التجبی کلمه «وقوف قلبی» در، بوکله «قلب صنو بری»  
توجه ایدوب عین بصیرت ايله حقیقت قلبه نظر ایدوب طور مق «در».

وقوف قلبی به اشتغال کیفیتی بودر که سالک قوی و حواسیه جانب یسارده  
قلب صنو بریده اولان قلب حقیقته توجه ایدوب بصیرتک حقیقت قلبه تعلق  
ایدوب اول حقیقته نظارت اوزره مستقر اوله، تا کیم اول سالک ده بر غیبت  
ویا اثر جذبه و یا احوال سلوکدن بر حال ظهور ایده، صکره اول ظهور  
ایدن حاله اتباع ایدوب مقتضاسنجه عمل ایده، تا کیم اول حال زائل اولنجیه  
دکین، صکره ینه و قوف قلبی به عودت ایدوب ینه بر حال ظهور ایدنجیه دک  
مشغول اولوب و اول حاله ینه اتباع ایدوب مقتضاسنجه عمل ایده، تا کیم  
اول حال زائل اولنجیه دک، بومنوال اوزره و قوف قلبی به مشغول اوله،  
تا کیم عنایت حقه مظهر اولوب نسبت طریقت علیه آنده تقرر و تحقیق  
ایده و مطلوب حاصل اوله.

بو طریقت علیه ده سالک سائر اشتغالات سلوکدن متأثر اولمازلر ایسه  
مشایخ عظام و قوف قلبی تعلیم ایدوب آکا مشغول ایدرلر، تا کیم آنلرده

تربیه به قابلیت کلور، آندن صکره سائر اشتغالات ايله تربیه ایدوب آنلری  
حقه ایصال ایدرلر، آنکچون و قوف قلبی بو طریقه (اصل اصول)  
اولدی.

### (نظم)

بیضه دل اوستنه مانند مرغ اول باسبان  
تا که انوار تجلی دلدله آپسون پروبال  
فیضکاه دلدله در کسب کالی سالک  
اندن اوزکه غیری یردن ایلز کسب کمال  
لوح مرآت دله دائم نظارت ایلسون  
جلوه گاه حقدر اول آنده اولور سیر جلال  
دلدن اوزکه جای وصلت استین عاشق دکل  
عاشق اولدر کیم ایدر دل خجمله کاهنده وصال

نثر — یدنجی کلمه «یادداشت» در، بوکله «وجود احدیت حق  
تعالی به هر حاله و هر شیده دوام اوزره مراقبه دن» عبارتدر.

یادداشت اشتغال کیفیتی بودر که سالک جمیع قیوداتی قلبندن تجرید و قوی  
و حواسی دخی احکامندن تعطیل ایدوب جمیع موجوداتی عدم اصلیلرنده  
ملاحظه ایده، و وجود وحدت ذات الهی بی جمیع موجوداتی محیط، کیف  
و کدن ولون و شکلدن وجهت و مکندن منزله بر امر نورانی و بوجود  
حقانی ملاحظه ایده و دائم اول امر نورانی بی جمیع اشیاده مراقبه ایده و بو  
مراقبه ده فتور همت و نشئت عزیمت ایتیه رک مداومت ایده، تا کیم وجود ذات  
حق تعالی بی جمیع مظاهرده مشاهده ایلیه، تکیم حدیث شریفده [رأیت  
ربی نورانیا] وارد اولمش و بوراده کی رؤیت مشاهده معناسنه کلمشدر.

مراقبه اثناسنده قلبنه خواطر خطوط ایدن سالک که کدر که نظرینی  
بصیراندن بر شیشه تعلیق ایده و کوزینی آندن آرمیوب اول خواطر مندفع



اولنجه به دك اول شيئه نظر ايدوب طوره ، يا خود خواطرده وجود وحدت ذات الهييه ملاحظه ايد ، تا كيم خواطرده وجود وحدت ذات الهييه ظهور ايدوب خواطر مضمحل اوله زيرا اثرده « ومن احسن الحسنات مراقبه الرقيب عند خطرات القلوب » وارد اولشدر .

### ( نظم )

كوزله طور اسرار حق دائما اشياده سن  
حق سكا اسراريني اشيادن ايلر آشكار  
ايله هر كز نظر ظاهرده نقش عالمه  
ايله باطنده همان نقاش نقشه انتظار  
سعي قيل نفي وجود كائناته عارف اول  
عارفه نفي وجود اولدي حقيقتده شعار  
حق تعالينك وجودنده بولور محو وجود  
هر نه كيم خارجه و خاطرده اولسه اعتبار

نثر — سكرنجي كله « نظر بر قدم » در ، بوكله « سالك حال مشينده نظريتي پشت پاينه تعليق ايدوب آفاقه باقامقدن » عبارتدر ، زيرا سالك مبتدي طريقتده كيدر كن آفاقه نظر ايلسه صور مبصرات قلبيه منتقش اولوب قلبده تفرقه حاصل اولور و اول تفرقه بي دكه بر حال ايله ازائه ايدمهز ، يا خود نظري مشتميات و مستحسانه تعلق سبيله قلبنده علاقه حاصل اولوب مفتون اولورده سلوك كن محروم قالور ، حقدن منقطع اولور ، چونكه « من كثرت لحظاته دامت حسراته » دلمشدر .

شيخ محمد بن عبدالله نقل ايدر كه ، بر كون استادم ايله بر يولده كيدر دم ، نظرم بر شاب جميل وجهه تعلق ايتدي ، استادم آكا مطلع اولدقده دونوب بكا ديديكه ( او غلوم سن بونظرك ضرريني البته بر كون كور رسك ) ، بن اول سوزدن زياده متأثر اولدم و ضرره منتظر اولدم ، تا كيم يكرمي سنه مرورند نصكره بر كچه آني كوردم تفكر ايدر كن اويودم و چنانكه صباح

قالقدم كوردمكه حفظ ايتديكم قرآن كريمي جمله نسيان ايتدم ، اولوقت بكا هاتقدن ندا اولديكه بونسيان اول نظرك ضرري در بووقت ظهور ايلدي ، انتهى .

سالك متوسط و متميزلر دخی اكر طريقتده كيدر كن آفاقه نظر ايدر كيتسه لر حضور قلبلري و جمعيت باطنلري زائل اولور و صكره اول حضوري و اول جمعيتي تحصيل قتي مشكل اولور ، ايمدي سالكلرك جمله سنه لازمدر كه يوله كيدر كن نظريني قد مينك اوزرندن آرميه ، نظرك بر معناسي دخی بودر كه سالك ماسودن كف يد و ترك محبت ايدوب طريق حقه جد و سعي ايله سلوك ايدوب آفاقه نظر ايتيه .

### ( نظم )

صقین یولده آیرمه چشمکی سن پشت پایکدن  
قالور یولده بقان آفاقه تیر اول منزله ایرمز  
کوکل جمعیتی زائل اولور آفاقه باققدن  
اوجعیت دخی بروجهله صكره اله کیرمز  
طریق حقه سعیهله کید نلر غیره باقازلر  
که زیرا غیره باقافلر بو یولده فائده ویرمز

نثر — طقوزنجي كله « خلوت در انجمن » در ، بوكله « باطنده حقه مشغول اولوب ظاهرده خلق ايله مخالطه ايتكدن » كنایه در ، خلوت در انجمن منتهی اولان سالكلرك حاللریدر ، زيرا مبتدي سالكلرك اهل غفلت ايله مخالطه دن البته قلبلرينه تفرقه و نسبتلرينه نقيصه حاصل اولور .

سالك مبتدي ابتدای سلوك كننده ناسدن عزلت ايدوب حق ايله انسيت تحصيل ايتك كر كدر ، تا كيم ناس ايله خلطت حق ايله انسيت مانع اولميه ، خلق ايله جمعيت دخی حق ايله خلوته منافی اولميه ، كورمز ميسين كه سائر طريقتلرده ايتدكلري خلوت ظاهريه خلوت باطنيه يي تحصيل ايجونددر ، يوقسه خلوت ظاهريه شريعتده و سنتده مقبول دكلدر ، بلكه بدعتدر ، زيرا



رسول الله (صلى الله تعالى عليه وسلم) صدر نبوته جلوس ايتدكدنصكره اصلا  
ناسدن عزلت ايدوب اختيار خلوت بيورديلر ، دائما ظاهرده خلقه تعليم  
شريعت وباطنده حقه مناجات ايدرلر ايدى ؛ [ لى مع الله وقت لايسعنى ملك  
مقرب ولا نبى مرسل ] قول شريفى بونى مؤيد اولان احاديث شريفه دندر ؛  
اصحاب كرام دخی سنت رسول الله اوزره ظاهرده خلق ايله معاملهده  
وباطنده حق ايله مذاكرهده اولورلر ايدى ، تكيم جناب واجب تعالى  
وتقدس حضرتلرى آنلرك وصف وتعريفلرى حقنده [ رجال لا تلهيهم تجارة  
ولا بيع عن ذكر الله ] بيورمشلردر .

خواجكان حضراتى دخی سنت شريفه اوزره خلق ايله خلطى وحق ايله  
خلوقى اختيار ايتديلر ، ليكن بوشرط ايله كه خلق ايله خلطت حق ايله خلوته  
مانع اوليه ، انكچون خواجه بهاء الدين حضرتلرى ( طريقنا طريق الصبغة  
والخير فى الجمعية ) بيورديلر ، فقط اكر خلقك خلطى حقك خلوتنه مانع  
اولور ايسه احوالده خلوقى اختيار ايتك لازمدر .

### ( نظم )

ايدوب سر كده خلوت خلق ايله كن انجمنلرده  
ولكن جهد ايدوب اغيارى قيله سر كه آگاه  
شعار انبيادر خلطت ايتك خلقه ظاهرده  
اوله باطنده هر دمه درون دلده ذكر الله

نثر — اونجى ككه « سفر » در وطن « در ؛ بوككه « سالك ماسنواي  
ترك ايدوب جانب حقه توجه ايله سفر ايتمه دن ، ياسالكك صفات ذميه سى  
صفات حمديه ترقيسندن ، ياخود سالكك عالم ملكدن عالم ملكوته وعالم  
ملكوتدن عالم جبروته وعالم جبروتدن عالم لاهوته عروجندن ، ياخود  
سالكك مرتبه علم يقيندن عين يقينه وعين يقيندن حق يقينه انتقالندن »  
عبارتدر ؛ سالك بو ذكر اولنان مراتبه سیر سفر ايتدكجه حق تعالى يه  
تقرب ايده من ، زيرا حق تعالىك طريق تقربى معنويدر ؛ آنده اولان سفر

دخی معنويدر ، معنوى سفر ايسه وطنده اولور ، سالكك ظاهرده اولان  
سفرلرى باطن سفرينى تحصيل ايجونددر ، يوقسه ظاهر سفرى باطن سفرينه  
وسيله اولماز ايسه ظاهر سفرى عبثدر ، اتعاب بدندر ؛ تقصيراتدن وترك  
عبوديتدن غيرى حاصل يوقدر ، بلكه بعض سالكه كوره ظاهر سفرى  
حرامدر ، زيرا حرامه مؤدى اولور ، انكچون خواجكان حضراتى سفر  
ظاهرى اعتبار ايتيوب ( سالكك سفرى وطنده در ديو ) بيورديلر .

### ( نظم )

دائما باطنده سالك طورميوب ايتسون سفر  
جسمنى قطع طريق ايكده اعبا ايتسون  
عالم ملكدن علايق قطع ايدوب ايتسون عروج  
عالم لاهوته دك برعالمى جا ايتسون  
طورمه باطندن سفر ايله وطندن اولمه دور  
ناسنى ظاهر يو طننده الها ايتسون

نثر — اون برنجى ككه « وقوف زمانى » در ؛ بوككه « زمان حاله  
اطلاعدن وزمان ماضى بي محاسبه دن » عبارتدر ، زيرا سالكه لازمدر كه  
هر وقتنى كوزه دوب مقتضاسنجه عمل ايده ، هر نهاريلى اقشامده وهر ليلنى  
صباحده محاسبه ايدوب كوره كه اول مرور ايدن وقتلر طاعات ايله مى مرور  
ايتدى يوقسه مخالفت ايله مى پكدى ؛ اكر طاعت ايله مرور ايتديسه الله  
تعالى اكا ايتديكى توفيق ايجون جد وثنا ايدوب طاعتده دوام وثبات  
ايده ، اكر مرور ايدن وقتلرى ذنب وغفلت ايله مرور ايتدى ايسه توبه  
واستغفار ايدوب ضايع اولان وقتلرينى زمان مستقبلده طاعت ايله تدارك  
ايده ، اكر وقتنى ضايع ايدن سالك مبتدى اولورسه اولسالك وقتنى ذنب  
ايله ضايع ايتشددر ، ذنبه توبه واستغفار ايدوب زمان مستقبلده ذنب ايتماكه  
عزيمت ايدوب طاعته سعى ايده ، اكر متوسط اولورسه اولسالك غفلت  
ايله وقتنى ضايع ايتشددر ، عقلنى قلمبندن ازاله ايدوب استغفار وبر دخی



غفلت ایتمه مکه عزیمت و حضور مع الله سعی و غیرت ایده ؛ اگر منتهی  
اولورسه اولسالک وقتنی حجب ماسوی ایله احتجاب وضایع ایشدر ، اول  
احتجابی قلبندن نفی ایدوب استغفار ایده و مشاهده الهیه ده استغراق ایده ،  
ایمدی بوندن معلوم اولدیکه سالک سلوک قنغی مرتبه سنده اولورسه وقتنی  
محافظه و محاسبه ایدوب تعمیر اوقات و تدارک مافات ایتمک اکا واجیدر ،  
زیرا اثرده [ من اهل وظیفه الوقت فوقته مقت ] و [ من علم اوقاته فازو  
من جهل اوقاته حاز ] وارد اولمیشدر .

### ( نظم )

ابن وقت اول مادر وقت مقدر اولمه کل  
وقته اول پرورده ، زنهار وقت پرور اولمه کل  
دائما احوالی نفسک حساب ایت موبو  
مالک نفس عنود اول نفسه چا کر اولمه کل  
نقدعری یوق یره صرف ایتمه غفلت ایلوب  
هر زمان طاعتده اول غفلتله ایتر اولمه کل  
وقتکه عالم اولوب درک ایله ضر و نفعی  
اوله جاهل وقتکه خسرا نه مظهر اوله کل

نثر — تعمیر اوقات و تدارک مافات بویله درکه وقتنی ضایع ایدن کیمسه یه  
لازمدرکه نهارینی صائم ، لیلنده قائم اوله ، اهل ذکر دن ایسه ذکره دوام  
ایده و اهل مراقبه دن منفک اولیه و اهل شهود دن ایسه شهودنده راسخ  
اوله ، و قلبنی تفرقه و غفلت و تعلق ماسوادن حفظ ایده ، لسانی فضول  
کلامدن و بصرنی مبصراته تعلقدن واذنی استماع اصواتدن ورجلنی عبث  
یره کتمدن حفظ ایده و تقلیل اکل و ترک حرام و ملازمت جوع و عطش  
ایده ، اخلاق ذمیه بی جله ترک ایدوب دنیویلدن احتراز ایده و دائما توبه  
و استغفاره ملازمت ایده ، امر معروف و نهی عن المنکر اشلیه و زهد و تقوی  
اوزره اوله ، ترک تسوف ایدوب وقتک مقتضاسن ایلیه و بر مکاندن بر مکانه

عملین تعلیق و بر زماندن بر زمانه تأخیر و تعویق ایتمه ، کسلدن غایت احتراز  
ایده ، زیرا طریق سلوک آفتی کسلدر !!! و دائم مجاهده بی التزام ایده  
و حق جانبیه محبه نافی اولور اموردن و حرامدن اجتناب ایدر کی اجتناب  
ایده ، هر وقتنی غنیمت بیلوب هیچ بروقتک فائده سنی اضاعت ایتمه ، زیرا  
« المصائب کثیره و اعظم المصائب ذهاب الوقت بلا فائده » وارد اولش  
و بوکلمات قدسیه معنالرینک حفظنده قولایلق اولسون ایچون ، آئیده کی  
نظم ایله تعریف ایدلمیشدر .

### ( نظم )

خواجکات کلمات پاکی \* اولدی آداب سلوکی حاوی  
نقشبندیه طریقنده کی سر \* بو کلمات مراعات ایله در  
( یاد کر ذ ) در کلماتن بریسی \* ذکر دائر آنک معنیسی  
کیم ( وقوف عددی ) دیر که ندر \* ذکر و تراوستنه وقف ایله در  
( باز کشته ) و یریلوب معنی پاک \* انت مقصودی و مطلوبی رضا  
( هوش دردم ) ده بومعنا مشهور \* ایتمک الله ایله هر دمه حضور  
بو ( نکاه داشت ) بومعنی خوشتر \* قومامق قلبه خواطر دن از  
( وقوف قلبی ) بو اولدی ای یار \* ایلک قلبه توجه هر بار  
و یردی ( یاد داشت ) بومعنی رونق \* کوزلیوب جانب حق طور مق  
و یر بومعنی نظر ( بر قدم ) \* پشت پاوستنه باقوب یورومه  
( خلوت در انجمن ) شرحی بودر \* خلق ایچنده ایتمه حق ایله حضور  
بو ( سفر در وطن ) اولدی مال \* روحله جانب الله رحال  
بیل ( وقوف زمانی ) ای جان \* اطلاع اولدی وقتکه هر آن  
وقتکی کوزله آندن ایتمه ذهول \* اوله سک تا که مشایخ ایچره خول  
اولدی اون بر کله جله تمام \* خواجکانه ایدلم بزده سلام

### فصل خامس

بو فصل ارباب طریقک سنت اوزره مداومت ایتدکری نوافل بیاننده در .



معلوم اولسونکه طالب وصلت حق اولان کیمسه نافله عبادت ایله اشتغال ایتمک لازمدر، تا کیم عبادات نافله ای ایشلمک ایله حقه تقرب ایدرک محبوب حق اولوب مظهر صفات الهیه اوله، نیکیم حدیث قدسیده وارد اولدی [لازال عبدی یتقرب الی بالنوافل حتی احبه فاذا احبته کنت سمعه الذی یسمع به وبصره الذی یبصر به ولسانه الذی ینطق به ویده الذی یبطش بها ورجله الذی یمشی بها] .

عبادات نافله نیک موجب قربیت و مستلزم محبت اولملری فرائض و سنتلری کمالیه ادادنصرکه اولور، یوقسه برسالك فرائضی فوت ایدوب نوافله مشغول اولسه، اکا اول نوافل قریبت و محبوبیت ویرمز، بلکه بعدیت و مبغوضیت ویرر، زیرا اثرده (من شغل الفضل عن الفرض فهو المغرور) و (فرائضک فوتيله اشلتن نوافل ایله فوت اولنان فرائض قضا اولنور وانلر ایچون غیر جزا اولمز) وارد اولمشدر .

معلوم اولسونکه حق تعالینک محبتی جالب و جناب قریبتیه جاذب اولان نوافل سنتده وارد اولان نوافلدر، یوقسه نافله بدعیه مخترعه دکلدر، زیرا رسول اکرم (صلی الله علیه وسلم) نه دکلو قریبت ویرر عبادت نافله وار ایسه بیان ایشدر وانلرک بیان ایتدیکی نافله عبادتلردن غیری نافله بدعیلر ایله حقه تقرب اولنماز، اثرده [ان احسن الحدیث کتاب الله وخیر الهدی هدی محمد وشر الامور محدثاتها] [من احدث فی امرنا هذا فهو رد] وارد اولمشدر .

سالك عبادات نافله دن برینی ورد ایدینوب التزام ایدینور ایسه کرکدرکه اتی بروقتیه تخصیص ایده وهر چقن اولوقت کلور اتی ایشلمک کرک واکر ضرورت حسبیه اتی ترک ایدر ایسه آخر وقتده اتی تدارک ایده، تا کیم اولعملده مداومت بولنه، زیرا [عمل قلیل مع المداومة خیر من عمل کثیر من غیر المداومة] و «خیر الاعمال ادومها» بیورمشدر .

سالكه لازمدرکه التزام ایتدیکی اورادی ترک ایتیمه، تا کیم آنلر

ایله حقه واصل اوله، زیرا التزام ایدیلان وردک ترکی باعث عتاب اوله جنی [تارک الورد معلون] حدیث صحیحیه مشهور .

دخی سالكه لازمدرکه شیخندن تلقی ایتدیکی انکاره مداومت ایدوب ترک ایتیمه، اکر ترک ایدر ایسه شیخندن ارادتی فسخ اولور؛ ودخی معلوم اولسونکه بو اوراد وازکاره مداومت و مواظبت سالكه کوره در، یوقسه عارفله کوره بروردی التزام و برعمله اعتصام اولنماز، عارفلر حق تعالینک استعمالیه عمل ایدرلر، کندی ارادتلریله بروردی التزام و برعمله اعتصام ایتزلر، بروقتی بروقتیه تفضیل و برحاله ترجیح ایتزلر، آنلردن هر نه حرکت صادر اولورسه حقلک تحریکیله صادر اولور، انلر هر نه مراد ایدرلر ایسه حقلک اراده سیله مراد ایدرلر، انلر نفسلرندن فانی اولوب حقله باقی اولدیلر، انکچون انلرده حقلک ارادتندن غیری اراده اولمز .

### (نظم)

اتباع ایت سنته هر ایشده اهل سنت اول  
میل بدعت ایلوب طاعتده ایتجه ابتداع  
حقه وصلندن اولور بدعتله سالك منقطع  
کیر طریق سنته کل حقدن ایتجه انقطاع  
شرع ایله حقلک رسولی خلقی دعوت ایلدی  
لازم اولدی هر کسه، ایتک رسوله اتباع  
سنت اوزره اولمدق بیک درلو طاعت ایشلمک  
ایده مزسک حضرت الله هر کز اتباع  
ترک رهبانیت ایت او، هوای نفسکه  
ایله راه سلفدن اوز که راهی اختراع  
دامن شرعی طوتوب آیرله سنتدن صاقین  
بدعتی ترک ایله ایتجه مبتدعه اجتماع  
اقتدا اوزره ایدوب طاعات، ترک ایت حظکی  
تا که طاعات ایچره حظک سندن ایتسون انجلا



نافله اعمال ايله سودر خدايه كنديكي  
ايله اسرار صفات اللهه سنده اطلاع

نثر — اهل طريقك مداومت ايتد ري نوافل مسنونه « صلاة  
نافله » ، « صيام تطوع » ، « قراءة قرآن » ، « اوراد واحزاب »  
اولق اوزره درت قسمدر .

صلات نافله — صلاة نافله دخی درت قسم اولوب اولی قسمی  
صلاة او ایندر ، بونک وقتی سنت مغربی ادا دن صکره عشا وقتنه قدردر ،  
بونک اقلی التي رکعت واكثری اون ایکی رکعتدر ، بونده مستحب اولان  
اولی ایکی رکعتده فاتحه دن صکره اوچر اخلاص او قومقدر ، ایکنی  
ایکی رکعتده فاتحه دن صکره برر اخلاص او قومقدر ، اوچنجی ایکی رکعتک  
اولی رکعتده فاتحه دن صکره قل اعوذ برب الفلق وایکنجی رکعتده قل  
اعوذ برب الناس او قومقدر ، دردنجی ایکی رکعتک اولی رکعتده فاتحه دن  
صکره سورة بقره نك اولندن [ بما كانوا يكذبون ] آیت کریمه سنه قدر  
و [ الهکم الله واحد ] دن [ لقوم یعقلون ] قدر واون بش اخلاص دخی  
اوقیه وایکنجی رکعتده ایه الکرسیدن خالدونه دك اوقیه والله مافی  
السموات [ دن آخر سوریه دك اوقیه واون بش اخلاص دخی اوقیه ،  
وبشنجی ایکی رکعتک اولی رکعتده فاتحه دن صکره سورة یروج وایکنجی  
رکعتده سورة طارق اوقیه ، التنجی ایکی رکعتک هر بر رکعتده فاتحه دن  
صکره بشر سورة کافرون اوقیه وصلاة او ایندن صکره « الحمد لله علی  
اجسن المسی الحمد علی احسن الصباح الحمد لله علی حسن المبیث اللهم لك الحمد  
جداً خالداً مع خلودك ولك الحمد جداً دائماً مع دوامك لا منتهی له دون مشیتك  
ولك الحمد جداً دائماً لاجزاء لقائله الا رضاك ولك الحمد جداً دائماً عند كل  
طرفة وتنفس عند كل نفس الحمد لله كفا حقه والصلوة والسلام علی خیر  
خلقه » دعای شریفنی اوقیه .

بوندن صکره دخی ایکی رکعت صلاة حفظ ایمان قیلله وآمك اولی رکعتده

فاتحه دن صکره آیه الکرسی بی بعده « ربنا لاتزغ قلوبنا بعد اذهبتنا وهب لنا  
من لدنك رحمة انك انت الوهاب » آیت کریمه سنی اوقیه ، ایکنجی رکعتده  
(سورة الم نشرح) لك اوقیه وسلامدن صکره سجده ایدوب سجده ده اون  
ایکی کره صلاة سلام ایدوب بودعایی اوقیه « اللهم انی استودعک دینی  
فاحفظه علی فی حیاتی وعندماتی وبعد وفاتی » ورأسنی رفع ایتد کدن صکره  
بودعایی دخی اوقیه « اللهم انی استلک ایمانا یباشر قلبی واستلک ایمانا دائماً  
واستلک قلبا خاشعاً واستلک یقیناً صادقاً واستلک دیناً قیماً واستلک رزقاً طیباً  
واستلک عملاً متقیلاً واستلک العافیة واستلک الشکر علی العافیة واستلک الغنی  
عن الناس یا ارحم الراحمین » بودعادن صکره دخی سورة سجده وسورة واقعه  
اوقومق مستحیدر .

وقت عشا داخل اولدقده درت رکعت سنت عشا قیلله وصلاة عشا بی  
ادا ایتد کدن صکره ایکی رکعت دخی سنت ادانیه قیلله واندن صکره دخی  
درت رکعت نافله قیلله وانک اولی رکعتده فاتحه دن صکره ایه الکرسی بی  
« خالدون » . وایکنجی رکعتده « لله مافی السموات » دن آخر سوریه و اوچنجی  
رکعتده سورة حدیدک اولندن « بذات الصدور » . و دردنجی رکعتده « هو الله  
الذی لا اله الا هو » دن آخر سوریه قدر اوقیه ، اندن صکره ایکی رکعت  
نافله دخی قیلله وانک هر بر رکعتده فاتحه دن صکره اوچر اخلاص اوقیه  
صکره دخی ایکی رکعت نافله قیلله ، آنک هر بر رکعتده یدیشر اخلاص اوقیه  
وسلامدن صکره سجده ایدوب سجده ده یدی کره استغفار ایده ویدی کره  
دخی « استغفر الله سبحان الله والحمد لله ولا اله الا الله والله اکبر ولا حول  
ولا قوة الا بالله العلی العظیم » دیه وسجده دن باشنی رفع ایتد کده « یا حی  
یا قیوم یا ذا الجلال والاكرام یا اله الاولین و آخرین رحن الدنیا والاخرة  
ورحمیها یا رب یا الله اغفر لی ذنبي وتقبل صلاتی وصیامی » دعاسنی اوقیه .  
بوندن صکره صلات وتری قیلله انک اولی رکعتده سورة اعلی بی ایکنجی  
رکعتده سورة کافرونی اوچنجی رکعتده سورة اخلاصی اوقیه وسلامدن  
صکره سجده ایدوب اون کره « سبوح قدوس ربنا ورب الملائكة والروح »



اوقويه صكره رأسني رفع ايدوب اية الكرسي اوقويه ' صكره ينه سجده  
ايدوب اون كره دخی « سبحوح قدوس ربنا ورب الملائكة والروح »  
اوقويه ' صكره رأسني رفع ايدوب تسبیح و تحمید و تكبير لری اوتوز اوچر  
كره ايدوب دعا ايد ' بعده سورة كهف ' سورة يسين ' سورة لقمان ' سورة  
دخان ' سورة ملكي اوقودقدن صكره صلاة و سلام ايدوب ذكره مشغول  
اوله ' اكر نوم غلبه ايدرسه « امن الرسول » الى اخره و سورة كهفك  
آخردن درت ايت و سورة كافرون و سورة اخلاص و معوذتيني اوقويه ؛  
و بودعاي دخی اوقيوب فراشته ياته « باسمك ربی وضعت جنی و باسمك ارفعه  
فاغفر لي ذنبي اللهم قني عذابك يوم تجمع عبادك اللهم اني باسمك احی و اموت  
واعوذ بك من كل شر ذي شر و من كل شر كل دابة انت اخذنا صيتها انت  
على كل شئ قدير ' اللهم انت الاول فليس قبلك شئ و انت الاخر فليس  
بعدك شئ ' اللهم انت خلقت نفسي و انت تتوفاها لك مماتي و محياها ان امتها  
فاغفر لها و ان احيتها فاحفظها ' اللهم اني اسئلك العافية اللهم احفظني  
في احب الساعات اليك و استعملني باحب الاعمال اليك تقربني اليك زلفي  
و تبعدني من سخطك بعد اسئلك فتعطيني و استغفرني فتغفر لي و ادعوك  
فتستجيب لي يا ارحم الراحمين « اوياندقده « الحمد لله الذي احيانا بعدما ماتنا  
ورد الينا ارواحنا و اليه البعث و النشور » دعاسني اوقويوب يتاغندن  
قالقه .

صلواة نافلهك ايكنجي قسمي صلاة تهجددر ' بونك وقي ثلث اولدن  
صبح صادق طلوع ايدنجيه دكدر ' بونك اقلي درت و اكثرى اون درت  
ركعتدر ' تهجد نمازينك اولكي ايكى ركعتك اولكي ركعتده فاتحه دن صكره  
اية الكرسي بي و ايكنجي ركعتده آمن الرسول بي تلاوت ايتك و سلامدن  
صكره « الله اكبر بيرا و الحمد لله كثيرا و سبحان الله بكرة و اصيلا سبحان  
الله و الحمد لله و لا اله الا الله و الله اكبر و لا حول و لا قوة الا بالله العلي  
العظيم » دعاسني اوقومق مستحيدر .

ايكى ركعتك اولكي ركعتده فاتحه دن صكره سورة طه دن اولدن بر مقدار

وايكنجي ركعتده بوسوره دن آخرنده اولان ( ان الذين امنوا ) دن آخر  
سوره دنك اوقويه ' اوچنجي ايكى ركعتك دخی اولكي ركعتده ( سورة  
سجده ) و ايكنجي ركعتده ( سورة دخان ) اوقويه ' در دنجي ايكى ركعتك  
اولكي ركعتده ( سورة يس ) و ايكنجي ركعتده ( سورة فتح ) اوقويه ' بشنجي  
ايكى ركعتك اولكي ركعتده ( سورة زمر ) ايكنجي ركعتده ( سورة الحديد )  
اوقويه ؛ آلتنجي ايكى ركعتك اولكي ركعتده ( سورة ملك ) ' ايكنجي  
ركعتده ( سورة مزمل ) اوقويه ' بدنجي ايكى ركعتك اولكي ركعتده  
( سورة قدر ) ' ايكنجي ركعتده درت كره ( سورة اخلاص ) اوقويه .

بو كيفيت اوزره صلاة تهجدى قيتلى مستحيدر ' زيرا اثرده وارد اولمشدر ' صلاة  
تهجددن صكره بودعاي اوقويه « اللهم اسلمت و بك آمنت و عليك  
توكلت و بك خاصمت اليك حاكمت فاغفر » اللهم يارب لي ما قدمت و ما اخرت  
وما اسررت و ما اعلمت انت المقدم و انت المؤخر لا اله الا انت ' اللهم آت  
نفسى تقويها و زكيتها انت خير من زكيتها انت وليها و موليتها اللهم اهدني  
لاحسن الاخلاق فانه لا يهدي لاحسنها الا انت و اصرف عني سيئها الا انت  
اسئلك مسئلة البائس المسكين و ادعوك دعاء المفتقر الذليل فلا تجعلني بدعاك  
رب شقيا و كن بي رؤفا رحما يا خير المسؤولين و اكرم المعطين » .

دعاي مذكوري اوقودقدن صكره سدس اخيرده يامراقبه و ياخود ذكره  
و ياخود قرائت قرآنه مشغول اولوب بو استغفاري يتمش كره ايد « اللهم  
اغفر لي و لوالديه و للمؤمنين و للمؤمنات و للمسلمين و المسلمات حيهم و ميتهم  
شاهدهم و غائبهم قريبهم و بعيدهم انك تعلم مثواهم و منقلبهم » و بوندن صكره  
تضرع و نیاز ايدرك بك ايد و حق تعاليدن رضا و رجح طلب ايد ' صكره  
بخر طلوع ايدوب بياض منتشر اولدقده بودعاي اوقويه ' زير رسول  
اكرم صلى الله عليه وسلم سنت بخردن صكره اوقورلر ايدى « اللهم اني  
اسئلك رحمة من عندك تهدي بها قلبي و تجمع بها شملى و تلم بها شعئى و ترد بها  
الفتن عني و تصلح بهاديني و تقضى بهاديني و تحفظ بها غائبي و ترفع بها شاهدي  
و تزكى بها على و تبيض بها وجهي و تلهمني بها رشدى و تعصمني بها من كل



سوء، اللهم اعطني ايمانا صادقا و يقينا ليس بعده كفر ورجة انال بها شرف  
كرامتك في الدنيا والاخرة ؛ اللهم اني استلك الفوز عند القضاء ومنازل  
الشهداء وعيش السعداء ومرافقة الانبياء والنصر على الاعداء ؛ اللهم انزل  
بك حاجتي فاني قصر رأيي وضعف عملي افتقرت الى رحمتك فاستلك ؛ اللهم  
يا قاضي الامور وشافي الصدور كما تجير بين البحور ان تجيرني من عذاب  
السعير ومن دعوة الشور ومن فتنة القبور ؛ اللهم ما قصر عنه رأيي وضعف  
عنه عملي ولم تبلغه نيتي وامنيقي من خير وعده احدنا من عبادك او خيرا  
انت معطية احداً من خلقك فاني ارغب اليك فيه واستلك يا رب العالمين ؛  
اللهم اجعلنا هادين مهتدين غير ضالين ولا مضلين حر بالاعدائك وسلا  
لاولياك نحب بحبك الناس وتعادي بعداوتك من خالقك من خلقك ؛ اللهم  
هذ الدعا و عليك الاجابة وهذا الجهد و عليك التكلان وانا لله وانا اليه  
راجعون ولا حول ولا قوة الا بالله ؛ اللهم يا ذا الجليل الشديد والامر الرشيد  
استلك الامن يوم الوعيد والجنة دار الخلود مع المقربين الشهود والركع  
السجود والموقين بالعهود انك رحيم ودود وانت تفعل ما تريد سبحانه من  
تعطف بالعر وقال به سبحانه من ليس المجد وتكبر به سبحانه من لا ينبغي التسبيح  
الا له سبحانه ذي الفضل والنعمة سبحانه ذي القدرة والكرم سبحانه الذي احصى  
كل شيء يعلمه ؛ اللهم اجعل لي نوراً في قلبي ونوراً في قبري ونوراً في سمعي  
ونوراً في بصري ونوراً في شعري ونوراً في بشري ونوراً في لحي ونوراً في دمي  
ونوراً في عظامي ونوراً في بين يدي ونوراً في خلقي ونوراً عن يميني ونوراً  
عن شمالي ونوراً من فوق ونوراً في تحتي ؛ اللهم زدني نوراً واعطني  
نوراً واجعل لي نورا « وبو دعائك اولنده واخرنده صلاة وسلام ايده »  
صكره قالكوب صلاة بخري قيله .

صلواة نافله لك او حنفي قسمي صلاة اشراقدر ، بونك وقتي شمك افقدن  
بر ربح مقداري ارتفاعنده در وبو صلاة اشراق ايكي ركعتدر وبونك ايكي  
ركعتنده دخي فاتحه دنصكره آمن (الرسول) ي اوقومق ياخود اوليكي ركعتنده

( نور السموات ) آيتي ، ايكنجي ركعتنده دخي ( في بيوت اذن الله )  
آي اوقومق مستحدر .

اشراق نمازي قلندقدن صكره بودعا اوقونور « اللهم ارزقني خير هذ  
اليوم وادفع عني شره » اللهم نور قلبي بنور هدايتك كما نورت الارض  
بنور قدرتك ، اللهم اني اصبحت لا استطيع دفع ما اكره ولا املك نفع  
ما ارجوا صبحت مرتبنا بعلمي واصبح امرى بيدغيري فلا فقير افقر مني ، اللهم  
لا تشمت بي عدوى ولا تسوي صديقي ولا تجعل مصيبي في ديني ودياري ولا  
في الاخرة ولا تجعل الدنيا اكبر همي ولا مبلغ علمي ولا تسلط علي من لا يرحمي  
في الدنيا والاخرة ؛ اللهم اني اعوذ بك من الذنوب التي تزيل بها النعمة ومن  
الذنوب التي توجب بها النقمة برحمتك يا ارحم الراحمين .

بودعدان صكره اوليكي ركعتنده فاتحه دن صكره ( قل اعوذ برب الفلق )  
وايكنجي ركعتنده ( قل اعوذ برب الناس ) اوقومق اوزره ايكي ركعت صلاة  
استغفار قيله ، سلامدن صكره « اعوذ بالله من الشيطان الرجيم رب اعوذ بك  
من همزات الشياطين واعوذ بك ان يحضرون اللهم اني اعوذ بك باسمك الاعظم  
وكلتك التامة من شر السا من والهامة واعوذ باسمك الاعظم وكلتك التامة  
من شر عبادك ومن عذابك واعوذ باسمك الاعظم وكلتك التامة من شر  
ما يجري به الليل والنهار ان ربي الله الذي لا اله الا هو عليه توكلت وهو رب  
العرش العظيم ، اللهم انك سلطت علينا عدوا بصير ايرانا هو وقبيله من  
حيث لا يرونهم ؛ اللهم آيسه منا كما آيسته من رحمتك وقنطه منا كما قنطه من  
عفوك ؛ اللهم ابعد بيننا وبينه كما بعدت بينه وبين جنك « دعاي شريفني  
اوقيه .

بوندن صكره دخي ايكي ركعت صلاة استخاره قيله وانك اوليكي ركعتنده  
فاتحه دنصكره ( سورة كافرون ) وايكنجي ركعتنده ( سورة اخلاص ) اوقويه  
وسلامدنصكره بودعاي اوقويه « اللهم اني استخيرك بعلمك واستقدرك بقدرتك  
واستلك من فضلك العظيم فانك تقدر ولا اقدر وتعلم ولا اعلم انك انت علام



الغيوب اللهم ان كنت تعلم كل قول وعمل في هذا اليوم خير لي في ديني ومعاشي وعاقبة امري فقدره ثم بارك لي فيه وان كنت تعلم كل قول وعمل في هذا اليوم شر لي في ديني ومعاشي وعاقبة امري فاصرفه عني واصرفني عنه وقدر لي الخير حيث كان .

هر ركعتيه فاتحه دن صكره بشر ( اخلاص ) او قومق اوزره ايكي ركعت ( شكر نهار ) نمازي قيتاق وعقيبده « اللهم لك الحمد جدا خالدا مع خلودك ولك الحمد جدا دائما مع دوامك لا منتهى له دون مشيتك ولك الحمد جدا دائما الاجزاء لقائه الارضاك ولك الحمد جدا دائما عند كل طرفة عين وتنفس عند كل نفس ولك الحمد جدا دائما عدد القطرات والنباتات والحجر والشجر والاوراق والحمد لله كفاحقه والصلوة والسلام على خير خلقه ، اللهم رحمتك ارجو فلا تكلفني الى غيرك طرفة عين ولا اقل من ذلك واصليح لي شاني كله لا اله الا انت وحدك لا شريك لك تب علي واغفر لي وارحمني انك انت ارحم الراحمين ، اللهم لك الحمد ولك المشتكا وبك المستعان وعليك التكلان ولا حول ولا قوة الا بك » دعاسني او قومق لازمدر .

بوند نصكره دخی ايكي ركعت ( كفارة ) نمازي قيله ، ايكي ركعتيه دخی فاتحه دن صكره يديشكره ( سورة كوثر ) او قويه ؛ بوند نصكره بر مصليحتي يوق ايسه ذكره يامراقبه يواسار عمله مشغول اوله واكر مصليحتي وار ايسه بودعايي اوقيوب مصليحتك قضاسته شروع ايد « اللهم كن وجهتي في كل وجهة ومقصدي في كل قصد وغايتي في كل سعي وملجائي وملاذي في كل شدة ووكميلي في كل امر وتولني تولى محبة وعناية في كل حال » ومصليحتي تحصيلده رب العالميني قلبندن مراقبه ايدوب وذكريني دخی لسانندن ترك ايتيه .

صلاة نافله نك در دنجي قسمي صلاة ضخير ؛ بونك ضل وقتي ، شمسك ربع سمايه ارتفاعي وقتيدر ، بونك الى درت واوسطي سكر واكثرى اون ايكي ركندر ؛ صلاة ضحى بي ( مس ، ليل ، ضحى ، انشراح ) سورة ليله

قيتاق وهر درت ركعتيه برسلاام ويرمك مستحيدر ؛ كيجه صلاتنده ايكي ركعتيه برسلاام مستحب اولديغي كي .

صلاة ضخير دن فارغ اولدقدنصكرم بودعايي او قويه « اللهم اني اسئلك علم الخائفين منك وخوف العالمين بك ويقين المتوكلين عليك وتوكل الموقنين بك وشكر الصابرين لك وصبر الشاكرين بك وانا بة الخبتين اليك ، اللهم صغر الدنيا باعيننا وعظم جلالك في قلوبنا ، اللهم وفقنا لمرضاك وثبتنا على طاعتك » بوند نصكره اكر مصليحتي يوق ايسه ياذكر يامراقبه وياقرائت قرآن ايله مشغول اوله وصكره ( قيلوله ) ايد ، زيرا قيام تهجد ايدنه كوره اولوقتده ( قيلوله ) ايتك سنتدر ؛ قيلوله دن قالقوب آبدست آلوب ايكي ركعت « سنت وضوء » قيلوب ظهر وقتنه دك مراقبه مشغول اولمق وظهرك وقتي دخول ايتدكده هر ركعتيه سور طويله دن برسوره او قومق اوزره درت ركعت ( صلاة زوال ) قيتاق مستحيدر ، اكر حفظنده سورة طويله دن يوق ايسه انك هر ركعتيه اوچر آية الكرسي او قومق اوليدر ؛ صلاة زوالى رسول الله صلى الله عليه وسلم ترك ايتيوب هر بار قيلارلر ايدى .

اندن صكره درت ركعت دخی ( سنت ظهر ) قيله وصلاة ظهري قيلدقدنصكره ايكي ركعت دخی سنت قيله اندن درت ركعت دخی نافله قيله انك اولكي ركعتيه ( آية الكرسي ) خالده دنه دك او قويه ، ايكنجى ركعتيه ( لله ما في السموات ) آخر سوريه دك او قويه اوچنجى ركعتيه سورة ( حديد ) ك اولندن ( بذات الصدوره ) دك او قويه ، در دنجى ركعتيه ( هو الله الذى لا اله الا هو عالم الغيب والشهادة ) دن آخر سوريه دك او قويه وبودرت ركعتي صلاة ظهر دن وصلاة عصر دن صكره قيتاق اترده وارد اولمشدر وعابدلردخی بوصلاته مداومت ايدوب چوق فائده سين مشاهده ايتمشدر .

سالكه لازمدر كه هر بار وضوء ايتدكده ايكي ركعت ( شكر وضوء ) قيله وهر بار مسجدده دخول ايتدكده ايكي ركعت تحية ( مسجد قيله ) ( وتنوير قلب ) ايچون كونده ايكي ركعت نافله قيله ، آنك هر ركعتيه فاتحه دن



صکره (شهد الله انه) بی (عند الله الاسلام) ه دك یدی کره اوقویه وسلامدن  
صکره یتش کره (یا الله الموفق) دیه وصلاتی کیجده وکوندزده ترك  
ایتموب قیلله ' زیرا سنتدر ' بوضلا ایچون امر وارد اولمشدر وعابدلر  
دخی بونک چوق برکتی مشاهده ایتملدر .

صلاة تسبیح — صلاة تسبیح کیفتی اوچ درلو اولق اوزره  
روایت ایدلش ایسه ده افضل روایت درت رکعتدر ' بوضلاتک کیفتی  
بودرکه الله ایچون نیت ایدوب نمازه دخول ایتدکن صکره اون بش کره  
(سبحان الله والحمد لله ولا اله الا الله والله اکبر) دیه ' صکره رکوعه  
واردقده ورکوعدن طوغردقده وسجده به واردقده وسجده دن قالقوب  
اوطوردقده اوزر کره اوقیه ' بو طریق اوزره هر رکعتده یتش بش ودرت  
رکعتده اوچوز کره تسبیح ایتش اولور .

رکوع وسجود تسبیح لینی دخی ترك ایتملیدر ' اگر سه وسجده اقتضا  
ایدر ایسه بوتسبیحی ذکره حاجت یوقدر و اگر بوضلا تسبیحی هرکون  
قیلق میسر اولز ایسه هفته ده برکون اولسون سالک بونی قیلق کرکدر .  
ودخی سالک لازم وواجبدرکه صلاة فرض وواجب وناقله ی قیلارکن  
آداب ظاهریه به رعایت ایتدکن صکره آداب باطنیه به دخی مبالغه ایله  
رعایت ومحافظه ایده ' زیرا رسول اکرم صلی الله علیه وسلم (لا صلوة الا  
بالحضور) پیورمشدر ؛ [حافظوا علی الصلوات والصلوة الوسطی] آیت  
کریمه سنده که صلاتدن مراد صلاة ظاهریه وصلوة وسطادن مراد صلاة  
قلب ومحافظة صلواتدن مراد آداب ظاهریه به ارکان ظاهریه ایله وآداب  
باطنیه به حضوع وخشوع وحضور مع الله ایله مراعات ایتک لازم کله جکی  
اشارت پیورمشدر .

پس ایدی سالک لازمدرکه قدرت وقوقی مقداری صلاتده ظاهر  
وباطن آدابنه رعایت ایده ' خصوصاً آداب صلوة دن شرط مشابه سنده  
اولان حضور مع الله زیاده اهتمام اولتیق واجبدر ' زیرا بعض مذهبه  
حضور ایله قیلنمیان صلاته باطل دیشلدر .

حکایه — حضرت علی کرم الله وجهه به برغزاده سهم اصابت  
ابتدی واول سهم پیکانی جسده شریفلرندن چیقارمقدن عاجز اولدیلر  
ویدیلرکه اگر بو پیکان چیقز ایسه ضرر ویرر ' اولوقت حضرت علی انله  
پیوردیلرکه بن صلوته شروع ایده ییم سن بیلدیککز کی لیمی یاروب پیکانی  
چیقارک وقالقوب صلوته شروع ایتدیلر ' جراحلر دخی جسده شریفی یاروب  
پیکانی چیقاردیلر ' بچان حضرت علی کرم الله وجهه صلاتدن فارغ اولدیلر  
قتنده اولان جماعته دیدیلرکه نیچون پیکانی چیقارمدیکز انلر دیدیلرکه  
چیقاردق لکن سن حس ایتدیکز !!! انتهى .

کور ایدی صلوته حضور نه کیفتیله اولور ایش ' لکن هرکسک بوکا  
استعدادی اولز ' ایدی هرکس استعدادینه کوره صلاتنده حضور مع  
الله اهتمام ایتک کرکدر ' زیرا لایکلف الله نفساً الا وسعها .

### (نظم)

مؤمنه اولدی صلاتی معراج \* آنی مؤمنلر ایدر باشنه تاج  
حاویدر جمله عباداتی صلاة \* برصلاته ویریلور بیک درجات  
کونده بش وقت امر ایدی اله \* ویرر آنی قیلانه رفعت وجاه  
دینی بنیاده صلاة اولدی عماد \* آنی ترك ایتز اولان اهل رشاد  
حق صلاة ایچره ایدر رفع حجاب \* ایدر آنده قولنه حسن خطاب  
ایده کوراکخلوص اوزره دخول \* ماسوادن ایده کور آنده ذهول  
کیم آنی ایتسه خشوع اوزره ادا \* بی نهایت ایده حق آکا عطا  
ایدن ارکان صلاتن تکمیل \* ویرر الله آکا چوق اجر جزیل  
اول ادب اوزره صلاته مشغول \* تا اوله حقه صلاتن مقبول  
نهی ایدر منکری دنیاده صلاة \* صاحبنه ویرر عقباده نجات  
کتورن حقه صلاتنده پناه \* ایتز اوزکه یره آنده نگاه  
حق ایله ایله صلاتکده حضور \* قره العین ایده تا سنده ظهور  
قیل الف کی صلاة ایچره قیام \* ایره کور مقصدیکه همچو سهام



قدیمی ایله رکوع کرده دوتا \* اوله سگ تا که عبادتده فنا  
ایده کور حقه حضوع اوزره سجود \* سجده کاهکده ایره سکا شهود  
قیل دوام اوزره صلاتن عشاق \* نور ایده تا که دلکدن اشراق

صیام تطوع — معلوم اولسونکه سالکله لازمدرکه نوافل  
مسنوندهن اولان صیام تطوعه ملازمت ایدر، زیرا سالک اولان کیمسه  
درت کون متوالیه افطار ایتسه البته آنک قلبنده قوت ونفسنده شهوت  
زیاده اولور، اولسالک سلوکنده صعوبت چکر، پس ایدی سالکله طریق  
سلوکنده صیامدن افضل طاعت واکل عبادت اولماز، زیرا صیام (الصوم  
خصاء) و (الصوم جنة) حدیث شریفلری مآلته نظراً نفسه مخالفتده  
جهاد اکبر وشیطانی مدافعهده آلت ظفر در.

صیام مکاشفه اسرار حقه بادی ومشاهده انوار حقه هادیدر، صیامله  
قلبه صفا وروح جلا ونفسه زکا حاصل اولور، جوع وعطش وریاضت  
وصلاة وصوم ایله مجاهده ایتمکجه هیچ برکیمسه کشفه نائل وشهوده واصل  
اولمز! ابو سلیمان دارانی (قدس سره) نک «برکون حرم شریفده  
وایام حازهده صائم ایدم، (صم فسوف تراه ان شاء الله تعالی) ندای  
هاتفیسنی ایشندم» دیدیکنی حکایت وبعض کتب منزلهده واجب تعالی  
حضرتلرینک [تجوع ترانی تجرد تصل] بیوردیغنی روایت ایدر.

اهل سلوکک سنت اوزره ملازمت ایتمکلی صیام متعدد طریق  
اوزره در، لکن اولطریقلر اوزره صائم اولق سالکک قدره وقوته  
مبنیدر، اگر سالک دوام اوزره صومه قدرتی اولورسه (صوم دهره)  
ملازمت ایتسون، اگر صوم دهره قدرتی اولمزسه (ایکی کون صائم) اولسون  
اگر بوکا دخی قدرتی اولمزسه (برکون صائم وبرکون مفطر) اولسون بو  
صورتله صیام (الصیام) اولان داود علیه السلام صومیدر، اگر بوکا  
دخی قدرتی اولمزسه (برکون صائم اولسون ایکی کون مفطر) اولسون

وبوکا دخی قادر اولمزسه هر یوم (ائین وخسینی صائم) اولسون، زیرا  
سالکله کوره طریق صیامده بوندن اسهل طریق اولمز وبوطریقلرک جمله سی  
حدیث ایله ثابتدر.

ودخی سالکله لازمدرکه هر شهرک اول و آخر ووسطنده برکون صائم  
اوله وشهور ذی الحجه وذی القعدة ومحرم ورجب وشعبانک عشر اوللرینی  
صائم اوله، ستة شوالی دخی صائم اوله، زیرا ستة شوالک افضلیتی  
حقنده [من صام رمضان ثم اتبعه من شوال کان کصیام الدهر] حدیث  
صحیحی وارد اولمشد.

فقط سالک بوصیامی اجر ملاحظه سیله وثواب قصیدیه طوتمیوب بلکه  
تحصیل رضاء الله واتباع رسول الله ایچون طوته، تا کیم اول صیامدن  
قریبت حق حاصل اوله، سالکله لازمدرکه یالکز بطنی وفرجی مفطرات  
ثلثه دن امساک ایتیه، بلکه جمیع قوی وحواسنی دخی شرعه مخالف اولان  
اموردن امساک ایده ونفسنی اخلاق ذمییه وقلبی تعلقات ماسودن امساک  
ایده، تا کیم اولسالک صوم شریعت ایله صوم طریقت وحقیقتی طوتمش  
وایکیسنی جمع ایتش اوله، زیرا چوق کیمسه لر اکل وشربدن امساک ایدرلر  
اما قوی وحواسنی مخالفات شرعییه دن امساک ایتمزلر، اول کیمسه لرک صومدن،  
جوع عطشیدن غیری حاصللری اولمز، زیرا اکلر عند الله مفطرلردر،  
هر نقدر عند الناس صائم اولدیلر ایهده، تکیم حدیث شریفده (صائم  
عند الناس مفطر عند الله) و (من صائم لیس له صیامه الا الجوع والعطش)  
واردر اولمشدرکه بویله صوم ایله صائم اولان رضاء اللهی تحصیل ایدوب  
اللهه تقرب ایدمز، بلکه بویله صوم بعده باعث مقت الله اولور.

### (نظم)

|       |     |       |        |
|-------|-----|-------|--------|
| صومدر | عفو | خدایک | سبی    |
| صومدر | هر  | عملاک | منتخبی |



صوم ایله صائم اولور اهل وصال  
 صمدیه بولور حسن خصال  
 طرد اولور صوم ایله ابلیس لعین  
 رام اولور سرکش اولان نفس خشین  
 صومدر شهوتی قطعک قلیچی  
 صامی نفسنه مالک قلیچی  
 صوم صامدن ایدر صرف هوا  
 هر ایشک دانه صوم اولدی دوا  
 صوم ایدر تنقیه جله جسدی  
 صوم ایدر تزکیه هر نفس بدی  
 صوم ایله ابتسه تشفی مرضا  
 ویرر الله آکا البده شفا  
 ملکه صوم ایله بکزر صائم  
 اولور اولطاعت حقه دائم  
 فخر ایدر صوم عباد ایله خدا  
 ایدر اجرینی نهایتسن ادا  
 صومدر بندهک اعلا علی  
 حق آنکچون دیر آکا (صومک لی)  
 صوم ایله صائم اولور نفسه غرا  
 اولور آنکه کراماته سزا  
 ایره هر طاعتنه دست خصما  
 صومدن آلمیه بر شی غرما  
 حفظ ایدر صومی قیامتده خدا  
 ایدر اصحابنه اجرینی عطا  
 فتح اولور صائم ایچون باب رضا  
 رد اولور نازل اولان حکم قضا

صائم صومی اولور ناره حجاب  
 صوم اولور صائم ایچون جنته باب  
 صوم ایله ترک سوا، ایکی جناح  
 بویوله بونلر ایله اولدی رواح

قرائت قرآن — نوافل مسنونهدن اولان قرائت قرآن سالک  
 منتهیلره کوره ذکر دن افضلدر، منتهی اولان سالک قرائت قرآنده اسرار  
 ذات الهی استکشاف و حقایق اسماء و صفات الله اطلاق و آداب  
 عبودیتی ادراک و ازعان ایدوب حقیقته واصل اولور، زیرا قرآن عظیم  
 الشان جمیع علوم اولین و آخرین حاوی و علم شریعت و طریقت و حقیقتی  
 شاملدر، لکن بوعلموی اطلاع سالکک استعدادینه مبنیدر.

سالک منتهی بوعلموی قرائت قرآنده مطلع اولدقده همتی فوت اولور  
 و یقینی زیاده اولور، حق تعالی نک مشاهده سنه اهتدا بولور، نتکم [ولقد  
 انزلنا الیکم آیات مبینات هدی للناس و بینات من الهدی والفرقان] وارد  
 اولمش و قرآن اوقور کن حق تعالی عارفله کلامنده نبلی ایدر و تعدادی  
 غیر قابل علوم لدنیه و حکم غیبیه ظهور ایلر؛ بوکا اشارت اولمق اوزره  
 رسول اکرم صلی الله علیه وسلم افندمن طرفندن (ان للقرآن بطنا و لبطنه  
 بطنا الی سبعین بطنا) بیورلمش و بعض عارفله طرفندن دخی (ففی کل کلمه  
 من القرآن الف فهم) دنیلشدر.

سالک منتهیلره لازمدر که قرآن عظیمدن کیجه ده و کوندزده بر مقدار  
 قرائت قرآن عظیمی کندویه ورد ایدوب برقاج کونده برقرانی ختم ایده  
 و ختم قرآنه ورد اولمق اوزره مداومت ایدنلر برقاج طرق اوزره در؛  
 بعضیلر اوچ کونده بر ختم ایدرلر، بعضیلر اکثرده، بعضیلر اقلده، ختم  
 ایدرلر، لکن سنت اولان هفتده بر ختم ایتمک کرگدر، بوکا قادر اولمز ایسه  
 اون بش کونده و الحاصل اوتوز کونی تجاوز ایتمیه رک کونده بر جزه اوقیوب



آیده برختم آیده ، هفته ده بر کره ختم ایدنلر ایچون صورت آتیه اوزره  
اوقومق بعض صحابه کرامک ترتیبدر .

جمعه کیجه سی سورة بقره دن ابتدا ایدوب سورة انعامه وسبت کیجه سی  
سورة انعامدن سورة یوسفه واحد کیجه سی سورة یوسفدن سورة طه به  
واثنین کیجه سی سورة طه دن سورة عنکبوته وثلاثا کیجه سی سورة عنکبوتدن  
سورة تنزیله واربعه کیجه سی سورة تنزیلدن سورة رحمانه وخیس کیجه سی  
سورة رحماندن اوقویوب جمعه کیجه سی مغرب ایله عشا بینده ختم ایتلیدر که  
بوتریب اوزره قتی چوق عابدلر ختم قرآن ایتدیلر .

قرائت قرآنک شروطنه رعایت ایتک قارئنه لازمدر ، تاکم اسرار  
قرآنیه شروطه رعایت سببیه اکا کشف اوله ، شروط مذکور بونلردر ،  
قرآن اوقیان کسه اولان طهارت کامله ایله برطاهر محمله قبله به متوجهاً  
دیز اوزرینه جلوس ایدوب صکره ذنوبندن اخلاق ذمیمه دن توبه ایدوب  
قلبی دخی تعلقاندن تجرید آیده ، صکره مصحف شریفی تعظیم ایله آچوب  
اعوذ وبسمله ایله سورة فاتحه یی اوقیوب صکره وظیفه سی اولان قرآنه  
شروع و آیت کریمه لک معانیسنده قول مفسرینی ومعانی لغویه سنی ملاحظه  
آیده ، دائم ذهننی حق تعالی جانبنه توجیه ایدوب سمعی حقه القا آیده  
و حق تعالیدن اصفا ایدر کی کلام الهی تلاوت آیده ، قدرت وعظمت  
الهییه یی تدبر وتفکر آیده ، اسرار حقک ظهورینه کلامندن منتظر اوله ،  
اخلاق قرآن ایله مخلوق واحکامیه محکوم اولغه عزم آیده ، بشارت  
آیتلرینی تلاوته استبشار آیده و وعید آیتلرینی تلاوته اللهدن خشیت ایدوب  
بکا آیده ، حروفات قرآنییه تجوید و کلماتی ترتیل آیده و قرائته استحجال  
ایجابوب تانی اوزره اوقویه وصوتنی جهریله اخفا بینده اخراج آیده ،  
قرائتی قطع مراد ایتدکده نحرز ایدرک قطع آیده و دیه که باری کلامندن  
ملالت ایچون قطع ایتم اقتضای مصلحت ایچون قطع آیدرم ، صکره بونی  
دخی دیه ( صدق الله العظیم سبحان ربك رب العزة عما یصفون وسلام علی  
المرسلین والحمد لله رب العالمین ) و سورة فاتحه یی دخی اوقویه و صکره

مصلحتنه مشغول اوله ، لکن قرآن عظیمدن کندنده حاصل اولان حالت  
مراعات ایدوب حفظ آیده .

قرآن عظیمی کیجه اوقومق کوندز اوقومقدن افضلدر ، زیرا کیجه قرآنک  
قلبه تأثیری زیاده در ، نیکیم حق تعالی بیوردی [ ان ناشئة اللیل هی اشد  
وطناً واقوم قیلاً ] و قرآن عظیمک اسراری کیجه قرائته زیاده ظهور ایدر  
وحافظلره کوره حفظدن اوقومقدن مصحفه نظر ایدوب اوقومق افضلدر ،  
زیرا مصحفدن اوقومقده حضور زیاده اولور .

### ( نظم )

حق کلامک آیده کور ورد زبان \* سسکا اسرارین آیده آنده عیان  
حل اولور آنی تلاوته رموز \* فتح اولور آنی قرائته کنوز  
کشف اولور آنده تدبرله علوم \* شرح اولور آنی تکررله فهم  
بولور آنکله ضلال اهلی هدا \* یلنور آنک ایله راه خدا  
دینی حق آنک ایله ایتدی بیان \* حق یولنده قومادی شک و کان  
نور حقدر بزه کلدی قرآن \* حق ایله باطله اولدی فرقان  
ذات حق کیدر اول وصف قدیم \* بکره مز بر صفتیه مثلی عذیم  
ایدر اول ذات الهیده قیام \* آکادر دال مطابق بو کلام  
هر حروفیدر آنک بحر حکم \* اولدی آیتلری اسرار ایله یم  
یوقدر عالم ایچنده ذی حد \* آنی قرآن عظیم ایتیه عد  
نور ایمانک اودر مقتبسی \* درس عرفانک اودر مدرسه سی  
ایتسه آنکله تشفی مرضا \* ایدر البتده آکا بخش شفا  
اوقویانلر آنی هر صبح ایله شام \* ایدر اللهیه مناجات کلام  
مصحفی دستکه تعظیم ایله آل \* ایله آداب ایله ترتیل مقال  
صفتدن ایدو بن ذاته صعود \* آیده کور حق کلامندن شهود  
قیل حضور اوزره قرآنه آغاز \* ایله قرآنی حقک اعزاز  
ویره کور قلبه تلاوته جلا \* بیله سسک تاکه ندر ما اوحی



قرائت اوراد و احزاب — نوافلک در درنجی قسمی اوراد  
واحزاب اوقومقدر .

طریقته رسوخ بولان سالک ایچون کیچیه وکوندزده نوافل مسنونہ دن اولان  
اوراد و احزاب ایله مشغول اولمق ، سائر عبادات ایله اشتغالدن انفعدر ،  
زیرا سالک راسخ اوراد و احزابده ایده جکی حد و ثنا و تسبیح و تنزیه و تضرع  
و نیاز و مراجعتلر ایله حق تعالیٰ به بردلور تقرب و حق تعالیٰ بدن بردلور  
استفاضه ایدرکه آکار آخر طریق ایله وصول اصلاً ممکن اوله ماز ،  
انکچون [ من لاورد له لاوارد له ] دنیلدی .

سالک راسخه لازمدرکه لیل و نهاردن بروقتده اوراد و احزاب مشغول  
اوله و هر بارکه اول وقت دخول ایدر ، اول اوراد و احزاب اوقیوب ترك  
ایتمیه ، زیرا اوراد و قتیه مخصوص عبادت دیمکدر ، بو حالده اورادینی وقتده  
اوقومق سالک لازمدرکه اووقتیه مخصوص اولان فیض منقطع اولمیه ؛ اگر  
قضا ایله ترك اولور ایسه کرکدرکه بر آخر وقتده آنی تدارک ایدر ، تا کیم اول  
کیمسه تارك ورد اولوب حدیثده کی ( تارك الورد معلون ) وعیدینه داخل  
اولمیه .

معلوم اولسونکه علماء بالله و اولیاء آکاهک ترتیب و تألیف ایتدکلری  
اوراد و احزابدن رسول الله صلی الله علیه وسلمدن وارد اولان اوراد  
و احزاب افضل و اکمل اولدینی [ و ما ینتطق عن الهوی ان هو الا وحی یوحی ]  
نص جلیلی ایله مرتبه ثبوتیه وارمش و جناب رسول اللهدن مأثور اولان  
تسبیحات و تهلیلات و استغفارات آتیده ذکر و تعریف ایدلمش اولدیغندن  
هر کیم آنلره مداومت ایدرسه اکا کفایت ایدر .

اوقاتدن دخی اقشام وقتده اوراد اوقومق سائر وقتلرده اوقومقدن  
افضلدر ، زیرا الله تعالیٰ اولوقتلی تعین ایدوب [ و سبح بحمد ربک قبل  
طلوع الشمس و قبل غروبها ] و [ و من اللیل فسبح و اطراف النهار ]  
یورمشدر ، بناء علیه اوراد و ازکار ایچون بو اوج وقتدن افضل وقت  
اولدینی آکلاشیلور .

سالک مستحب اولان غروبدن اول یوزر کره ( لاله الا الله وحده  
لا شریک له له المملک وله الحمد یحیی و یمیت و هو حی لا یموت بیده الخیر و هو علی  
کل شیء قدير ) و ( سبحان الله و الحمد لله و لا اله الا الله و الله اکبر ) و ( لاله  
الا الله المملک الحق المبین ) و ( اللهم صل علی النبی و علی آله و صحبه و سلم  
عدد ما علمت و ملاء ما علمت ) و ( بسم الله ماشاء الله لا قوة الا بالله )  
( استغفر الله الحی القیوم و اسئله التوبه رب اغفر وارحم و انت ارحم  
الراحین ) دیه ، اندنصکره سورة شمس ایله و اللیل سورة وضحی و معوذتینی  
برر کره اوقویه ، بعده شمس غروب ایدنجهیه قدر ( استغفر الله العظیم  
الذی لا اله الا هو الحی القیوم بدیع السموات و الارض و ما بینهما من جمیع  
جرمی و ظلمی و ماجنیت علی نفسی و اتوب الیه ) استغفارینه مشغول اوله ،  
غروبدن صکره دخی ( اللهم عند اقبال لیلک و ادبار نهارک و اصوات  
دعائک و حضور صلاتک و شهود ملائکتک صل اللهم یارب علی محمد و علی آله  
واعطه الفضیله و الوسیله و اعطه المقام المحمود الذی وعدته رضیت بالله ربا  
و بالاسلام دینا و بمحمد صلی الله علیه وسلم نبیا ) دعاسنی اوقویوب صلاة  
مغربیه شروع ایدر .

صبح نمازینی ادا ایتدکنصکره یوز کره ( سبحان الله و بحمده استغفر  
الله العظیم و اتوب الیه ) و ( سبحان الله و بحمده لا قوة الا بالله ) و ( لاحول  
ولا قوة الا بالله العلی العظیم یا قدیم یا دائم یا قائم یا حی یا قیوم یا فرد یا وتر یا احد  
یا صمد یا من لم یلد و لم یولد و لم یکن له کفوا احد یا من الیه المصیر ) و ( بسم  
الله ماشاء الله لا قوة الا بالله ) و ( اللهم صل علی محمد عبسک و نبیک الامی  
و علی اله و صحبه و سلم عدد ما ذکره الذاکرون و عدد ما غفل عن ذکره الغافلون )  
والی کره ده ( اللهم اغفر لی و للمؤمنین و المؤمنات و المسلمین و المسلمات حیهم  
و میتهم شاهدهم و غائبهم قریبهم و بعیدهم انک تعلم مثنویهم و متغلبهم ) دیه که  
سالک بو اوراده مداومت سببیه حق قتنده بدلادن اولور ؛ اون کره دخی  
( اللهم اصلح امة محمد اللهم ارحم امة محمد اللهم فرج عن امة محمد ) دیه .  
بو ایکی وقتده سالک مصلی سنده اوطوروب تسبیح و تهلیل و استغفار



ایتمدنک فضیلتند قتی چوق آثار وار ایسه ده ( یا ابن آدم اذکرفی من بعد صلاة الفجر ساعة وبعد صلاة العصر ساعة اکفک ما بینهما ) حدیث قدسیسنگ ذکر ایله اکتفا ایلدم .

سالکله لازمدرکه ورد اولق اوزره صلاة فجر دن صکره ( یس ) وصلاة ظهر دن صکره سورة ( ملک ) وصلاة عصر دن صکره سورة ( نباء ) صلاة مغرب دن صکره سورة ( واقعه ) وصلاة عشاء دن صکره سورة ( ملک ) اوقویه ، زیرا برکیمسه بوسوره لری بووقتله اوقیوب ورد ایدنسه اول کیمسه حق قتله اهل قرأتدن یازیلور .

طریق نقشبندی دن اولان سالکله لازمدرکه بوطریقته مخصوص اولان ختم خواجکانی هر اثنین و جمعه کیمه سی ورد ایدوب اوقویه ، زیرا بوختم شریفک فیض و فتوحی غایت چوقدر ، بعضیلرینی نظم ایله ذکر ایتدم .

بوختم شریفک شرطلری بودرکه بونی اوقویان بوطریقته اولق یاخود مأذون اولق کرک ، اندنصکره طهارت کامله ایله بر محل طاهره ده قبلایه متوجهاً ایکی دیزی اوزره اوطوروب جمیع کناهلرندن توبه واستغفار ونفسنی اخلاق ذمیه دن تطهیر و قلبنی تعلقاتدن تجرید ایدوب صکره خواجکان حضراتنک روحانیترین توجیه و آنلردن استمداد واستعانت ایده ، صکره الیرینی قالدیروب ( الحمد لله رب العالمین والصلاة والسلام علی خیر خلقه محمد وآله وصحبه اجمعین سبحان ربی العلی الاعلا الوهاب اللهم یا مفتیح الابواب ویا مسبب الاسباب ویا مقلب القلوب ویا ابصار ویا دلیل المتخیرین ویا غیاث المستغیثین اغثنی توکلت علیک یارب وفوضت امری الیک یارزاق یا فتاح یا باسط وصلی الله علی خیر خلقه محمد وآله وصحبه اجمعین ) دعاسنی اوقویوب الیرینی یوزینه سوره ، بوندن صکره مع بسمله فاتحه شریفه یی یدی کره و صلوات شریفه یی یوز کره و الم نشرح لک سوره سنی مع بسمله یتمش طقوز کره و اخلاص شریفی مع بسمله بیک بر کره و بعده مع بسمله فاتحه شریفه یی یدی کره و صلوات شریفه یی یوز کره اوقویه آندنصکره الیرینی قالدیروب دعا ایده .

بوختمک ثوابی روح کریم رسول الله و بعده ارواح اصحاب رسول الله ایله ارواح خواجکانه هدیه اولنور ایسه اولی واحسن اولور والله تعالی آندن دخی زیاده اکا اجر ویرر ، اگر بوختم شریف جماعته اوقنورسه بوعددلری جماعته تقسیم ایده و عددینی زیاده و نقصان ایتمکله اهتمام ایده و مجلس واحده اوقویه ، اوقودیغی نسنه لری جمله تجوید ایله اوقویه و اخفا ایله اوقویه تاکه جنبینده اولان کیمسه ایشتمیه ، اثنای ختم تطیب ایتک و مجلسی تبخیر ایتک مستحدر .

### ( نظم )

ایرر مقصودینه اول کیمسه ختم خواجکان ایلر  
جهانک جاه واجلانده کسب عز و شان ایلر  
بوختمی اوقومق کثرت ویرر اموال و اولاده  
کرفتاری ایدر آزاد غدن شادمان ایلر  
بوختم ایله بولور خائف سلامت شر اعدادن  
ادای دینی اول مدیون اولنلردن ضمان ایلر  
شغالر بخش ایدوب اصحاب امراضه ویرر صحت  
سلوک اربانه اسرارینی حقل عیان ایلر  
بوختمک فیض روحانیتک اول کیمسه آکلر کیم  
طریق نقشبندی اوزره ختم خواجکان ایلر

خاتمه — اهل سلوک ایچون لازم اولان بعض اموری حاویدرکه  
آنلر ایله اگر برسالک عمل ایدر ایسه واصل حق اولور .

سالکله اول لازم اولان بودرکه مظهر تجلای الهی اولمش بر شیخ کامل  
بولوب آنی حق تعالی حضرتنه واسطه ایدینوب آکا اقتدا ایده ، جمیع  
امورینی آکا تفویض و تسلیم ایدوب آکاربط رابطه محبت ایده که اندن استعانه  
واستفاضه یه استمداد حاصل اوله ، زیرا مفیض ایله مستفیضک بیننده مناسبت



معرفت شرطدر ؛ سالک مبتدی حقدن محجوبدر و حقدن محجوب اولانك  
حقه مناسبتي يوقدر و مناسبتي اوليان كيمسه حقدن استفاضه خاصه ايده من  
زيرا مبتديك مناسبتي شيخه اولوب شيخدن طريق استفاضه تحصيل ايتدكدن  
صكره حق تعاليدن طريق استفاضه يي بيلور ، حق تعاليدن دخی بلا  
واسطه استفاضه ايلر ، زيرا سالک محجوب جهت امكندن منزله اولان  
ذات واجب الوجوده معرفت خاصه سي و قرينيت معنويه سي اولدن استفاضه  
ايده من ، بناء عليه سالكه حق بيلدبرر و واسطه وصلت اولور بر شيخ  
مربي كركدر كه آندن تربيه كوروب آنكه حقه معرفت حاصل ايده ، زيرا  
رسول اكرم ( لولى المربي لما عرفت ربي ) بيورمشدر .

اكر طالب حق اولان كيمسه بر شيخ مربي بولوب آنكه حقه واصل  
اولز ايسه كركدر كه كلمه توحيد شروط و آداب ايله مداومت ايدوب  
رسول الله صلى الله تعالى عليه وسلم سنت سنه لرينه اتباع ايده  
وروحانيت عليه لرينه دخی دائم توجه ايدوب انلردن استمداد و استفاضه  
ايده ، تاكيم بو طريقه اول كيمسه واصل حق اوله ؛ چونكه بو كلمه طيبة  
توحيدى حق تعالى رسول اكرمه قوللريني كندينه ايصال ايچون انزال  
ايدوب تعليم ايتمشدر .

كلمه توحيد شرك جليدن قلبى پاك ايتديكى كې شرك خفيدن دخی پاك  
ايدر ، ظلمت طبيعتى و حجاب غفلتى ازاله ايدوب حق مشاهده سبب  
اولور ، زيرا بو كلمه طيبه نفي ايله اثباتدن مركبدر ، نفي ايله حجاب موانع محو  
اولوب اثبات ايله انوار تجليات آشكاره اولور ، آنچون رسول الله  
( افضل كلمه قلت انا والنبون قبلى لا اله الا الله ) بيورمشدر .

طالب حقه كركدر كه بو كلمه طيبه يي قيام و قعودنده و حركت و سكوتنده  
دائم الاوقات حضور قلب ايله نفي بشريت و اثبات الوهيت ايدرك لسانا  
ياخود قلباً ذكر ايده ، تاكيم آنده حقيقت توحيد ظهور ايدوب واصل حق  
اوله ، شيخ شهيد مجد الدين بغدادى قدس سره نك ( اتفق المشايخ قدس الله

ارواحهم على ان المرید مالم يسلك طريق لا اله الا الله مدة قريبة باربعين  
سنة لا يصل الى حقيقة لا اله الا الله ) ديديكى و خواجه محمد حكيم ترميذى  
قدس الله روحه نك دخی « بر كيمسه كه دوام دولت ايمان طلب ايدر ، اكا  
كر كدر كه هر حال و كاردنه لا اله الا الله كلمه سين ، ذكر ايده و آنك ذكريني  
كندينه عادت و سجيه ايده ، زيرا بو كلمه طيبه ظلمت شرك جلي يي محو ايتديكى  
كې ظلمت شرك خفي يي دخی محو ايدر ، نور ايماني تجديد ايدوب حقيقت  
ايماني ايصاح ايدر ، حقيقت ايمانك ايصاحندن صكره حق تعالينك تجليسنه  
ايصال ايدر » ديه بيان حقيقت ايتديكى روايت اولمش و كلمه توحيدك لزوم  
ذكرينه اشارت اولمق اوزره اثرده [ جدد و ايمانكم بلا اله الا الله ] وارد  
اولمشدر .

حق تعالى به سالكر اوج طريق ايله وصلت ايدرلر ؛ يا طريق جمال ايله  
فقط و يا طريق جلال ايله فقط ؛ يا خود طريق جلال و جمال ايله معاً وصلت  
ايدرلر ؛ لكن طريق جلال و جمال ايله وصلت ، طريق جلال و طريق جمال  
ايله وصلتدن افضل و اكملدر و طريق جمال و جلال ايله وصلت ايسه انجق  
كلمه توحيد ايله اولوب سائر اسماء ايله اولماز ، زيرا سائر اسماء يا جمال و يا  
جلاله دالدر ، اما كلمه توحيد نفي ايله اثباتدن مركبدر ، نفي جلاله و اثبات  
جماله دالدر ، انكچون كلمه توحيد صفت جلال و جمال ايله سلوكه طريق  
اولمشدر .

كلمه توحيد ايله سلوك ايدوب پرورش بولان سالک حق تعالى به طريق  
جلال و جمال ايله وصلت ايتمش اولور ، انكچون كلمه توحيد ايله حقه واصل  
اولان سالک صاحب قدرت و قوت اولوب شريعتى حقيقتله جمعه قادر  
اولور ؛ خوف و رجا صاحبي اولوب جلالده جالى و جمالده جلالى مشاهده  
ايدر ، اهل اداب اولوب حق خلقده و خلق حقده مشاهده ايتدكده  
ايكى مشاهده نك حقنى اعطا ايدوب حق خلقدن و خلق حقدن تميز ايدر ،  
اشتباه و التباس ورطه سنه دوشمز ، صاحب تمكين اولوب صفات متقابله دن



اكا تغير كز ، عزالت و ذلت و لطف و قهر عندنده يكسان اولور ، تجليات ذات و صفات و استماعنده بر اولور .

اما يالكز صفت جلال ايله پرورش بولان بر سالك تجلي صفت جالدين متغير و متلون اولوب شطحياتي قائل و الحاده مائل اولور .

يالكز صفت جمال ايله پرورش بولان سالك ايسه تجلي صفت جلاله تحمل ايده ميوب يا منحير و يا مستهلك اولور ، ابوتراب نسفينك مریدی سلطان العارفين ابوزيد بسطامينك يوزيني كوردكده هلاك اولديغي كي .

سلطان العارفينه بومستلتهك حكمتندن سوال ايتدكلرنده « اول مرید طريق صفت جمال ايله سلوك ايدوب پرورش بولمش ایدی ، بن اول وقت مظهر تجلي صفت جلال ایدم ، چنانكه يوزيمه نظر ايتدی ، جلالی يوزمده مشاهده ايتدكده تحمل ايده ميوب هلاك اولدی ، اكر اول مرید طريق جلال ايله پرورش بولسه اول مشاهده دن هلاك اولمز ایدی » بيورديلر .

سالك اولان كيمسه كلمه توحيدى ذكر ايله معانيسنده ( لاموجود الا الله ) معناسنه ترقى ايدوب ( لاموجود الا الله ) معناسنى ملاحظه ده مواظبت ايتمز و جميع كائناتى دخی عدمیت ايله ملاحظه ايليه رك يعنى جميع موجوداتى عرشدن فرشه دك ذاتلرنده معدوم و وجود حق ايله موجوددر و جميع افعالى فعل واحددر ديو ملاحظه ايلز ايسه ده توحيد حقيقيه واصل اولوب اسرار وحدت وجود حق اشياده مشاهده ايده من ، اكر بوملاحظه اوزرينه مواظبت ايدر ايسه نفسندن وسائر اشياذن آنده فناى تام حاصل اولوب نفسنده وسائر اشياده حق تعالينك اسرار وجودينى و آثار اسما و صفاتنى مشاهده ايدر و ( مافى الوجود سوى الله ) سربنه واقف اولمغله « مارأيت شيئا الارأيت الله فيه » كلامنى تسكلمه كسب استحقاق ايلر .

### ( نظم )

حق ايدر اسرارينى اشياده هر دم آشكار  
قلب استرا اول اول اسرارى اذعان ايليه

كوره كيم يوقدر بوانوارنده آنك هيچ خفا  
چشم بنياد استر اول انوارى سيران ايليه

سالك حقيقت اولان كيمسه يه لازمدر كه ارادت صادقه ايله حق تعالى يي اراده ايتدكده نصكره سائر ارادات و اختياراتى جمله ترك ايده ، نفسنده اولان هوا و هوسلرى سلب ايده ، كندينى معدوملر حكمنه ادخال ايده ، قلبنده اولان رسوم و تعينى و قيود تعلقى تجريد ايده ، حول و قوتندن خروج ايدوب حق تعالينك يد قدرتنده « ميئك يد غسالده تقلى » كېي ثقلب ايده ، فقر وفاقه يي اختيار ايدوب دولت دنيايى ترك ايده ، دائم جناب حقه اشتياق ايله توجه ايده ، زيرا خلقتك حق تعالى يي مشاهده دن محجوب و فضلندن محروم اولملى كثرت ارادت و اختيارندن و حب دنيا و ماسوادن اولمشدر ، يوقسه حق تعالينك خلقندن بعيد اولوب فضلندن عدم شمولى اولديغندن دكلدر ، زيرا [ ونحن اقرب اليه من حبل الوريد ] و [ والله ذو الفضل العظيم ] آيت كريمه لرى بوكا اشارتدر .

### ( نظم )

ای مرغ دل بودام بلادن خلاص ايجون  
عنقالتى ايله ايمه جهان دارينه هوس  
جوفضای عالم قدسك هماسى اول  
قونمه صقین بولاشه دنيايه چون مكس  
ترك ايده كور بوجله ارادات نفسى  
تا اوله سين فيوض الهى يه دست رس  
محو ايله دلده قويمه رسوم علايق  
وصل خدایه مانع اولان هر قيودى كس

نثر — سالكه لازمدر كه روياده كوريلان معانى يه اعتبار ايدوب  
قلبنى انلر ايله مشغول قليمه ، كرك اول روياده كوريلان معنالر سالكله



نفسه متعلق اولسون و كرك آفاده متعلق اولسون ، زیرا رؤیایك بعضیله  
 اوهام فاسده و خیالات کاسده دن ظهور ایدر و بعضیله تعلقات ماسوادن  
 نشأت ایدر و بعضیله کشف الهیدن انجلا ایدر ، اول کوریلان رؤیای  
 بو طریقله قنغسیله اولورسه اولسون ، سالکله لازمدرکه آنلر ایله قلبی  
 مشغول ایدوب حق تعالیدن محجوب اولمیه و بوندن معلوم اولدیکه کشف  
 الهی ایله اولان رؤیایله بیله اعتبار ایدوب قلبی انکله مشغول ایتیه ، زیرا  
 اولدخی سالکله سلوکنده فائده ویرمز ، لکن او قدر فائده ویررکه سالک  
 مقامک ندرتبهده اولدیغنی بیلور و بونی بتلدن ایسه بیله مه سی اولادر ، زیرا  
 سالک سلوکنده مقامی بیلک قیددر و بعضی اولورکه سالک مقامنده اعلا  
 اولدیغنی بیلور نفسنده عجب حاصل اولور ، عجیبه مردود حق اولور ،  
 بناء علیه رؤیایله اعتبار ایتک سالکله ضرردر .

مشایخن بعضیله سالکله رؤیایله اعتبار ایتلی سالکله مقاملری  
 رؤیایله بیلوب آنلری تسلیم ایتک ایتک ایتک یوقسه شیخ کشف ایله  
 سالک مقامی بیلدکه رؤیایه حاجت یوقدر .

سالکله لازمدرکه کشفنده ظاهر اولان نقوش صورملک و ملکوتیه نظر  
 ایتیه ، زیرا ملک و ملکوتک احوالی کشف سالکله رهزیدر ، سالک  
 اولکشفه تعلق ایدرده سلوکندن منقطع اولور و اولکشفه راضی اولوب  
 قالدورسه حق قتنده مطرود اولور ، سالکله لازمدرکه اصلا بروجهله  
 حقدن کرامت طلب ایتیه ، بلکه سالکله لازمدرکه کرامتدن حق تعالییه  
 صیغنه ، زیرا که کرامتله اکثری سالکله مکر اولور چونکه کرامتده  
 حظ نفس و حق تعالینک تصرف قتنده اثبات تصرف واردر ، بناء علیه  
 رسول الله صلی الله علیه وسلم افندمز ، حضرت علییه ( یا علی لا تطلب  
 الکرامه ) بیوردیلر .

### ( نظم )

خواب غفلتدن کوزک آج دوشمه رؤیا فکرینه  
 ایلله اضغاث واحلام ایله قلبی پرغبار

التفات ایتیه صغین کشفکده نقش عالمه  
 تا اوله قلبکده نقاشی اونقشک آشکار  
 عالم ظاهرده اظهار کرامت ایتیه  
 تا که نفسک ایتسون وارلق یولنده افتخار  
 حضرت حقدن کرامات استین محجوب اولور  
 ایلز عارف کراماته انکچون اعتبار

نثر — سالکله لازمدرکه هر حالده اطاعت شرع و اتباع سنت  
 ایدوب عزیمتله ایله عمل ، رخصتلدن اجتناب ، بدعتلدن اعراض ایدیه ،  
 اگر بر سالک جمیع سنتلری قدرتی یتدوکی قدر اشلرسه حق تعالینک امرینه  
 امتثال ایدوب محجوب حق اولور ، نیکم بیوردی [ قل ان کنتم تحبون الله  
 فاتبعونی یحببکم الله ] و اگر جمیع بدعتلدن اعراض ایدرسه اهل سنتدن  
 اولوب هدی رسول الله اولور ، اگر مجاهدات و ریاضات اوزره  
 مداومت و ملازمت ایدرسه حق تعالی اکا طریق مشاهده سنی البتده  
 هدایت ایدر نیکم [ والذین جاهدوا فینا لنهیدنهم سبلنا ] بیوردی .

### ( نظم )

بوراهک اطاعتله اولور یاقین اراغی  
 جهد ایله عبادتدن اولور زاد بلاغی  
 حقل ایشور قربته کیم اویسه رسوله  
 سنده اویه کور اثر رسوله قو ، آیغی  
 نفسیله جهاد ایتیه که کیم چکسه ریاضت  
 البتده قورار عرش شهود اوزره اوتاغی  
 سالک نیجه واصل اوله در کاهنه حقل  
 دیبادن آنک اولمسه قلبنده فراغی

نثر — دخی سالکله لازمدرکه هرند عبادت ایدرسه شوق و ذوق  
 ایله ایدیه ، نفسی عبادته کراحتله جبر ایتیه ، فتوردن غایت احتراز ایدیه ،



زیرا که ، اکراه و فتور ایله ایشلنن عبادت ، قلبه قسوت و عیا ویرر ،  
نفسه طاعتدن اعراض ایراث ایدر ، هر عملی که سالک ایشلر ، حقه محبت  
قصیدله ایشلیوب اجرت قصیدله ایشلیه ، زیرا اجرت قصیدله ایشلنن عملر  
موجب اجر و ثواب اولسه دخی [ فن کان یرجوا لقاء ربه فلیعمل عملا صالحا  
ولایشرك بعبادة ربه احدا ] نص جلیلی حکمنجه حقه قربیت ویرر .

اجرت ایچون عمل ایتمک شرک خفیدر ، زیرا عمل انجق وجه الله ایچون  
کرکدر ، وایتدیکی مجاهدات و ریاضاتدن وسطه مراعات ایده ، حدندن  
زیاده نفسنه ریاضات تحمیل ایتیه ، زیرا نفسنه تحمیل مالایطاق ایتمک زندقه  
والحاد ایراث ایدر ، اکثری سالک کرب الحاده دوشمه نری نفوسلرینه  
تشدید ایتدکلرندن ایچوندر ، دینلدی ( من شدد شدد ) .

شریعتده دخی افراط و تفریط منهیدر ، انکچون بوشریعتنه ( شریعت  
وسطی ) و بو امته ( امت وسط ) تسمیه اولمشدر .

سالک عباداته نظر ایتیبوب معبوده نظر ایتمک و عبادتله رینه مغرور  
اولماق لازمدر ، زیرا عبادتک آفتی عبادته مغرور اولوب عجب ایتهدر  
وایتدیکی عبادتی کورمیوب حقلک توفیقندن کوره وایتدیکی عبادتله  
دخی تقصیراتی فکر ایدوب حقدن عفو طلب ایده واکر ایتدیکی  
عبادتله رنفسنده اجرت داعیه سی ظاهر اولورسه ، جمله عبادتله رینی مؤمنین  
و مؤمناته بخش ایدوب اول داعیه دن سلامت بولوب مفلس اولوب الله  
تعالیک لطف و فضلندن اغنا اوله ، تا کیم امان اللهده اوله ، زیرا حدیث  
شریفده [ المفلس فی امان الله فی الدارین ] وارد اولمشدر .

والحاصل چیچ سالکله واجبدرکه ایتدکلری عبادتله ر حق تعالی به  
تخصیص ایدلر و حقدن غیری جنت آرزوسی وجهنم خوقی ایچون اولیوب  
بلکه حق تعالی قتنده عزت بولورم ملاحظه سنی دخی ایتیهلر ، زیرا باعث  
خلقت انسان اولان انجق ذات احدیته عبادتله ر غیری دکلدلر ، ایدی ما خلق له

ایچون عبادتی ایتمک کرکدر ، نشکیم بیوردی [ وما خلقت الجن والانس الا  
لیعبدون ] .

### ( نظم )

حقه قربیت ویرر طاعت دیو ایتدکلرم  
راضیم آنلر دخی بردرلو عصیان اولیه  
ایتدیکم نفسه ریاضتله جهاد اکبرم  
حیفدرکیم اولدخی اسباب غفران اولیه  
زعمله ظن ایتدیکم حقه کمال معرفت  
عاقبتده قورقرم اول جهل و خسران اولیه  
حق یولنده جانمی سعی ایللیوب قیلدم فدا  
یکدم اول جاندن دخی سعیمده طغیان اولیه  
راه عشق ایچره خدادن ایتدیکم امنیهلر  
قورقرم آنلر دخی محشرده حرمان اولیه  
عبد اولان البت عبودیتده اولمز بیقصور  
بیقصور اولسه مکر اول کیمسه انسان اولیه

نثر — سالکله لازمدرکه صفات ذمیمه لکه بوجوب ظلمانیه در ، جهد  
ایدوب نفسندن ازاله ایله حقه تقرب ایده ، زیرا آنلر ایله تقرب محالدر .

صفات ذمیمه ل « شهوت ، غضب ، کبر ، تجبر ، ظلم ، عدوان ، حقد ،  
حسد ، غیض ، بغض ، شرک ، نفاق ، کفر ، عصیان ، حرص ، طمع ،  
بخل ، لوم ، ریاست ، حب شهوت ، حب دنیا ، طول امل ، تعلق  
ماسوی » دن عبارت اولوب برکسه ده کی بوضفات موجوددر ، اول  
کسه نک صفات حمیده ایله اتصافی ممکن اوله من ، زیرا صفات ذمیمه صفات  
حمیده نک ضدیدر وایکی ضد ایله اتصافی ممکن دکلدلر .

صفات حمیده دخی « عفت ، حلم ، خول ، رأفت ، مرحمت ،



قناعت ، کفای ، فقر ، مروت ، صدق ، اخلاص ، عدل ، انصاف ،  
توکل ، تسلیم ، جود ، سخا ، زهد ، ورع ، قصر امل ، ذل مسکنت ،  
ترك دنیا ، قطع تعلق ماسوی « اولوب سالک بوصفات حمیده لرده فانی  
اولدقده صفات الله آنده تجلی ایدوب [ بی یسمع و بی ینطق و بی یبطش ]  
حدیث قدسیسنه ماصدق اوله ماز .

صفات الله دخی سالکده تجلی ایتدیکجه احدیت صفات آنده تجلی ایتز  
واحدیت صفات آنده تجلی ایتدیکجه احدیت ذات آنده تجلی ایدوب واصل  
حق اولمز ، چآنکه احدیت ذات آنده تجلی ایدوب واصل حق اولدقده  
اهل شهود اولوب وجود حق جمیع کائناتده مشاهده ایدر و ( مافی الوجود  
سوی الله ) سرینه مظهر اولور ، و بوسره مظهر اولان جمال الهی جمیع  
اشیاده مشاهده ایدوب ( مارایت شیئا الا رأیت الله فیه ) سرینه مظهر  
اولور و بوسره مظهر اولدقده جمال الله انک قلبنده دوام اوزره تجلی  
ایدوب اول تجلی کونا کون مظاهره عکس ایدوب جمال الهی کیفیات  
متنوعه ایله مظاهرده مشاهده ایدر ، نیکم بوییت ایله اندن تعبیر اولندی .

( بیت )

وما الوجه الا واحد غیرانه \* اذا انت اهدت المرایا تعدداً

( نظم )

زهی دلبر که اولدی جمله عالمی مرایای  
قوعالمدن اول عشاقنه رویین نما ایلر  
زمین و آسمانه صغین حسن سرافرازی  
دل ویرانه عشاق قنده بولسه جا ایلر  
جانندن فقط برلمه در اکوانه عکس اولدی  
فقط اول لمه در حسن جهانی پر ضیا ایلر  
تستر ایلشدر کنیدی ارباب غفلتدن  
تماشای جالان اهل عرفانه صلا ایلر

جمالک عرض ایدنجیه عارفه وحدت سرایندن  
اولور حیران انا الحق نغمه سندن جان فدا ایلر  
الهی ایله بوینسده ناچیر نیکی محبوب  
جمالک اشتیاقندن جهانی پشت و پا ایلر

نثر — حق تعالی حضرتنه وصلت ایکی طریق اوزره در ، بری طریق  
سلوکدر که مقدم ذکر اولمشدر و اولطریقه ازکار و اوراد و مجاهدات  
وریاضات ایله مشروطدر .

ایکنجی طریق ایسه طریق جذبه در و بوطریقه جذبه لازمدر ، بوکا  
جذبه سنر سلوک اولمز ، بوطریق شروطی بودر که بونی بریبر طریقندن  
تلقی ایتدکدنصکره جمیع علایق دنیایی ، صفات بشریتی ، قید وجود  
و حیاتی بالکلیه ترك ایدوب ( موتوا قبل ان تموتوا ) امریله عمل ایده ، حقندن  
غیری برنسنهیه نظر ایتیه ، دائم خراب اندر خراب اولوب فنا عالمنده  
تمکن ایده ، دنیایه و امور دنیایه تملک ایتیه ، جذبه الهیه به دائم اقتدا ایده ،  
دائم ملاحظه جناب حضرت حق سبحانه و تعالیده اوله ، فرائض و رواتبلردن  
غیری عبادات و نوافل ایله قلبنی مشغول قلبیه ، جمیع اوقاتنی اولملاحظهیه  
صرف و حصر ایده ، دائم عشقه اقتدا و جذبهیه انقیاد ایله حقه تقرب ایده ،  
بوشروط اوزره سالک بوطریقه سلوک ایدر ایسه ( جذبه من جذبات  
الرحمن توازی عمل الثقلین ) مقامی درک ایدر .

اهل جذبه دن اولوب عشق ایله مألوف اولمیان سالک ، بوطریقت علیهیه  
سلوک ایده من ، زیرا بوطریق ( طریقت شطاریه ) در ، بونک اول قدمنده  
سالک قشمر بشریتی آتش عشق ایله یاقوب طیر بیضه سندن چیرکی چیق  
کرکدر ، بوطریقتنه سلوک آسان ظن اولمشون ، زیرا بوطریقتنک اسهل مشاق  
ترك جان ایتدکدر .



## (نظم)

كان عشق غایت ايله سخندر چككه كلز  
چكنلر هپ اكا جان رشته سندن جلالر طاقدی  
تعجب ایتنه زاهد احتراق قلب عشاقه  
كه عشقك ذره سی در رخلری هپ آتشه یاقدی

نثر — بو طریقك اهایلرینك حلیه لری بودر كه انلر بر صفت ايله  
موصوف اولزلر ، انلرده حول وقوت اولمز ، انلر ماضی ومستقبل بیلزلر ،  
آنلر حشر وحساب کورمزلر ، جنت وجهنم قیدینه دوشمزلر ، آنلر  
صفات الله ايله موصوفلر در ، تحريك الهی ايله متحرك وتسکین الهی ايله  
ساکنلر در ، انلرک جنتی حق مشاهده وجهنمی حقندن محجوب اولمقدر ، انلرده  
تفکر معیشت وتذکر جوع وعطش اولمز ، انلر بر امامه اقتدا وبر مذهبه  
التجا ایتمزلر ، انلر « لی مع الله وقت لا یسعی ملک مقرب ولانی مرسل »  
سربینه مظهر اولملر در ؛ اللهم اجعلنی من الذین یحبونهم ویسلکون طریقهم  
امین بحرمة محمد سید المرسلین صلی الله علیهم اجمعین .

## (نظم)

بنم عصیان ايله هپ پکدی چاغم \* قراردی قالمدی قلبیده آغم  
چکر نفسم بنی سمت فساد \* انکیچون یوق صلاح ایجره طور اغم  
اویار شیطانہ نفسم حقه اویمز \* رضای حقه هیچ کیمیز آی اغم  
جناب حقه یوق بنده توجه \* ضلالت راهنه واردر صی اغم  
عبادتدن بکا جمعیت ایرمز \* هوای نفس ايله صالقم صی اغم  
بکا حق سمتنه ممکنفی کیمک \* یولنده یوق بنم زاد و یار اغم  
نه ممکندر بنم حقه وصولم \* بنم بنلکدن اولمز سه قراغم  
اوکلز دردیه درمان اولوردی \* اولیدی عشق ايله داغ اوزره داغم  
محبت نارینه باق جان وجسمم \* درونده یافار دائم اوجاغم  
بکا سن جذبه کی یار ايله یارب \* فضای حضرت قوردر اوتاغم

یولنده عشق کی ايله دلبر \* سکا عشقك ايله اولسون بلاغم  
بنی بنلک حجابندن خدایا \* کچور ايله سکا یاقین ایراغم  
خرابات ارلرندن فیض آلوردم \* قرائت قیلسه مختل دماغ  
سماواته عروج ایتمک اولوردی \* تعلق اولسه قلبیده باغم  
دروغ سر ايله مملو اولوردی \* اگر دیرنسه اصلا دوداغم  
کوکل حقیله دورمه سویلشوردی \* دیلده اولسه لاف ايله لاغم  
جهانی کور میوب حق کورردم \* کوزم کورمز ایشترسه قول اغم  
ندر معنای وحدت فهم ایدردم \* اونوتسم بیلم صواله صاغم  
عماراتی بکا جای ایتنه یارب \* خراباتی بنم ايله بوجاغم  
بود کلو حق ایچون یاندم یاقیلدم \* کویکده یانمدی هیچ برچراغم  
حیییک حرمتیچون یالهی \* مقام جذبه کی ايله قوتاغم

## (باب ثانی)

بر مقدمه ايله بش فصله منقسم اولوب خواجه محمد بهاء الدین نقشبنده  
( قدس سره ) حضرتلرینک بعض مناقب و کرامتلی بیاننده در .

مقدمه — تعریف ولایت و اثبات کرامت بیاننده در .

معلوم اولسونکه ولایت « معبود ايله عبدك میاننده قرب عبودیت  
ونسبت حییتدن عبارت » در .

بو ولایت ایکی قسمدر ، بر قسمی ( ولایت عامه ) در که « حق تعالی ک  
امر ایتدیکنی ایشلیوب ، نهی ایتدیکندن اجتناب ایدوب هر حالده رضای  
حق کوزتمک » دن عبارتدر .

ایکنجی قسمی ولایت ( خاصه ) در که « رسول الله اتباعاً نوافل  
عباداته باشلیوب عمل وتقرب خاص ايله حقه تقرب ایدرک محبت الله  
مظهر اولوب صفات الله ايله اتصاف » ایتکدر ، نه کیم حدیث قدسیده  
[ ولا يزال عبدي يتقرب الي بالنوافل حتى احبه فاذا احبته كنت سمعه



الذی یسمع به وبصره الذی یبصره ولسانه الذی ینطق به ویده الذی یبطش  
بهاورجله الذی یمشی بها [ وارد اولمشدر .

ایمدی ربیسنه بورتبه قریبتی اولوب جمیع قوی وحواسی ، ربیسنک  
تصرفنده اولان بر بنده نک خواری عادانک وکرامات عالینک صدوری  
استبعاد اولنوری ؟ اول بنده دخی اظهار کرامت ایتک و خارق العاده  
شیلر ایشلک ایله عندالله مؤآخذ اولنوری ؟ اول بنده هر نه ایشلرسه  
حق تعالینک امریله ایشلر .

### ( نظم )

نوافل ایشلیوب بر بنده ایتسه حقه قریبت  
اولور اول بنده هم محبوب حق هم منبع اسرار  
بورتبه بنده سی اولدقده حقل لطفنه مظهر  
تعجب ایتمه اولی بنده کرامت ایلسه اظهار

نثر — اکر اولیه بر بنده دن ظاهرده شرعه مخالف بر امر صدور  
ایدرسه ، اول امر البتہ حق تعالینک حقیقته اذیلله صدور ایتشددر ، تنکیم  
خضر علیه السلامدن غرق سفینه و قتل صبی ظاهرده شرعه مخالف  
صدور ایتدی اما باطنده حق تعالینک امریله صدور ایتشددر ، انکچون موسی  
علیه السلام شریعت جانبدن اعتراض ایتدکده خضر علیه السلام ( مافعلته  
عن امری ) پیوردی .

کرامات اولیا آیت کریمه ایله ثابت اولوب ازان جمله [ کما دخل علیها  
زکریا الحراب وجد عندها رزقاً ] ، [ وهزی الیک بمذع الخلة تساقط  
علیک رطباً جنیاً ] آیت کریمه لرله حضرت مریمدن و [ انا ایتک به قبل ان یرتد  
الیک طرفک ] آیت جلیله سیله دخی آصف بن برخیا دن صدور ایدن  
کرامتلر بیان و اخبار پیورمشدر .

بناء علیه کرامات و خواری عادانک اولیادن صدوری اظهار من الشمس  
فی وسط السماء ظاهر وهویدادر ؛ خواری کراماتی انکاره بحال یوقدر ،  
وانکار ایدنلر مکابر و معاندلردن اولوب آنلرک انکارلری مسموع دکلددر .

حکایه — شیخ جابر رحی ( قدس سره ) پیوردیکه اهل رجب  
کرامات اولیایی انکار ایدرلر ایدی ، بندخی صحرا ده براسده سوار اولوب مدینه  
رحبه داخل اولوب چارسوی رحبه واردم وجمع ناسده ندا ایدوب دیدمکه  
« اولیانک کرامتلرینی انکار ایدنلر قنده در ، کلسون کورسونلرکه اولیانک  
کرامتلری وارمیدر ؟ یوقیدر ؟ اندن صکره اهل رجب انکار کرامات  
اولیادن رجوع و توبه ایدوب بکا اعتراضدن کف لسان ایتدیلر !!!  
انتهی .

### ( نظم )

ایله کبر و حسد دن صقین اول انکاری  
طوقونه حال پسندیده اهل الله  
قدرینی پست ایده می اوج فلکدن هرگز  
نه قدر طعن دروغ ایلسه عالم ماهه

نثر — ولایت خاصه دخی اوج مرتبه در ، اولی مرتبه ولایت  
صغرادر ، بومرتبه ده ولینک صفاتی « صفات الله فانی واول ولی صفات  
الله ایله قائم اولقی » در ، ولی بومرتبه ده دخی سیر فی الله ایله سلوک ایدر ،  
تنکیم سابقده ذکر اولنان حدیث قدسیده اکا اشارت اولندی ؛ عمر بن  
الفارض بومرتبه ده اشارت ایدوب ( ولم تهونی مالم تکن فی قانیا \*  
ولم تفن مالم یجلی فیک صورتی ) پیورمشلرددر .

ایکنجی مرتبه ده ولایت وسطی مرتبه سیدر ؛ ولی بومرتبه ده وجود  
اکنیدن فانی اولوب وجود حقانی ایله قائم اولور و بومرتبه ده حاز اولان  
ولی ( مافی الوجود سوی الله ) دعواسمین ایدوب ( ومارایت شیئا الا



رأيت الله فيه ( کلامی سویلر و سیر مع الله ايله سالوک ایدر ، عمرین  
الفارض ( قدس سره ) بومرتبه به دخی اشارت ایدوب ( جلث فی تجلیها  
الوجود فی ناظری \* فی کل مرتی اراها رقیقی ) بیورمشلردر .

اوچنجی مرتبه ولایت کبری مرتبه سیدر ؛ ولی بومرتبه ده بقا بالله بولوب  
کلمات ولایت ايله متصف اولور ، بومرتبه ده بولنان ولی سیر مع الله ده  
نهایت بولوب بومرتبه دن یوقاری تقدم ایده من .

ش . عبد القادر ( قدس سره ) حضرتلری ( مازالت ارتع فی میادین  
الولا \* حتی بلغت مکله لا توهب ) بتیلله بومرتبه به اشارت بیورمشلردر .

حق تعالی ولی به بومرتبه ده او قدر لطفلر احسان ایدرکه حساب  
کمز ، خلقت ارشاد و تربیله لری ایچون اکا اذن ویرر ، مقام جمعدن  
مقام فرقه انی رد ایدر ، اولدخی سیر عن الله شروع ایلر ، و خلقت تربیه  
وارشاد لینه مشغول اولور ، حق تعالی دخی اکا اظهار کرامته و خرق  
صادقه اولیه قدرت و قوت ویررکه هر قنغی برخارق العاده بی اظهار مراد  
ایسه اظهاره قادر اولور ، لکن حق تعالی آنی سر حکمته مطلع ایدرده  
حکمته مخالف اولان خوارق العاده بی اظهار ایتمز ؛ اظهار ایتمدیکی ایسه  
حکمته مخالفتدن ایچوندر ، یوخسه عدم قدرتدن دکلدر .

ولینک اظهار خارق عادت ایتمدیکنیک بروجهی دخی بودرکه حق تعالی  
ولایتی خلق آراسته ستر ایتمشدر ، اکر ولی اولان کیمسه اظهار کرامت  
واجرای خارق عادت ایسه حق تعالینک اخفا ایتمدیکی ولایتی اظهار ایتمش  
اولور ، بوايه ولی به لایق دکلدر ، بلکه ترک ادبدر ؛ ولایت مرتبه سندن  
طرد اولور ، انکچون دینلدیکه ولیدن کرامتک صدوری نسادن حیضک  
ظهوری کبیدر ، مکرکه حق تعالی اول ولی به اظهاره اذن ویرمش اولد ،  
زیرا کرامتک اخفایی ( ان الله اخفی ثلاثه فی ثلاثه اخفی رضائه فی طاعته  
وغضبه فی معصيته وولایته فی خلقه ) حدیث شریفیلله ثابتدر .

ایندی بر ولی اظهار کرامت ایسه ، حقلک اخفا ایتمدیکی ولایتی اظهار

ایتمش اولور ، زیرا کرامت دیدکلری ولیدن صدور ایدر ، ولینک غیریدن  
صدور ایتمز ، والحاصل نبی به اظهار معجزه نصل واجب ایسه ولی به  
اخفاء کرامت اولیجه واجبدر .

### ( نظم )

اولیانک قدرتی وار قادر قهاردن  
خارق عادته یوق انلرده عجز اظهاردن  
حکمتی کوزلر ولی قصد کرامت ایلمز  
احتراز ایلر کرامتک ولی اشهاردن  
بولمز اظهار کرامتله ولیلر عزتی  
انلرک عزتلری اخفاده در اغیاردن  
اولیالردن کرامتک صدوری شویله کیم  
حیضه بکرر شنن ایجاب ایتمده ابکاردن  
هر ولی ستر کرامت ایتمکه مأمورددر  
اولسه اظهارده اذنی حضرت ستاردن  
اولیانک بویله ییل احوال و کیفیته  
صاقله آنلردن لسانی کشف ایدوب انکاردن

نثر — اولیاه اللهدن صدور ایدن کرامات عالیاک افرادی بک چوق  
اولدیغی جهته تعدادی ممکن دکل ایسده انواع کرامات یکر می بشدر .

اولکی نوع — احوال قبوره اطلاع وارواح اموات ايله تکلمدر .  
ایکینجی نوع — اجار و اشجار و حیواناتک تسبیح لرینی استماع وانلر  
ایله مکلمه در .

اوچنجی نوع — جادات و حیواناتی امرینه رام ایدوب اشجاری  
انمار ایتمدر مکرر .

دردنجی نوع — احیای اموات و امواتی احیا ایتمکدر .



بشجی نوع — جسم لطیف کی اجساد کشیفه لره فوص ایدوب دخول  
ایتمکدر .

آلتجی نوع — سولر اوزرنده مشی وهوالرده طیزان ایتمکدر .

یدنجی نوع — مسافه بعیده بی طی و مسافات قریه بی بسط و بعید  
ایتمکدر .

سکزنجی نوع — ازمنه کثیره بی قصر و زمان قلیلی نشر ایتمکدر .

طقوزنجی نوع — اعیان موجوداتی قلب ایدوب علم کیمیایه اطلاعدر .

اونجی نوع — دفع جنون وازاله علت ابله اعطای صحت ایتمکدر .

اون برنجی نوع — عند الله دعائک استجابتی و عند الناس کلامک  
تأثیر بدر .

اون ایکنجی نوع — شعر سویلك وامرار حقیقتدن خبر ویرمکدر .

اون اوچنجی نوع — قلوب متنفره بی جمع و تالیف و عداوتی محبه  
تبدیل ایتمکدر .

اون دردنجی نوع — اکل شربدن غنا کلوب نیجه آیلر و ییلار تغدی  
ایتمک و حرو بردن ضرر کورمامکدر .

اون بشجی نوع — یغمور وقار یاغدرمقدر .

اون آلتجی نوع — روزگار لر اسدیروب و روزگار لر دفع ایتمک  
و حرو برد اظهار ایلمکدر .

اون یدنجی نوع — طعام قلیل ابله چوق عسکری طویور مق و غیبیدن  
احضار اطعمه به مقدر اولمقدر .

اون سکزنجی نوع — عسکر اعدایی قهر ایدوب غلبه ایتمکدر .

اون طقوزنجی نوع — آتش یا نایمق و اسباب هلاکدن متأثر اولمامقدر .

یکرمنجی نوع — مغیباتی بئلك و کورمک و قلوبده اولان اسرار .  
اطلاعدر .

یکرمی رنجی — نوع برآنده رقاچ مکانه ظاهر اولمق و عبون ناسدن  
اختفا ایتمکدر .

یکرمی ایکنجی نوع — ردمده ناسه امداد و اوزاق کلام لر استماع  
واوزاق یره اسماع کلام ایتمکدر .

یکرمی اوچنجی نوع — نفوس آیه و قلوب قاسیه به تملك و تصرف  
ایدوب تربیه و اصلاح ایتمکدر .

یکرمی دردنجی نوع — عالم ملک ملکوتیه انفاذ حکم ایدوب خلع  
و ایلاس و عزل و اجلاس ایتمکدر .

یکرمی بشجی نوع — غایبه اولان سالک لری حفظ و حراست  
ایدوب عصیاندن تبعید و عبادتیه تقریب و سوق ایتمک و سالک لری روحانیت  
و جسمانیت لرنده تدبیر و تربیه ایدوب انلری حقه ایصال ایلمکدر .

### (نظم)

بو کرامات عظیم الشانی \* هرکسه ویرمز ایش حق آتی  
و بر اولنکیمسید طاعت ایدرک \* حق یولنده ایده کنندن فانی  
و هیبدر جمله کرامات کزین \* جد و سعی ابله دکل کسب آتی  
بو کرامت لری فضلیله خدا \* سودیکی عبده ایدر ارزانی  
نیجه ایرسون بو کراماته کشی \* اولانجه اکا حق احسانی  
برکشی اولما ییچق حقه ولی \* بو کرامت لره اولمز دانی  
نیجه اول شخصه کرامت ویریه \* اگرانک یوق ایسه عرفانی  
ورع و زهد عبادتله خدا \* ایدر عبدینی کرامت کانی  
مالک کنز کرامت اولدنک \* خرق عادتده بورر فرمانی  
بو کراماته کیم اولسه قادر \* اولور عالم لریک اول سلطانی



نثر — خارق عادت ایکی قسمدر، بر قسمی استدر اراج دیگر کرامت  
اولوب خارق عادت اولان شی فاسقندن صدور ایدرسه «استدر اراج»  
واکر صالحندن صدور ایدرسه «کرامت» اولور.

خارق عادتک ایکی قسمی دخی حق تعالینک اعطاسیله اولور ایسه ره  
استدر اراج اولان خارق عادتق حق تعالی فاسقه مکر اوله رق اعطا  
و کرامت اولان خارق العاده بی حق تعالی صالحه فضل اوله رق احسان  
ایدرکه بوتقدیرجه استدر اراجک مرجعی ضلالت و کرامتک مرجعی ولایت  
اولور.

استدر اراجی کرامتدن فرق ایتمک طریقی — خارق عادت  
صدور ایتدیکی کیمسه نک شریعتیه مخالفتی وسنته متابعتی یوق ایسه استدر اراجدر،  
اگر اول خارق العاده نک صدور ایتدیکی کیمسه نک هر حالده شریعتیه مطاوعتی  
وهر امرده سنته متابعتی وار ایسه اول خارق عادت کرامتدر، بوندن  
معلوم اولدی؛ استدر اراجک مصدری اولان کیمسه شریعتیه وسنته مخالف  
اولاندر، کرمک انک مخالفتی اعتقاد جهندن اولسون، کرمک عمل جهندن  
اولسون؛ کرامتک دخی مصدری اولان کیمسه هر حالده احکام شریعتیه  
مطاوع وهر امرده سنته متابعتی اولاندر، زیرا کرامت صاحبی اولان  
کیمسه نک شریعت وسنته سرمو مخالفتی اولور ایسه کرامتی استدر اراجیه  
تبدیل وکنندی دخی رتبه ولایتدن تنزیل اولنور؛ ولینک ولایتی مطاوعت  
ومتابعیت ایله شرطدر.

حکایه — ابویزید بسطامی (قدس سره) حضرت تلمیذک عندهنده  
بر کیمسه بی ولایت و کرامت ایله وصف ایتدیلر، بسطامی حضرت تلمی دخی  
بزه انلرک زیارتلرینه کیمک واجب اولدی دیهرک مریدلرینی آلوب انلرک  
زیارتلرینه کتدیلر وچن اول کیمسه نک اولدیغی محله واردیلر بالاتفاق اول  
کیمسه منزندن چیقوب مسجد کیدردی، بسطامی حضرت تلمی دخی اول  
کیمسه بی طریقی مسجدده کوردیکه قبله یه قارشو تو کوردی، چنکه بسطامی

حضرت تلمی اول کیمسه بی سنته مخالفته کوردی در حال عودت ایدوب اول  
کیمسه ایله کورشمیدی و بیوردیکه بر کیمسه که احکام شریعت و آداب سنته  
رعایت ایتیه نه کیفیت ایله اول کیمسه ولی اولور؟ انتهى.

### (نظم)

عبادت تخمینی اک طورمه دائم ارض طاعتده  
ولایت بوستاندن کرامت ویرمک استرسک  
عبادت ایتمین آدم ولایت ذوقنی سورمز  
عبادت قیل ولایت ذوقنی سن سورمک استرسک  
طوتوب احکام شرع الهی سن دور اوله سنتدن  
ولایتله قباب قرب حقه کیرمک استرسک  
یوزک سور طیراغه یالوار خدایه آه وزار ایله  
مسترسک، لاخوف عالنده کولمک استرسک  
رها قیل راحت یولنده جد وسعی ایله  
جناب حضرت اللهه وصلت ایتمک استرسک  
شهود ماسوادن یوز چویر اغماض عین ایله  
نقوش کائناتی لوح دلدن ستمک استرسک  
بصیرت چشمه کل بوکل مازاغ البصردن کج  
وجود وحدتی کثرتده هر آن کورمک استرسک  
اونوت خاطرده کی کسب ایتدیگک هر علم و عرفانی  
اگر وهی اولان علم لدنی بیلک استرسک  
خدایی سو چیقیر قلبیکده قویمه حب دنیایی  
خدایه سندخی کنندی اوزوک سودیرمک استرسک  
تجرد قیل ملانک کی ترک ایت قید ناسوتی  
فضای عالم لاهوته سننه کتمک استرسک  
بلند همت مردانه لیکله حقه طاعت ایت  
بومیدان کرامت ایچره جولان ایتمک استرسک



## فصل اول

بوفصل خواجه محمد بهاء الدین نقش‌بند ( قدس سره ) حضرت‌تلیزینک  
حال صباوتنده اولان احوالی و صحبت‌لری و داخل اولدینی مشایخ و سلسله  
طریقتی بیاننده در .

خواجه حضرت‌تلیز بیور مشلردر که حق سبحانه و تعالی حضرت‌تلیزینک  
بویندلیزینه ایتدیکی عنایتلردن بری بودر که حال صباوتنده شیخ بزرگوار  
خواجه محمد بابای سماسی ( قدس سره ) نك نظر شریف‌لریله مشرف اولدم  
بنی اوغوللغه دخی قبول ایتدیلر .

حکایه — خواجه حضرت‌تلیزینک والد امجدلری بیوردیلر که اوغلم بهاء  
الدینک ولادتندن اوچ کون صکره خواجه محمد بابای سماسی ( قدس سره )  
جیع اصحابیله قصر عارفانه تشریف ایتدیلر ، بنم انلردن ارادتم وانلره  
غایت محبت وار ایدی ، خاطریله کلدیکه اوغلم بهاء الدینی آلایم اولصاحب  
ولایتک حضورینه کتورهیم وانلردن اکاهمت نیاز ایدیم ، بونیت ایله آنی  
آلوب خواجه حضرت‌تلیزینک حضورلرینه تضرع و نیاز ایدرک کتوردیم ،  
انلر دخی المدن آلوب صدرلرینه باصدیلر و « بوفرزند بنم اوغلمدر »  
بن بونی اوغوللغه قبول ایتدم « بیوردیلر ، صکره بوزلرینی اصحابه  
دوندردیلر ، امیر کلال دخی اصحابی آراسنده ایدی ، خواجه حضرت‌تلیز  
امیر کلاله خطاب ایدوب « چوق کره سزه بوموضعدن برمرد خدا  
رایحه‌سی کلور دیش ایدم و بوکره دخی سزک منزلدن چیقوب بو طرفه  
یاقلاشدقده سزه دیدم ایدیکه اول رایحه مرد خدا زیاده اولدی ، غالب  
بوکه اول مرد خدا وجوده کلدی ، ایشده اول مرد خدا بوفرزند پاکدر ،  
امیددر که بوفرزند مقتدای روز کا اوله » بیوردیلر .

دیگر — خواجه حضرت‌تلیزینک مادر مخدره‌لری بیوردیلر که « اوغلم

بهاء الدین درت یاشنده ایدیلر ، اتفاق اولوقت بریوکلای ایشکیز وار ایدی ،  
اوغلم بهاء الدین بکا برکون توجیه خطاب ایدوب دیدیکه بواپنک بر آانی  
سقر بوزاغی طوغورسه کرکدر ، حق تعالینک قدرتیله رقاچ آیدنصکره  
اول اینک اوغلم بهاء الدینک دیدیکی کبی بر آانی سقر بوزاغی طوغوردی !  
هرکیمکه اولکون اوغلمدن اول سوزی ایشتمش ایدی تعجب ایتدی و عنیدیزده  
بحقق اولدیکه اولکشفک اوغلمدن ظهور ایتدی خواجه بابا ( قدس الله  
روحه ) حضرت‌تلیزینک نفس مبارک‌لردن نشئت ایتدی .

دیگر — خواجه حضرت‌تلیز ( قدس سره ) بیوردیکه بن اون بش  
اون الی یاشنده ایکن جدم ( علیه الرحمة ) مراد ایتدیکه بنی متأهل ایده ،  
بنی خواجه بزرگوار محمد بابای سماسی ( قدس الله روحه ) حضرت‌تلیز دعوت  
ایچون سماسه فرستاده ایلدی ، حق اول بقعه شریف ایله مشرف اولوب  
خواجه حضرت‌تلیزینک لقالریله نشریف ایتدم ، آنلرک برکت صحبت‌لردن بنده  
برحال عجیبه حاصل اولدی و اول کیجه بنده برحالت تضرع و مسکنت  
ظهور ایتدی ، آخر لیله قاقوب وضوء ایتدم و خواجه حضرت‌تلیزینک  
مسجد متهرکه‌لرینه واروب ایکی رکعت نماز قیلدم و باشمی سجده‌یه قویوب  
چوق ، چوق دعا و تضرع ایتدم اولخالده لساندن جریان ایتدیکه « الهی  
بکا بار بلایی چکمه که قوت و محنت و محبتکی تحمل طاقیت احسان ایله » چنکه  
صباح اولدی خواجه حضرت‌تلیزینک مجلس شریف‌لرینه حاضر اولدم ،  
خواجه حضرت‌تلیز بکا توجه ایدوب فراست طریقیله اول کیجه بنده واقع  
اولان احوالی جمله تقریر و بیان ایتدیلر و « ای اوغل ! دعاده بویه  
دیمک کرکدر که الهی اول نسته که سنک رضای شریفک آنده درانی بن بنده  
ضعیفه فضل و کرمکه احسان ایله ، البت خداوند عزوجل نك برشیده  
رضاسی اوله اولشی بنده یه بلا دکادر ، اگر آنک دخی کندی طرفندن  
بردوسته بلا که یه عنایتیله اولدوسته اولبار بلایی چکمه که قوت و برر  
اول بلانک حکمتی دخی آکا اظهار ایلر ، ایدمی کشتی کندی اختیار یله خداوند  
تعالیندن بلا طلب ایتک قتی دوشواردر ، بنده کسنا خلق ایدوب خداوند



عن وجلدن بلا طلب اتمك لایق دكلدر « بیوردیلر ؛ بو نصیحتدن صکره میدانہ صفرہ دوشنوب طعام کلدی و مجلسده حاضر اولانلر ایله خواجه حضرتلری طعام ایتدیلر و طعام ایتدکدن صکره خواجه حضرتلری صفره دن برصومون اتمك آلوب بکا و بریلر ، بندخی آنی آلدن اما آنی آلمقده نفسمه غایت امتناع کلدی و خواجه حضرتلری نفسمک امتناعی کشف ایدوب « بواتمکی آلمقده نفسک امتناع ایدر ، لیکن بواتمک یولده بزه لازم اولور ! » بیوردی ؛ بعده خواجه حضرتلری دعوتہ اجابت ایدوب و جلہ اصحابیله قالقوب دابهیه سوار اولوب یوله روان اولدی ، بن خواجه حضرتلرینک رکابلرنده یورردم ، حضرت خواجهنک رکابنده کیدرکن بنده اولقدر شوق و ذوق حاصل اولور ایدیکه تعلق ماسوا قلمدن کلیاً زائل اولوب جمعیت و حضور قلمده حاصل اولور ایدی ، بعض تفرقه حاصل اولسه ، خواجه حضرتلری « قلبکی تفرقه دن حفظ ایله » دیو بکا التفات بیوررلر ایدی و انلرک مجرد بو کلاملری ایله قلمدن تفرقه زائل اولوب ینہ جمعیت عودت ایدر ایدی ، انلرک بو کشف و تصرفلرینی مشاهده ایتدیکه بنم انلره رابطه محبتم زیاده اولور ایدی ، بو حال اوزره انلرک رکابلرنده کیدرکن یولیمز برقریه یه اوغرادی ، اول قریه ده خواجه حضرتلرینک احباسندن برکیمسه خواجه حضرتلرینی استقبال ایدوب خانلرینه دعوت ایتدی ، چنکه خواجه حضرتلری اولکیمسهنک خانلرینه نزول ایتدیلر اولکیمسهنه خجالت عارض اولوب اضطرابه دوشدی ، خواجه حضرتلری انک خجالت واضطرابک کوردکده اول کیمسهنه خطاباً بیوردیلرکه « طوغری سویله اضطرابک سببی ندر ؟ » اولکیمسه دخی « افندم سزله طعام ویرمک استرم اما خانه مده سوددن غیر برشی بولمیدی ! » دیمکله خواجه حضرتلری بکا توجه ایدوب بیوردیلرکه بهاء الدین سکا و بردیکم اتمک عاقبت ایشہ یرادی کتور کورلم ، وقتاکه اولکیمسه خواجه حضرتلرندن بو کلامی ایشندی غایت مسرور او اوب کندی سودی کنوردی و اول اتمک ایله سودی صفره یه قویوب خواجه حضرتلری جلہ

اصحابیله اول سود و اتمکی یدکدن صکره چوق کیمسدر دخی اول سود ایله اتمکی بیوب طویدیلر و بو کرامت عظیمه دخی بن و سائر ناس خواجه حضرتلرندن مشاهده ایتدکده غایت تعجب ایتدک ؛ بعده خواجه حضرتلری اصحابیله قالقوب قصر عارفانه توجه ایتدیلر ، بن ینہ خواجه حضرتلرینک رکابنده کیدوب قصر عارفانه کتدک ، اشو سفرده بونک امثالی نیجه کرامات عظیمه خواجه حضرتلرندن بن و اصحابی مشاهده ایتدک .

دیگر — خواجه بهاء الدین حضرتلری بیوردیلرکه وقت صبا و تمدن حین بلوغه دک خواجه بزرگاور بابا حضرتلرینک صحبت شریفلریله مشرف اولدم ، خواجه حضرتلری دار بقایه رحلت ایتدکدن صکره جدم ( رحمة الله علیه ) بنی آلوب سمرقنده کتدی ، انده اولان اولیای عظام و مشایخ کرامک زیارتلرینه بنی کتوردی ، انلردن بنم ایچون دعا و هبت طلب ایتدی ، اندن صکره ینہ بنی آلوب بخاریه کلدی و بخار اقرینده ( قصر عارفان ) دیدکلری قریبه ده ساکن اولدق ، اول ایامده خواجه عزیزان علی رامینی حضرتلرینک تاج شریفلری بکا کلوب واصل اولدی ، اول تاج شریف بکا واصل اولدقدن صکره حالم غایت خوش اولدی ، قلمده محبت الله جوش و خروش ایتدی ؛ اندن صکره خواجه سید امیر کلال ( قدس سره ) حضرتلرینک قصر عارفانه تشریفلرنده بکا چوق التفاتلری اولدی و بیوردیلرکه خواجه بزرگوار محمد بابا حضرتلری بکا « اوغلم بهاء الدین تربیه و شفقتکی دریغ ایتمه اکر آنک تربیه سنده قصور ایدرسک حق تربیه می سکا حلال ایتم » دیو وصیت بیورمش اولدقلرندن « اکر خواجه حضرتلرینک وصیتلرینی ترک ایدوب سنک تربیتکده قصور ایدرسم نامرد اولیم » دیو نذر ایتش ایدم ، بو صحبتدن برنیجه ایام مرور ایتدکدن صکره برکیجه رؤیامده حکیم اتا حضرتلرینک تربیه ایچون بنی بر درویشہ حواله ایتدکلرینی کوردم ؛ بندخی اول رؤیایی بر صالحه جدم وار ایدی اکا تفریر ایتدیکمده انلرده « اوغلم سنک تربیه مشایخ ترکاندن نصیبک واردر » دیو رؤیایی تعبیر ایتش اولدقلرندن حواله ایدلدیکم درویشک صورتنی خاطر مده حفظ ایدوب دام



اكا منتظر اولدم، بركون سوق بخاراده كزر كن اول درويشي كوردم  
اما آنكله صحت ايده مدم، اول اجلدن غايت مكدر منزله كلدم، اول كدر  
ايلاه او طوردم، كوردمكه بر كيمسه اول درويشك طرفدن بكا كلوب  
« دوريش خليل سني استر » ديدى، اولوقت غايت مسرور اولوب برمقدار  
هديه تدارك ايدوب عجله ايلاه آلوب اول درويشك فائمه كتدم، انلره ملاق  
اولدم، بكا چوق التفات و رغبت اينديلر، اولوقت كورديكيم رؤياي آنلره  
نقل ايتكى مراد ايتش ايسه مده بن نقل رؤيايه باشلامدن « سنك خاطر كده  
اولان بنم معلومدر، انلري ذكره حاجت يوق ! » ديش اولديغندن بن  
آنلك بوكشفنه غايت تجب ايدوب محبتم آنلره زياده اولدى، اندن صكره  
آنلك صحتلرينه چوق زمان مداومت و خدمتلرينه ملازمت ايدرك آنلردن  
چوق تربيه كوردم، بر مدت صكره ماوراء النهر سلطاني وفات ايدوب  
سلطنتي وراثتله اول درويشه انتقال ايتديكي جهتله اول اقليمك اهالي سي  
كلوب اول درويشي بخارادن آلوب كئيديلر، بندخى انلر ايلاه بيله كتدم،  
اول درويش چنكه تحت سلطنته جلوس ايتدى، بندخى آنلك خدمتلرينه  
مشغول اولدم، اول وقت دخی انلردن چوق كرامت مشاهده ايدوب انلره  
صدق ايلاه خدمت ايتدم، انلر دخی بكا شفقت و محبت ايدوب تربيه ايدرك  
ايدى، بو حال اوزره انلره اننى سنه رضای حق ايجون خدمت ايتدم،  
انلره اوليه تقرب ايتدمكه جميع اسرارينه محرم اولوب هر امورنده مدر  
اولدم، اما ظاهرده سائر خدمه كي ظاهر خدمته مشغول اولوردم، آنلر  
دخی چوق كره بكا اشارت ايدرك سائر خدامه ديرلر ايديكه هر كيمسه كه بكا  
رضای حق ايجون خدمت ايده اولكيمسه خلق قتنده عزيز و محترم و حق  
قتنده مقرب و مكرم اولور، بن دخی بويلاه بيلوردمكه بوكلام الله بكا اشارت  
ايدوب سويلدن غرض بنم، زیرا بدن غیری اكا كيمسه رضای حق ايجون  
خدمت ايتز ايدى، الی سندهن صكره اول سلطنت مندرس و منقرض  
اولوب هباء مشور اولدى، بندخى اولحالي مشاهده ايتكمده قلمده اصلا  
تعلق دنيا و حب رياست قالمیوب ترك و تجریده رغبت ايتدم، اندن صكره  
كلوب بخاراده ( زيور تون ) قريه سنده ساكن اولدم.

ديكر — خواجه حضرتلری بيوررلر كه اوائل جذباتمه حق  
دوستلردن بر عزیزه مقارن اولدم، اول عزیز بكا ديديكه ( بن سني حق  
آشنالردن كوردم ) بندخی ( اميد ايدرمكه سز افنديك نظری بكا اولور  
ايسه آشنالردن اولوردم ) ديدم، صكره اولعزیز بكا ( آرزولده نفسم ايلاه  
نه معامله ده ) بولنديغمي صوردي، بنده جواباً ( بولورسم شكر ايدرم بولزسم  
صبر ايدرم ) ديدم اولعزیز دخی ديديكه ( بوبر آسان ايشدر، ايس اودركه  
نفسكه رهفته بر محله اتمك و صو و پرميوب حبس ايده سكره نفسك سكا  
سر كشاك ايتيه ) بندخی اولعزیزه تضرع ايدوب بو حالي آنلردن طلب ايتدم،  
انلر دخی بكا امر ايدوب بيورديكه ( سكا كر كدر كه نفسك اميدي خلقدن  
منقطع اولمق ايجون فلان صحرايه كيدوب عبادت حقه مشغول اول و اوچ  
كون مكث ايت در دنجی كون فلان طاغك اتيكينه كيت و اول طاغ اتيكينه  
كيدر كن سنك او كينه بر چيلاق آنه بنمش كيمسه چيقه كلور، سن اول كيمسه يه  
سلام و يروب كچ و اول كيمسه يي اوچ آديم بكد كده سكا دبر كه « يا جوان طور  
سكا اتمك و يريم » سن اكا التفات ايتيوب و اندن اتمك آلمیوب كیده سك (   
عزیزك امر و اشارتی اوزره اول صحرايه كتدم و آده اوچ كون مكث  
ايدرك در دنجی كون اول طاغك اتيكينه كتدم و كيدر كن او كه بر چيلاق  
آنه بنمش بر آدم چيقه كلدى، سلام و يروب بكدى، اولكيمسه بكا ديديكه  
( يا جوان كل سكا اتمك و يريم ) بن اكا اصلا التفات ايتيوب و آندن دخی  
اتمكى آلمیوب كتدم، اندن صكره اولعزیزك حضورينه وارد يغمده « بهاء  
الدين ! بوندن صكره سكا كر كدر كه خلقك خاطرلرينى اله آلوب افتاده لك  
خدمتلرنده بولنه سك، ضمعفايه و شكسته دلانه اكرام و حرمت ايدرك  
مصالحنى تحصيله سعي ايده سك، بيكسره انيس اوله سك و انلره مسكنيت  
و منزلت اظهار ايده سك » بيور مشلر ايدى، عزيز مشار اليك بو امرلرينه  
امثال ايدوب بيور دقلى خدمتله مشغول اوله رق نجه مدت دخی بو طريق  
اوزره سلوك ايتدم، اندن صكره اولعزیزك حضورينه كتدم، اولعزیز بكا  
خطاباً « بهاء الدين سكا كر كدر كه بوندن صكره حيواناته رعايت و تيمار



ایده سگ وانلره مقام نیازده اوله سگ ، زیرا انلر دخی حق تعالینک مخلوقلریدر ، انلره دخی نظر ربوبیت واردر واکر یوک چکیچی حیوانلرک آرقه لرده وسائر اعضا لرده جروح وقروح کورور ایسک جروح لرینه علاج وقروح لرینه تیمار ایده سگ « دیدی ، بنده انلرک بوا مرلرینه امثال ایدوب بو خدمته مشغول اولدم ، نیجه ، مدت بو طریق اوزره سلوک ایدرک ایضای خدمته اهتمام ایتدم ؛ اگر اوکمه طریقده بوکلی و بوکسز بر حیوان کلسه اول حیوان نیجه یه قدر مکث ایدر ایدم ، حیوانک اوکنه حرمت ایدوب یکمزدم و حیواناتک ایزلرینه یوزیمی سوروب حقه تضرع ایدردم .

بوموال اوزره بدی سنه مأمور اولدیغ خدمتلی ایشلدم ، صکره اولعزیز بکا « بهاء الدین ! سکا لازمدرکه بودرگاهک کلب لرینه دخی نیاز ایدرک خدمت ایده سگ ، تا کیم بر نیاز صاحبی کله ایشده سگ ، آلردن دخی مدد طلب ایده سگ « دیمش اولدقلرندن بوا مرلرینده امثال ایدوب و بو خدمتی دخی غنیمت بیلوب مشغول اولدم ، تا کیم رکجه برکله ایشدم ، اول وقت حالم متغیر اولوب اول کلپک اوکنده تضرع و نیاز ایتدم ، اول وقت بکا بر آغلامق مستولی اولدی ، اول بکا حالندن اول جانواری کوردمکه آرقده سی اوستنه کلوب یوزینی سمایه طوتدی ، آیاغنی دعایه ال قالدیرر کی قالدیردی و آوازونالدر ایتدی ، بندخی ایکی انیمی قالدیروب مسکنیت ایله آمین دیدم ، تا کیم اول جانوار خاموش اولوب حال اصلیه سنه رجوع ایتدی .

بنه اول ایامده ماه تموزده قصر عارفان چیقوب صحرا ده کیدرکن کوردمکه بر جانور آفتابه حیران اولمش طورر ، آنی اول صفت حیرتده کوردکده بنده بر ذوق درون پیدا اولدی ، اولوقت خاطر مه کلدیکه اول جانوردن نیاز ایده یکه بنم ایچون درگاه حقدن شفاعت ایتسون ، بونیتله ایکی انیمی قالدیروب تعظیم و حرمت ایدرک اول جانوره قارشو طوردم ، اول جانور حیرت واستغراقدن حالت اصلیه سنه عودت ایدوب آرقه سنی

یره قویوب یوزینی آسمانه طوتدی ، بندخی اولوقت نیاز و تضرع ایله اول جانور حالت اصلیه سنه رجوع ایدوب آباق اوزرینه طور نیجه یه قدر آمین دیدم ؛ بوندنصکره بنه اول عزیزک حضورینه واردیغده « بهاء الدین بوندنصکره سکا کرکدرکه طریقلرک خدمته مشغول اوله سگ ، طریقلری سپوروب پاک ایده سگ ، اگر طریقلرده خلقک متأذی اولدیغی نسنه لری کورر ایسک ازاله ایده سگ ، کراحت ویرر اشیلاردن طریقلری تطهیر ایده سگ ، تا کیم طریقلردن مرور و عبور ایدلر زحمت چکسون » بیوردیلر .

عزیز مشار الیهک بوا مرلرینه دخی امثال ایدوب خدمت مذکوریه مشغول اولدم ، بو خدمته اشتغال وقتنده دامنم خاکدن خالی اولمزدی ، زیرا دامنم ایله دامنم طریقلرک تطهیری ایچون سپورندی طاشردم ، بن اول خدمتدن خالی دکلمکه لباسمی ییقایوب پاک ایدم و هر هانکی بر خدمتی که اول عزیز بکا امر ایتش ایدی ، آنلری کلیلله ایشلدم و صداقت اوزره آنلری یرینه کتوردم ، هر بر خدمتی ایشلده کده حق تعالینک نیجه عنایتلری ظاهر اولدی ، رعونت نفسدن قورتلدم و جاه انانیتدن نجات بولدم ، درجه روحانیه ترقی ایتدم ، نیجه اسرار الله محرم اولدم .

دیگر — خواجه حضرتلری بیوردیلرکه غلبه جذباتم و یقینار لغم ایامنده شهر بخاراده کشت و کذار ایدوب مزارلری زیارت ایدردم ، برکجه مزارات متبرکدی زیارت ایدرکن قنغی مزاره کیتدم ایسه آنده برینار چراغ کوردم ، اول چراغلرک روغنلری و فتیللری موجود اما فتیللرینی تحریک ایدوب اخراج و اصلاح ایتک لازمکه ضیالری آرتوب سونیه ؛ خواجه محمد واسع ( رحمة الله علیه ) حضرتلرینک مزارینی زیارتده بکا اشارت اولندیکه وار خواجه احمد حفر نونیک دخی مزارینی زیارت ایله ! یقینکیم مزار متبرکدنک زیارتنه کتدم ، ایکی کیمسه بللرنده قلیج باغلی کلدیلر و بنی طوتوب بردابیه بندروب خواجه مزاره خون مزارنه کتوردیلر و بنی اول مزارک قتنده قویوب کتدیله ؛ اول مزار متبرکدنک زیارتنی



دخی کوردم، انده دخی بر چراغ ینار واول چراغک کیفیتی سائر مزارلرد، اولان چراغلرک کیفیتی کیدر؛ اول مزارک حضورنده قبله یه متوجه اولوب اوطوردیم، اولوقت بکا بر غیبت عارض اولدی، اول غیبتده اولیه مشاهده ایتدیمکه قبله جانبندن دیوار شق اولوب بر نخت عظیم ظاهر اولدی، اول تختک اوزرنده بر اولو کیمسه اوطورمش ایدی، اوکنده بریشیل پرده چکامش و تختک دخی اطرافنی جماعت عظیم احاطه ایدوب اوطورمشلردر، محمد بابا سماسی حضرتلری دخی اول جماعتک اراسنده اوطورر ایدی، اذن بیلمکه اول جماعت خواجهکان حضرتلریدر، لکن خاطریه کلدیکه اول تخت اوزرنده اوتوران اولو ذات کیدر؟ اول وقت جماعتدن بری بکا جواب ویروب سویلدیکه تخت اوزرنده کی اوطوران اولو کیمسه خواجه عبد الخالق و اطرافنده اوطوران جماعت خلفاسندن اولان خواجه احمد صدیق، خواجه اولیاء کلان، خواجه عارف دیو کروی، خواجه محمود انجیر فغنوی، خواجه علی رامینی در؛ چنکه خواجه محمد بابا سماسی به کلدیلر، دیدیکه سن بونلرک حیاتلرینه ایرشدک و بونلری بلورسک، بونلر سکا تاج عزیزانی و بر دیلر، بندخی ایتدم بیلورم، لکن بن اولناج شریفی اونوشم، اول کیمسه اولناج شریفک خانه مده اولدیغنی و اولناج سببیه بکا بو کرامت ویرلدیکنی اخبار ایلدی.

اول جماعتدن بر دیگر بری بکا دیدیکه قولاق طوت و خوش دکله که خواجه بزرک سکا بر قاج کلکات ایله نصیح ایده چک که اول کلکادن غیری برشی ایله طریق حقه سلوک اولمز، بندخی اول کیمسه لردن اذن طلب ایتدیمکه قاقوب خواجه حضرتلرینک دست شریفلرینی پوس ایدم، اذن ویردیله و خواجه حضرتلرینک اوکنده کی پرده یی قالدیردیله، واروب خواجه حضرتلرینه سلام ویروب دست شریفلرینی پوس ایتدم، زیارت ایدوب حضورلرنده قیام اوزره طوردم، آنلر دخی سلوک داتر اولان کلکاتی جهله سویلدیلر.

خواجه حضرتلرینک دیدیکی کلکادن بری بودرکه « بهاء الدین ! اول

چراغلری مزارانده سکا اول کیفیت اوزره کوسترمه لری بوکا اشارتدر که سنک قابلیت واستعدادک بو طریقه واردر اماقتیل استعدادکی تحریک ایتک لازمدر، تا کیم استعدادک روشن اولوب اسرار حق آنده ظاهر ونمایان اوله، زیرا کشتی قابلیتک موجی اوزره عمل ایتک کرکدر که مقصودی حاصل اوله.

کلکات سائر دخی « بهاء الدین ! سکا لازمدر که هر حالده قدمکی جاده شریعت اوزره قویه سک ! امر ونهیده استقامت اوزره اوله سک ! دائم عزیمتلر ایله عمل و سنتلره متابعت ایدوب جمیع سنتلری ممکن اولدجه اشلویه سک ! رخصتلری ترک ایدوب بدعتلردن اجتناب ایده سک، دائم احادیث رسول الله ( صلی الله علیه وسلم ) ی پیشوا ایده سک، آثار اصحاب کرامی تجسس ایدوب انلرک اثرلرینه سلوک ایده سک » نصیحتلرندن عبارت ایدی.

خواجه بزرک حضرتلرینک بو کلکات قدسیه سندن صکره اول جماعت بکا دیدیلر که یارنکی کون عجله ایله ( نسف ) جانبیه کیدوب سید امیر ( کلل ) ک خدمتلرنده اوله سک، اول جانبیه کیدرکن فلان محله ایرشدکه بر پییره ملاقی اولوب اول پیر سکا بر ایسیحاق اتمک ویرسه کرکدر، اول اتمکی آل، اما اول پیر ایله هیچ تکلم ایتمه ! آتی یکدکدن صکره بر کاربانه و آندن صکره دخی بر اسب سوار کیمسه یه ملاقی اولسک و اول کیمسه سنک اوکنده توبه ایتسه کرکدر، سنده اولان تاج مبارکی دخی سید امیر کللاه کتور.

بو کلاملردن صکره اول جماعتدن بری تحریک ایدوب بنی اول غیبتدن صحوه ارجاع ایتدی، بن در حال اول مزار منبر که نک قشندن قاقوب اول بخرده ( زیور تون ) ده منزله کلدیم، اهل بیتدن تاج شریفی ایستیوب آلدیم، چنکه تاج شریفی کتورب بکا ویردیله، حالم غایت متغیر اولوب بکا ایتدم، و تاج شریفی آلوب یوله روان اولدم، مولانا شمس الدینک



قریه سنه ایریشوب صباح نمازینی آنلرک مسجده قیلدم واول کون اول  
قریه ده مکث ایتدم، ایرتسی شمس طلوع ایدرکن قالقوب (نسف) جانبیه  
روان اولوب اول جماعتک خبر ویردکری محله ایریشوب اول پیره ملاقی  
اولدم و تعریفلری وجهله اول پیر بکا بر ایسیحاق اتمک ویردی، اتمکی  
آندن آلدیم و هیچ برسوز سویلشمدن آنی پکدم کتدم؛ صکره کاربانه ملاقی  
اولدم، اهل کاربان «ای یکیت زره دن کلورسک؟» دیه سوال ایتدیلر،  
بنده «اکنه قریه سندن کلورم» دیدم، بعده اورادن نوقت چیقدیغمی؟  
صوردیلر؛ شمس طلوع ایدرکن چیقدیغمی سویلدم که آنلره ملاقی اولدیغم  
وقت ضحی ایدی؛ کاربان افرادی بونی اشدکده اول قریه نک بو محله  
درت فرسخ اولوب قریه دن اول لیلده چیقدقلری حالدله آنجق اورایه  
واصل اوله بیلدکلرینی متعجبانه بر صورتده حکایه ایتدیلر.

کاربانی سبقت ایتدکده اول آتلی کیمسه یه ملاقات ایدوب سلام ویردم؛  
بوزات «سن کیمسک که؟ سندن بکا بر خوف عارض اولدی» اکا دیدمکه  
«بن اول کیمسه یکه سن بنم اوکومده توبه ایده جکسک!» اول کیمسه دخی  
کلوب اوکومده توبه ایتدی، و شراب یوکللی بر بارگیری وار ایدی  
بارگیری طوتوب شرابی دوکدی، بن ایسه آنی اوراده بر اقوب ارض  
نسفه ایرشدم.

ارض نسفده بر قریه یه اوغرادمکه سید امیر کلالت بوراده اولدیغمی  
بکا خبر ویردیلر، نزد عالیلرینه کیدوب ملاقات شریفه لریله مشرف  
اولدم، عزیزان حضراتنک تاج شریفلرینی دخی چیقاروب عرض ایتدم  
سید امیر حضرتلری برمدت خاموش اولدیلر، بعده «بوتاج عزیزان  
حضراتنک تاج شریفلریدر» بیوردیلر که و بنم «بلی افندم» دیه ویردیکه  
جوابده «بوتاج شریفی اخذده ایکی شرط وارد، اول شرطلری حفظ  
ایدوب آنلره رعایت ایتک لازمدر» دیدیلر؛ بوابی شرط ایسه حضرت  
عزیزانک طریقنه سلوک ایدوب سید امیر حضرتلرینه خدمت ایش  
تشکیم اول جماعت حضرت خواجه یه واقعه ده آنلری امر ایتدیلر ایدی

خواجه حضرتلری بیوردیلر که اول ایکی شرط ایله اولتاج شریفی آلدیم  
قبول ایتدم، اولوقت سید امیر حضرتلری خواجه عزیزانک طریقنی اعطا  
ایدوب نفی واثباتی حبس نفس طریقیه بکا تلقین ایتدی، بن دخی ذکر  
(علانیه) بی ترک ایدوب حبس نفس ایله نفی واثباته مشغول اولدم و خواجه  
عبد الخالق (قدس سره) بکا واقعه ده توصیه ایتدی کلالتک جمله سیله  
عمل ایدوب اول طریقت علیه یه سالک و عنایت حق ایله طریقت علیه نک  
نتیجه سنه واصل اولدم؛ انتهى.

خواجه حضرتلرینک سلسله طریقت علیه لری صورت آتیه اوزره در.  
خواجه حضرتلری طریقت علیه یی جمیع آداب ظاهریه و اسرار باطنیه سیله  
خواجه (سید امیر کلالت) حضرتلرندن اخذ و تلقی بیورمشلر و آنلرده  
خواجه (محمد بابا سماسی) حضرتلرندن و آنلر دخی خواجه (عزیزان علی  
رامینی) حضرتلرندن اخذ ایتمشلر در.

خواجه عزیزان ایسه خواجه (انجیر فغنوی) حضرتلرندن، آنلر  
دخی خواجه (عارف ریوگری) حضرتلرندن و آنلر خواجه بزرگوار  
(عبد الخالق غجدوانی) حضرتلرندن و مشارالیه خواجه (یوسف همدانی)  
حضرتلرندن و آنلر شیخ (ابو علی فارمدی) حضرتلرندن و آنلر شیخ  
(ابو الحسن خرقانی) حضرتلرندن و آنلر (ابو یزید بسطامی)  
حضرتلرندن و آنلر (امام جعفر صادق) حضرتلرینک روحانیتلرندن اخذ  
ایتشدر.

امام مشارالیه حضرتلری دخی والدلی (امام باقر) حضرتلرندن،  
آنلر دخی والدلی (امام زین العابدین) حضرتلرندن، آنلر دخی والدلی  
(امام حسین) حضرتلرندن، آنلر دخی (امام علی) کرم الله وجهه  
ورضی الله عنه، حضرتلرندن، آنلر دخی (امام المرسلین) صلی الله علیه  
وسلم، افندمن حضرتلرندن اخذ ایتش و آنلر (جبریل امین) علیه  
السلام، حضرتلرندن و حضرت جبریل حق سبحانه و تعالی حضرتلرندن  
وساطت طریقیه اخذ ایتشدر.



آخر برجسته بود طریقت علییه بی خواجه عزیزان (علی رامینی)  
 حضرت تلی خواجه (ابو القاسم کرکائی) حضرت تلی ندن؛ آنلر دخی شیخ  
 (ابو عثمان مغربی) حضرت تلی ندن؛ آنلر دخی (علی رودباری) حضرت تلی ندن؛  
 آنلر دخی شیخ (سری سقطی) حضرت تلی ندن؛ آنلر دخی شیخ (معروف  
 کرخی) حضرت تلی ندن؛ آنلر دخی (امام رضا) حضرت تلی ندن؛ آنلر دخی  
 والدلی (موسی کاظم) حضرت تلی ندن؛ آنلر دخی والدلی (امام جعفر  
 صادق) حضرت تلی ندن و امام جعفر حضرت تلی والدلی (امام محمد باقر)  
 حضرت تلی ندن؛ آنلر دخی (امام زین العابدین) حضرت تلی ندن؛ آنلر دخی  
 والدلی (امام حسین) حضرت تلی ندن؛ آنلر دخی (امام علی) ﴿کرم الله  
 وجهه ورضی الله عنه﴾ حضرت تلی ندن؛ آنلر دخی رسول اکرم ﴿صلی الله  
 علیه وسلم﴾ افندمن حضرت تلی ندن آخذ و تلقن ایتمشد.

بر آخر جهتن دخی بو طریقت علییه بی امام جعفر والدیه سی طرفندن  
 جدی (امام قاسم) حضرت تلی ندن و امام قاسم دخی (سلطان فارسی) حضرت تلی ندن؛  
 آنلر دخی (ابوبکر صدیق) حضرت تلی ندن اخذ ایتمش و مشارالیه حضرت تلی  
 دخی طرف عالی نبویدن تلقی و تلقن بیورمشدر؛ رضی الله علیهم اجمعین.

### فصل ثانی

خواجه حضرت تلی نک توبه و انا به سبله جذبات و مجاهداتی بیاننده در.

حکایه — خواجه حضرت تلی بیورمشدر که توبه و انا بتمک سببی  
 بود که اهل بیته میل قلبی وار ایدی، برکون آنسکه خلوت ایدوب  
 اوطور رکن اکا التفات و محبت داتر بعض معامله ایتدم، ناکاه هاتفدن  
 «جمله دن بری اولوب جناب حضرت به یوز دوندیرمه زمانی دهاکلمدی؟»  
 خطابله عتاب ایدلدن؛ اول عتابدن حالم غایت متغیر اولوب بیقرار اولدم،  
 قلوب خاومدن طشره چیقدم، اول هله قریب اولان ایرماقده اثوابی  
 بودم و توبه نیتله دخی غسل ایتدم، اول شکسته لک ایله ایکی رکعت نماز

قیلدم و جمیع ماسوادن توبه و اعراض ایدوب جناب حق توجیه ایتدم،  
 اندنصکره نیجه ییلار درکه بن اول نمازک آرزو سندهیم، زیرا اونماز کی  
 بردها نماز قیلدم!

دیگر — خواجه حضرت تلی بیوردیلر که توبه و انا بتمدن صکره  
 (زیورتون) قریه سنده ساکن اولدم و اوقات خسه بی اول قریه نک جامعنده  
 سنت و جماعت ایله ادا ایدردم، برکون حسب الاقتضا بروقت نمازی ترک  
 ایتدم ایدی، اول جامع شریفک بر عالم متقی امامی وار ایدی، بکا دیدیکه  
 «بن سنی صف آرای میدان طاعت بیلوردنم، سن ایسه صف شکن  
 ایتمش سک؟» بن دخی جواباً دیدمکه «حضرت تلی بکا حسن ظنی اولدیغندن  
 اولله ملاحظه ایتدکز، یوقسه بن بریالدرلی تونیم» امام افندی جواب  
 اولقی اوزره شو:

### (بیت)

قلب روی اندنسانند ز بازار عشق  
 خالص باید که از آتش بیرون آید سلیم

بیتی سویلدیلر؛ بو بیت قلبنده اولله بر درد پیدا ایتدیکه اول دردک  
 شعله سی آتشدن بنده حالا بیقرارلق موجوددر.

دیگر — حضرت خواجه (قدس سره) بیوردیکه کریم مطلق  
 (جل عطاء) حضرت تلی لطف و عنایتله بکا فتح باب ایتدکدن صکره مقدما  
 اولان یارانلرم برکیجه یولده اوکه چیقیدیلر و بکا نوازش ایدوب بنی ینسه  
 کندیلرینه اویدرمق ایچون چوق سعی ایتدیلر که انلره اتباع ایدم، لکن  
 عنایت حق ایله اولوقت لساندن «حق تعالی نک آچش اولدیغنی قیوی  
 قیامغه و قیامش اولدیغنی قیوی دخی آچغه کسه نک کوچی یتز» مقادیغنی



شامل اولان اشو ( مايفتح الله للناس من رحمة فلا ممسك لها ومايسك فلا مرسل له من بعده ) كلامی صادر اولمش و بو كلام انلره دخی حسن تاثیر ايتمش اولديغندن جمله سی بردن توبه واستغفار ايدوب حق تعالينك طريقنه سلوك ايتديلر .

ديكر — خواجه حضرتلری اوائل حاللرندن حكایت ايدوب بيوردیلر كه « بز اويچ كيمسه ايدك طريق حقنه سلوك ايتدك ، اما بنم همم جميع ماسوادن پكوب حق تعالی حضرتلرينه واصل اولمق ایدی ، اول جلدن حق تعالينك عنايتی ايريشهرك بنی جميع ماسوادن پكوروب مقصودمه ايرشدردی »

### ( بیت )

مردان رهش بهمت دیده روند  
زان رهرا نشان پایرا نیست

ترجمه — مردان راه خدا همت چشمه یوردیگری جهته اول بولده آباق ایزی اولز .

ديكر — خواجه حضرتلری بيوردیلر كه اوائل طلبده یولم برقرار خانه یه اوغرا دی ، كوردمكه انده نیجه كمسه لر قار اوینارلر ، انلردن ایکی كمسه دخی غایت قاره مشغول ایدیلر ، اول ایکی كمسه نك بری مغلوب اولوب هر نقدر دنیاغی وار ایسه یودولدی ، اول خسارت ایله اول كیمسه نك جد وسعی زیاده اولدی ، رفیقنه دخی دیرایدیكه ای بنم دوستم ، بولعبده سمری دخی ویرسم بوندن بنه واز كلم ؛ مرقومك بوقدر خسارت ایله اول لعبه اولان شوق و ذوقنی كوردیكده بنده دخی طریق حقهده بر غیرت ظهور ایتدی كه اول كووندن بری طلب حقهده جد وسعیم زیاده اولمده در

### ( بیت )

تادر نزدی بهر جئه داری آتش \* هرگز نشود حقیقت وقت تو خوش  
ترجمه — ای سالك راه خدا ، مالك اولدیغك هر شیعی آتش نسیان ایله یاقدجقه حقیقت وقتك خوش اولماز .

ديكر — خواجه حضرتلری بيوردیلر كه بدايت طلبده حالم بویه ایديكه هر هانگی بر محمله ایکی كمسه صحبت ایدر كورسم انلرك صحبتلرينه قولاق طوتاردم ، اكر صحبتلری حق سبحانه و تعالی جانبنه متعلق ایسه اول صحبتدن شاد و ممنون و اكر حق جانبنه متعلق اولمزه اول صحبتدن غمناك و دغون اولوردم .

### ( بیت )

هر كه نه کوی تو خاموش به \* هر چه نه یاد تو فراموش به

ترجمه — هر کیم سنی ذکر ایتیه اول ساکت اولمايك ، هر شی سكا ذکر اولیه آنی اونوتمايك .

وهر نوقت كه بنده بر حال ضلله ایتسه ایدی بر آشنا استردمكه بن حق جانبندن سویلسمده اول دكسه ، اوسویلسمده بن دكله سم !

ديكر — خواجه حضرتلری بيوردیلر كه ابتداء طلبده بكا هاتقدن ندا كلدیكه نه کیفیته بو طریقته سلوك ایدرسن ؟ بن ایتدمكه هر نه دیرسم وهر نه دیرسم اول اولسون ، هاتقدن دخی دینلیدیكه یوق اولیه اولز ، بزهرنه دیرسم سن انی ایشلك كرك ، بندخی دیدمكه بنم طاقتم بوقدر و بنم طریقته سلوكه قدرتم اولیه اولور كه دیدیكم اوله و اكر دیدیكم اولمزه ایسه بو طریقته سلوكه قدرتم اولز ، بو طریقته دخی سلوك ایدممه ، بنه هاتقدن دینلیدیكه یوق بز نه دیرسم انی ایشلك كرك ، بندخی تکرار دیدمكه اكا



طاقتم یوقدر بوند نصکره اولوقت بنی بدن سلب ایدوب الدیلر تا کیم اون کون مقداری حالم اوله خراب اولدیکه کندمدن بخیبر اولوب ناامید اولدم ، اندن صکره ینه هاتقدن ندا اولدیکه بلی هر نه دیرسک اوله اولسون .

### ( بیت )

انراکه در پذیرد معبود لایعلا \* اوراچه حاجت آید رنج جهاد جله  
ترجمه — اوکسه بی بکنسه معبود بغیر عله — انکیچون نه حاجت اربعینلرده جله .

دیگر — خواجه حضرتلری پیوردیلر که برکیچه کیدرکن یولم برکوبری به اوغرا دی ، اوکوپریدن پکرکن بکا برعجائب حال طاری اولدی ، اول حالدده حق تعالی قلبه الهام ایتدیکه حضرتمدن همان برزده رحقی طلب ایدرسک ، اول وقت بکا برحالت عارض اولوب حالم متغیر اولدی و درونده برغیرت وبرعلو همت ظهور ایدوب صاغ الیم ایله قوتم مقداری یوزیمه برسله اوردمکه اول سله نك اثری نیجه زمان یوزمدن زائل اولدی ، اولوقت دیدمکه « کریم ! دریای رحمتی اوزریمه صب ایله وبکا دخی انی تحمله قوت احسان ایله » درحال بنده اولوقت اثر موهبه رحمت ظهور ایتدی ، اندنصکره هر نه لطف کوردم ایسه اورحمتک اثرندن کوردم .

### ( بیت )

هیت تراپکنکره کبریا کشد \* ان سقفاک هرابه ازی نردبان کشد  
ترجمه — هیت سنی عرش معلایه دک چکر ، اول فوق کاهه بوندن ابو سلم استه .

دیگر — خواجه حضرتلری پیوردیلر که ایام شتاده برکون بکا برحالت جذبه غلبه ایدوب صویندم و آرقه پوست الوب حجرا ویا بانلرده یالین آباق کشت و کذار ایتدم ، آیاقلرم خار و خاشاکدن پاره پاره اولمش ایدی ، اول حالدده ایکن برکیچه بنده سید امیر کلالک جذبه صحتلری ظهور ایدوب اول جذبه ایله سید امیر کلال خیامنه توجه ایدوب کتدم ، چنانکه مجلس شریفلرینه داخل اولدم ، بنی کوردکلرنده مریدانه خطاباً « اول کیدر ؟ » پیوردیلر ، مجلسنده اولانلر دخی دیدیلر که « بهاء الدین » در ، انلر دخی پیوردیلر که « مجلسدن انی طشره ایدک » انلر دخی بنی مجلسدن طشره براقدیلر ، نفسم غایت سرکشاک ایتک استدی ، آز قالدیکه عنان ارادتمی قطع ایدم ، لکن عنایت الهیه بکا یاور اولوب نفسمی اول سرکشلسکدن منع ایدرک نفسمه خطاباً « ای نفس ! بن بوخوارلکی الله ایچون قبول ایتدم ، بنی الله تعالی البتده بوخصوصده مأجور ایدر » دیدم وباشمی سید حضرتلرینک آستانه سعادتنه وضع ایتدم .

صباحه قدر باشمی اول آستانه سعادتدن اوزریمه قار یاغدینی حالدده قالدیرمدم ؛ سید حضرتلری صباح نمازینه چیقارکن قاپوی آچوب قدم شریفلرینی باشمه باصدیلر ، بنی اول حالدده کوردکلرنده آستانه دن بنی قالدبروب خانه سعادتلرینه کتوردیلر وبکا چوق نوازشرله تسلیتلر ایدوب بشارتلر ایتدیلر و « اوغلم ! بوخلعت سعادت انجق سکا لایقدر ! » پیوردیلر و مبارک اللریله آیاقلرمدن اولان خار و خاشاک چیقاروب یاره لریمه علاج ایتدیلر ، فیض روحانی بنده اول وقت حاصل اولدی ، بندخی شیمدی هر صباح خانه مدن مسجده چیقارکن امید ایدرمکه برمریدی آستانه مدده اول حالدده کورم ، لکن شمعی مرید قالدی جمله شیخ اولدی !!!

### ( بیت )

کربشاید بدوست ره بردن \* شرط یاربست در طلب مردن



ترجمه — دوسته یول بولق آرزوسنده اولان ، دوستلغك جله  
شرائطندن اولان اولمكي اختيار ايدر .

ديكر — خواجه حضرتلری بیوردیلر که ایام سلوکده بخاراده  
ساکن اولوردیم ، سید امیر کلال حضرتلری دخی نسفده ساکن اولورلر  
ایدی ؛ برکون سید حضرتلرینک جاذبه محبتلری بنده غلبه ایدوب قرارم  
قالدی ، اولوقت قالقوب نسف جانبده روان اولدم ، چنانکه سید  
حضرتلرینک زیارت شریفه لایله مشرف اولدم ، بکا بیوردیلر که « ابو وقتده  
کلدک ، زیرا فرونه قایلری طولدریم ، لیکن اودون یوقدرکه فرونی  
یاقوب قایلری بشورم » بندخی اول خدمتی رحمت بیلوب واردیم طاغدن  
آرقام ایله مغیلان دیکنلرینی یوکلنوب کتوردیم ، حضرت سید دخی  
اوکتیردیکم مغیلان ایله فرونی یاقوب قایلری بشوردی ، سیدک صنعتی  
قاب یاهق ایدی !

### ( بیت )

بنجام براه چنان می دواندم بنشاط \* خارهای مغیلان جریر می آید

ترجمه — طریق کعبهده اویله نشاط ایله یلدمکه ، اول طریقهده  
اولان تیکنلر بکا اپک کلدی !

ديكر — خواجه حضرتلری بیوردیلر که غلبات طلبده برکون سید  
حضرتلرینی زیارت ایچون بخارادن نسفه کیدرکن اوکه بر آنلی کیمسه  
چیقدی که الله عصا وباشنده کلاه وار ایدی ، اول عصا ایله بنی اوردی  
ویدیکه « آتیلری کوردکی ؟ » بن اکا هیچ جواب و برمدم ، برقاج  
کره کیدوب وکلوب اوکه پکوب بکا تشویش و بردی ، بن سنی بیتام سن  
کیمسک ؟ دیدیکمه بشیمه دوشوب « کل سنک ایله صحبت ایدلم ! » دیمش  
ایسهده قطعاً التفات اینیوب کتندم ، سید حضرتلرینک چنانکه ملاقاتلریله  
مشرق اولدم ، بیوردیلر که « خواجه خضر (علیه السلام) سکا ملاقی اولدی

وسنک ایله صحبت مراد ایتدی نه ایچون آکا التفات ایتدک ؟ » جوابنده  
« جناب حضرتکزه توجه ایتدیکم ایچون آنلره التفات ایده مدم ، زیرا آنلره  
انتسابم آنلرک صحبتلرندن بنی اغناء ایتدی دیدم

ديكر — خواجه حضرتلری بیوردیکه سید امیر حضرتلرینک مجلس  
سعادتلرینه واردیم ، او مجلسدن سید حضرتلری قالقوب طریقهده برخط  
چکوب کیندیلم و دیدیلر که « کیمسه ایچون بوخطی پکیمک ممکن دکلدر ،  
مجلسده اولنلر جله مخیر قالدیلر ، لیکن عنایت حق سبحانه و تعالی بکا دستگیر  
اولوب قالدیم ، اول خطی پکوب سید حضرتلرینک وراسنده طوردم ، چنان  
آنلره قریب اولدم ، دونوب بکا خطاباً « اوغلم پک کوزل ایتدک ، بزدن  
برخطله کرو قالدک ، شمدنصکره هرخط مشکل که اوکوکه چکرلر ، جهد  
ایتکه آتی پکوب طشره قالمیه سک ! » بیوردیلر

ديكر — خواجه حضرتلری اوائل حالنده ایتدکلری مجاهداتی

حکایت ایدوب بیوردیلر که زیورتون قریه سنده درویشان ایله برقیش  
کیجه سی بر مجلسده ایدک ، اول کیجه بکا غسل اقتضا ایتدی ، غسل ایچون  
طشره چیقدیغیمده جمیع آقار صولری طوکش کوردیم ، بوزلری قروب  
غسل ایتک ایچون برشی آرادمسده بوله مدم ، دوریشانی اوپاندروب  
بمحضور ایتک استمدم ، کوردمکه غیری برچاره یوق آرقامه براسکی پوست  
آلدم ، زیور توندن چیقوب قصر عارفانه کتدمکه غسل ایدیم ، چنانکه  
قصر عارفانه کیدوب خانه مه واردیغیمده اهل بیتک جله سی اویقوده  
بولندقلرندن آنلری دخی اوپاندردیم و خانه مک اطرافنده آرادمکه برقاب  
بولوب آنک ایله غسل ایدم ، برشی بوله مدم ، اندن صکره واردیم معجدهک  
حوضنک بوزونی قیروب و حوضدن برقاب ایله صو آلوب غسل ایتدم  
واول کهنه پوستی ینه ارقامه آلوب درویشانک جله سی اویقوده اولدقلری  
حاله زیورتونه کلدیم و آنلری ینه اوپاندروب بمحضور ایتدم !

ديكر — خواجه حضرتلری اوائل حاللرین حکایت ایدوب



پیوردیلر که آلتی آی مقداری باطن قهوسی اوزریمه باغلندی ' اول مدته  
اصلا بنده برفیض الهی ظهور ایتدی ' اول سبیدن بی آرام و بیقرار اولدم  
دشت و صحرای کزدم ' ناچار قالب انجامنده قصد ایتدم که وارایم بر مخلوقه  
تعلق ایله آنک خدمتده ملازمت ایدیم ' اول نیت ایله کیدرکن یولم  
بر مسجد اوغرای ' اول مسجدک دیوارنده (کل ای دوستم بنم دایم  
سنکله \* صقین بیکانه اوله کل بنله) مالنده اولان :

### ( بیت )

ای دوست بیا که ماترایم \* بیکانه مشو که آشنایم

بیتنی کوردیکمده حالم غایت خوش اولوب عنایت بی علت بکا ایرشدی  
فیض قهوسی دخی باطنده کشاد اولدی .

دیگر — خواجه حضرتلری پیوردیلر که جوانلق زمانده حق  
سبحانه و تعالیدن طلب ایتدمکه « یارب ! بکا توفیقی احسان ایله »  
بو طریقک بارینی چکیمکه بکا قوت و قدرت ویر ' تا کیم بو طریقک نقدر  
ریاضات و مجاهداتی وار ایسه ایشلییم « حضرت واحد مطلق طلب  
واقعی لطفاً اجابت ایدوب او یله قوت و قدرت ویردیکه بو طریقک نقدر  
ریاضات و مجاهداتی وار ایسه جمله ایشلدم ' شمدی پیرلک و قنده کلفت  
ریاضات و مجاهداتدن آزاد اولدم .

### ( بیت )

شرطست که مالکانه تحریر \* آزاد کنده بنده پیر

### ( ترجمه )

شرط بودر که مالکانه اسیر \* آزاد ایدر بنده اولورسه پیر

دیگر — خواجه حضرتلری پیوردیلر که منازل و مقاماتی عبور

آواننده ایکی کره حلاج منصورک صفتی بنم وجودمده پیدا اولدی ' آز  
قالدیکی آندن ظهور ایدن صدا بنیدن دخی ظهور ایده ' اولوقت بخاراده  
بردار آغاجی وار ایدی ' اول دار اغاجک دینه کتدم و کندی کندی  
دیدمکه « اکر سندخی دعوای انا الحق ایدرسک ' سنک دخی یرک بودار  
آغاجینک باشیدر » عنایت الهیه بکا دستگیر اولدیده بن اول دعوان  
یکدم .

دیگر — حضرت عزیزان « رضی الله علیه » دن منقولدرکه  
آنلرک تربیه لرنده بر درویش وار ایدی ' عزیزان حضرتلری اول درویشه کمال  
شفقت ایدوب آندن خوارق عاداتی نفی ایدرلر ' آنلری وارلق عقبه لرندن  
پکوررلر ایدی « اکر روی زمینده عبد الخالق غجدوانی حضرتلرینک  
خلفا سندن بری موجود اولسه ایدی منصور بردار اولمز ایدی » پیوردیلر  
انتهی .

### ( نظم )

وارلغی ترک ایده کور ایتمه انا الحق دعواسن  
زیرا منصور بودعوا ایله بردار اولدی  
عارف ایلرمی بودعوا ایله اثبات وجود  
اهل عرفانه بودعوا قتی یک عار اولدی  
سربینی حقلک ایدر عارف اولنلر مستور  
آنلرک تهمتی سر حق اظهار اولدی  
متلاشی اولوبن کندوکی حق ظن ایتمه  
حق اودرکیم بوجهان جمله آکادار اولدی

### ( فصل ثالث )

خواجه حضرتلرینک فنا فی اللهی و ولایتلری و وصلتلری  
بیاننده در .



خواجه حضرتلری پیوردیلر که ایام سلو کده خواجه بزرگوار بابا سماسی  
( قدس سره ) حضرتلرینک امر ایتدکاری وصیتلرک جمله سیله عمل ایتدم  
وجله سنک نتیجه لرینی کندمده مشاهده ایتدم و بویله وصیت ایتدیلر که  
رسول الله صلی الله علیه وسلم حضرتلرینک حدیثلرینی و صحابه کرامک  
آثارینی تفحص ایت' بن دخی مشارالیهک بو وصیتلرینی طو توب مجالس علمایه  
ملازمت ایتدم واحادیث و آثارلری اوقیوب عمل ایتدم ، عنایت حق ایلله  
بونلرک فائده سنی کورددم ، نتیجه سنی مشاهده ایتدم ، لکن بو طریقت علیه ده  
زیاده فائده و پروب ایشی کورن تضرع ، نیاز ، مسکنت ، مذلت ، علو  
همت اولدی ، بزی دخی بو قیودن ایچرو آلدیلر و هر نه بولدقسه بوصفاتدن  
بولدق !

## ( بیت )

انچارخ زرد و جامه ژنده خرنده \* بازارجه حریر و دیباد کرسنه

ترجمه — بو پرده وجه اصرله لباس کهنه آلورلر \* حریر  
واطلسک بازارای اولدی بویرک غیری \*

دخی پیوردیلر که کلام کبریای حقیقتدر که سالک راه حقیقتنده کندی  
نفسنی فرعونک نفسندن یوز بیک مرتبه بدتر کورسه اول سالک بو طریقتک  
اهلی اوله من ، او بولده نفی وجود و یوقلق نفسنی نقصان صفتیه کورمکک  
عظیم ایشدر ، بو صفتلر بو بولده سر رشته دولت و صلندر ، بن دخی  
بو صفتلری تحصیلده نفسی طبقات موجوداتدن هر طبقه یه نسبت ایدوب  
سلوک ایتدم ، نفسمی دخی ذرات کائناتدن هر ذره ایلله وزن ایتدم ،  
حقیقتنده جله یی کندمدن بهتر و خوشتر کورددم ، تا اول رتبه طبقات  
موجوداتدن نفسی نسبت ایدرک تنزل ایتدیمکه طبقه فضلاته قدر نفسی  
نسبت ایتدم ، فضلاته دخی منفعت بولدم نفسمده هیچ منفعت بولدم \*

## ( بیت )

ازهر کسی و خویشتن باخبرم \* وز هیچ کسی به نیم الا بترم  
هر چند بحال خویشتن نکرم \* یک حبه نیزر قدم تابسم

## ( ترجمه )

هر کسه هم با که ده وار خبرم \* هیچ کابدن دیلم یک بترم  
نقدر حالمه قیلدمسه نظر \* دانه دکر قدم تابسم

خواجه حضرتلری پیوروب دیرلر ایدی که ویس القرینک روحانیتلرینه  
توجه ایدر و آنک صفتندن سیر ایلر ایدم ، بو آنده آنک صفتندن چیقدم ؟  
آنک صفتی ایسه طعامی ترک ایدوب هیچ برسننه اکل ایتمک ، علایقده  
تجرد ایتمک ، وجود امکانیدن فانی اولمق ایدی ، بزی فنا و نیاز  
قیوسندن ایچری آلدیلر ، هر نه بولدم ایسه بونلردن بولدم \*

خواجه حضرتلری ینه پیوردیلر که مشایخ طریقت و کبرای حقیقتک ارواح  
طیبه لرینه توجه ایدردم و جله سنک اثر روحانیتلرینی مشاهده ایدردم ،  
ویس القرینی حضرتلرینک اثر روحانیتلرینه طعامدن انقطاع و علائق  
ظاهریه و باطنیه لردن تجرد ایدی ، هرگاهکه خواجه محمد حکیم ترمذی  
( قدس سره ) حضرتلرینک روحانیتلرینه توجه ایدردم ، آنلرک روحانیتلرینک  
اثری بی صفت و بیر نسکک ایدی ، یکریمی ایکی سنه در که خواجه محمد ترمذی  
حضرتلرینه متابعت طریق اوزره بی صفت و بی رنگیم ، اگر برکسه بی  
بیلک استرسه حالا بوزمانده دخی بی رنگ بی صفت \*

خواجه حضرتلری سلطان العارفين ابو یزید بسطامی ( قدس سره ) دن  
نقلا روایت پیوردیلر که مقاماتی سیر سلو کده صفات انبیا علیهم السلامی  
جمله سیر ایتدم ، چنکه بارگاه محمد ( علیه السلام ) حضرتلرینه ایردم ،



اولقامه کیرمک استدم ، لکن دست رد ایلہ پيشانہ اوروب بنی اولقامه قومديلر ، بن ايسه سلطان العارفينک ايرديکی مقامه ايريشدم ، آنی سير ايتدم ، شيخ جنيد بغدادی ( قدس سره ) ايله شيخ شبلينک ايرديکی مقامله ايريشدم ، آنلری سير ايتدم ، سائر اوليانک مقاملرينه ايريشوب تماميله سير ايتدم ، بر بارگاه معظميه ايردم ، کوردمکه آنک کي معظم بارگاه يوق ، بيلدمکه اول بارگاه معظم محمد ( صلي الله عليه وسلم ) ک بارگاهيدر ، اول بارگاه قنده تادب ايدوب طوردم ، آنی کيروب سير ايددم و ابو يزيدک ايتديکی کستاخلفی ايتدم ، انجق سر نيازی اول آستانه عزته وضع ايدوب تعظيم و حرمت ايله تقبيل ايتدم .

خواجه حضرتلری بيورديلر ، برکون کندی جاعتم ايله ( زيورتون ) قريه سنده بر باغده اوطوردق ، ناکاه اول وقت بنده بر اثر جذبه الهيه و عنايت ازليه بي علمه ظهور ايدوب بنده بر اضطراب و بی قرارلق حاصل اولديکه اصلا راحتم قالمدی ، اول حالت ايله قالقوب قبلهيه متوجهاً اوطوردم ، اول توجهده بکا بر غيبت عارض اولدی ، اول غيبت ايله بنده فناي حقيقی ظهور ايدوب فناي في الله ايرشدم و اول فناده عياناً روحی کوردمکه ملکوت سماواتی کچوب اول يره ايرشدمکه روحم اول يره کوب صورتنده نوردن بر درياه غرق اولوب نابيد اولدی ، اول وقت جسممده اثر حیات قالمدی ، اول حالده اهل و عیالم کريه و افغان ايتديلر بر زماندن صکره روح ينه جسممده عودت و بشريتمه رجعت ايتدی ، اول فنا بنده آلتی ساعت مقداری متمادی اولدی .

ينه بيوررلر که بر کچه درویش محمد زاهد ايله مزداخون ( رجه الله عليه ) مزاري عندننده اوطوررکن روحم جسممدن طشره چيقوب دوران ايدرك سوی آسمانه عروج ايتدی و جله آسمانی سير ايدوب صکره ينه دوران و هبوط ايدرك جسمديه دخول ايتدی ، بنم بو حاملدن محمد زاهدک « کيسه لر بتلديکی بکانه حالت اولدی ! » مألنده اولان ( کسرا و قوف نيست ماراچه ثالثت ) مصرعی مضمونجه اصلا خبری اولدی .

خواجه حضرتلری بيورديلر که برکون ( زيورتون ) مسجدینک عودينه طيانوب قبلهيه متوجه اوطورردم ، ناکاه بنده اثر غيبت ظهور ايدرك تدريج ايله جميع وجوديه سرايت ايتدی و اول غيبت بنی بدن بالکليه نحو ايتدی ، اول حالده « آگاه اولکه مقصودکه واصل اولدک ! » دنيلدرک بنی وجود بشريه اعاده ايتديلر .

ينه بيورديلر که اقطاب زمان و اوتاد زميندن برجاعت قائمه کلوب حاضر اولدی ، بنی بر سجاده نک اوزرينه آلوب اجلاس ايتديلر و اول سجاده نک اطرافنی طوتوب بنی قالدريدلر و بر عظيم تخت اوزرينه وضع و اجلاس ايتديلر ، اندن صکره بنده هيچ غم و اندوه اولمادی و اولماز ! مشايخنن بعضاری خواجه حضرتلرينک حضورنده « خواجه حضرتلری زمانک ختم ولايتی و قطب الاقطايدر ، زیرا چوق آيت وحديشده آکا اشارت واردر » ديدکلرنده خواجه حضرتلرينک سکوت بيوردقلری روايت اولمش و خواجه حضرتلرينک بوس سکوتی اول بعض مشايخنک ديدکلرينه اقرار و تصديق ديمک اوله جفی آکلاشلسدر .

قطب اولياء عزت ديدکلری عبد القدس ( رجه الله عليه ) حضرتلرندن نقلاً روايت اولندی که خواجه حضرتلرينک حکمی و سیری جميع آسمان زمينه جاری اولدی ، زیرا حضرت عزيزان ديدیکه جله زمين بو طائفه نک نظرنده « سفره » مثلوردر ، خواجه حضرتلری دخی ديدیکه طرناق مثلليدر ، بونلرک نظرلرندن بر شی غائب اولمز ، عزيزان حضرتلرينک روی زمينی سفرهيه تشبيه ايتلری دائره ولايتلرينک کبر و سعتلرينه نسبت ايله در ، زیرا برولينک نقدر دائره ولايتی کبير و واسع اولسه عوالم اولقدر نظرنده صغير اولور .

### ( نظم )

خاتم کنز ولايت واقف کنز قضا  
قطب عالم شبهه سز خواجه بهاء الدين در



طوتدی آفاق ولایتله صدای شهرتی  
برج احکام شریعتده ضیاء الدین در  
فص قلبی نقش اسرار حقیقت رسم ایدن  
نقشبند خواجهکان شاه لواء الدین در

### فصل رابع

خواجه حضرتلرینک فقر وفاقه لری و اخلاق و آدابی و معرفته دآر بعض  
کلمات قدسیه لری بیانده در .

خواجه حضرتلرینک خلفاسندن خواجه علاء الدین ( قدس سره )  
نقل ایتدیکه خواجه حضرتلرینک صفات سنیه لری « فقر وفاقه » ترک  
دنیا ، تجرد ماسوی ، نفی وجود فانی ، مشاهده وجود حقانی « ایدی ؛ دائم  
فقری مدح و ثنار ایدوب سالک لری فقره ترغیب و تشویق ایدرلر و « بزل  
هرنه بولدق ایسه صفت فقر ایله بولدق ! » دیرلر ایدی ، کندیلرینک  
فقری اول رتبه ده ایدیکه خانه سعادت لرنده ایام شتاده مسجد شریف لری نه  
فرش ایده جک نسنه سی اولمدیغندن برکهنه کلیم دوشرلر ایدی ، معیشت لری  
حلال خاص ایدی و حلالی تحصیلک طریقنه مباغنه ایله رغبت و دقت  
ایدرلر ایدی ؛ شهبادتدن اجتناب لری حرامدن اجتناب کبی ایدی ؛ دائم  
مجلس لرنده ( العبادة عشرة اجزاء تسعة منها طلب الجلال و جزء منها سائر  
الاعمال ) حدیث شریفی ذکر ایدرلر ایدی .

فقر وفاقه لری بورتبه ده ایکن کرم عطالری ، احسان و ایثار لری اعلا  
درجه ده ایدی ، برکیمسه آنلر بر هدیه کتورسه اوکسه ده هدیه سنک امثالی  
یاخود ایکی مثلی قیمتده بر شی عرض ایدرلر و ( تهادوا تحابوا ) حدیث  
شریفی منطوقیله عمل ایلرلر ایدی ؛ بیلدیکی یاخود بیلدیکی کسه لردن بری  
خانه لری نه کیمسه بشاشت ایله آنی استقبال ایدوب اجلاس ایدرلر ایدی  
واکا ما حاضر اولان طعامدن و غیره ما کولاتدن اولان نسنه ایله اکرام

ایدرلر ایدی و مهمانه بالذات خدمت ایدوب آخره ایتدیرمز ایدی ، اگر  
هوا بارد اولسه مسافر اوشو مسون دیه جامه خوابلری و اورتونه جک  
یورغانلری مسافره و یروب کندیلری جامه خوابسز یا تورلر ایدی ، مسافرک  
دابه سینه صو و صمانی کندیلری و یرلر ایدی ، نفقه لری زراعتسه  
مخصوص ایدی ، زیرا هر سینه آنلر بر مقدار شعر بر مقدار ماش زراعت  
ایدوب آنلر ایله تعیش ایدرلر ایدی ، اکثر علما و صلحا زیارت شریف لری نه  
کلورلر و « حلال خالص اکل ایده لم » دیو تبرکا طعامی اکل ایدرلر  
ایدی ، هر امرده سنت سنیه ده اتباع و باخلاصه طعام خصوصنده زیاده  
دقت و اهتمام ایدرلر و یورلر ایدیکه خبرده وارد درکه زوجات طاهرات  
( رضی الله عنهن ) دقیق شعری اله میوب خبر ایدرلر ایدی ، بزم اهل  
بیتزده اله مه دن دقیق شعری اکک ایتدی ، اول اککدن اهل بیت  
اکل ایتدکده جمله سی خسته اولدی ، چنکه اول قصه دن بکا خبر ویردیله ،  
بیلدیمکه اول خسته ک صاحب رسالت ( صلی الله علیه و سلم ) افندمن  
حضرتلرینک زوجات طاهراته عدم متابعتدن اولدی و بی ادبک ایدوب  
زوجات طاهراته مساوات صورتیله ایش ایشلر کلر ننددر ، بندخی اهل بیت  
دیدمکه زوجات طاهراته متابعت صورتیله اکک پیشسیروب اکل ایدک ،  
انشاء الله تعالی صحت بولورسز ، آنلر دخی زوجات طاهراته متابعت ایتک  
اوزره اکک پیشسیروب آندن اکل ایتدیله جمله سی صحت بولدیله .

### ( بیت )

هرکه پی در پی رسول نهاد \* از همه رهروان به پیش فتاد

### ( ترجمه )

کیمکه روش پی رسوله ایدر \* رهروانی کچوب ایلر و کیدر

روایت اولنورکه خواجه حضرتلری اکثر اوقاتده طعامی کندولر  
طبخ ایدرلر و سفره خدمتی دخی کندولری کورلر ایدی ، طعام ایدرکن



سالکله حضور مع الله ووقوفه رعایت ايله امر ایدرلر ایدی ، جماعت ايله طعام ایدرکن اگر اول جماعتدن بری غفلت ايله لقمه اخذ اینسه اکا شفقت ایدوب تربیه طریقیله انی اکاه ایدرلر ایدی ، برکیمسه یه سفره لرنده غفلت ايله طعام ایتدرملرلر ایدی و برطعام غفلت ايله یا غضب ايله و یا اکراه ايله طبخ اولنسه ، اول طعامدن اکل ایتملر و سالکله ده اول طعامدن بدرملرلر ایدی .

نقل اولندیکه خواجه حضرتلرینک احباسندن بری انلره برپو خواجه هدیه کتوردی ، خواجه حضرتلری بیوردیلرکه بزه پو خواجه دن یک لایق دکلدر ، زیرا پو خواجه غضب ايله یوغرلدی و غضب ايله طبخ اولندی ، اگر برطعام غضب ايله طبخ اولنسه و یا غضب ايله قوتاراسه ، اول طعامدن یملرلر ایدی و بیوررلر ایدی که هر نوع تغدی که یا غفلت و یا غضب و یا کراهتله وجوده کسه ، اول نسنه مکروهدر ، انده خیر و برکت یوقدر ، زیرا آکا نفس ايله شیطان یول بولدی ، البت و البت انی اکل ایدن کسه ده بر نتیجه قبیحه ظهور ایدر و آکا بناء در که جمیع اعمال صالحه و افعال حسنه آکا هلق ايله طبخ اولوب و آکا هلق ايله اکل اولنان حلال خالصدن ظهور ایدر ، بو خلقک اعمال صالحه یه موفق اولمقلری اکل و شر بلرینه عدم احتیاطلرننددر ؛ جمیع احوالده و خصوصاً صلاتده اول ( حضور مع الله ) آکا هلقله طبخ اولنوب و آکا هلقله اکل اولنان طعامدن نشأت ایدر .

حکایه — خواجه حضرتلرینک ( هراة ) مملکتشه وقوع عزیمتلرنده هراة ملکی علماء و مشایخ هراتی جمله دعوت ایتدی اول جمعیتده خواجه حضرتلرینه و سایر علماء و مشایخه اکرام ایدوب سفره خدمتده مشغول اولدی ، طعاملرک جمله پدری میراندن حلال وجه اوزره وجوده کلدیکی جهنله شبهه ایدلیوب اکل ایدلمسنى و قیامتده بو طعامدن طولای سوال اولنورسه ضامن اولدیغنى بیان ایتدی ، بوندن صکره جمله می اکله شروع ایتدیلر ، اول دیارک شیخ الاسلامی اولان مولانا ( قطب الدین )

دخی او سفره ده حاضر ایدیلر ، آنلر خواجه حضرتلرینه دیدیلر که « نیچون بو حلال لقمه دن اکل ایتزسکز ؟ » خواجه حضرتلری بیوردیلر که « بنم بر حاکم وار ، اکا عرض ایتدمکه یو طعامدن اکل ایده می ؟ یوقسه ایتیمه می ؟ » اول بکا دیدی که « اکل ایتمه و اگر نیچون اول طعامدن اکل ایتدک ؟ دیه سوال ایدرلر ایسه ( ملک طعامی اولدیغنى ایچون اکل ایتدم ) جوابی ویر ! » چنکه خواجه حضرتلری شریعت و طریقت اوزره بونکته دقیقه ای اولجمع عظیمده مولانا قطب الدینسه سویلدیلر مولانا قطب الدینک حالى متغیر اولوب حیرت کلدی ، ملک خواجه حضرتلرینه تعریض طریقیله « درویشان بویله نمکته لری سویلیه ککشلردر ! » دیمش اولدیغندن مولانا « عفو ایدوب آنلری بزه باغشلاک » دیو ملکدن استرحام ایلدی !

ملک ایسه خواجه حضرتلرینک بونکته سندن غایت منفعل اولوب مولانادن بو طعاملرک کیمله اطعام ایدلمسنى لازم کله جکنى صورمش و مولانا دخی آنک جوابی ینه آندن طلب ایدلمسنى ملککه بیان ایلش اولدیغندن ملک دخی خواجه حضرتلرندن جواب طلب ایتدکده خواجه حضرتلری بیوردیلر که « شریعتده آنک جوابی بودر که هر برشیده که شبهه اوله آنک مصرفی فقرادر ، اگر بو طعاملرده شبهه وار ایسه فقرایه و یرمک کرک و اگر شبهه اولیوب حلال صرف ایسه بو هرانده چوق کسه لر واردر که بو طعاملرک لقمه سنه احتیاجلری واردر انلره اطعام ایتک کرکدر ، زیرا بو مجلسده اولنلر هر بار بو طعاملری اکل ایده ککشلردر »

خواجه حضرتلرینک شریعت و طریقتی جامع اولان شو جواب قدسیلرندن حضار مجلس جمله متحیر اولوب اعتقاد ایلدیلر .

دیگر — خواجه حضرتلری ( سرخس ) مملکتشه ایکن ملک هراتدن انلره بر مکتوب کلدی ، مضمونی بو ایدی که « خواجه حضرتلرینک حکایت شریفه لرینه غایت اشتیاق واردر ، نه اشارت بیوررلر » کرچه



خواجه حضرتلر ينك ملوك و سلاطینی تشریف و انلرله ملاقات ایتلری  
وظیفه دکلدر اما، ملک اولجانبه زیارت ایچون توجه ایدوب کلورسه  
فقرايه غایت ثقلت و خلقه دشوار اولور ملاحظه سنه بناء خواجه حضرتلری  
سرخسدن ملک ملاقاتی ایچون هرات جانبه روان اولوب کندیله  
خواجه حضرتلری ملک ایله ملاق اولدقلرنده ملک مجلسنده حاضر بولنان  
بالجمله اعیان و اشراف و علماء و مشایخ خواجه حضرتلرینک زیارتلریله مشرف  
اولدیله بر ساعتد نصکره طعام چکلدی، جمله اشراف و علماء و مشایخ سفرهیه  
اوطوروب اکل طعامه شروع ایتدیله، خواجه حضرتلری دخی سفرهیه  
اوطوروب اما اكله شروع ایتدی و بر آرائق سفرهیه لیم صید کتوردیلر،  
خواجه حضرتلری اندن دخی اکل ایتمهجه اولوقت علمادن بری خواجه  
حضرتلرینه دیدیکه « لیم صید حلال خالصدر انده شبهه یوقدر، نیچون  
اندن اکل ایتمز سکر؟ » خواجه حضرتلری بیوردیلرکه « خوان ملکده  
طعام ایتمک بکالایق دکلدر، زیرا بن جماعت درویشانک معتقدیم و درویشانک  
بعضیلری بونده حاضرلدر، بنی کورلرکه خوان ملکده طعام یدم،  
بیلزلرکه حلال طعام می یدم، یوقسه شبهه لی می؟ بواشته ایلله بندن حسن  
اعتقادلری زائل اولورده استفاضه ایدوب طریق حقه سلوک ایده منزل،  
بو جواب حقانیدن جمله سی مستفید اولوب خاموش اولدیله و سفره  
قالقدندن صکره خواجه حضرتلرینه ملک سؤال ایتدیکه « بو صفت  
درویشیت سزلره موروثمیدر؟ » خواجه حضرتلری بیوردیلرکه « موروث  
دکلدر اما ( جذبة من جذبات الرحمن توازی عمل الثقلین ) مؤداسنجه جذبه  
ایریشوب بوسعادت ایله مشرف اولدم، صکره ملک ینه سؤال ایتدیکه  
« سزک طریقکزده خلوت اولور می؟ » خواجه حضرتلری بیوردیلرکه  
( خلوت در انجمن ) تعبیری بو طریقک عظماسندن اولان خواجه عبدالحق  
عجبدوانی حضرتلرینک کلاملرنندر؛ ینه ملک سؤال ایتدیکه « خلوت  
در انجمن دیمک معناسی ندر؟ » خواجه حضرتلری « ظاهرده خلق ایله  
باطنده حق ایله اولیق دیمکدر » بیوردیلر \*

## ( بیت )

ازدرون شو آشنا و از برون بیکانه شو  
اینچنین زیباروش در این جهان کم می شود

## ( ترجمه )

انیس اول یار که باطنده، وحشت ایله ظاهرده  
بودر آیین عاشق یار ایله اغیار اراسنده

ملک دیدیکه « بودیدیکمز معنا انسانه ممکن و میسر میدر؟ » خواجه  
حضرتلری بیوردیلرکه « اگر بومعنا ممکن و میسر اولمیددی حق سبحانه  
و تعالی [ رجال لاتلهیهم تجارة ولا یبع عن ذکر الله ] بیورمنزل ایدی، صکره  
ملک سؤال ایتدیکه « بعض مشایخ دیدیکه ( الولاية افضل من النبوة ) بوقنخی  
ولایتدرکه نبوتدن افضل اوله؟ » خواجه حضرتلری « بوندن مراد ولایت  
انبیادر، زیرا نینک ولایتی نبوتدن افضلدر » بیوردیلر \*

ملک ایله بوسؤال وجوابلردن صکره خواجه حضرتلری مجلسدن  
قالقوب شیخ عبد الله انصارینک خانقاهلرینه کیدوب نزول ایتدیله، ملک  
دخی خواجه حضرتلرینه دورلو ذی قیمت هدیهلر ترتیب ایدوب خواص  
اتباعلریله ارسال ایتدیله، خواجه حضرتلری اول هدیهلردن برشی  
قبول ایتدیله و بیوردیلرکه نیجه سنه لدرکه حق تعالینک عنایتی ایله  
کسهلرک کوچی یتدیکی میدان فقرده آرقی یره کتوره مدیلر، ایدمی ملکده  
سویلیک که خاطرینی بو مثللو امور ایله مشغول ایتسون، اندن صکره دخی  
ملک حرمندن برقیص و بر سر اوایل و بر مندیله خواجه حضرتلرینه هدیه دیو  
کوندردیلر و دیدیلرکه « بونلر کندی الیم علمندن وجهت حلالدنیز، نیاز  
ایدرمکه خواجه حضرتلری باری بونلری قبول ایده! » کتورن کسه  
دخی چوق نیاز ایتدی، آنلریده قبول ایتدیله! حالبوکه خواجه حضرتلرینک  
اول وقت قیصلری یوق ایدی و باشلرنده کهنه عمامه و آیاقلرنده اسکی  
پابوج وار ایدی، بو ضرورته ایکن ملک جانبندن برشی قبول ایتدیله \*



## (بیت)

دیوانه کند هر دو جهان را بخشد \* دیوانه تو هر دو جهان را چه کند

## (ترجمه)

دیوانه ایدوب صکره و پرر سگ دو جهانی

دیوانه اولان نیلسون آلسون دو جهانی

نقل اولندیکه خواجه حضرتلری صائم اولدقلری کون انلره مهمان کلسه ، اول مهمانه استیجال ایدوب طعام ماحضر کتوررلر ایدی و خاطری خوش اولسون ایچون صومنی بوزوب مهمانه موافقت ایدرلر ایدی و چوق کره بیوررلر ایدیکه اصحاب رسول الله (صلی الله علیه وسلم) مجلسده جمع اولسهلر البت برشی اکل ایدرلر ایدی ، صائم اولانلر اولمایانلره موافقت ایدرلر ایدی ، چوق کره ینه بیوررلر ایدیکه ابو القاسم کرکانی کتانبنده « معصیت اولمادیغی یرده اخوانه موافقت ایتمک نافله صومدن کمتر دکلدنر » دیو ذکر ایتمشدنر .

ودخی نقل اولندیکه خواجه حضرتلرینه برسمک مطبوخ هدیه کتوردیلر ، اول مجلسده اولان درویشان ایله اکل مراد ایتدیلر ، جمله درویشان سفرهیه کلوب اوطوردیلر اما بر درویش کلوب اوطورمدی ، خواجه حضرتلری دخی اکا « نیچون سفرهیه گلر سگ ؟ » دیدیلر ، اول دخی « صائم ! » دیدی ، خواجه حضرتلری دخی « کل بزه موافقت ایت » دیدیلر ، اول درویش ینه اجابت ایتمدی ، خواجه حضرتلری ینه لطف بیوردیکه « ایام رمضانده برکون ثوابنی سکا بخش ایدیم ، کل بزه موافقت ایله » اول کسه ینه اجابت ایتمدی ، اول وقت خواجه حضرتلری بیوردیلر که « بوکسه حقه بعیددر ، سنز بونی ترک ایدک ! » اول کسه دخی غایت زاهد و متورع ایدی ، اندنصکره اول کسه زهد و ورعن ترک ایدوب خطام دنیانک طلب و تحصیلنه مبتلی اولوب اولیاء اللهک محبتلرندن دور اولدی .

نقل اولندیکه خواجه حضرتلرینه بر (قصعه هریسه) هدیه کتوردیلر ، خواجه حضرتلری دخی مجلسده بولنان درویشان دیدیلر که « کلک سزکله بوهریسه یی اکل ایدلم » جمله سی انی اکله اوطوردیلر ، درویشانندن بری اوطورمدی ، خواجه حضرتلری اکا دیدیکه « نیچون کلوب اوطورمز سگ ؟ » اولدخی دیدیکه « صائم ! » خواجه حضرتلری اکا دیدیکه « صائم ایسه ک دخی کل بزه موافقت ایله ، بزی باب فضلدن کچوردیلر و بزم وظیفه من ادای فرائض و واجبات و سنن مؤکده در ، زیرا اثرده ( من شغلہ الفرائض عن الفضل فهو معذور ومن شغلہ النفل عن الفرض فهو مغذور ) وارد اولمشدر ؛ هرکیم بزم احبابمزدنر بزه متابعت لازمدر ، زیرا بزم نسبتیمز متابعتیمز بولنمز ، ینه بیوردیلر که اول ریاضات و مجاهداتسکه بز ایشلدک سزک انلری ایشلییه طاقتکز اولمز ، همان سزک تدبیریکز بودر که اختیاریکزی ترک ایدوب رضامزی طلب ایده سز ، دخی درویشه لازمدر که دائم اندیشه و فکر ایده که عجب قنغی عملی ایشلدکله اهل الله بندن راضی اوله ؛ بو طائفه نیک کلمات قدسیه لرندندر که مرید ایچون شیخه خدمت ایتمک عبادات نافله دن افضلدر .

خبرده وارددر که رسول الله (صلی الله علیه وسلم) افندمن حضرتلری بر غزاده ایدیلر ، ابوبکر و عمر (رضی الله تعالی عنهما) اول غزاده رسول الله خدمت ایدوب و صائم اولورلر ایدی ، رسول الله (صلی الله علیه وسلم) افندمن حضرتلری آنلره بیوردیلر که صوم سببیه ضعیف اولوب خدمت ایده مز سکز ! صومی ترک ایدک ، انلر دخی امره امتثالا صومی ترک ایتدیلر .

خواجه حضرتلرینک اول رتبه حسن خلقلری وار ایدیکه اکر بر درویشک و یاخود بر دوستنک خانه سنی تشریف ایتسهلر اوکسه نیک جمع اولاد و متعلقات و جیرانی سؤال و حیواناتنه وارنجه تفحص ایدرلر و جمله سنک خاطرلرینی تطیب ایلرلر و بیوررلر ایدیکه سلطان العارفین ابو یزید (قدس سره) هر گاهکه عالم استغراقدن صحوه کلورلر ایدی ، جمله احباب و اصحابنی سؤال ایدوب تفحص ایدرلر ایدی .



بر درویش دیدیکه خواجه حضرتلرینک صحبته داخل اولمزدن مقدم  
زراعت بستان ایله تعیش ایدردم، بر کون خواجه حضرتلری مزرعده  
اولدیغی محلدن مرور ایدرکن آنلری کوردن و بستانده اولوقت قاوون  
یا بر قارپوز بولوب خواجه حضرتلرینه هدیه کتورم، کوردمکه جمله  
خامدر، چاره بوله مدیغمدن همان بر خام قاوون کسوب نیاز و مسکنت ایله  
عذر دیلیرک حضور شریفلرینه کتوردن و دیدمکه «افندم! بوندن غیری  
افندیه لائق قاوون بوله مدم» جمله سی خامدر، زیرا هنوز اولغه باشلادی؛  
خواجه حضرتلری آنی قبول ایتدیلر، آندن صکره چوق زمان بکا اول  
سبیدن نسبت ظاهره ایله التفات و شفقت ایدوب خاطریمه رعایت ایدرلر  
ایدی، آنلرک حسن خلقلری سبب اولدیله بن و متعلقاتم جمله طریق حقه  
سلوک ایدوب خواجه حضرتلرینک نسبت باطنیه لریله مشرف اولدق،  
خواجه حضرتلری چوق کره بیوررلر ایدیکه خلق بکا دوست و نسبتی  
خلق آراسنده ثابت و اظهار ایدن بوستانی درویش ایدی و بوییتی دخی  
بیورردی.

### (بیت)

جان میفر و ختم بجوی کس نمیخرد  
آن لحظه یار بر سر بازار مارسید

### (ترجمه)

یا تلق ایتدم جانی برار پایه کسه آلمدی  
اولوقت یارم یتشدی کلدی جان یازارینه

اول درویش که بستانده بولنان خام قاوونی طریق نیاز ایله بزه  
کتوردی، البت بزه دخی لازم اولدیکه آنک ظاهر و باطن احوالنه رعایت  
ایدهم، اکا احسانده مبالغه ایدهلم، زیرا احسانده سبقت ایتک بیوک ایشدر،  
آنی کورمز میسنکه؟ ایکی کسه بری برلینه ملاقی اولدقده آنلردن بری سلامه  
سبقت ایتسه اول برینک اوزرینه رد سلام واجب اولور! زیرا حق تعالی

حضرتلری [واذا حیثتم بحیة خیوا باحسن منها اوردوها] بیوردی؛  
اول درویش تا کیم حیاته در آنک حقنه رعایت ایدرم زیرا حقوقه رعایت  
آداب طریقنددر، مقامات عالییه ایریشنلرک کافه سی، آداب طریقته  
رعایت ایله ایرشمشدر، و طرق علیهنک بیوک لری (من اتصل اتصل برغایة  
الادب و من لم يتصل لم يتصل بترك الادب) بیورمشلردر.

خواجه حضرتلری بیوردیلر که «بو طریقته قصور صاحبی اولان  
کسه، کرکدر که تضرع و تذلل ایدوب اعتراف عجز و قصور ایله سلوک  
ایده، تا که او کسه نك مقصودی حصوله کله!» خلق دیرکه بزم طریقته  
ریاضت یوقدر، ایدمی بوندن بیوک ریاضتی اولور؟ که خاطری ماسوادن  
کسیلوب نسبت حضور مع اللهی حفظ ایده، جمیع احوال ظاهریه  
و باطنیه لری سنته تطبیق ایدوب هر حالده نفسنه مخالفت اوزره اوله،  
مخالفت نفس هر نقدر عمل قلیل ایهده سالک آنی بیوک بیتک کرک، سالک  
مخالفت نفسه قادر اولور ایهه آنی الله تعالینک توفیقندن ییلوب شکر  
ایتمک کرکدر.

مشایخ بیوردیلر «اذا اردت مقام الابدال فعلیک بتبدیل الاحوال».

بو کلامده تبدیل احوالدن مراد مخالفت نفسدر، «سز نفسکزه هر حالده  
تهمت و تهدید ایدیکز! زیرا نفس (امارة بالسوء) در، هر کیم بو حاله  
موفق اولورسه سعاده ایریشور؛ سالکه هر طرفه العینده وجود امکانی  
نفی ایدوب وجود حقایق بی اثبات ایتک لازمدر، زیرا «وجود ذنب  
لا یقاس به ذنب اخر» بیورمشدر وینه بیورمشدر که (صلوة و صوم  
وریاضات و مجاهدات) رب العالمینه طریق وصولدر، اما بزم عندمزده نفی  
وجود بونلردن وصوله اقریدر و نفی وجود ترک اختیار ایتک و عملده قصور  
کورمکله حاصل اولور؛ تعلق ماسوی سالکله جهاب غظیمدر، اگر  
بر سالک قلبی تعلقدن مجرد قیود دن تبعید ایتسه، اول سالک البت حقه  
واصل اولور و پردها اخر ریاضاته و مجاهداته حاجت قالماز.



## ( بیت )

تعلق حجابست و بی حاصلی \* چو پیوند را بکسلی حاصلی

## ( ترجمه )

تعلق شویله بیل کیم حقه بی حاصل حجاب اولدی  
انی کسمک سکا وصل جناب حقه باب اولدی

خواجه حضرتلری بوییتی بیوردقلری وقت مجلسده، برکیمسه نك خاطرینه کلدیکه ایمان و اسلام دخی تعلق حجابیدر؟ خواجه حضرتلری دخی اولوقت اوکیمسیه توجه ایدوب تبسم ایدهرک بیوردیلرکه حلاج منصورک ( کفرت بدین الله و الکافر واجب علی و عند المسلمین واجب حرام ) بیتنی ایشتمدکی؟

اهل حقیقت ایمانی ( الایمان عقد القلب بنی جمیع مائالفت القلوب الیه من المضار و المنافع سوی الله عز و جل ) جمله سیله تعریف ایشتملردر؛ سائر ناسک عندنده کی ایمان و اسلام اهل حقیقتک عندنده کی ایمان کی دکلدر، فائده ویرن ایسه ایمان حقیقی اولاندر .

خواجه حضرتلرینک برحنفی المذهب دوریشی واریادی، اولدرویشیه خواجه حضرتلرینک زیاده نظر و التفاتلری واریادی، برکون اولدرویشی بر اجنبی درویش ایله بحث ایدوب تحقیق مقام و تفصیل کلام ایدوب ایمان و اسلامی تعریف ایدرک دایما اقرار ایله تصدیقندن و اسلام دخی ایمان اوزره زائد اولان اعمالدن عبارتدر دیدی، بونک اوزرینه امثله و دلائل سوق ایتدی، اول بحث خواجه حضرتلرینک سمع مبارکه لرینه واصل اولدقده اول مجلسده بولنان درویشانه بیوردیلرکه سزک اول بحثه تعلقکر اولدی، سزه کرکدرکه اول تعلق ترک ایدوب ایمانی تقلیددن چکوروب قورتیله سز، اول درویشانک جمله سی خواجه حضرتلرینک نصیحتیه ایمان تقلیددن چکیدیلر، اما اول بحث ایدن چکمدی و غایت مضطرب و متحیر اولدی،

ا کا ممکن اولدیکه ایمان تقلیددن کچه! خواجه حضرتلری اول درویشیه دیدیکه بوندن صکره درویشان صحبتندن چقی! طورمه! اول درویش خواجه حضرتلرینه چوق تضرع و نیاز ایدوب عفوینی طلب ایتدی، لکن خواجه حضرتلری آنی درویشان آراسندن طرد ایدوب بردخی دوریشان مجلسنه قومادی، صکره عنایت الهیه ایریشوب اولدرویشی عقبه تقلیددن چکوردی، حالی غایت خوش اولوب خواجه حضرتلرینک اذنیله درویشان صحبتنه داخل اولدی، صکره اول درویش حالندن تشکر ایدوب دیرایدیکه ( کاشکی خواجه حضرتلری بولطفی بکا مقدم ایده لردی، الله تعالی یه حد و ثنالر اولسونکه خواجه حضرتلری همتلریله بنی بوعقبه تقلیددن چکوروب ایمان حقیقی سعادته ایرشدیردیلر .

خواجه حضرتلری برکون دابه لرینه سوار اولوب کیتدیلر، رکابلرنده چوق درویشان و احبابلر واریادی، اولوقت خواجه حضرتلری دابه اوزرنده عظیم کریمه و بکا ایتدیلر، درویشان و احبابی دخی آنلره اتباعاً بکا و کریمه ایلدیلر، لکن کیمسه خواجه حضرتلرینک کریمه لری سببی بیلدی و برنیجه وقت کریمه دن صکره خواجه حضرتلری اظهار مذلت و افتقار ایدوب بیوردیلرکه ( بوقدر افلاس و بیخا صالاق که بنده واردر، لایق دکلدرکه بنم کسه سلامی الله، لکن حق تعالی بنی خلق آراسنده رسوای ایدوب خلقی بکا مشغول قیلدی! دریغا که کسه لر بنم احوالندن خبردار دکلدر .

## ( بیت )

کرید انندم برانندم ز شهر \* ای دریغا کس نمیداند مرا

## ( ترجمه )

کر بیلیدیلر شهر دن نفی ایدرلردی بنی \* ای دریغا کسه لر هیچ بیلدی کندی بنی  
نثر — بنم بو خلق ایله نه ایشم و مصلحتم وار، زیرا بنده خدا اولان کسه یه جمیع احوال و صفاتنه و حرکات و سکناتنه و لحظات و خطواتنه



وقوا وحواسننده واعضا واجزاسنده حقه مشغول اولوب خلقدن منقطع اولسه حقیقتده اكا بنده اطلاق اولمز ، اول بنده دخی حقیقت اخلاص ایله مشرف اولمز ، زیرا اشغال تعلقات بشریه واهواء نفس اماره قتی چوقدر بنده کرکدر که بوحدیث شریفک حکمی اوزرینه « رجعنا من الجهاد الاصغر الى الجهاد الاکبر » عمل ایدوب جمله ماسوادن اکراه وانقطاع ایده ، تا کیم حقیقتده اول بنده بنده حق اوله ، تشکیم حق تعالی [ فن یکفر بالطاغوت و یؤمن بالله فقد استمسک بالعروة الوثقی ] پیوردی ؛ بنده یی حق تعالی دن اشغال ایدن ماسوا طاغوتدر ! آنلردن انقطاع و آنلری انکار ایدوب حقه مشغول اولقی بنده یه لازمدر که حضرت رسول اکرم ﷺ افندمن حضرتلری ( الهوی عند الله ابغض من جمیع الالهة ) پیوردیلر یعنی « کفره نك یر یوزنده اله دیو طایدقلری نسنه لردن اهل اسلامک اله کبی طایدقلری هوای نفس عند الله بدتر و اشر !! » اولدیغنی بیلدیردیلر .

بنده حق اولان کسه جمله هواری ترک ایدوب فقط حق تعالی نك عبودیتنه مشغول اوله ، حق تعالی دن غیر نسنه له تعلق و محبت ایتیه ، تشکیم « کورمز میسین ؟ یا محمد ! اول کیمسه که هواسنی اله اتخاذ ایتدی و کندینی حق بنده نی ظن ایدر » معناسنی شامل اولان [ افر آیت من اتخذ الهه هو یه ] پیورلمشدر .

### ( بیت )

خواجه بندارد که دارد حاصلی \* خواجه فی را جز به این پندار نیست

### ( ترجمه )

خواجه ظن ایلر که وارچوق حاصلی \* ظندن اوز که خواجه نك بوق حاصلی

نثر — رسول الله ( صلی الله علیه و سلم ) افندمن حضرتلری پیوردیلر که « تعس عبد الدرهم تعس عبد الزوجة » یعنی هلاک اولدی

و هلاک اولسون کوش و التون بنده سی وزن و فرزند بنده سی ! زیرا هر کیمسه که بر شینه تعلق و محبت ایدر آوشی اول کیمسه نك مونس و معبودیدر و اول کسه دخی اول شینک ما نوس و عبیدر .

### ( بیت )

هر چیر که اندر جهان بسته انی \* انست ترا درد و جهان مونس معبود

### ( ترجمه )

هر نسنه که اولدک جهانده اكا بسته \* اولدی دو جهانده سکا اول مونس و معبود

نثر — بنده یه کرکدر که هر شیدن علاقه سنی قطع ایدوب قلبی حقه ربط ایده ، پیوردیکه حضرت عزیزان ( علیه الرحمة و الغفران ) حضرتلردن سؤال ایتدیلر که « درویشک ندر ؟ » آنلر دخی پیوردیلر که « برکندن و پیوستندن یعنی مخلوقدن انقطاع و ابتعاد و حقه ارتباط و اتصالدر » ینه پیوردیلر که « اولولردن بر اولونک سوزیدر که هر کیم ماسوادن قورتیلوب سلامت بولورسه مسلماندر ، هر کیم مرادات و مقاصد دن اعراض ایدوب فراغت ایدرسه مؤمندر ، زیرا کسه مؤمن اوله من تا کیم خبیثی طیبیدن تمیز ایتدیکه معناسنه اولان [ ما کان الله لیذر المؤمنین علی ما انتم علیه حتی یمیر الخبیث من الطیب ] آیت کریمه سی بوکا اشارتدز ؛ هر نسنه که بنده نك مرادی هوای نفسیدر اول نسنه خبیثدر .

جمیع موجوداتدن یعنی آسمان وزمین و عرش و فرش بونلرک درونلرنده اولان نسنه لک جمله سندن فارغ اولور ايسه ک ایریشوب ایریشمیکندن قورتولورسک ، کوروب کورمدیکنک انتظارندن پاک اولورسک ، جمله بلا و آفتلردن سلامت بولورسک ، بویولده وجود حجابندن بیوک حجاب و وجود بلا سندن بیوک بلا اولمز و بویولده مریدله تمیندن زیاده زهر قاتل اولمز ؛ بونلردن دخی پکیمک سالیکه لازمدر تا که مقصوده ایریشه .



## ( بیت )

تادر نرنی چه داری آتش \* هرگز نشود حقیقت وقت توحوش

## ( ترجمه )

یوقلقله اگر اورسك ایدی وارلغه آتش  
وصلت یولنه یوقلق اولور سكا ضیا کش

خواجه حضرتلری بیوردیلر که حدیث قدسیده وارددرکه 'الله تعالی داود علیه السلام' ه خطاب ایدوب بیوردی که « یاداود ! بنی دوست ایدین ، دوستلری دخی دوست ایدین ! و بنی بندهلریه سودیر ! » داود علیه السلام دخی دیدیکه ( یارب ! سنی دوست ایدنمکه و دوستلریکی دخی دوست ایدنمکه کوجم یتر اما ، سنی قوللریکه سودیرمکه کوجم یتمز ! ) حق سبحانه و تعالی حضرتلری تکرار بیوردیکه « یاداود ! هرگاهکه بنم نعمتی قوللریه خبر ویروب احسانمی ذکر ایدرسك ! آنلرک قلبنده محبت حاصل اولوب بنی سورلر \*

خواجه حضرتلری بیوردیلر که بزم طریقیز طریق هدی وعروه وثقی در ؛ زیرا بوطریقت علیه اتباع سنت رسول و اقتدای اصحاب اوزره مبنیدر ؛ آنکچون بو طریقته عمل قلیل ایله چوق فتوحات حاصل اولور ؛ اما رعایت اتباع سنت غایت صعبدر ؛ اگر بز دیلرسك سالکری طریقته جذبه ایله تربیه ایدرز ؛ اگر دیلرسك سلوک ایله تربیه ایدرز ؛ زیرا مرشد اولان حاذق طبییه بکزر علاجی مر یضنک علته کوره ایدر ؛ نتکیم حق تعالی حکمت بالغه سیله بعض قوللرینه عز و غنا و بعض قوللرینه فقر و ذل ایله معامله ایدر ؛ بزم بو طریقتمز طریق صحبتدر ؛ خلوت شهرت و آفتدر ؛ صحبت بو شرطله کر کدرکه ایکی کیسه صحبت ایتدکلرنده برلرندن فانی اولهلر ! یوقسه بوبله اولمزه صحبتدن فائده اولمز ؛ بزم صحبتمه داخل اولان جاعتنک بعضینک قلبنده محبت نخمی اکتلمشدر ؛ لکن تعلق ماسوی سبیلله

اول تخم نشو و نما بولماش ، بو حالده بزه کر کدرکه اول کیسه نك قلبنی تعلقاتدن پا- ایدم ! تا کیم اول محبت نخمی ظاهر اولوب نشو و نما بوله ! بعضیلرک دخی قلبلرینه تخم محبت اکتلمشدر ؛ بزلره کر کدرکه آنلرک قلبلرینه تخم محبتی اکوب بتوره لم \*

هرکیمک قلبنده بزلره میل و محبت وارددر ! اول کیسه کرک قریب و کرک بعید اولسون ؛ بزلره لازمدرکه آنک نسبتنه رعایت ایدم و آنی روز و شب تربیه ایدوب حس و خشاک تعلقاتدن پاک ایدم ؛ زیرا نسبت محبت ، بعد مکان حجاب اولمز ( یارمنی در یمنی پیش منی ) بزم طریقتمزده سالک کر کدرکه هانکی مقامه ایرشیدیکنی بلیه ! تا کیم مقامی بیلوب اکا راضی اولورسه اول مقام اکا حجاب اولیه ! نتکیم ( من رضی عن مقامه حجب عن امامه ) دنیلدی \*

اگر بر سالک حق تعالی دوستلرندن بر دوسته مقارن اولورسه ، کر کدرکه اول سالک مقارنت وقتنده اولان حالی ایله مقارنتدن مقدم اولان حالنی وزن ایدم ؛ اگر مقارنت وقتنده اولان حالی مقارنتدن مقدم اولان حالندن خوش و احسن اولورسه ! اول عزیزک مقارنتنه ملازمت ایدم ؛ زیرا اول سالک ایچون مقارنت فرض عیندر ؛ اگر مقارنتدن مقدم اولان حالی مقارنت وقتنده اولان حالندن خوش اولمزه ، اول کسه نك مقارنتنی ترک ایدوب آندن فرار ایتسون ! زیرا آنک مقارنتی آکا فائده و برمز ؛ بلکه ضرر ویرر \*

## ( بیت )

با آنکه نشستی و نشد جمع دلت \* از تو نرود ثقلت کلت  
زهارار دیکری زان می باش \* زیرا نکند جان عزیزان بجلت

## ( ترجمه )

کیمدن سکا گلرزه اگر صفوت خاطر \* یاسندن اگر کتمزایسه کل عناصر  
زهار صاقوب اولمه مقارن اکا زبرا \* هیچ ایلز ارواح عزیزان سنی خامر



خواجه حضرتلری بیوردیلرکه « هرگز شیخ اولان کیمسه کندی قوتیله  
مریدی بر مقامه ایصال ایدمهز ، اکرکه مرید ، خقی طلبده پای همتن شیخ  
باشنه وضع ایتمدیکه ، اکر مریدک بو رتبه همتی اولورسه شیخ آنی کندی  
مقصودینه ایصال ایدر ، زیرا شیخ مریدک نزدبانیدر

طریقت ابدن عبارت اولوب طریقه سلوک شرطی « ادب مع الله ،  
ادب مع الرسول ، ادب مع الشیخ » اولق اوزره اوچدر . \*

ادب مع الله ؛ سالک ایچون ادب مع الله « عرشدن فرشه قدر  
موجود اولان اشیانک کافه سنی الله تعالی خلق ایتدی ، جمله سی  
الله تعالینک آستانه عزتنه باش قودیلر ، بونلرک کافه سی فنا صفتیله  
موصوفلردر » اعتقادنده بولنقدن عبارتدر . \*

ادب مع الرسول ؛ سالک سعی ایدوب کندینی [ فاتبعونی ] مقامنه  
ایرشدیرمکدن جمیع احوالنده واجبه حرمة رسول اللهی حفظ ایلکدر . \*

ادب مع الشیخ ؛ سالک شیخی متابعت رسول ایدرک نائب رسول  
الله وخلق حقه دعوت ایله مأمور اولدی اعتقادنده بولنق شیخ حضور  
وغیبتنده تعظیم و تکریمه رعایت ایتمکدن عبارتدر . \*

مشایخ کرام اهل بصیرتدر ، الطاف حضرت ازلیسه یی بیلورلر ،  
اهل کرمدرلر ، سالکک قصور و خطراتنی کوررلر ، عفو ایدرلر ،  
مشایخک احوالی مختلفه در ، الطاف ربوبیتی مشاهده وقتنده آنلره کوره  
کاه کلور .

### ( بیت )

یش لطف عفو بی حد تو شاه \* توبه کردن از کنه امد کنه

### ( ترجمه )

لطف عفوک اویله چوق ای پادشاه \* معصیتدن توبه اولمشدر کنه

بو طائفه مشایخک امناسیدر . سالکدرده ظهور ایدن یرامن خوی  
و بد فعلاری نقیر و قطمیر بیلورلر و کوررلر و شفقت ایدوب سالکری  
آندن کچوررلر .

### ( بیت )

اگر بینی که نا بینا و جاهست \* اکر خاموشی بنشین کنهست

### ( ترجمه )

کوررسن بر کورن اوکنده قوی \* سکوت ایدوب او طورسن اولمازی

مشایخ صیاده بکزر ، تمکیم صیادلر دقیق صنعتلریله وحشی جانورلری  
صید ایدرلر و اول جانورلرده اولان صفت وحشی ازاله ایدوب آنلره  
هنر و معرفتله تعلیم ایدرلر ، مشایخ کرام دخی حسن تدبیر ایله نفوس  
طاغیه و عاصیه نک طغیان و عصیانلری ازاله ایدوب انقیاد و اطاعت  
صفتلریله موصوف ایدرلر ، ادب عبودیتی تعلیم ایدوب اسرار الهیه یی  
کوسترلر و معرفه اللهه ایردیرلر و حقیقت خدمتنی ایدرلر . \*

مشایخن بعضلرینک معاملهلری سالکک قابلیتله کوره در ، اکر  
سالک مبتدی اولورسه ، آنک یوکنی یوکنورلر « یا داوود اذاریت لی طالب  
فکن له خادما » خطابه بناء سالکک خدمت ایدرلر ، شیخ اولان سالکک  
چوق خدمت ایتک لازمدرکه سالکک سلوک طریقه قابلیت کله ؛ زیرا  
سالکک طریقه سلوکنک امکانی سالککد یقین حصولنه موقوفدر ،  
ویقینک حصولی ایسه مشایخک همتلرینه محتاجدر ، تا که اول مجاهده لر  
نتیجه ویره ، زیرا مجاهدات و عباداتک نتایجی یقینه موقوفدر ، سالکک  
کندی جانلرندن حاصل اولان یقین ادنی سبب ایله زائل اولور اما مشایخ  
حضراتنک همتلریله حاصل اولان یقین متغیر و زائل اولماز ؛ اولجاهدات  
و عباداتک مشایخک همتلرندن حاصل اولان یقین ایله ایشلمش اوله ، البت  
آنلرک نتیجه سنده معرفت تفصیلیله ظهوره کلور ، ذکرک نتیجه سنک حصولی



همت مشایخه محتاجدر! زیرا ذکر دخی بر شیخ کاملدن اخذ اولند بجه نتیجه سی  
 ظهور ایتمز؛ (لا اله) کلمه سی الهه طبیعیه لری نفی ایدر؛ و (الا اله) کلمه سی معبود  
 حقیقی بی اثبات ایدر، بولکه توحیدی ذکر کردن مقصود توحیدک حقیقتنه  
 ابرمکدر، یوقسه لفظا کلمه توحیدی چوق ذکر ایتک دکدر، زیرا چوق  
 کره کلمه توحیدی (از درون) ذکر ایله نتیجه توحید ظهوره کلور، کلمه توحیدک  
 حقیقتی انی ذکر ایله قلبدن ماسوا بالکلیه نفی اوله! وقوف زمانیک سالکله  
 غایت چوق فائده سی واردر! زیرا سالک، زمانک حضور یله سرورینه واقف  
 اولدقده شکر ایدر و غفلت ایله مرورینه واقف اولدقده زمان آتیده تدارک  
 ایدوب حق تعالی به عذر واستغفار ایدر؛ سالکله ولایت خاصه ده اولیاه  
 اللهم قنغیرینه تبعیت ایدر سه حقه واصل اولور.

مشایخ اوچ قسمدر؛ برنجیسی (مقلد) درکه، ایشیدر و ایشیدیکیله  
 عمل ایدر.

ایکنجیسی (کامل) درکه، بیلور و عمل ایدر و کالی غیر یه تجاوز  
 ایتمز.

اوچنجیسی (مکمل) درکه، بیلور و عمل ایدر و غیر یلری دخی علم و عمل  
 ایله تربیه ایدر، کماله ایرشیدیر.

ارادت، تسلیم، ترک اختیار، بر معنادر و بواوچی دخی بر مبارک  
 حالدر.

ارادته قتی چوق کلام سوبلدیلر ایهده بزم مختارمن (الارادة ترك  
 الارادة) یعنی مرید اولان کیمسه کندی اختیارینی مقتدای اولان شیخ  
 اختیارنده بالکلیه ترك ایتکدر.

### (بیت)

ما اختیار خویشین از دست داره ایم \* کان اختیار شاه همه اختیار ماست

### (ترجمه)

بزدوستمزه جمله ویرمشن اختیاریمز \* اولشاهک اختیاریدر اختیاریمز

نثر، بزم اختیاریمز بودرکه سالکله طریق جذبیه مشغول  
 قیللم، اما اگر دیلرسک طریق سلوک ایله تربیه ایدرز، سالک مبتدی  
 کرکدرکه بزم درویشانمزله صحبت ایده؛ تا کیم بزم محبتدن اکا قابلیت کله.

### (بیت)

به بیغی وقت سفتن مردحکاک \* بشا کردان دهد در خطرناک

### (ترجمه)

کوررمیسک که دلمک وقتی حکاک \* ویره شا کردله در خطرناک

نثر، خواجه حضرتلرینده «سزلنه طریق ایله بولنورسن» دیه  
 سؤال ایدوب «عارفلرک استفاده ایدوب غیرلرک استفاده ایده مدیکی  
 طریق اوزره بولنورزکه بوده مراقبه، مشاهده، محاسبه اولق اوزره  
 اوچدر» جوابنی آلدیلر.

مراقبه، (نسیان رؤیة المخلوق بدوام النظر الى الخلق) حکمنجه،  
 سالک طریقته حقیقتده لازمدرکه رقم نسیاتی جمیع مخلوقاتک ناصیه  
 وجودینه چکوب دائم جانب احدیت ذات مطلقه ناظر اوله، بومعناجه  
 مراقبهک اهلی قتی نادر در! اگر بولنور ایهسه، طریق خفیه اهلیندن  
 بولنور! بزیلدککه دوام مراقبه تحصیلک طریق مخالفت نفسدر.

مشاهده، (المشاهدة هي واردة غيبة ترد على قلب فتروح ولا تمکث  
 فيه) دالی اوزره «بن واردة غیبیه بی بر صفت ایله ادراک ایدرمکه اول  
 صفت بنده حال اولشدر! لکن بوقدر ادراک ایده بیلورمکه اول واره  
 حال قبضده ورود ایتسه صفت جمال اولور، بن انجق بوقدر ادراک ایدوب



تعبیر ایده بیلورم ' بواجلدندر که ارباب مشاهده تجلیاتی ایکی نوعه حصر  
ایدوب ( انجلی اما جلالی واما جالی ) دیدیلر \*

محاسبه ' سالک اوزرندن مرور ایدن ازمنه ماضیه بی تجسس و تفحص  
ایدوب کوره که اول حضور ایله می مرور ایتدی ؟ یوقسه غفلت ایله می مرور  
ایتدی ؟ اگر حضور ایله می مرور ایتدیه ، اولسالک وقتنی ادراک ایتشدیر !  
حق تعالی به شکر وجد ایتسون ؛ اگر غفلت ایله می مرور ایتدیه ، اولسالک  
وقتنی ضایع ایتشدیر ! اکا لازمدر که مستقبله تدارک ایدوب حق تعالی به  
عذر واستغفار ایده ؛ عارفلر بواوچ طریقه رعایت ایتدکلری ایچون چوق  
فائده تحصیل ایدرلر ، اما عارفلرک غیری بو طریقلره رعایت ایتدکلرندن  
بو طریقدن فائده تحصیل ایده مزلر \*

خواجه حضرتلری تکرار بیوردیلر که « بزلر وصول مقصوده واسطه یز !  
سالکلره لازمدر که بزلردن منقطع اولوب مقصوده متصل اولولر ، زیرا  
ارباب تربیتک طریق بودر که اطفال سلوکی کهواره طریقه اداخل ایدوب  
ندی تربیه ده لب همت ایله آنلری تربیه ایدوب حد وصوله ایردیرلر ،  
صکره کندولرندن آیروب بارگاه احدیه اداخل ایدرلر ! اندن صکره آنلری  
رب العالمین تربیه ایدر \*

( بیت )

ممکن نبود وصول مقصود \* بی بدرقه عنایت یار

( ترجمه )

ممکن اولورمی وصول مقصوده \* قیلاغوز اولسه عنایت یار

نثر ' ایدمی سالک اگر عمر ابدی ایله معمر اولسه ، شیخنک نعمت  
تربیتک ولطف همتک شکرینی ادا ایده مز \*

( بیت )

کر بکویم لطف همت بردوام \* بکزرت عزم نکردد این تمام

( ترجمه )

لطفنک شکرین ایدرسم بردوام \* دوکنور عزمده شکر اولماز تمام

نثر ' ینه بیوردیلر که عبادت وجود ایراث ایلر ، زیراعابدک عبادت  
ایتمی وجود طلب ایتکدر ! ایدمی عابده کرکدر که عبادتده نفسنی افنایه  
سعی ایده و ( عبادت ایتدم ) دیو کندینه وارلق ویرمیه ! هرچنکه عبادتلیرینی  
تمام وکال اوزره ایشلر سده کندینی آنلرده قصورلی کوره ! زیرا شول  
عبادتلر که وارلق ایله ایشلنه ! اول عبادتلیر عابدلری حقدن تبعید ایدر !  
تقریب ایتز ؛ بیوکلرک کلامیدر که ( اذا اردت مقام الابدال فعلیک بتبدیل  
الاحوال ) بیورمشلردر ؛ بوتبدیل احوالدن مراد مخالفت نفس و ترک هوا  
و طبیعتدن خروجدر ، بونلری ایشلین کیسه نک البتده احوال بشریتی  
تبدیل اولوب مقام ابداله واصل اولور ، لکن بونلری ایشلک عنایت  
مرشده محتاجدر \*

( بیت )

کیست ابدال آنکه اومبدل شود \* خرش از تحلیل یزدان خل شود

( ترجمه )

کیمدر ابدال اولکه اومبدل اولور \* خری تحلیل خدادن خل اولور

نثر ' ینه بیوردیلر که : اولیاء الله صحبتلرنده حقیقت ادب و قته  
مراعاتدر ؛ زیرا وقت اولور که انلرک صحبتنده بی ادبلیک عین ادب اولور !  
وقت اولور که ادب عین بی ادبلیک اولور ! ایدمی اولیاء اللهک نفس پاکلرینی  
طوتقی حقیقت اولدی ! کرک ظاهرده انلرین نفس پاکلرین طوتقدن بی ادبلیک  
ظهور ایدر سده ، انکچون ( ترک الادب عندالادباء ادب ) دینلدی \*

ینه بیوردیلر که ( من عرف الله لا یخفی علیه شیء ) یعنی بر کیسه معرفت



تامة ايله حق تعالينك الوهيتنى بيلسه ، اولكيمسه سائر اشيايى دىنى كشف  
طريقيله بيلور ، برشى اكا خنى اولماز ، زيرا جميع اشيا حق تعالينك مظهر  
صفات واسما سيدر ، ظاهرى بيلن مظهرى دىنى بيلور .

حضرت عزيزان على رامتينا كلاملردن اولىق اوزره روايت  
بيورديلر كه بو طائفه نك نظر نده روى زمين سفره مقداريدر ، بن بويله ديرمهكه  
طرفق مقداريدر ؛ انلك نظر نندن برشى غائب اولمز ، حضرت عزيزان  
اولكلامى سويلدكلر نده اوكلر نده سفره وار ايديكه انكچون سفره به تشبيه  
ايتدى ، يوقسه عارفك وسعت قلبى بر شيه نسبت اولماز ، زيرا يرلر وكوكلر  
عارفك قلبنه نسبتده بر نقطه كيدر ، انكچون حق تعالى [ ماوسعنى ارضى  
ولاسمانى انما وسعنى قلب عبد المؤمن ] بيورمشدر .

قلبك وسعتى معرفتك وسعتيدر ! زيرا جله قلوبك وسعتى بر در ! لکن  
معرفتلى نك وسعتى بر دكلدر ؛ مشايخك ايكي جهتلى برر ايندلى واردر !  
لکن بزم آينه من الی جهتليدر ! بن قرق سنه در آينه دارلق ايدر م هرگز  
آيندهم غلط ايتامشدر ، زيرا اولياء الله هر نه كوررلر ايسه نور فراست ايله  
كوررلر ، نور فراستى حق تعالى وليلرينه كرامت ويرمشدر ، هر شيكه  
حق تعالى جانبندن كرامت ويريله ، البت اولشى صواب اولور ، خطا ايتمز ،  
توحيدك نهايته ايريشلور اما معرفتك نهايته ايريشك غايت دشواردر ؛  
درويشك پاينه بر خار باتسه انى درویش بيمك كر كدر كه نه سببندر ؛ اهل  
الله بو خلقك بارلر ينى انكچون جكرلر كه خلقدن مهذب اولوب بر كوكل دىنى  
اله كتورلر ! زيرا هيج بر كوكل يوقدر كه حضرت حق اكا نظرايتميه ، كر كسه  
اول كوكل صاحبي اكا واقف اولسون وكر ك اولماسون ، هر كيمكه نظر  
الهي اولديغى وقتده بر كوكل اله كتورسه ، اول نظر دن اول كيمسه فيضياب  
اولور ، ايمدى هر كوكلى اله كتورمك كر كدر كه شايد نظر الهي به  
مصادف اولنه .

### ( بيت )

صد سفره دشمن بكشد طالب مقصود  
باشد كه يكي دوست بياید بضيافت

### ( ترجمه )

يوز صفره جكر دوشمنه اولطالب مقصود  
شايد اوله بر دوستنه اول ايد ضيافت

نثر ، اكر بن يارانلرمك عيبنه نظر ايدرسم ، يارسز قالورم ! زيرا  
هيج كيمسه يوقدر كه صفت حسندن حالى اوله .

### ( بيت )

حاصل دريا نه همه در بود \* يك هنر ازهر كه پر بود

### ( ترجمه )

حاصل دريا اولور م جمله در \* پر هنر اولسه كشي ي دولدور

نثر ، « الرفيق ثم الطريق » بو طريقتك لوازمنددر ، شمع كي  
اول و شمع كي اوله ، يعنى شمع كي اول غير يله روشنائى ويرمهده ،  
وشمع كي اوله ، كنديني ظاننده قومدهده ؛ هر كيم كه بزم دامنه ياپشه بز  
اكا شفاعت ايدرز .

### ( بيت )

نيكوارا دوست دارد هر كه باشد در جهان  
كربدارا دوست دارى كوى بردى ازميان

### ( ترجمه )

ايولرى دوست انخاز ايلدى قواهل جهان  
كوتيلر له دوست اولورسك طويى قاپدك اورته دن



نثر \* درویشانہ دخی امرایتدیله که بویقی ازبر ایدوب حفظ ایدک  
 زیرا بزوبیتدن چوق درس الدق سالکک خواطر نفسانیه و شیطانیه بی دفع  
 ایتمده متفاوتلردر، بعضیلر خواطر نفس و شیطان کلزدن مقدم دفع ایدرلر،  
 بعضیلر دخی کلوب قرار ایتدکدنصکره دفع ایدرلر، بودفع چندان فائده  
 ویرمز! لکن اولسالک خواطرلری منشاء و مدخلنده اطلاع ایدرسه فائده دن  
 خالی اولماز، سالک برصفتدن برصفتنه انتقالک کیفیتنی بیلک غایت صعب ایسه ده  
 سالکه انتقالک کیفیتنی بیلک کرکدر، کیم سالک طریقده سلوکی آسان اوله!  
 بونی بیلک ایسه همت شیخه موقوفدر، درویش هر نه سویلر سه کندی  
 حالندن سوینک کرک، زیرا درویش بر حالدن خبر ویرسه، اول حال کندیکنک  
 حالی اولسه، حق تعالی انی اولخالک سعادتنه ایرشدیرمز.

سالک اگر بر عبادت نافله به چوق دوام ایدوب احیانا آنی ترک ایتمه،  
 اولعبادت اکا عادت کبی اولور فائده سی اولماز، ایمدی سالکه کرکدر که  
 گاه بگاه نافله عبادتی ترک ایده، تا کیم عادت کبی اولوب انده نفسک حظی  
 اولیه! زیرا نفسک حظیلله ایشلنن عبادت سالکه فائده ویرمز بلکه حق  
 قتمده مردود در، رسول الله (صلی الله علیه وسلم) دعای برکاتیلله بوامته  
 مسخ صوری اولماز، لکن مسخ معنوی اولور.

### (بیت)

اندرین امت نباشد مسخ تن \* لیک مسخ دل بودای ذوالفطن

### (ترجمه)

اولمدی بوامت ایچره مسخ تن \* مسخ دل واردر محقق الکله سن

نثر \* اولیاء الله اسرارہ مطلع اولورلر، لکن اجازتسن اظهار  
 ایده منزل (هر که دارد میبوشد و هر که ندارد میخروشد) زیرا (اخفاء  
 الاسرار من صنع الاحرار) در، بزدن بعض کره خلقک خواطر احوالی

اظهار صادر اولور، لکن بزم ارادت مزایله دکلدر! حق تعالی بزم لسانزدن  
 انلری اظهار ایدر، کرکدر که درویشک طشره سی بیرنک و درونی بیچنک  
 اوله.

### (بیت)

تادرین خر قه آیم \* از همه نرنجیم وهم نرنجیم

### (ترجمه)

بو خر قه ایچنده بولندجه نه کسه بی انجیر ونه کسه دن انجیرم

نثر \* بر اولو کسه دن سوال ایتدیله که درویشانی نه حالده در جواب  
 ویردیله که زبونلقده در، درویش تحملده یوک چکچی حیوانه بکرز  
 کرکدر که نقدر یوکتسه لر تحمل ایده، درویش طبله بکرز هر نقدر چوماق  
 اورسه لر اصلا آدن مخالف صدا ظاهر اولمز، درویشلر ابن وقت واهل  
 نقدر، معاملهلرینی فردایه حواله ایتزلر، آنک ایچون (الصوفی ابن  
 الوقت) بیورلمشدر.

### (بیت)

امروز بین باطن جمال دوست \* ای بیخبر حواله بقدر اچه میکنی

### (ترجمه)

بو کون عین بصیرتله جمال یاری سیرایله \* صقین ای بیخبر قتلله حواله آنی فردایه

نثر \* شیخ ابو الحسن خرقانی حضرتلرینک کلمات قدسیه سننددر،  
 اولطریق که حقدن عبده کیدر جمله سعادت اندر سعادتدر، اولطریق که  
 عبیدن حقه کیدر، جمله ضلالت اندر ضلالتدر. بیضه قابلیتک فاسد



و مخالف صحبت کردن حال ، غایت مشکدر ، آتی انجق کبریت اجر اولان  
اهل ارشاد صحبتی اصلاح ایدر .

( بیت )

جز صحبت عاشقان مستانه مپند \* دل در هوس قوم فرومایه مپند  
هر طائفه ات بجانب خویش کشد \* جمعیت سوی و برانه و طوطی سوی قند

( ترجمه )

عاشقانك صحبتدن غیری بی ایتمه پسند  
قلبی ایتمه صقین قوم فرومایه لاله بند  
چکمه ده هر طائفه یار بی کنیدی سمته  
بوم چکر ویرانه یه هم طوطی چکر سوی قند

نثر ، بز اوائلده مطلوبی کنیدی طلب ایدوب بیلدك ، صکره  
حق تعالی بز کنیدی ایصال ایدنلره سوق ایتدی ! آنلر دخی بز حق  
ایصال ایتدیلر ، زمانه طالبلری ایسه کنیدلر دن مطلوبی طلب ایدوب  
بیلدك استملر ، ایستلر که حق طلب ایدوب بیلدن حقه واصل اوله لر !  
ایدی بر کیمسه مجاهده ایدوب حق تعالی یه قوللق ایلسه ، حق تعالی آنك  
قلبنه داعیه طلب اعطا ایدوب بزه سوق ایدر ! بز دخی آنك حق جانبده  
هر نه نصیبی واریسه اكا ایصال ایدرز و حقیقتده مرشد حق تعالیدر .

بز بو یولده خوارلیکی اختیار ایتدك ، لکن حق تعالی کنیدی فضیلدن  
( ولله العزة و لرسوله و للمؤمنین ) قول شریفنی ناطق اولدیغی وجه اوزره  
بزه عزت و یردی ، بو یولده اهل پندارك حالی غایت مشکدر .

( بیت )

کرچه حجاب تو بیرون از حدت \* هیچ حجابی تو چو پندارد نیست

( ترجمه )

کرچه حدندن حجابکدر بیرون \* یوق حجابك هیچ پندارك کبی  
نثر ، نقل اولندیکه خواجه حضرتلری بی بر کیمسه کبره نسبت ایتدی ،  
خواجه حضرتلری دخی بیوردیلر که « بزم کبریه حق تعالی کبریا سیدر »

( بیت )

بار تکبرم اکرم در سرست \* هم زدم اوست که درمن وزید

( ترجمه )

بنم باشمده کی بار تکبر \* دم حقندنر اول کیم اسدی

نثر ، ( الکاسب حبیب الله ) حدیث شریفنده کی کسیدن مراد  
رضاء اللهدر ؛ کسب دنیا دکلدر ، بر کیمسه جمیع امور بی الله تعالی یه  
تفویض ایتدکدن صکره مخلوقه اتجا ایتك شرکدر ، لکن بو شرک اهل  
عمودن عفو اولنور ، لکن اهل خصوصدن عفو اولنر ، الله تعالی یه  
توکل ایدن کیمسه کندوسنی متوکل کورمیه و توکلنی مکاسبیدن بر مکسب  
ایله ستر ایده ، حق تعالی بی تخریب دنیا ایچون خلق ایتدی ، خلق ایسه  
بندن تعمیر دنیا طلب ایلر .

( بیت )

جرا بعالم اصلی خویض وازوم \* من از بکا وغم یار این وان زبکا

( ترجمه )

نیچون قیوب بونیده آینده اصله کتم \* که بن غریب زدن بار بود ارتردن

نثر ، اگر بو وجود انساندن خراب اولوب آخر بر وجود اولسه ،



بوفقیری اکا وضع ایدلردی، ایددی کرکدرکه انسان دائم فقر اوزره اوله!  
 تمکیم حق تعالی [والله غنی وانتم الفقراء] بیوردی، وارد اولان (امط  
 الاذی عن الطریق) حدیث شریفنده ذکر اولنان (اذی) دن مراد نفسدر  
 و طریقدن مراد طریق حقدر، ایددی دیمکدرکه نفسکی حقلک یولنده  
 ازاله ایله! تا کیم حقه ایره سک.

(بیت)

زیر دیوار وجو دتوتوی کنج کهر \* کنج ظاهر شودارتو زمین بر خبری

(ترجه)

زیر دیوار تنکده سنسک اوکوهر کانی  
 ظاهر اولوردی اوکوهر اولسک ایدی سن ویران

نثر، و دخی (نفسک مطیتک فارقی بها) حدیث شریفنده ذکر  
 اولنان نفسدن مراد مطمئنهدر، اماره دکلدر، زیرا نفس اماره یه رفق  
 ایتک رخصت ویرمکدر واکا رخصت ویرمک معصیته سبیدر، اما نفس  
 مطمئنیه رخصت ویرمک قوت طاعته سبیدر، زیرا نفس مطمئنیه نه قدر  
 رخصت بولسه او قدر طاعته میلی و شوقی زیاده اولور و عصیاندن  
 اعراضی آرتار، زیرا اولیاء اللهک نفسلری مقام اطاعتده بر رتبه یه بالغ  
 اولدیکه اگر رضاء الله ابرام اولنسه لر، دخی خلاف رضاده اولمازلر،  
 ولایت بیوک نعمتدر، ولی اولان کیمسه کرکدرکه ولایتی بیله تاکه ولایت  
 نعمتک شکرینی یرینه کتوره، ولی اولان کیمسه عنایت حقله جمیع آفات  
 بشریه دن محفوظدر، اصلاً نفسی اکا غلبه ایدمه، ولیدن ظهور ایدن  
 کشف و کرامتله هیچ اعتماد اولتماز، انجق اعتماد اولنوب فائده ویرن  
 استقامت و متابعت سنتدر! آنک ایچون (الاستقامه خیر من الف  
 کرامة) دینلش و حدیث شریفده دخی «یا علی کن طالب الاستقامه»

ولا تکن طالب الکرامة فان ربک یطلب منک الاستقامه و نفسک یطلب  
 منک الکرامة» وارد اولمشدر.

اکر ولی بر باغه کیرسه، اول باغک اشجارینک هر اورا قندن اکا (یا ولی  
 الله) اوازی ظاهر اولور، او ولی یه لازمدرکه اول اوازه التفات ایتیب ذل  
 و افتقارینی آرتروب عجز و قصورینه اعتراف ایده، بومقامده رسول الله  
 (صلی الله علیه وسلم) کلامه ایر شمشدر، زیرا آنلره هر نقدر لطف الهی و فیض  
 ربانی اولدیه، آنلرینه بنده لک و نیاز و تضرع لرینی زیاده ایدوب (افلا  
 اکون عبداً شکوراً) بیوردیلر، بعضی اولیانک حق قتنده قصورلرینه نظر  
 اولنمیوب عفو اولنملری نفی بشریت حالنده اول قصوری ایشلدکلرنددر!  
 یوقسه و لیلرک قصوری سائر ناسک قصورلرندن بیوکدر و مؤاخذه لری  
 دخی اشددر، بنده یه لایق اولان بو درکه بر علی ایشلدزدن اول اختیارین  
 سلب ایده و ایشلدکدن صکره اختیارین اثبات ایده که اختیارینی اثباتده  
 چوق سعادت واردر، زیرا بر بنده اگر رضاء الله مخالف عمل ایشلمسه  
 اول علی دخی کندی اختیارینه اسناد ایلسه اول علی ایشلدیکندن  
 خجالت چکوب حق تعالی یه توبه ایدوب اندن استغفار ایدر، اگر رضاء  
 الله موافق عمل ایشلمسه «حق تعالینک توفیقیله بو علی ایشلدم» دیو حق  
 تعالی یه حد و ثنا ایلر و رضاء الله موافق عمل ایتکه سعی ایلر «المجاز  
 قنطرة الحقیقة» ده ذکر اولنان مجازدن مراد عبادات ظاهره در، بناء  
 علیه سالك عبادات ظاهره یی ایشلمیوب آنلردن عبور ایتدیکه حقیقته  
 واصل اولمز.

تصحیح نیت غایت صعبدر! بو جهندنکه نیت و هیاتنددر! کسبباتدن  
 دکلدر، انکیچون حسن بصری (رحمة الله علیه) ی بر بیوک کیمسه نیک  
 نمازینی قیلغه دعوت ایتدیلر، نیتی تصحیح ایدمه مدیکندن کیدوب قیلدیلر،  
 اگر نیت کسبیه اولسه تصحیح ایدر ایدی و آنلره نیت یوقدر دیمز ایدی،  
 شیخ عبدالله تستریدن منقولدرکه (النیه نونها نور و یاوها یدالله علی عبده  
 وهاوها هداية) سبحانه و تعالی «النیه روح الاعمال» و دخی بیوردیلرکه



خبرده وارد درکه « من استوی يومه فهو مغبون و من كان غده شرا من يومه فهو ملعون و من لم يكن في الزيادة فهو نقصان فالمت خیر له »  
بوحديث شریفده اعمال ظاهریه به اشارت اولدیغی کبی اعمال باطنیه به دخی اشارت وارد ، زیرا اعمال ظاهرده ترقی البتده نهایت بولور ، اما اعمال باطنیه که توجه الی الله و محبة الله و معرفة الله بولورده اصلاً نهایت اولمز ، سالکه لازمدر که هر کون و هر آن وساعت الله تعالی به توجه و محبة و معرفته سعی ایدوب ترقی اید ، زیرا بولورده نهایت اولمز ! اگر بولورده نهایت اولسه حدیث شریفده بویه بیورلار ایدی .

دخی بیوردیلر که اثرده وارد اولان « الصلوة معراج المؤمن » حدیث شریفده صلاة حقیقتک درجانه اشارت وارد ، ایدی مصلی اولان کیمسه کرکدر که تکبیر تحریمده اکبریت سخانه و تعالی انک وجودینه استیعاب اید ، تا کیم قلبنده خشوع و خضوع پیدا اوله ، اول خشوع و خضوع زیاده اوله رق آنی مقام حضوره ایرشدره ، اول مقامده انی مستغرق و مستملک اید ، بو حالک کالی رسول الله (صلی الله علیه وسلم) ده بولندی ، زیرا خبرده وارد در که رسول الله (صلی الله علیه وسلم) صلاته شروع ایتدکه مبارک صدر شریفلرندن این و صدایده اولور دیکه اصحاب کرام بعید محلدن ایشیدرلردی ، اول صدا کال خشوع و خضوعدن نشئت ایدر ایدی ؛ خواجه حضرتلرندن سؤال ایتدیلر که صلاتده اولان خشوع و خضوع ندن حاصل اولور ، جواباً « لقمه حلالی حضور ایله اکل ایتمدن و حضور ایله آبدست المدن و تکبیر و تحمیری حضور ایله کتورمدن حاصل اولور » بیورمشلردر .

خواجه حضرتلرینک کلمات حقایق آیاتندر ، [ الصوم لی و انا اجازی به ] حدیث قدسیسندده ذکر اولنان (الصوم) ایله صوم حقیقته اشارت وارد ، صوم حقیقت ايسه صائم بطنی مفطراتدن امساک ایتدیکی کبی قلبنی ماسـوانک دخول و تعلقندن امساک ایتدکر ؛ اثرده وارد در که « اذا احب الله عبداً لم يضره الذنب » بونک تاویلی بودر که چنکه عبد محبوب بر معصیت ایشلسه ، اول معصیتک طریق اعتذارینی بیلوب در عقب

اعتذار ایدر و الله تعالی عذرینی قبول ایدوب اول معصیت آنی اللهدن محجوب ایدوب ضرر و پرمر دیمکدر ، یوقسه عبد محبوب اولان کیمسه نك ذنبی ذنبیت حکمندن چیقار دیمک دکلدر .

رسول الله (صلی الله علیه وسلم) افندیزدن وارد اولان « لی مع الله وقت لا یسـمعنی فیـه ملک مقرب ولا نبی مرسل » حدیث شریفده ایکی درلو معنی و یردیله ، بر معنی بودر که « بن الله تعالی بی بعض وقت اویله مشاهده ایدر مکه اولوقتهده اصلاً بئله الله تعالی نك بینده ملک مقرب و نبی مرسل توسط ایدمه من یعنی واسطه بینزدن مرتفع اولور ، بر معنی دخی بودر که « بنم الله تعالی ایله بروقم وارد که اولوقتهده کی حالمه ملک مقرب و نبی مرسل توسع و تحمل ایدمه من ، اولکی معنی بعض سـالکله بعض وقتده واقع اولور ايسه ده ایکنجی معنی انجی رسول الله مخصوصدر ، زیرا ایکنجی معنی رسول الله بطن نبوت اولان ولایتندن عبارتدر ، اول مقام ايسه رسول الله مخصوصدر ، اول مقامه نه ملک مقرب و نه ده نبی مرسل ایره بیلور و نه تحمل ایدر ، اول معنایه نظراً (الولاية افضل من النبوة) دنیلشدر ؛ بو معنایه دخی حدیث شریفده اشارت ممکندر که الله تعالی بعض قولنه بعض وقتده جمال صفتیله تجلی ایدرده اول قول اولوقت اویله عظیم اولور که عرشدن فرشه دك جمیع مکانلری طولدورر ، اولوقت اول قوله نه ملک مقرب و نه نبی مرسل توسع ایدر .

نقل اولندیکه خواجه حضرتلری زیارت بیت اللهدن عودده بغداده اوغرادیلر ، بغدادک علما و مشایخی عظیم جمعیت ایدوب خواجه حضرتلرینی اول جمعیه دعوت ایتدیلر ، اول جمعیهده خواجه حضرتلری و درویشانی و شیخ نورالدین و اصحابی بر صاف اولوب اوطوردیلر ، علما و مشایخ بغداد دخی جمله مراتبیلر بر صاف اولوب اوطوردیلر ، اول مجلسده خواجه حضرتلرینه بر غیبت ظهور ایدوب مبارک باشلرینی جیب مراقبه به چکدیلر ، بروقتدن صکره رأس شریفلرینی رفع ایدوب « بزه بر غیبتکه عارض اولدی آنده اویله مشاهده ایتدک که شیخ بزرگوار خواجه محمد بابا سـمسی (روح الله



روحه) حاضر اولوب «او غم! بوجلمده برسوال عظیم اولنسه کرکدر؛ احواله واقف اوله سک، تا کیم دهشت ایتکسزین جواب ویره سک بیوردی» دیدیلر، بر زماندن صکره اهل مجلسدن بری سوال ایتدیکه اهل اللهدن صادر اولان (ما رأیت شیئا الا رأیت الله فيه وما رأیت شیئا الا رأیت الله معه وما رأیت شیئا الا رأیت الله بعده وما رأیت شیئا الا رأیت الله قبله) بوکلاملرک مابینلری نه کیفیت ایله توفیق وتوجیه اولنور؟ اهل مجلس جمله سی شیخ نورالدیندن جوابه منتظر اولدیلر، شیخ نورالدین دخی خواجه حضرتلرندن جواب التماس ایتدیلر، خواجه حضرتلری تواضع ایدوب جوابی شیخ نورالدینه حواله ایتدیلر، شیخ نورالدین دخی تکرار خواجه حضرتلرندن جواب التماس ایتدی، بومنوال اوزره اوچکره بینلرنده بوتکلیف دوران ایتدکدنصکره خواجه حضرتلری جوابه تصدی ایدوب ایجاز واختصار اوزره «بواختلاف اقوال اختلاف احواله منیدر» جواب باصوابی ویردیلر، بو یولده ویردکلی جواب جامع معایندن جمله اهل مجلس حصه مند وفیضیاب اولوب اظهار کلمه تحسین ایدوب خواجه حضرتلرینک کمال عرفانه یقین حاصل ایتدیلر، اندنصکره خواجه حضرتلرینک علوشانی علما و عرفا بیننده نمایان اولدی.

خواجه حضرتلرینه کبار علمادن بری سیر سلو کدن مقصد نه اولدیغی صورتی، خواجه حضرتلری جواب ویردیکه معرفت تفصیلیدر؛ اول کسه ینه سوال ایتدیکه معرفت تفصیلی ندر؟ خواجه حضرتلری دخی «اول مؤمن بهلرکه مخبر صادق انلردن اجالا خبر ویرمشدر، انلری دلیل برهانیدن مرتبه کشفه ایرشدیرمکدر» جوابی ویرمشدر.

علمادن دیگر برکیمسه خواجه حضرتلرینه سوال ایتدیکه لطف ایله قهر حق تعالینک صفتلریدر، وکالاتک اهلارته سیدر، لیکن بوایکی صفتک بیننده فرق نه درکه هرکیم مظهر لطفدر، محل اثباتدر وهرکیم مظهر قهردر محل نفیدر؟ خواجه حضرتلری جواب ویردیلر که قهر ایچون ایکی جهت واردر.

بر جهت، الله تعالیدن ظهوری جهتیدر، بوجهتدن قهر نفی اولماز وکیمسه دخی اصلا اکا معارضه ایده من، بوجهتدن اصلا شک یوقدر که قهر صفت کالدر.

ایکنجی جهت، خلق اوزرینه وقوعی جهتیدر که بوجهتدن قهر صفت نقصاندر، نفی اولنور، اکا معارضه دخی ایتک لازمدر.

خواجه حضرتلرندن سوال اولندی که الله تعالی بعض سالکک حالی اخذ ایدر، اول وقتده اولسالك نه ایشلسون؟ بیوردیلر که اگر اخذ اولنان حالدن بر بارمقی باقی قالمش ایسه دلیلدر که الله تعالی اولسالكدن تضرع و نیاز طلب ایدر، کرکدر که اولسالك تضرع و نیاز طلب ایده تا کیم اولکی حالنه ایریشه، اگر اخذ اولنان حالدن برشی باقی قالمدی ایسه دلیلدر که الله تعالی صبر و رضا طلب ایدر، اولسالك راضی و صابر اولوب عبودیتده اولقی کرکدر.

وینه سوال اولندی که درویشلر ماسوایی ترک ایدوب کندیلر دن فانی اولدیلر، دنیا و آخرتده آنلرک حقندن غیری استکلیری یوقدر، نیچون (اللهم اغفر لی) دیرلر؟ خواجه حضرتلری جواب ویردیکه کندیلرینک پاکلکینی ایستملری آخرک پاکلکین ایستمکدر.

ینه سوال ایتدیلر که دوریشان کرامت حقنده نه سویلرلر؟ خواجه حضرتلری دخی «درویشان حقندن غیری هر نه واریسه انی توحید ایله نفی ایدرلر، کرامت نه اولدیغی بیلرلر، زیرا اصحاب کرامتک جمله سی محجوبلردر واهل عرفان کرامته نظر دن بعیدلردر.

اهل اللهک خواطر قلوبه نه طریق ایله واقف اولدقلری خواجه حضرتلرندن صورلدقده «نور فراسته واقف اولورلر، اول نور فراستی حق تعالی اولیاسنه کرامت دیو ویرمش و» اتقوا فراسة المؤمن فانه ينظر بنور الله «حدیث شریفیله بوکا اشارت بیورلمشدر» جوابی ویرمشلردر.

خواجه حضرتلرندن کرامت طلب ایتدکلرنده بیوردیلر که بزم کرامت ز ظاهر در که بودکلو کناهله روی زمینده کررز!! وینه سوال ایلدیلر که



مشایخدن بعضیلرینک ( الصوفی غیر مخلوق ) دیملرینک تاویلی ندر ؟  
خواجه حضرتلری جواب ویردیلرکه ( صوفیلره بعض وقتده بر حال عارض  
اولورکه اول حاله نظر ایله صوفی مخلوق دکلدر ) دیمدر، یوقسه اولخالدن  
قطع نظر صوفینک مخلوق اولدیغنده شبهه یوقدر .

ینه سؤال ایتدیلرکه شیخ جنیدک ( قطع القارون و وصل الصوفیون )  
قولنده قاری و صوفی کیمدر ؟ خواجه حضرتلری جواب ویردیلرکه قاری  
اسمه مشغول اولان ، صوفیده مسما ایله مشغول بولنلندر .

صوفیونک ( الفقیر لایحتاج الی الله ) قوللردن مرادلری ندر ؟ دیو واقع  
اولان سؤاله خواجه حضرتلری « صوفیلرک فقردن مرادلری فقر حقیقیدر ،  
فقر حقیقی اولان کیمسه تأدب ایدوب حق تعالی یه عرض احتیاج ایتمز ؛  
صوفیهک فقردن احتیاجی سلب ایتلری بوکا بناء در ، یوقسه مخلوق  
بالذات خالقه محتاجدر و ( حسبی علی سؤالی علمه بحالی ) قبیله نلندر .

سؤال اولندی که ( اذاتم الفقر فهو الله ) کلامنک تاویلی ندر ؟  
خواجه حضرتلری جواب ویردیلرکه « بوفقردن مرادفناهی تامدر ، بوفناهی  
تام سالکده حصولی عننده الله تعالی انک قلبنده تجلی ایدر ، ایددی اول  
فقر تجلی یه سبب اولدیغی ایچون بوکلام دینلدی .

### ( بیت )

چونکه نبودیکه بودجمله خدا بودبس  
چون تو نمادی که ماند جمله خدا ای کدا

### ( ترجمه )

اولمز ایسهک چونکه سن جمله سین اولدک خدا  
قالدک ایدسه سن قالدک خدا ای کدا

عرفا کلامی اولمق اوزره خواجه حضرتلری بیوردیلر ( لاتصح معرفة  
العارفين يتضرعون الى الله ) بوکلام عارفلرک وارقلرینه ووجود بشریته

عودت و رجعتلرینه دلیلدر ، زیرا تضرع فرقت و مجالقی احوالنددر .

### ( بیت )

تاتو زهستی خود زیر زیر نکردی \* درنیستی مطلق مرغت به پر نکردی  
این پرده نهادن درهم شکن که \* هرگز در پرده رهنیابی تا پرده در نکردی

### ( ترجمه )

تاوارلغک یواسین طاغتمه دجه هرگز \* یوقلق هوالرنده مرغک پر آچوب اوچر  
بو پرده نهادی خرقة ایله تا سراپا \* خرقة اولمدجه پرده اسراره یول بولماز

خواجه حضرتلری طرفندن روایت اولنور که شیخ ابو سعید  
( قدس الله سره ) دن سؤال ایتدیلرکه سنک جنازک اوکنده قنغی آیتی  
اوقویدلم ؟ انلر بیوردیلر که ( جنازم اوکنده آیت اوقومق بیوک ایشدر !  
لکن بویقی اوقیک !

### ( بیت )

چیست ازین خوبتر درهمه افاکار  
دوست رسدنزد دوست بارینزدیک یار

خواجه حضرتلری دخی بیت مذکوری بنم جنازه مک اوکنده اوقومق  
بیوک ایشدر ! لکن ( برالای مفلسلر کلدک در احسانکه \* شی الله ایلرز  
حسن روی تابانکه ) مألنده اولان ( مفلسایم آمدم در کوی تو \* شی الله  
از جمال روی تو ) بیتنی اوقویک دیو وصیت ایشلدر .

### فصل خامس

خواجه حضرتلرینک کشف و کرامت و تصرفاتی بیاننده در .

خواجه حضرتلرینک درویشانندن بری نقل ایدر که بر تاریخده قجاق



جانبندن لشکر عد و کلوب بخارا شهرینی غارات ایتدی و نیجه کیمسه لری  
هلاک و نیجه لرینی اسیر ایدوب برادریم دخی جمله اسرادن اولوب کتدی  
پدرم برادریمک اسیر اولسیچون غایت محزون اولوب بکا امر ایتدیکه  
البت قبحاق جانبته کیدوب برادریمی اسیرلکدن قورتاره سک بندخی  
خواجه حضرتلرینه آنک مشورتی ایچون کیدوب بر مقدار هدیه آلتون  
کتوردیم ، چنکه خواجه حضرتلریله استشاره ایتدم ، بکا پیوردیلر که کیت  
پدریکک رضاسنده بولنکه سعاده نائل اوله سک ! صکره اول ویردیکم  
هدیه بی بکا و یروب پیوردیلر که آل بوا آلتونلری سکا سفیده لازم اولور!  
بندخی الدم ، اثنای مفارقمده اکر بر شدت واقع اولور ایسه بزه توجه  
ایله دیو امر ایتشلر ایدی ، انلرک همتلریله قبحاق جانبته روان اولدم ،  
اول اسیرلر و برادریم اطلاق ایدلش اولدقلرندن کندی لرینی خوارزنده بولدم ،  
بن و برادریم سائر اسرا ایله بر سفینه یه سوار اولوب بخارا جانبته توجه ایتدک ،  
بر مقدار بحرده مسافه قطع ایتدکدن صکره بر مخالف ریح اسوب سفینه مزى  
غرق ایده یازدی ، اول وقت اهل سفینه جمله سی فریاد و فغان و ندور  
و قربان و تجدید ایمان ایدرکن خواجه حضرتلرندن بر کیمسه نك استغاثه سی  
سمعه واصل اولوب اولوقت خواجه حضرتلرینک بکا ایتدیکی وصیتلری  
خاطریه کلدی ، بندخی خواجه حضرتلرینه توجه ایتدم ، اولدمده کوردیمکه  
خواجه حضرتلری سفینه ده حاضر اولدیلر ، کیدوب آنلره سلام ویردم ،  
سلامی المیوب سر اولدیلر ، اولوقت روزکار دخی ساکن اولدی و جمله  
تلاطم بحر محو اولدقدن صکره بر موافق ریح اسوب بزی سلامت ایشدیردی .  
بخارایه کلدیکمه خواجه حضرتلرینک زیارتی جمله یه تقدیم ایدوب  
حضور سعادتته کیروب دیدار شریفیله مشرف اولدقدن تبسم ایدوب  
پیوردیلر که سفینه ده بزه کلوب سلام ویردکده سلامی آلدق ، لیکن آلدیغمی  
ایشتمک ! بوسری ستر ایله دیه بکا امر ایتدیلر بندخی و قاتلرندن صکره یه دك  
ستر ایتدم .

خواجه حضرتلری بخارا قریه لرندن بر قریه یه تشریفلرنده شیخ خسرو

نام کیمسه نك منزله نزول ایتدیلر ، شیخ خسرو اولکیجه قریه نك جمیع  
علما و اشرافی دعوت ایتدی ، اکل طعامدن صکره خواجه حضرتلری شیخ  
خسروه پیوردیلر که قپویه و ارباق کیم وار ؟ شیخ خسرو دخی کتدی ،  
کوردیکه اولقریه دن یوسف نام کیمسه انده بر طباق ارمود قپوده طورر ،  
استیذاندن صکره ایچرو کیردی و کتوروب اول ارمودلری خواجه  
حضرتلرینک اوکنه وضع ایتدی ، خواجه حضرتلری دخی اول ارمود  
حقننده چوق تجسس و تفحص ایتدکدن صکره دیدیلر که بوارمودلری کیمدن  
الدک ؟ یوسف دخی فلان کیمسه دن الدم ، دیدکلرنده خواجه حضرتلری  
شیخ خسروه بوارمودلری بر بیوک قابه بوشالتوب کتیرمسنی امر ایتدی ،  
اولدخی بر بیوک قابه بوشالدوب کتوردی ، خواجه حضرتلری مبارک ایله  
اول ارمودلرک آره سندن بر ارمود آلوب یوسفه ویردیلر و باقی ارمودلرک  
مجلسده اولنلره تقسیم آیلسنی شیخ خسروه حواله ایتدیلر و پیوردیلر که  
حصه سنی کیمسه یه سن ! صکره خواجه حضرتلری یوسفه نظر ایدوب  
دیدیلر که بوارمودلرک حقننده تجسس و تفحصک سری ندر بیلور میسک ؟  
یوسف ایتدی سری بوکه بکا خبر ویردیلر که قریه مزه بویله بر کشف  
و کرامت صاحبی کلدی بندخی مراد ایتدمکه زیارت سعادتتکن ایله مشرف  
اولم و بوارمودلری فلان کیمسه دن اشترا ایتدمکه سزه هدیه ایدم ، لیکن  
کستاخلق ایدوب سزی امتحان ایچون بر ارمودی نشاتلیوب جمله سنک  
تحتنه قودم و دیدیمکه کوره ییم بوارمودلری جمله آره سندن بولوب بکا  
ویررمی ، خواجه حضرتلری پیوردیلر که او یله ایسه باق سکا ویردیکم ارمود  
اول نشاندیلرک ارمودمیدر ؟ یوسف ایتدیکه بلی اودر ، صکره خواجه  
حضرتلری یوسفه نصیحت ایدوب پیوردیلر که الله تعالینک قوللرینی امتحان  
ایتمک لایق دکلدر ، ایدی بز اول ارمودی بیلوب سکا ویرمسک بزدن بعید  
اولوردک و چوق ضرر کورردک ! هر کیمسه که رسول الله (صلی الله تعالی علیه  
وسلم) دیننده درویش و فقیر اوله ! آنی امتحانه حاجت یوقدر ، یوسف  
دخی اعتذار و جرمنی اعتراف ایدرک ایتدیکی کستاخلغه پشیمان اولوب توبه  
ایتدی ، اولوقت خواجه حضرتلرینه انتساب ایدوب درویشانندن اولدی .



بر دوریش خواجه حضرتلرینه انتسابنک سببی حکایه ایدوب دیدیکه  
بروقت سمرقنده ساکن ایدم، خواجه حضرتلرینک کشف و کرامت لرینی  
استماع ایله آنلره محبت ایدوب اصلا صبرم قالمیوب قالقدم خواجه  
حضرتلرینک زیارت شریفلر یچون بخارایه کتمکله نیت ایتدم، مادرم دخی  
بکا درت التون خرچلق و یروب خرچه مک بر محله دیکدی، چنکه بخارایه  
کیدوب خواجه حضرتلرینک صحبت شریفلرینه داخل، اولدم صحبتلرندن  
بکا برجذبه حاصل اولوب اصلا صبرم قالمدی، درویشاندن برینه رجا  
ایتمکله خواجه حضرتلرینه نیاز ایتکله بنی بنده لکه قبول ایتسونلر،  
آنلر دخی نیاز ایتدکله خواجه حضرتلری نیازلرینی قبول ایدوب بکا چوق  
التفات ایتدیلر و بیوردیلر که سنی دوریش ایدرز اما سندن آلتون آلورز،  
بندخی دیدیکله فقیرم التونم یوقدر سکا ویرم، آنلر دخی درویشانه توجه  
ایدوب بیوردیلر که بونک خرچه سنده دیکیلی درت التونی واردر انکار  
ایدوب دیر که فقیرم التونم یوقدر!

خواجه حضرتلرینک بوسره اطلاعی مشاهده ایتدیکله مخیر اولوب  
خرقه دن التونلری سوکوب اوکنه وضع ایتدم، مجلسده بر صبی وار  
ایدی، خواجه حضرتلری بر درویشه بیوردیلر که آل بو آلتونلری  
شو صبی یه ویر، اولدخی آلوب صبی یه ویردی، صبی آلوب قبول  
ایتمدیکنی کوردیکله غایت حیات چکدم اول درویش ینه کتوروب  
آلتونلری بکا ویردی، آدن صکره خواجه حضرتلری اول قریه دن  
قالقوب درویشان ایله آخر قریه یه کتدیلر، بندخی آنلر ایله بیله کتدم، اول  
قریه ده دخی عظیم جمعیت و صحبتلر اولدی، دوریشان ینه بنم ایچون خواجه  
حضرتلرینه نیاز ایتدیلر، اول مجلسده دخی بر صبی واریدی خواجه حضرتلری  
ینه بیوردیلر چیقار التونلری بوسبی یه ویر، بندخی چیقاروب ویردم،  
اول صبی دخی المدی، بوندن بکا دهها زیاده حیات کلدی، اولرجه کیم از  
قالدیکله هلاک اولیدم، درویشان ینه بنم ایچون نیاز ایتدیلر، اول وقت  
خواجه حضرتلری بیوردیلر که بخل جلدیه کوره غایت مذموم صفتدر،  
خصوصا طریق حق سالک اولنه کوره آندن مذموم صفت یوقدر.

### (بیت)

کترین چیرنی درینره بودسر \* درهم و دینار را اینجا چه قدر

### (ترجمه)

یک حقیر شیر بو یواده جان و سر \* نیجه بولسون بونده قدرک سیم وزر  
خواجه حضرتلری درویشانک نیازلرینی قبول ایدوب بنی بنده لکه  
قبول ایتدیلر.

اول درویش تحدیث نعمت اولقی اوزره دیدیکله خواجه حضرتلرینک  
بنی اول مؤاخذه لر ایله مرادی قلمدن حب دنیایی سلب و اخراج ایچون  
تریه ایدی! الحمد لله او مؤاخذه دن صکره قلمده حب دنیا محو اولدی  
و توکل صفتی خواجه حضرتلرینک همتلریله حق تعالی بکا احسان ایتدی.

مولانا محمد هر وی جانب بغداددن خواجه حضرتلرینک زیارتیچون بخارایه  
کلوب خواجه حضرتلرینک صحبتلرینه داخل اولهرق جمله درویشانندن  
اولدی، بر نیجه زماندن صکره خواجه حضرتلرندن همت طلب ایتدی،  
خواجه حضرتلری بیوردیلر که همتک وقتی وار، بروقتدن صکره مولانا  
سائر درویشان ایله خواجه حضرتلرینک مجلس شریفلرنده ایکن خواجه  
حضرتلری مولانایه خطاباً بیوردیلر که بکا بقین کل همتک وقتی کلدی،  
مولانا دخی قالقوب خواجه حضرتلرینک یانه واردی، خواجه حضرتلری  
انی اوکونه اجلاس ایتدیلر و بیوردیلر که واقف اولکله نصیبیکه نائل  
اوله سک، صکره خواجه حضرتلری شهادت پارماغیله مولانا ک دیزینه  
دوقندی، او اوقت مولانایه بر حیرت کلوب کندیدن غائب اولدی،  
صکره خواجه حضرتلری انی حال اصلیسنه ارجاع ایتدی و بیوردیکله  
خبردار اولکله وقت فوت اولیور، دیوب ینه پارماغی مولانا ک دیزینه  
طوقندردی، ینه مولانایه غیبت کلوب بیروش اولدی و یره دوشدی!  
خواجه حضرتلری انی حال اصلیسنه ارجاع ایدوب بیوردیکله واقف



اول فرصت آنی قالدی ! اولوقت مولانا فغان ایدوب کریان اوله رق جامه سنی  
جاك جاك ایتدی ، اولوقت خواجه حضرتلری مولانایه پیوردیلر که بووقت  
باغ زاغان وقتی دکلدر ! اول سوزدن مولانا غایت اضطرابه دوشدی !  
صکره ینه خواجه حضرتلری مولانای حال اصلیسنه ارجاع ایدوب  
حقیقته ایصال ایتدیلر .

مجلسده حاضر اولان درویشان مولانادن خواجه حضرتلرینک بووقت  
( باغ زاغان ) وقتی دکلدر ! پیورملرینک وجهنی سؤال ایتدکلرند مولانا  
باغ زاغان هر ائده بر محلاک اسمیدر ، بر دوست ایله بر کون باغ زاغانده صحبت  
ایدرکن اولدوست بکا دیدیکه بر کون اوله که سن بر صاحب همتک صحبتنه  
داخل اوله سک ! اولکون حالک غایت خوش اولور ! بنی فراموش ایتنه !  
اولوقتکه خواجه حضرتلری بنی اولحاله ایرشدردی ! اولدوستنک باغ  
زاغانده کی کلایه خاطریمه کلدی ! خواجه حضرتلری بووقت باغ زاغان  
وقتی دکلدر دیمهلری اکا اشارت ایدی ، اول اضطرابم دخی خواجه  
حضرتلرینک خواطر قلمبه اطلاع ایتدیکندن ایدی ، بن بوقدر کشت  
گذار ایدوب ارباب کشف و کرامته مقارن اولدم ! لکن خواجه حضرتلری  
کی اسرار قلوبه مطلع اولور کیمسه یه تصادف ایتدم ! ظن ایدر مکه  
بو روز کارده خواجه حضرتلری کی صاحب تصرف و اهل کشف  
بر کیمسه بوقدر .

خواجه علاء الدینه بر درویش قلیک صفت و کیفیتی نه اولدیغنی صور دقده  
خواجه علاء الدین معلوم دکلدر جوابنی ویرمش و اول درویش قلیک  
صفت و کیفیتی بنم غنیمده اوچ کونلک ماهه بکزر دیمش ایدی ! درویش  
مذکورک بوسوزی خواجه حضرتلرینه نقل اولندقده « درویش بوکلای  
کندی حالنه نظر ایله سویلدی » پیورمشلردر .

خواجه علاء الدینی خواجه حضرتلرینک حضورینه کتوردیلر ،  
خواجه حضرتلری مبارک قدم شریفلرینی خواجه علاء الدینک قدیمی اوزرینه  
وضع ایتدیلر ، اولوقت خواجه علاء الدینه بر عجیب حال کلدی ، بعده

خواجه حضرتلری انی حال اصلیسنه رد ایتدیلر و پیوردیلر که ایدمی سکا  
ظاهر اولان کیفیتی وصف ایله ، خواجه علاء الدین دیدیکه عرشی و فرشی  
وجیم خلایق قلمبه مشاهده ایتدم ! خواجه حضرتلری دخی دیدیلر که سنک  
قلبکده اولان کیفیت کوردیکلک کیدر ، ایدمی قلیک کیفیتی بویله اولدیغنی  
تقدیرده نیجه آنی وصف ممکندر ، زیرا قلیک عظمتی بیانه کلزنته کیم  
حدیث قدسیده اکا اشارت اوله رق [ ماوسعنی ارضی ولا سمائی بل وسعنی  
قلب عبد المؤمن ] وارد اولمشدر .

خواجه حضرتلری بیت الله کیدرکن خراسانه اوغرادیلر ، خواجه  
مؤیدک منزله نزول ایدوب انده بر قاچ کون مکث ایتدیلر ، و بر کون  
( کاربان سرای ) زهتکاهنی تفرجه کیتدیلر ، اول محلهده خواجه حضرتلرینک  
حضور شریفارینه بر درویش کلدی ، خواجه حضرتلری اکا التفات ایدوب  
پیوردیلر که بونلر بزم احبامزنددر ، لکن بزی بیلزلر ، صکره خواجه  
حضرتلری اولدرویشی آلوب منزله کتوردیلر ، صاحب منزل دخی  
خواجه حضرتلریچون طعام حاضرلیوب کتوردی ، خواجه حضرتلری  
صاحب منزله دیدیکه بوکون شهریکزده الله دوستلرندن برینی بولوب  
کتوردیم ، اگر اذیکز اولور ایسه طعامه کلسون ! خواجه مؤید دیدیکه  
یک کوزل کلسون خواجه حضرتلری درویشانندن بری واسطه سیله آنی  
طعامه کتوردی ، اکل طعامدن صکره خواجه مؤید اولدرویش ایله احوال  
طریقت و اسرار حقیقتندن چوق بحث ایتدیلر ، درویش خواجه  
حضرتلرینک صحبتنی غایت طلب ایدر ایدیسدهده خواجه حضرتلری اصلا  
صحبتنه قارشیدیلر ، درویش خواجه حضرتلرندن کیمکه استیذان ایدوب  
قالقوب مجلسدن قوش کی اوچارق محله کتدی ، خواجه حضرتلری  
آنمی اولحاله کوروب تبسم ایتدیلر و پیوردیلر که بو بر آسان ایشدر ،  
چنکه یاتسو وقتی کلدی ینه اول درویش خواجه حضرتلرینک  
حضورینه کلدی ، خواجه حضرتلری اولوقت اکا دیدیکه اول ایتدیکلک  
ایش نه ایدی ، حق تعالینک بندهلری عنندده اوللارو ایش معتبر دکلدر !



حق تعالی بعض بنده لرینه اول قدر اسرار اعطا ایتدیکه بر بنی خلقه اظهار ایتسه، جمله یریشان اولور، اول درویش دخی دیدیکه بن قرق بش سنه در بر و بحری کشت و کذار ایدرم، اول دیدیکه بنده لری بوله مدم! اون کره بیت اللهی طواف و روضه رسول اللهی زیارت ایتدم، اول اسرار دن بر سر استشمام ایدمدم! خواجه حضرتلری دخی درویشه «اگر بر لحظه بکا تسلیم اولور ایتسه کور رسک» عالمده او یله کیمسه اولوب اولمدیغنی او کر نوب اول سری شم ایتش اولور رسک «بیورمش اولدقلرندن اول درویش تسلیم اولوب خواجه حضرتلرینک یانه واردیلر» خواجه حضرتلری دخی آفی او کونده دیز بدیز اجلاس ایتدیروب شهادت بر مقلرینی اولدرویشک دیزینه دو قنر دیلر، در حال درویش کننیدن غائب اولوب یره دوشدی و نفسی دخی منقطع اولوب بر ساعت مقداری میت کی یادی! صکره ینه خواجه حضرتلری شهادت یار مقلرینی درویشک آله طوقنردی، درویش کننینه کلوب قالقوب او طور دی، خواجه حضرتلرینه اعتذار ایدوب دیدیکه نادانلق و نابکارلق ایتدم و سزک کی عالیقدرک حضورنده بی ادبک ایل ناهموار سوز سویلدم، کرم و عنایت ایدوب عفو ایدک و کستاخلغمزه باقیوب بزی تربیه بیورک، زیرا بن بوقدر و قندر که جست و جو ایدر و بو حال آزار کزه رم، شمدی همتکیز بر کاتیله اکا واصل اولدم!.. خواجه حضرتلری دیدیکه بوشینه نائل اولق ایچون خدمات مبروره ده بولنق کر کدر، درویش دیدیکه بک کوزل خدمتکیز ایل بیت اللهه کیدهیم، خواجه حضرتلری دیدیلر که سن اون کره بیت اللهه کیمدکی؟ درویش ایتدی سزکله کتمکی حساب ایدرم، انلری حساب ایتم، خواجه حضرتلری دخی دیدیکه سکا خیرلی بو که هراته بزم نسبتزه ملازمت ایدم سکا! درویش دخی خواجه حضرتلرینک امرینه امثالاً هراته کیتدی، خواجه حضرتلری درویشان ایل بیت اللهه جانینه روان اولدیلر.

کبار علمادن بری دیدیکه جوانلق ایامنده خواجه حضرتلرینه غایت محبت ایدرم، انلرک همتلریله بنده عجایب احوال ظهور ایتدی، انلر دخی بکا

وصیت ایدرلر ایدیکه بنی خاطر دن اخراج ایتمه، دائم انلری خاطر مدن تصور ایدوب انلره رابطه ایدرم، اولوقت پدرم بیت اللهه کتدی و بنی بیله کتوردی، کیدرکن یولز هراته اوغرا دی، هرات شهرینی تماشا ایدرکن خواجه حضرتلرینک رابطه لرندن بکا زهول و غفلت کلوب بنده اولان احوال عجیبه زائل اولدی، صکره اصفهانه واردقده انده بر عزیز شیخ وار ایدیکه جمله اهل اصفهان اندن همت و دعا طلب ایدرلر ایدی، اندن قتی چوق کرامتله ظهوره کلمشیدی، پدرم بنی آلوب اول عزیزک حضورینه کتوردی، بنم ایچون انلر دن همت طلب ایتدی، لیکن بن خواجه حضرتلرندن غایت خوف ایتدیکدن اصلاً آنک همتنی قبول ایتدم، اندن صکره کیدوب بیت اللهی زیارت ایتدک و عودتده خواجه حضرتلرینک زیارتلریله مشرف اولدقده خوف دخی زیاده اولدیکه خواجه حضرتلرینک رابطه لرندن غفلت ایدوب اولعزیز ایل کور شدم، خواجه حضرتلری آنلر دن خوف ایتدیکمی کشف ایتدکده بیوردیلر که خوف ایتمه قصوری بز عفو ایدرم! سن بنم او غلمسک! بنم او غلامیمه کیمسه نک حدی یوقدر که تصرف ایده!! صکره لطیفه طریقیله بیوردیلر که هراته کیتدکده نیچون بنی فراموش ایتدک؟

### (مصراع)

فراموشی نه شرط دوستانست

### (ترجمه)

محبته ندر شرط نخستین \* فراموش ایتمکدر دوست دوستین

خواجه حضرتلرینک درویشانندن بری حکایت ایتدیکه بر وقت عراقه کیدرکن یولم (سمنام) شهرینه اوغرا دی، ایشتمکه آنده قصر (معانی) دیرلر بر عزیز خواجه حضرتلرینک محبتلرنددر، آنک زیارتنی مراد ایدرک درویشانندن بر یله زیارتنه کتدم، صحبت ایتاسنده بر مناسبله آنک



خواجه حضرتلرينه نسبتك سببى سوال ايتدم ! ديديلر كه عنايت الهيه ايريشوب بر كيچه رسول الله ( صلى الله عليه وسلم ) افندمن حضرتلرينى روياده كوردمكه بر كلسه تانده بر قاچ اعزه كرام ايله اوتوررلر ، اول اعزه نك ميانده بر عزيز نوراني اوتورر ، بن دخی تضرع و نیاز ايله صاحب سعادت حضرتلرينك حضور مقدسرينه كيدوب دولت زيارتلرينه نائل اولدقن صكره صحبت شريفه ليله مشرف اوله مديغمي و اول شرفدن محروم قالدیغمي ، مختصرانه بر صورتله عرض ايتديكمده ؛ رسول الله ( صلى الله عليه وسلم ) افندمن حضرتلري « اكر استر ايسه ك حجتك فائده سنى بوله سك ؟ بو عزيزك صحبتنه داخل اول ، انلره متابعت ايله » ديو امر ايتديلر و خواجه حضرتلرينى اشارت ايدوب اسملرينى دخی ذكر ايلديلر .

خواجه حضرتلرينك اسم شريفلرينى هر نقدر ايشتمش ايسه مده وجه منورلرينى كورمامش ايدم ، چنكه خوابدن بيدار اولدم ، اول روياده كورديكم عزيزك صورت و شكلنى و تاريخ رؤيت و مشاهده سنى بر كتابك ظهريته يازدم ، بر قاچ سنه دن صكره بر كون دكانده اوتورر كن بر نوراني عزيز كلوب دكانه اوتوردی ، چنكه دقتله مبارك وجهلرينه نظر ايتدم ، كوردمكه نور الهى وجهنده لمعان ايدر ، اولوقت روياده اتباعله مأمور اولديغم عزيز خاطر به كلدی و بكا حيرت عارض اولدی ، بر زماندن صكره كندومه كلدم و قالقوب خواجه حضرتلرينك مبارك اللرينى تقبيل ايتدم ، اولوقت آنلري خانه مه دعوت ايتدم ، آنلردخی لطف ايدوب اجابت ايتديلر ، قالقوب او كومه بن آرقه لارنده طوغرى قيومه كلوب آچوب ايجر و تشریف ايتديلر و كنديمه مخصوص اولان كنجخانه نك بولنديغمي جهریه قصد ايدوب كتديلر ، چنكه جهریه كيرديلر ، كتاب دولابنى آچوب كتاب ارسندن بر كتاب آلوب بكا ويرديلر و بيورديلر كه باق ايمدی بو كتابك ظهريته نه يازمشدر ، چنكه كتابنى آلوب ظهريته نظر ايتدم ، كوردمكه روياده كوريكم عزيزك صورتى يازمش ! بيورديلر كه تاريخنه دخی نظر ايله ، چنكه تاريخنه نظر ايتدم ، كوردمكه رويابى كورديكم سنه دن خواجه حضرتلرينه

ملاقى اولديغم وقتله قدر يدى سنه مرور ايتدی ، وقتا كه خواجه حضرتلري طرفندن محير عقول اولان بوكشف و كرامتى مشاهده ايتدم ، بيهوش و حيران اولدم ، عقلی جمع ايدوب كنديمه كلديكده خواجه حضرتلرينك چوق الثقات و كرملرينه مظهر اولدم ، اولوقت بكا نسبت طريقلرينى اعطا و بنى بنده لكه قبول ايتديلر ، اولوقتدنبرو نسبت شريفه لرينى حفظ ايدوب متابعتلرينه رعايت ايدرم .

خواجه حضرتلري بخاراده ( كل آباد ) محله سنده بر دوستك خانه سنده درويشان ايله اوتوررلرايدی ، درويشاندن ملا نجم الدينه خواجه حضرتلري توجه ايدوب بيورديلر كه مولانا سكا هرنه ايدرسم امثال ايدوب ايشلرميسك ؟ مومى اليه دخی ايشلرم ديمسى اوزرينه خواجه حضرتلري بيورديلر كه اكر معصيت امر ايدرسم امثال ايدرميسك ؟ و اكر سرقت ايت ديو امر ايدرسم امثال ايدرميسك ؟ مولانا سرقتنه امثال ايتيم ديدی ، خواجه حضرتلري نچون سرقتنه امثال ايتزسك ؟ ديديلر ، مولانا ديديكه سرقت حقوق عبادت متعلقدر ، البت قيامتمده مطالبه اولنور ، لكن معصيتلر حقوق اللهدر ، الله تعالى عفو ايدر يا خود توبه ايله ساقط اولور ، خواجه حضرتلري دخی مولانا يه ديديلر كه چونكه بوايمریمزه امثال ايتزسك صحبتزدن كيت ، خواجه حضرتلرينك بوكلامدن مولانا غايت غصه به دوشوب مضطرب اولدی ، مجلسده حاضر اولنلر جمله شفاعت ايتديلر ، خواجه حضرتلري دخی شفاعتلرينى قبول ايدوب مولانا نك جرمى عفو ايتديلر و در عقب خواجه حضرتلري قالقوب درويشان ايله او خانه دن طشره چيقوب ( در وازه سمرقند ) ديرلر بخاراده بر قيو وار ایدی ، انك سمنه توجه ايدوب كتديلر ، چنكه يولده بر محله ايريشديلر ، خواجه حضرتلري درويشانه امر ايتديلر كه بو ديوارى دلك و خانه نك فلان محلنده بر چوال قوماش واردر آلوب كتورك ! درويشان دخی ديوارى دلوب خانه دن اول چوال چيقاروب كتورديلر ، خواجه حضرتلري دخی درويشان ايله اول چوالى كتوروب بر كوشه ده اوطورديلر ، بر ساعتد نصكره



بر کلب صداسی کلدی، اولوقت خواجه حضرتلری مولانایه امر ایتدیلر  
فلان درویشی الوب کیدک، اولخانهک سمته باقلک نه وارد، مولانا دخی  
درویش ایله اولجانبه کتدیلر، کوردیلر که خرسزلر آخر طرفدن دیواری  
دلوب خانهیه کپروب کوردیلر که خانهک دیواری دلوب اولمتاعلری  
آمشلر، اولوقت بررلینه دیدیلر که بزدن اول بوخانهیه خرسزلر کلوب  
متاعلری الدی! حیفکم بر ساعت اول کلوب الهمدق! دیوتأسف چکدیلر،  
مولانا دخی کلوب کوردیکی کبی خواجه حضرتلرینه خبر ویردی، درویشان  
جمله بوکشف و کرامتدن متحیر اولدیلر، صکره خواجه حضرتلری  
درویشان ایله اول متاعلری آلوب اول دوستک خانهسینه عودت ایدوب  
کلدیلر، صباح اولدقدده خواجه حضرتلری اولمتاعلری درویشانه یوکلدوب  
صاحبنه کوندردیلر و درویشانه دیدیلر که بومتاعک صاحبنه دیکر که  
درویشان خانهکز سمتدن پکرکن احواله مطلع اولوب خرسزلردن  
بومتاعلری قورتاردیلر، اولوقت خواجه حضرتلری مولانایه دیدیلر که مولانا  
اگر سن امریزه امثال ایدوب بوخدمتی ایشلهسک ایدی! سکا چوق اسرار  
منکشف اولور ایدی، لکن اول سعادتیه نصیبک یوق ایش! مولانا  
دخی نادم ویشیمان اولوب نفسنه لوم وعتاب ایتدی.

خواجه حضرتلرینک درویشانندن بری دیدیکه برکون (نصف) ده  
برکیمسه ایله نزاع ایتدم، اولکیمسه بدن غایت اینجندی، برخیلی ایامدنصکره  
بخارایه کیدوب خواجه حضرتلرینی زیارت ایتدم، بکاهیج الثفات ایتدیلر،  
چوق تدبیر و علاج ایتدم، فائده ویرمدی و چوق کیمسه لره شفاعت ایتدیردم،  
مفید اولمدی، لکن چوق یلواردم، پیوردیلر که بن نسفه کیمسه هم کرک  
اینجندیکک کیمسه یه اعتذار ایدوب خاطرینی خوش ایتدیکه صحبتمزه سنی  
قومایز دیدی، اندنصکره نسفه مایوسا عودت ایدوب دائم خواجه  
حضرتلرینک تشریفلرینه منتظر ایدم، برکون کوردیمکه خواجه حضرتلری  
نسفی تشریف ایدوب خانهمه نزول ایتدیلر و هیچ اوطورمیوب اول نزاع  
ایتدیکم کیمسه نک خانهسینه کتدیلر و وجه شریفلرینی اول کیمسه نک

عتبهسینه وضع ایدوب اعتذار ایتدیلر و پیوردیلر که اولکیمسه ای بن ایتدم  
درویش ایتدی عفو ایله، چنکه اول کیمسه خواجه حضرتلرینی اولتضرع  
واعتذارده کوردی، حالی متغیر و بییهوش اولدی، صکره کندویه کلوب چوق  
کریه وزاریلق ایتدی و بنم قضاوریمی عفو ایتدکدنصکره کندی اعتذار  
ایتمکه باشلدی، خواجه حضرتلرینک خاکپایلرینه یوز سوروب توبه وانه  
ایدوب درویشانندن اولدی و خواجه حضرتلرینک حسن اخلاقی ایشیدنلر  
خواجه حضرتلرینه محبت ایدوب سعادتیه ایردیلر.

خواجه حضرتلری برکیمه بخاراده درویشان ایله درویش عطانک  
سطوحی بیننده اوطوررل ایدی، اول بیتک جوارنده برسرای وار ایدیکه  
آنده والی بخارا اوطورر ایدی، اول کیمسه اول والی سراینده اتباعیه  
لعب و آهنگ ایدرلردی، خواجه حضرتلری پیوردیلر که بولعب و آهنگی  
بزه ایشتمک جائز دکدر، قولانغزه پنبه طیقماق کرکدر، تا اول صدالری  
ایشتمهلم، خواجه حضرتلرینک مجرد بوکلام قدسیه لرله مجلس شریفنده  
اولنلرک جمله سی اول صدالری اصلا ایشتمدیلر! چنکه صباح اولدی، اول  
جوارده اولان جیرانلر درویشلری کوردکده دیدیلر که یکن کیمه  
او هنسکامه لردن نیجه راحت ایتدیکز؟ درویشلر دخی دیدیلر که خواجه  
حضرتلرینک کرامتلیله اصلا بز صوت و صدا ایشتمک! بوکرامتی والیه  
سویلدکلرنده والی نادم اولوب استغفار ایتدی، بو خبر جمیع اهل  
بخارایه واصل اولدی، جمله سی تعجب ایدوب خواجه حضرتلرینه اعتقاد  
و محبتلری زیاده اولوب چوق کیمسه لر دخی سعادتیه ایرشدیلر.

خواجه حضرتلری طوس شریفی تشریف پیوروب آنده برقاچ ایام  
مکث ایتدیلر ایدی، اول آئنده برکون قالقوب درویشان و سائر احباب  
ایله شیخ (معشوق) طوسینک قبرینی زیارت کتدیلر، چنکه قبره قریب  
اولدیلر، دیدیلر که (سلام علیک یا معشوق طوسی! حالک نیجه در؟  
خوشمیسک؟) قبردن دخی جواب کلدیکه و (علیک السلام حالم  
خوشدر! غایت راحت وارد! ) بو جوابی قبردن خواجه حضرتلری



ایله برلکده کیملنلرک جمله سی ایشندیلر ، اول جماعتدن بری خواجه  
حضرتلرینی انکار ایدردی ، اولکیمسه چنکه خواجه حضرتلرندن بوکرامتی  
مشاهده ایتدی ، غایت خجالت چکوب انکارندن توبه ایتدی ؛ خواجه  
حضرتلرینه معتقد اولوب محبارندن اولدی .

خواجه حضرتلرینه درویشانندن بری بر مقدار ( الما ) هدیه کتیردی ،  
خواجه حضرتلری دخی اول الماری مجلسده حاضر اولنلره تقسیم ایتدیلر  
ویوردیلرکه بر ساعتده کیمسه حصه سنی اکل ایتسون ! زیرا بوالمارل شمدی  
تسیح ایده یورلر ، خواجه حضرتلری بو خبری ویردکه مجلسده اولنلر اول  
المارک تسبیحلرینی ایشندیلر !

### ( بیت )

همه ذرات در نطقند لکن \* تویی شمع نمدانی شنودی

### ( ترجمه )

قو ذرات نطق ایلر ولکن سنک \* سمعک یوق اول نطق بیله سک  
درویشانندن بری حکایه ایدوب دیرکه خواجه حضرتلرینک سعادت  
قبوللرینه نائل و شرف صحتلرینه داخل اولدم ، انلرک همت علیله ریه  
فقر وفاقه بکا آسان اولدی ، لکن طریق فقره کیرمزدن اول بنده مدخر یوز  
التون مقداری آچه وار ایدی ، اهل یتیم انلری صاقلامشدی ، برکون  
اهل یتیم آنلری بکا و یروب دیدیکه بوالتونلر ایله بعض تجارت ایتسک  
پک خوش اولور ، بن دخی سوزین طوتم و التونلری آلوب بخارایه  
واروب اول التونلر ایله البسه آلدیم ، واروب انلری قراده صاتوب تجارت  
ایتدم ، چنکه انلری بخارا قریه لرندن بر قریه کتوردیم ، کوردیمکه خواجه  
حضرتلری اولقریه بی شریف ایتشلدی ، اول اشیایی بر محله امانت بر اقوب  
خواجه حضرتلرینک زیارت شریفه لرینه کیتدم ، چنکه ملاقاتلری ایله  
مشرف اولدم ، بکا دیدیلرکه نه سبب ایچون بو قریه په کلدک ؟ بندخی دیدیمکه

بخارادن بر مقدار اثواب الدم ، انلری صاتیق ایچون کلدیم ، بیوردیلرکه  
وار اثوابلری کتور ، بندخی کتوروب اوکلرینه وضع ایتدم ، اول وقت  
« سن اکر بندن دنیا طلب ایدرسک ، عنایت حقله شو طاغی سکا آلتون  
ایده یم ! لکن الله تعالی پی طلب ایدن کیمسه په دنیایی ترک ایدوب فقری  
اختیار ایتک کر کدر ! بزبوسنک ایتدیکک کاره اعتبار ایتوز ، زیرا  
فقرا طائفه سنک کارخانه لری دنیانک ماوراسنده در ، انلره اقتضا ایدن  
مصلحتی الله تعالی اسرکه مز ؛ انلره ویرر آنک ایچون فقرا برشی ادخار ایتز  
سندخی بوندن صکره بوکاری صقین ایشلمه !!! » بیورمش اولدقلرندن خواجه  
حضرتلرینک امرلرینه امتثالا جمیع اشیایی حق یولنه بذل ایتدم ، اندن  
صکره خواجه حضرتلرینک همتلری برکاتندن بکا هر نه درلو مصلحت اقتضا  
ایتدی ایسه ، حق تعالی انی لطف و کریمیه ادا وقضا ایتدی ، بر دخی معیشت  
خصوصنده محنت و مشقت چکمدیم .

### ( بیت )

هیچ مانی و هیچ ماکم نی \* وز هیچ چیر ما غم نی

### ( ترجمه )

هیچ بز یوق دکلز هم هیچ بز کم دکلز \* هیچ یر شیدن ایچون دل پر غم دکلز  
مریدانندن امیر حسین حکایت ایتدیکه خواجه حضرتلری بر کچه یارین  
فلان دوستمک زیارتنه کیتسم کرک ، ان شاء الله اون بش کونه دک کلورم ، دیمش  
و صباح و قشده قالقوب درویشان ایله یوله روان اولوب کتمش ایدی ؛  
اولکون خواجه حضرتلرینک فراقنه صبر ایده میوب غایت اشتیاقلری بکا  
خلابه ایتدی ، خانقاهده بنمله بر درویش قالمشیدی ، اخشام وقتنده اکادیمکه  
قورقرم خواجه حضرتلری آنلره اولان قرط اشتیاقی کشف و شفقت  
ایدوب کپرو عودت ایدر کلور ، اولکیمه نک صباحی کوردیمکه خواجه  
حضرتلری عودت ایدوب کلدیلر و بکا بر هیبتله نظر ایدوب بیوردیلرکه



بن سکا دیدمیکه اون بش کوندنصره کلورم، سن ایسه اوکومه برطاغلدن  
سد چکوب اول طاغی بن نیجه چکوب کیده یم، صکره وجه مبارکرینی  
اولدرویشه چوپروب بیوردیلرکه امیر حسین سکا دیدمیکه قورقرم خواجه  
حضرتلری یولدن عودت ایدر کلور، اولدخی نعم سلطانم دیدی، خواجه  
حضرتلری دخی دیدیکه اشته اول توجه و اشته یاقلرذرکه اوکومزه سد  
چکدی! آنک اوزرینه خواجه حضرتلرینک جلالی مشاهده ایتدیکمه  
قلبه خشیت عظیمه طاری اولوب خاکپایلرینه دوشوب عفو طلب ایتدم،  
انلر دخی بندهلرینه مرحمت و شفقت ایدوب عفو ایتدیلر و بیوردیلرکه  
اگر مقصودک بندن آیرلماقی ایسه بنی سنکله ظن ایله، زیرا بن سندن  
آیری دکم، شمدنکیر و صاقین بنی سندن آیر و ظن ایتمه!

( بیت )

باتوام هر جا که هستی باتوام \* تانه پنداریکه تنها میروی

( ترجمه )

قنده ایسک بن سنکله آنده یم \* سن صاقین ظن ایتمه تنها کیده سک

اولوقت بیوردیلرکه « حق یولنده محبت چوق ایش ایشلر، بو محبت  
بر صفت عظیمه درکه بوصفته سلوک ایدوب انکله عمل ایتمک سالکله لازمدر،  
اصحاب کرام ( رضوان الله علیهم اجمعین ) دخی بوصفته متصف ایدیلر،  
زیرا آنلر استمزلر ایدیکه بر لحظه رسول الله صلی الله علیه وسلمدن غائب  
اوللر » خواجه حضرتلری بکا بولطف و نصیحتی ایتدکدنصره قالقوب  
اولدوسنک زیارتنه کستدیلر.

ینه مومی الیه طرفنندن حکایه اولنورکه برکون خواجه حضرتلری  
بنی بر خدمت ایچون ( قصر عارفان ) دن بخارایه کوندردیلر و بیوردیلرکه  
بو کیجه بخاراده یاقوب صباح عودت ایله، بندخی در حال یوله روان  
اولوب کتدم و اثنای طریقده کیدرکن نفسمله مناقشه ایدوب ناسزا

کلمات سو یلدم و دیدمکه ای کافر نفس بر کون اولورمیکه مسلمان  
اوله سکده بنده سنک شرکدن خلاص اولم، بن نفسمه بو عتباتی ایدرکن  
کوردمکه اوکومده بر نورانی کیمسه ظهور ایتدی و بکا خطاباً « سن بویولده  
نه محنت و مشقت چکدک که نفسکه بو عتباتی ایدر سک؟ بویولدن گذران ایدن  
مشایخ اویله محنت و مشقت چکدیلرکه انلرک چکدیکلرینک بر ذره سنی تمحله  
قدرتک یوقدر » دهرک اول مشایخک اسملریله چکمش اولدقلری محن و مشاق  
برر برر ذکر و تعریف ایتدی، بندخی اعتذار ایدوب تقصیراتمی اعتراف  
ایتدم، اندنصره اولکیمسه سفره سندن بر مقدار خیر چیقاروب بکا ویردی  
و دیدیکه بو خیری بخاراده طبع ایله اکل ایت، بندخی اولخیمیری آلوب سفره مه  
قویوب کیتدم، چکنکه بخارایه داخل اولدم، ذکر اولنان خیری پشیرمک  
ایچون فرونجی به ویردم، فرونجی اولخیمیری کوردکده تعجب ایدوب دیکه  
بویله خیر هرگز کورمدم، بونی سکا کیم ویردی؟ و سن کیمسک؟  
بندخی دیدمکه خواجه حضرتلرینک خادمیم، اول فرونجی تعظیمه خیری  
طبع ایدوب بکا ویردی، بندخی اکا اول اتمکدن بر پارچه ویردم، اندنصره  
خواجه حضرتلرینک خدمتی ادا ایدوب بخاراده ( کل آباد ) محله سنده  
مسجده اخشام ویاتسو نمازلرینی قیلدقدن صکره قبله به متوجهاً او طوردم،  
اولوقت نفسم ( الما ) ارزوسن ایتدی، کوردمکه مسجدک پنجره سندن بر قاق  
الما آتدیلر! الماری الوب اول اتک ایله اکل ایدوب اولمسجده نصف  
الایله دک مکث ایتدم، صکره قالقوب یوله روان اولدم و صباحه دک قصر  
عارفانه ایرشدم، صباح نمازنده خواجه حضرتلرینک حضور سعادتلرینه  
کیتدم، بکا دیدیلرکه سکا یولده مصادف اولوب خیر ویرن کیم ایدی؟  
بیلدکی؟ بن ایتدمکه بیلدمدم، انلر دیدیکه خضر ( علیه السلام ) ایدی،  
صکره الما قصه سندن خبر ویردیلر و دیدیلرکه ذهی سعادت اول فرونجی به که  
اول خیری پشوردی و اندن یک دخی نصیب اولدی، اندنصره عاقبت  
اول اتمکچی خواجه حضرتلرینک قبولیله مشرف اولدی.

درویشانندن بری روایت ایلرکه بنی بر کیمسه خواجه حضرتلرینه بر مصلحت



ایچون ارسال ایتدی، چئنگه (قصر عارفان) ده خواجه حضرتلرینک باغنه ایرشدم، کوردیمکه شیخ امیر حسین و شیخ محمد خرکوش ودها برقاچ درویش باغده اوطوردرلر، بن دخی انلرک یانته واردم، اولوقت قلمبه بر خوف طاری اولدی، اعضامه لرزه دوشدی، درحال خواجه حضرتلری خانه سعادتلرندن طشره چیقوب اولدیغمر محله کلدی، واروب خاکپایلرینه یوز سوروب اول کیمسه نك سلامنی تبلیغ ایتدم، اولوقت بکا دیدیکه سنده بر خوف وار سبی ندر؟ بن ایتدم بو محله کلدکده بکا خوف عارض اولدی لیکن سببی بیلم، خواجه حضرتلری «سببی امیر حسیندن سوال ایت» دیدکلرنده امیر حسین صباح وقتنده درویشان ایله خواجه حضرتلرینک خانه سعادتلرینه کلورکن کوردککه خانه سعادتدن برکیمسه چیقوب قوش کبی برهوا اوچه رق یانزدن کلوب پکدی، جمله من آکا باقه قالدق، مراد ایتدک که پشیننه دوشوب کیدهلم، بز بو فکرده ایکن خواجه حضرتلری دخی خانه سعادتلرندن طشره چیقوب یانمزه تشریف ایتدیلر و یوردیلر که بن خانه مه کیدوب کلنجیه قدر بو آراده صبر و مکث ایتدک، خواجه حضرتلرینک بو کلانندن بزه خوف عظیم طاری اولدی و اول خوف بزدن زائل اولدن سن یانمزه کلدک دیدی، بعده خواجه حضرتلری دیدیکه ایشده اول سنده کی خوف بونلره عکس ایتدی.

صکره خواجه حضرتلری او قوش کبی اوچان کیمسه نك احوالی تعریف قصدیه یوردیلر که «فلان کون نسفدن بخارایه کیدرکن کوردیمکه برکیمسه اوچوب کیدر، بندخی ایریشوب دیدیمکه احباب عزتک محبتی نیچون ترک ایتدک؟ ونه سبیدن بو دیارلره کلدک؟ اولدخی تأسف ایدرک دیدیکه بن نهانده دیارنده نم، رجال الله بنی سودیلر و صحبتلرینه ادخال ایتدیلر! بر مدت انلر ایله همدم اولوب کزردم! برکون انلر ایله اقصای معموره ده بر شاهقه جیلده اولورکن اولاد و عیال آرزوی یادیمه کلدی، انلر دخی مقاملرینه منافی اولور آرزوی قلمبه کشف ایتدکلرنده بنی اول جبل شاهقه سنده ترک ایدوب کیمک مرانده اولدقلرینی آکلادم.

انلره نیاز ایتدیمکه بنی بر ویابانده قویوب کیمک، باری بلاد معموره یه بر اقوب کیدک، کوردیمکه بنی بودیارلره اولاشدیروب کیتدیلر، بندخی اول کیمسه یی آلوب خانه مه کتوردم، التی کوندرکه خانه مه مسافر ایدی، بوکون صباح وقتنده بندن استیذان ایدوب چیقوب کیدرکن بونلر اکا تصادف ایتدیلر، انی کوردیلرکه قوش کبی پرواز ایدوب کیدر! بونلر دخی میل ایتدیلر که انک پشیننه دوشوب کیده لر، اولیلدن بونلرک قلوبنه تفرقه حاصل اولدی، انکچون عجله ایله طشره چقدیمکه بونلرک قلوبنده کتفرقه یی دفع ایدیم، بونلره دیدیمکه بر ساعت بو آراده مکث ایدک تا که بن کلم، زیرا بونلر انک اردنجه کیمک آرزوسنده ایدیلر، لیکن درویشه لازمدرکه پیرندن غیره کیمسه یه میل ایتیه، اعتقادینی دخی پیرندن اوزمیه، اگر خضره ملاق اولورسه دخی!!» اولوقت خواجه حضرتلری بو نصیحتی ایتدکده مبارک جبهه لرندن اثر جلال ظاهر اولوب یوردیلر که هواده اوچق آساندر، مکس دخی هواده اوچر! بویله کرامتله حق تعالینک خاص قوللری یانسنده معتبر دکلدر.

خواجه حضرتلرینک بر درویشی وار ایدی، انک حالی بو ایدیکه قنخی بره کیمسه قوش کبی اوچر ایدی، برکون درویشان اول درویشی بر مصلحت ایچون قصر عارفانن بخارایه کوندردیلر، اولدرویش یولده اوچر کیدرکن خواجه حضرتلری انی اولخالده کوردکلرنده حجاب اولسون ایچون اول حالی آندن سلب ایتدی و یوردی که حق تعالی بکا سالملرک احوالندن تصرف اعطا ایتدی، دیلرسم انلره الباس حال ایدر و دیلرسم حالرینی سلب ایلرم، مقتضای استعدادلری اوزره تربیه ایدرم، زیرا مربی سالمکه انفع اولانی ایشلر.

خواجه حضرتلرینه برکیمسه کلوب سلام ویردی، خواجه حضرتلری سلامی آلدیلر ونه ایچون کلدیکنی صوردیلر، اول کیمسه دخی دیدیکه روحانیتکی استرم، خواجه حضرتلری دخی مجلسده اولان درویشاننه ایتدیلر نه دیرسکز ویره می؟ درویشان دیدیلر سلطانمک لطف کرملرینه



تهایت یوقدر سز اعلم سکز ، خواجه حضرتلری اول کیمسه به برنظر ایتدی ،  
اول نظرده اکسیر خاصه لرندن اول کیمسه ده بر عجب حال ظاهر اولدیکه  
هر کیم انی کورسه عاشق دلداده سی اولوردی .

خواجه حضرتلرینک نجل نجبی وفات ایتدکلرنده بیوردیلرکه عنایت  
حقله اوغلمک وفاتنده دخی رسول الله موافقت ایتدم ، زیرار رسول الله  
( صلی الله علیه وسلم ) افندیمرک دخی اوغلاری وفات ایتدیلر ، حضرت  
رسول الله صلی الله علیه وسلم اوزرلرندن جریان ایدن امورک جمله سی  
الله تعالینک ارادتیله بنم اوزرمدن جریان ایتدی و هر بر سنکه رسول  
الله بنم بزه کیشدر ، انکه عل ایتدم ، وجه سنک نتیجه سی بولدم ، کندمه  
اثر وفاتده سی مشاهده ایتدم ، تا اولرتبه سنکه علی التزام ایتدیکه حضرت  
رسول الله اصحابیله بر سفرده بر منزله نزول ایتدیلر و اصحاب کرامه  
بیوردیلرکه بر تنور یا قونکه اتمک پیشورم ! چنکه اصحاب کرام تنوری  
یا قدیلر رسول الله ( صلی الله علیه وسلم ) اصحاب کرامه بیوردیلرکه هر کس  
بر پارچه خیر الوب تنوره وضع ایتسون ! کندیلری مبارک اللرینه  
بر پارچه خیر الوب تنوره وضع ایتدیلر ، تنورک قپوسنی قپادیلر ، بر زماندن  
صکره تنوری آچوب کوردیلرکه اصحابک وضع ایتدکلری خیرلر جمله  
پیشدی رسول الله ( صلی الله علیه وسلم ) ک وضع بیوردکلری خیره آتش  
تأثیر ایتدی !

رسول الله اتباع ایچون بندخی بر کون درویشان ایله بر تنور یا قدق  
و هر بریمز کندی الیزله بر پارچه خیر الوب تنوره وضع ایتدک بر زماندن  
صکره تنوری آچوب کوردیکه درویشانک وضع ایتدیکی خیرلر پیشدی ،  
بنم وضع ایتدیکم خیره آتش تأثیر ایدوب پیشدی ، الحمد لله بونده دخی  
سنکه عمل ایتدم و اول عملک اثرینی مشاهده ایتدم و نتیجه سنه واصل اولدم .

بر کون خواجه حضرتلری درویشان ایله بر قریبه کیتدیلر ، اول قریبه  
قریب محله بر مجذوبه ملاقی اولوب صحبت ایتدیلر ، اثنای صحبتده خواجه  
حضرتلرینه مجذوب بی ادبک ایدوب ناسزا کلمات و ناهموار شطحیات

سویلدی ، حتی دیدیکه سنی و سنک خدامکی مسخره لغه آلورم ، بوسوزدن  
خواجه حضرتلری غایت انجنوب ( قارین آغریسی ) سکا دیدیلر  
و دونوب کبرو کیتدیلر ، اولجذوب دخی خواجه حضرتلریله بر مقیدار  
کیتدکدنصکره کبرو دونوب کیتدیکه اذن ایستدی ، خواجه حضرتلری اکا  
اذن ویردیلر ، لکن مجذوب کیده مدی ، بر دخی اذن طلب ایتدی ، ینه  
خواجه حضرتلری اذن ویردیلر ، ینه کیده مدی ! بو حال اوزره بر قاچ کره  
اذن طلب ایتدی خواجه حضرتلری ده هر طلبده اکا اذن ویردی ایسه ده  
مجنوبک کیتدیکه قدرتی اولمدی ، انجامنده خواجه حضرتلرینه اولجذوب  
تضرع و نیاز ایله دیدیکه بنم کیتدیکه قدرتم یوقدر لکن بر درویشکده امر  
ایت بنی یوکلنوب محله کتورسک ! خواجه حضرتلری دخی بیوردیلرکه  
قنخی درویشی ایسترسک یوکلنوب سنی محله کتورسن ! اولجذوب درویش  
امیر حسینی طلب ایتدی ! خواجه حضرتلری امیر حسینه یوکلن بونی  
محله اولاشدر ! دیو امر ایدوب سرعتله بوله روان اولدیلر .

امیر حسین مجذوبی یوکلنوب ایکی خطوه کیتدن بیهوش اولوب یره  
دوشوب تسلیم روح ایلدی ! مجذوب اول حالی کوروب فریاد ایدرک  
خواجه حضرتلرینه امیر حسینک حالی خبر ویردی ! خواجه حضرتلری  
بیوردیلرکه پک خوش اولدی ( ماشاء الله کان ) ایدی وار آنی دفن ایله  
مجنوب ینه فریاد و فغان ایدوب دیدیکه سز بیورک که بن آنی ایشلیم !  
خواجه حضرتلری مجذوبه التفات ایتدیلر ، تا که مجذوبک اصلا چاره سی  
قالمدی ، اولوقت خواجه حضرتلرینه درویشلری شفاعت ایدوب مجذوبک  
کستاخلغنک عفوینی طلب و امیر حسینک اول قضادن تخلصنی نیاز ایلدیلر ،  
اولوقت خواجه حضرتلری دیدیلر « بنی و خدامی مسخره لغه آلان کیمسه  
کر کدرکه بویله قضالری دفع ایده » مجذوب ینه تضرع و نیاز ایدرک خواجه  
حضرتلرینک خاکپایلرینه دوشدی ، درویشان دخی شفاعت ایدوب دیدیلرکه  
« افندم انک بی ادبکی حدینی تجاوز ایتدی ، لکن بالاخره عجزینی بیلوب  
جرمنه اعتراف ایتدی ، سز لر دخی لطف ایدوب عفو ایدک » خواجه



حضرتلری درویشانک شفاعتلرینی قبول ایدوب مجذوبک جرمینی عفو ایتدیلر، کبر و دونوب مبارک قدملرینی امیر حسینک صدرینه وضع ایتدکده درحال امیر حسینک روحی جسدینه عودت ایتدی و قالقوب اوپوردی، اندنصکره خواجه حضرتلری بیوردیلرکه «چن امیر حسینک یانه کیتدم» روحی دردنجی قات کوکه واصل اولمشیدی، بندخی الله تعالینک اذنیله انی اول محلدن ردایدوب جسدینه ادخال ایتدم» اولجذوبه دخی عنایت ایدوب محله کیمکه قدرت احسان ایتدیلر، اولجذوب محله یوریوب کتدی.

خواجه حضرتلری برکون بخاراده (دروازه کل آباد) محله سنده درویشاندن برینک خانه سنده اوتورورکن دابهیه سوار اولمش برکیمسه کلوب خانه نک قیوسنده طوردی، خواجه حضرتلری دخی درون خانه دن بیوردیلر که یافلان قیوی آچوب ایچروکل که طلب ایتدییک نسبت بونده در؛ چنکه اول کیمسه ایچرو کبردی خواجه حضرتلری اکا دیدیکه کوردکی؟ فلان محلدن دابه کی چو یروب سنی بورایه کتوردم؛ زیرا کوردم سنیکه حقیقت طلب ایچون ترمیزه کیدردک! بندخی دیدمکه باق همسنزلکمه که بوپردن برکیمسه کیدوب ترمیزه مرشد آرایه؛ اول کیمسه دخی دیدیکه بیوردیغکز کی اول محله ایرشدکده دابهم ایلری کیتدی؛ بو قدر سعی ایتدم، ممکن اولمیکه دابه یی اولجانبه سورم! ناچار قالوب دابه نک لجامنی اوزرینه بر اقدم و دیدمکه بونده بر سر وار کورهیم دابه نه یره کیدر، اولمجلدن دابه دونوب سرعتله بخارایه داخل اولوب کلوب بو قوده طوردی! مجلسده اولنلر جمله مقیم اولدیلر خواجه حضرتلری اول کیمسه یه تلقین طریقت ایدوب تحت تربیه لینه آلدیلر.

درویشاندن بری دیدیکه خواجه حضرتلری بخاراده بر مجلسده مقام عشقندن صحبت ایتدیلر، اولجلسده حاضر اولنلرک هر برینه بر حال کلدیکی کی بزه دخی بر حال محبت حصوله کلدی، اول حال ایله بخارادن قالقوب قصر عارفانه کیتدم، انده بر عورته تعلیم و ارایدی، اتفاق اولعورت ایله ملاقات ایتدم، اولعورت دخی بکا کندیینی تسلیم ایتدی! چنکه اکا قریب اولدم،

کوردمکه فرجه ذکر بیننده بردست حائل اولدی، دقت ایتدم کوردمکه خواجه حضرتلرینک دست مبارک لیدر، اولوقت همان ایکی اللرمه کوزلری طوتوب اندن فرار، ایتدم بر قاج کوندنصکره خواجه حضرتلرینک خاکپای دولترینی زیارت ایتدیکمه بکا بیوردیلر که تا که دستمی کورمدیکه اولفعلدن کوزلریکی طوتوب فرار ایتدک!!! اولوقت بکا عنایت و لطف ایدوب اول تعلق نفسانیتی بدن ازاله وقوت شهوانیتی دخی بالکلیه سلب ایتدیلر و اول عنایتدنصکره اولیه اولدمکی اصلا بنده شهوتدن اثر قالمدی.

خواجه علاءالدین دیدیکه برکون خواجه حضرتلرینک حضور سعادتلرنده ایدم، مولانا حمیدالدین تلامیذلرندن مولانا خرد ظهیری کلوب دیدی که خواجه حضرتلری یارین قوشلق و قشده بزه تشریف ایتسونلر، انکله براز درویشانه صحبت ایدم، خواجه حضرتلری پک کوزل اجابت ایدم بیوردیلر و دیدیلر که بودعوتده بر حکمت وار! چنکه قوشلق وقتی اولدی، خواجه حضرتلری قالقوب مولانا حمیدالدینک درسخانه سنه کیتدیلر؛ مولانا حمید الدین دخی خواجه حضرتلرینک سبب تشریفلرینی سوال ایتدیلر، خواجه حضرتلری بیوردیلر که مولانا خرد ظهیری سزک جانبکزدن بزی دعوت ایتدی و دیدیکه مولانا سزکله صحبت درویشانه ایتسه کرکدر، مولانا حمید الدین دخی مولانا خرد ظهیرینک خواجه حضرتلرینی نه ایچون دعوت ایتدیکنی ایشتدکده دیدیکه حاشا بن سزی بو مثلی امر ایچون دعوت ایدم و بو مقوله سوزی سزله سویلیم! زیرا سزی بنم امتحان ایتک حدم دکدر و سزک طریقتکزک حقایق جملیه نک معلومیدر، سزک بو طریقتکز طریق استقامت و مساک طاعتدر، اکا اعتراض ایتکه کیم جسارت ایدر.

خواجه حضرتلری بونی ایشتدکده «نه مانع! مولانا ظهیری بزی اظهار حق ایچون دعوت ایتدی، بزه دخی طالب حق، و بزم مقصودیه، حق باطلدن تمیز ایتکدر، وسلوکزی متابعت سنت مصطفویه اوزرینه بنا ایتک استرز، سزدخی مقتدای عصر سکز! بزره کتاب الهک علانی و حکمنی بیلدیر سکز! بزر سزلردن کتاب الهی تعلیم ایتک لازمدر و اخبار رسول الهی و آثار



صحابه بی سزاردن استماع ایتک کر کدر، ایدی بزطریقمزی سزله عرض ایدهلم، اگر طریقمزی سننه موافق ایه انک اوزرینه مواظبت ایدهلم واکر مخالف ایه اندن رجوع ایدهلم» بیوردیلر.

مولانا حیدالدین خواجه حضرتلرینک مقصودی اظهار حق اولدیغنی اگله دقده مقصودلرینه مساعده و عقد مجلس ایدوب بخاراده اولان علما و مشایخی مجلسه جمع ایتدیلر، مولانا خرد ظهیری و بعض طلبة علوم اتفاق ایدوب اول جمعیت عظماده بحثه شروع ایتدیلر و دیدیلر که بو طریقت درویشیه نه دیمکدر که آنک سببیه مدرسه لر خالی قالوب رونق علم زائل اولدی؟ اگر بو طریقت درویشیه بو حال اوزرینه قالورسه طلبة علوم افاده و استفاده دن معطل اولور؟ خواجه حضرتلری انلرک غرضلری اجرای نفسانیت اولوب اظهار حق اولدیغنی کوردکلرندن سکوت ایتدیلر، سائرلری دخی بشقه برشی صورمیوب آفاق صحبه شروع ایتدیلر! مولانا حیدالدین اولوقت تهورلنوب مولانا خرد ظهیری به و اتباعنه تعذیر ایدوب دیدیلر که سزک بوکلماتکز طریق حقندن خارجدر؛ خواجه حضرتلری مولانا حیدالدینه توجه ایدوب بیوردیلر که «حق تعالی عنایت ایدوب دینمزه اولان مرض جهلک ازاله سنک علاجنی بیان ایدوب [فاستملوا اهل الذکر ان کنتم لاتعلمون] بیوردی، بز دخی بوا مره امثالاً مرض جهلی ازاله ایچون علما حضرتلرینه مراجعت ایدوب بیلدیکمزی انلردن اوکرنیز؛ پس ایدی علمادن سؤال ایدهلمکه بزم بو طریقمزی صوابمیدر؟ یوقسه خطامیدر؟ بزه بیان ایتسونلر!»

مولانا حیدالدین خواجه حضرتلرینک بو سوالی اوزرینه دیدی که سزک بو طریقتکز غایت صواب و احسندر، جاده سننه مطابقدر، جمیع اهل اسلامه لازمدر که بو طریقتیه سلوک ایدوب بوکا ملازمت ایدلر.

خواجه حضرتلری تکرار سوزیه باشلا یوب خواجه یوسفی دخی بو مجلسه دعوت ایدک، زیرا آنلره فقراء درویشانک احوالی و طریقمزی اسرارینی

غایت اعلا بیلورلر، دیمسی اوزرینه خواجه یوسفی دعوت ایتدیلر، مجلسه کلدکلرنده خواجه حضرتلری اکا دیدیکه کرم ایدوب بو معترضلرک مشکللرینی حل و فقرادن بوعتراضی دفع ایلر، روشمزنه کونه اولدیغنی انلره بیان ایت! اولوقت مولانا حیدالدین تکرار دیدیکه روشمزن و سلوکمکز پسندیده علما و صلحادر، سننه مطابقدر! سزده خطا متصور اولماز.

معترضین مولانا حیدالدینک بوسوزلرینی ایشندکدکلرنده ارتق اعتراضه مجاللری قالمیوب مخیر اولدیلر، انجامنده کوردیلر که خواجه حضرتلری برنمد خرقة کیرلردی، ناچار قالوب اول خرقة شریفه به اعتراض ایدوب «خبرده (نهی النبی صلی الله علیه و سلم عن لبس الشهرتین) وارد اولمش و بونمد خرقة بی کیمک شهرته سببیت ویره جکی درکار بولنش اولدیغندن بویولده خرقة کیمک منهیدر» دیملرینه جواباً خواجه یوسف «بو خرقة شهرته سبب اولان البسه دن دکلدر، زیرا شهرته سبب اولان لباس یا اعلا رتبه ده تسکلف ایلر اولان لباسدر که خلق آنکله مشغول اولورلر، یا خود ادنی مرتبه ده اولان لباسدر که انی کیمک ایلر خلق اراسنده کشی شهرت بولور، بو خرقة ایه وسط رتبه سننده در، شهرته سبب دکلدر» جواب صوابی و پردیلر.

خواجه حضرتلری خرقة حقنده اولان بحثی ایشندکلره چونکه بونمد خرقة بو قدر بحثه سبب اولدی، اولاسی بودر که بونی دخی ترک ایدوب کیمهلم بیورمش و اول خرقة بی او جمعیتیه بولنان بر فقیره چیقاروب احسان ایتمش ایدی.

معترضلر خواجه حضرتلرینک بویولده کی سخاوت حالی کوردکلرنده هیچ بر وجهله محل اعتراض بوله میوب دیدیلر که بز درویشان ایلر بحثک طریقتی بیلیمز، لکن انلرک احوالی بیلور جنسلرندن بر حاکم عادل نصب ایدرز، اولحاکم بونلرک حقنده نه شهادت ایدرسه قبول ایدرز، اندنصرکه



واروب خواجه اولیاء بزرگوارك اوغلنی كئوروب حکم نصب ایتدیلر  
واکا دیدیلر که خواجه بهاء الدین حضرتلرینی نیجه بیلورسك؟ اول  
دخی دیدیکه بن فقیرك والدی خواجه اولیاء قطب الدینی نیجه بیلورسز؟  
انلر دخی پیشوای اهل طریقت و مقتدای اهل شریعت و صاحب ولایت  
بر مرد کامل بیلورز دیدیلر، بوندن صکره دیدیکه بر کون والدم خواجه  
اولیانك حضورنده ایدم، کوردمکه خواجه بهاء الدین لباس فاخره کیوب  
اسب سوار اوله رق والدم خواجه اولیانك زیارتنه کلدیلر، والدم ایله  
چوق صحبت ایتدکدن صکره کتمکه یقین واندیم بکا دیدیکه نیجه سن بنم  
اوغلم ایسك بونلر دخی اوغلدنر، دیوب بخله بونلر بینده عقد اخوت ایتدیلر  
و بزه امر ایتدیکه قالدك معانقه ایدك، بز دخی قالقوب معانقه ایتدك،  
صکره بکا خطاب ایدوب دیدیکه معلومك اولسونکه بونلر قطب دوران  
اولوب نیجه احوال عجیبه و کرامات غریبه اظهار ایتسه لر و بونلر چوق  
کیسه لر واسطه اولوب حقه اولاشدیرسه لر کرکدر! ایشته بوزمان  
بونلرک ظهوری زمانی و کرامتی ایامیدر!

منکرلر و معترضلر خواجه حضرتلرینك حقنده بوشهادت حقانیتی ایشته دیلر،  
جمله شرمسار اولوب دمبسته خجالت اولدیلر، خواجه حضرتلرینك حقانیتی  
و درجه رفعتی نمایان و طریقتك صواب و مستطاب اولدیغی عیان اولدی،  
منکرلرک دخی بطلانی آشکار و دعوالری [فوق الحق و بطل ماکانوا  
یعملون] قولنجه تبار اولدی.

خواجه حضرتلری مولانایه اعتذار ایدوب بیوردیلر که سزلی تصدیق  
ایتدك، مولانا دخی خواجه حضرتلرینه اعتذار ایتدیلر که بومحبتك  
خانه سنی تشریف ایدوب بر طعام ایتمه دن کتمك مناسب دکلدر، اذنکز  
ایله بر طعام طبخ ایتدیره لم، خواجه حضرتلری دخی تواضع ایدوب  
طعامك طبخنی بز ایده لم بیوردیلر، اندن صکره جمله اهل مجلس قالقوب  
مولانا حید الدینك خانه سنه کیتدیلر، خواجه حضرتلری دخی درویشان  
ایله طبخ طعامه مشغول اولدیلر و طعام طبخنده خواجه حضرتلری کلوب

مولانا خرد ظهیرینك یاننده اوطوردیلر، اولوقت مولانا خرد ظهیرینك  
حالی متغیر اولدی، خواجه حضرتلری دخی طعامی قوتارمق ایچون  
مطبخنه کیتدکدن صکره مولانا خرد کندیبن غائب و بیهوش اولدی، چنکه  
مولانا حسام الدین آنی اولحال اوزره کوروب غایت محزون اولدی،  
خواجه حضرتلرینك خلیفه لرندن علاء الدین، خواجه حضرتلرینك  
مطبخنده یاننه کیدوب دیدیلر که مولانا خرد هلاک اولیور کرم و لطف ایدوب  
جرمنی عفو وانی اول قضادن خلاص ایدك، زیرا مولانا حسام الدین غایت  
محزون اولمشدر، انك خاطرینه رعایت لازمدر، خواجه حضرتلری دخی  
عنایت ایدوب مولانا خردك یاننه کلدی و دست مبارکینی انك ظهیرینه وضع  
ایتدکری آنده مولانا خرددن بیهوشلق زائل اولوب کندیبنه کلدی  
اولوقت چوق کریه و فریاد ایتدی و ایتدیکنه نادم و پشیمان اولوب توبه  
ایتدی، مولانا حسام الدین چن خواجه حضرتلرندن بو کرامتی کوردی،  
اظهار محبت ایدوب دیدیکه بزم خواجه حضرتلرینه احتیاجز، کوزك  
سیاهینك بیاضنه اولان احتیاجی کیدر، وجمله علما اول مجلسده سینه صاف  
اولوب خواجه حضرتلرینه محبت ایله فیضیاب اولدقلمی حالده مجلسه طعام  
کلوب صفای خاطر ایله طعام ایتدیلر.

خواجه حضرتلرینی بر کون باغک برینه دعوت ایتدکدرنده اجابت  
ایدوب درویشانی الهرق کیتدیلر، اول مجلسده علما و فضلادن پک چوق  
کیسه لر و ارایدی، اول جمعیت عظماده خواجه حضرتلری چوق حقیقت  
صحبتی ایتدیلر، صحبت تمام اولوب مجلس انجام بولدقده خواجه حضرتلری  
باغدن طشره بر نزهتگاه محله بر درختک سایه سنده اوطوردیلر، خواجه  
حضرتلری قالقوب طشره کیتدکدن صکره مولانا عارف دیرلر بر کیسه  
مجلسده قلان احبابله تصوفانه صحبت ایتدی، لکن آنك صحبتی استماع  
ایدنلره انقباض حاصل اولوب مجلسدن قالدیلر، صاحب دعوت دخی  
بعض طلبه علوم ایله قالقوب باغدن طشره چیقیدیلر و مراد ایتدیلر که خواجه  
حضرتلرینك حضورینه کیده لر، لکن آنلره بر خوف عارض اولدیده



خواجه حضرتلرينك حضورينه كيمكه جسارت ايد مديلر واول حالي  
خواجه علاء الدينه حكاييت ايتدي .

خواجه حضرتلرينك اول محلدن باغه تشريفلري وقت ظهر ايدى ،  
بر محله سنت ظهره شروع ايتديلر ، جمله ناس دخی واروب خواجه  
حضرتلريله سنت قيلديلر ، صكره خواجه حضرتلري مولانا ابو بكرى  
اوكونه پكورديلر ، مولانا ابو بكرى تكبير افتتاحه قدرتي قالميوب چن  
خواجه حضرتلري انى اول حالده كورديلر ، كنديلر امامته پكديلر ،  
آنلرده بر هيت ودهشت ظهور ايتديكى اول هيبتدن جاعتك هر برنده  
بر حال ظهور ايدوب بعضيلر كرىه ايتدى وبعضيلر ييهوش اولوب بعضيلر پده  
چيقوب صحرايه دوشوب كندى ، مولانا ابو بكر جامه سين پاره پاره  
ايدوب كندوسنى پرله اوردى و مرشدم بندن اينجندى ديو باشنه  
طير اقلر صاچدى ، خواجه حضرتلري چن نمازى تمام ايتدى ، كورديكه  
يتش قدر كيمسه دن بر كيمسه دن بشقه كنديلري ايله نماز قيلمش يوق !  
باغدن طشره چيقوب بر تپه ده اوطورديلر ، چن خواجه يوسف خواجه  
حضرتلرينى اول تپه ده اوطورر كوردى ، خوفى زياده اولوب خواجه  
علاء الدينه ديديكه نه تدبير ايدلم ؟ تا كيم بو خلك احوالى اصلاح ايدلم !  
خواجه علاء الدين قالقوب خواجه حضرتلرينك حضورلرينه كندى  
وخواجه حضرتلرندن خلك احوالك اصلاحنى نياز ايتدى ، خواجه  
حضرتلري دخی بيورديلر كه بونلرك اصلاحى بويله اولور كه خواجه يوسف  
مولانا عارفك يانته كيدوب اكا دركه بو پريشانلق هپ سنك كلامى  
استماعدن حاصل اولدى كر كدر كه بونلرك احوالى اصلاح ايدم سىك ،  
خواجه علاء الدين دخی كلوب بوسوزى خواجه يوسفه سويلدى ! خواجه  
يوسف دخی كيدوب مولانا عارفى ارادى لكن بولامدى ، صكره خواجه  
علاء الدين يته خواجه حضرتلرينك حضورينه كيدوب يته نياز ايتدى  
ويديكه بو خلق سزك صحبتكز ايچون بو باغه كلديلر ، مولانا عارف نادانلق  
ايدوب بى حاصل صحبتلر ايله انلري پريشان ايتدى ، كرم و لطف ايدككه  
انلرك اصلاحى سزك التفاتكزه موقوفدر .

خواجه حضرتلري لطف و عنایت ايدوب خواجه علاء الدينك نيازىنى  
قبول ايتديلر واول كيمسه لك هر برلرينه برر نظر ايله احوال پريشانلرينى  
اصلاح ايتديلر ، لكن مولانا ابو بكر التفات ايتديلر ! تا كيم مولانا عارف  
بولوب خواجه حضرتلرينك حضورينه كتورديلر ، خواجه حضرتلري  
دخی مولانا عارفه عتاب ايدوب ديديلر كه سنك مرادك صحبت عشقندن خلق  
كنديكه جذب ايدى ، لكن بنم تنورم غايت كرم اولقى سبيله خيرلرينى  
اكا ياشد يروب افساد ايتدك ! ايمدى بسكا واجبدركه انلرك احوالى اصلاح  
ايدم سين ، لكن بن انلرك احوالى اصلاح ايتدم ، سندخی مولانا ابو بكرى  
اصلاح ايله ، زيرا صحبت عشق اكا خطاباً سويلدك ، واوليه عالم وفاضلى  
مهمل كلمات ايله كندوكه جذب ايتك ايچون خراب ايتدك ! انك اولادى سنى  
راحت قورلرمي ؟ ديو خواجه حضرتلري بو عتاب امير كلاتى سويلدكده  
مبارك جبهه لرنده اثر جلال ظهورينى مولانا عارف مشاهده ايتدكده درونته  
وحشت عظيمه دوشوب خواجه حضرتلرينه تضرع و نياز ايدرك ايتديكى  
كستاخلقدن عفو طلب ايتدى و ديديكه بدكارلىق ايتدم ، حدم اولمدينى  
ايشده بولندم ، اندن توبه ايدوب پشيمان اولدم ، خواجه يوسف قالقوب  
آنك ايچون شفاعت ايتدى ، خواجه حضرتلري دخی خواجه يوسفك  
شفاعتنى قبول ايدوب مولانا عارفك جرمينى عفو ايتديلر و مولانا ابو بكر  
التفات ايدوب انده اولان پريشانلغى دخی ازاله ايدوب حالى اصلاح  
ايتديلر ، جمله سى اولوقت خواجه حضرتلرينك قوه تصرفيه سنى مشاهده  
ايدوب تسليم اولديلر واول مجلسده بولنانلرك جمله سنى خواجه حضرتلرندن  
فيضياب اولديلر .

خواجه حضرتلري بركون مر كبه سوار اولوب كيدر كن پول اوزرنده  
اوطوران بر درويشك ايندكلرينى خواجه حضرتلري كوردكده « سن  
قيام ايدرايسهك ، بنم مر كيدن اينمكلهكم اقتضا ايدر ! بنم ايسه اينمكه قدرتم  
يوقدر » بيورمشلر ! خواجه حضرتلرينك بو كلامندن درويشه بر غضب  
طاري اولوب ناهموار كلمات سويلدى ، خواجه حضرتلري تبسم ايدوب



اظهار بشاشت ایتدیلر وانه حاضر بولناتلر خواجه حضرتلرینک حمله  
تعجب ایتدیلر، اندن صکره اول درویش بر عظیم درده مبتلا اولوب آز  
قالدیکه هلاک اوله! آنک بی ادبکنی بیلنلر دیدیلرکه: ای درویش! سنک  
بو درده ابتلا اولقلغک خواجه حضرتلرینه بی ادبک ایتدیکنکندلر،  
خواجه حضرتلرینک رضاسی تحصیل ایدلمکجه بودرد علاج قبول ایتز!

خواجه حضرتلری بر کون اولدرویشک خانه سی سمتدن چکرکن  
اولدرویشک خانه سندن بر کیمسه چیقدی، خواجه حضرتلری دخی  
درویشک حالندن اکا سوال ایتدی، اول کیمسه دخی دیدیکه حالی غایت  
کوتیدر، تشریفکزه منتظر در، خواجه حضرتلری عنایت ایدوب انک  
عیاده سنه کیدوب حالی سوال ایتدیلر و دیدیلرکه (الشافی هو الله)  
صاقین قورقه! قالقارسک! خواجه حضرتلرینک مجرد بو کلامی ایله اول  
انده درویش عافیت کلوب قالقدی و خواجه حضرتلرندن اعتذار ایدوب  
«افندم بی ادبک ایتدم و خاطر شریفکزی اینجندم» کرم و لطف ایدب  
جرمی عفو ایدک «دیدی! خواجه حضرتلری دخی دیدیلرکه خاطریمز  
اولوقت اینجندی اما، شمدی خاطریمزده بر غبار قالمدی، اولوقت بیوردیلرکه  
مشایخک قلیجی عرباندر خلق کندیلرینی اول قلیچلره اوررلر، بوقسه مشایخ  
اهل مرحتدرلر کیمسه یه قلیج اورمزلر!

خواجه حضرتلری بیت اللهی زیارت کتدکده (منا) ایامنده چاج قوربان  
کسدیلر، خواجه حضرتلری بیوردیلرکه بز دخی قوربان کسمک کرک اما  
بز قوربان ایتیز! انجق اوغلی قوربان ایده رز! اولوقنده خواجه  
حضرتلرینک خدمتده اولان درویشلر اول کلامک صدوری ساعتی قید  
ایتدیلر، بخارایه کلدکلرنده کوردیلرکه خواجه حضرتلرینک مخدوملری  
وفات ایتش و نه کونده و نه ساعتده وفات ایتدیکنی صور دقلرنده کلامک  
صدوری ساعتیه مخدوملرینک وفاتی ساعتی توافقی ایتدیکی اکلاشلشدلر!!!

خواجه حضرتلری بیوردیلرکه اصدقای درویشاندن محمد زاهد ایله

بر کون صحراده تنها اوطوروب صحبت ایدرکن «کمال عبودیت حق یولنده  
جان فدا ایتکدر!» دیدیکده محمد زاهد جان فدا ایتک غایتی نه مرتبده  
اولدیغنی صوردی، بنده جواباً (اگر درویش حق ایچون «اول!» دیسلر  
اولور) دیش ایدم! جزئی بر زمان صکره بنده ظهور ایدن بر حال اوزرینه  
محمد زاهده (حق ایچون اول دیدم) اول دخی اولدمده اولدی، بن دخی  
آنی ارقه سی اوزرینه یاتوروب آیاقلرینی قبله یه چوبردم، بو حال اوزره  
قوشلقدن اویله وقتنه قدر قالدی، اول کون غایت حرارتلی بر کون ایدی،  
بن حیرتمدن واردم بر درختک سایه سنده اوطوردیم، رزماندن صکره  
قالقوب یانسه کتدم، کوردمکه یوزی متغیر اولوب سیاه اولدی، آنی اول  
حاله کوردیکده حیرتم دهها زیاده اولدی، اولوقت قلمبه الهام اولدیکه  
سویله که یا محمد دیریل، بن دخی اویج کره دیریل دیدم! کوردمکه اثر حیات  
بدننده ظاهر اولوب حرکتیه باشلادی، حیات بدننه تمام حلول ایتدکده  
قالقوب اوطوردی.

بوقصه یی سید امیر کلال حضرتلرینه نقل ایتدم، انلر دخی بیوردیلرکه  
اوغلم! نیچون اولوقت اکا دیمک یا محمد دیریل، بن دخی بوکله قلمبه الهام  
اولدی و بوکله یی دیمکجه دیرلمدی دیدم.

خواجه حضرتلری بخاراده بر دوستک خانه سنده درویشان ایله  
اوطوررلر ایدی، صاحب خانه ایسه سفره لوازمی ایچون اویج درویش  
چارشویه کوندردی و هربری بر مصلحت ایچون برجهته کتدی، اول اویج  
درویشک هربری کیتدیکی جهته ده خواجه حضرتلرینی کوردیلر،  
و مصلحتلرینی آلوب جمله سی ینه بریره جمع اولدیلر و جمله سی معاتوجه ایدوب  
خانه یه کیدرکن درویش محمد ملاقی اولدیلر، قصه یی اکا نقل ایتدیلر  
اول دیدیکه بنده خواجه حضرتلرینی فلان محله کوردیم کیدرلر ایدی،  
اول درویشلر بونی ایشته کلرنده خواجه حضرتلرینی عجب قنده بولورز  
دیو تحیرده ایکن خواجه حضرتلری آنلره بر درویش کوندردی، وار باق



انلر نه چوقا کلندیلر ، اول کیمسه بونلره ملاق اولدقده قصه بی نقل  
ایتدیلر اول درویش دخی دیدیکه سز خانه دن کتدکن صکره بن وصاحب  
خانه اصلا خواجه حضرتلرینک حضورندن مفارقت ایتدک ، بنی سزه  
کوندردی وار باق درویشان حیرتده درلر تیر کلسونلر ، بز دخی عجله  
ایدوب خواجه حضرتلرینک حضورلرینه کتدکده بزه بیوردیلر که نه چوق  
مکت ایتدیکز ؟ بز دخی ، قصه بی خواجه حضرتلرینه نقل ایتدک ! تبسم  
ایدوب بیوردیلر که « حضرت عزیزان ( قدس سره ) بر رمضان اخشامی  
اون اوچ بره دعوت اولندیلر ! جله سنه اجابت ایدوب بر آنده جله سنه  
افطار ایدوب طعام ایتدیلر »

مولانا نجم الدین دیدیکه بن برکون خواجه حضرتلریله بخارا نواحیسنده  
بر صحرا ده کیدرکن کوردک که صحرا ده یدی آهو کزردی ، خواجه  
حضرتلری بکا دیدیکه حق تعالینک بنده لری یانه بوجانورلر کی وحشی  
جانورلر کلور ! سندخی دیله که بوجانورلر سنک یانکه کلسونلر ، بندخی دیدمکه  
بنم نه حدم وار که سزک حضور کزده اوله کرامت دیلیم ، خواجه  
حضرتلری دیدیلر که سن همان انلره توجه ایله انلر سنک یانکه کلورلر ،  
بندخی انلرک جانبنه ایکی خطوه کیتدم ، کوردمکه اول آهولر سکرده رک یانمه  
کلوب طور دیلر ، خواجه حضرتلری دخی بیوردیلر که هانکیسنی طوتار  
ایسه ک طوت ، بندخی قنغیسنی طوتیق دیلدم ایسه آخری بنی طوت دیو  
کلدی و آنی طوتایم دیدم بر غیر ی کلدی ! بن مخیر اولوب انلردن برینی  
طوته مدم ، اول وقت خواجه حضرتلری بر آهونک ظهرینه مبارک دستنی  
وضع ایدوب دیدیکه سکا حاجت قالدی بن طوتدم ، صکره اول آهولری  
اول محله قویوب کیتدک انلر بزم آردیمزدن باقه قالدی !

خواجه حضرتلرینک درویشانندن بری دیدیکه قصر عارفانده بر بوستان  
اکدم ! صولامه وقتی کلدی اما صولر کسلدیکندن بوستان صولایه مدم ، یاغور  
دخی یاغدیغندن بوستان غایت صقلدی ، خواجه حضرتلری دخی اول ایامده  
بوستانمه کلدی و بیوردیکه بوستانک صولامه وقتی کلدی ، بندخی دیدمکه

صولامه وقتی کلدی اما صولر کسلدی ، خواجه حضرتلری بیوردیلر که  
( فاطر السموات والارض ) حضرتلری قادر در که سکا صو ویره ، سن  
همان صو یوللرینی آج ، بندخی عجله ایله صو یوللرینی آچدم و اوکیجه صباح  
اولنجیه قدر صویه منتظر اولدم ، صباح وقتنده صو کلوب بوستان  
صولادم ، حتی بر مقدار صوغان و صرمساق و ارایدی ، انلری دخی صولادم ،  
صو دخی کسلیدی ، فکر ایتدمکه عجب طاغله یاغورمی یاغدی ؟ واردم  
ایر مق طرفنه باقدمکه صو کلدیمی ؟ اصلا صودن اثر یوق ، مخیر اولدمکه  
عجب بو صو زه دن کلدی ؟ صکره خواجه حضرتلرینک زیارتلرینه کیتدم ،  
بکا بیوردیلر که بوستان صولادکی ؟ اوت صولادم دیدم ، تسکرار  
بیوردیلر که صو کسلدی صکرک نه ایشلدک ؟ دیدمکه ایرماغه کتدم کوردمکه  
اصلا ایرماقده صو یوق غایت تعجب ایتدمکه اول صو نه سمندن کلدی !  
خواجه حضرتلری دخی بیوردیلر که چون بوسری کوردک خاموش اول .

خواجه حضرتلری بر عزیز ایله ایرماق کنارنده شیخ سیف الدین قبرینک  
مقابله سنده او طورلر و اولیاء اللهک احوالندن بحث ایدرلر ایدی ، انای  
صحبته شیخ سیف الدین ایله شیخ حسن بلغارینک مابینده اولان قصه  
کرامتی ذکر ایتدیلر ، اول عزیز دخی دیدیکه اولیاء اللهک کچمش زمانده  
چوق تصرفلری اولدی ! عجب بوزمانده دخی انلر کی تصرف ایدن واری ؟  
خواجه حضرتلری بیوردیلر که بوزمانده آدم واردر که بو ایرماغک  
صوینه یوقاری آق دیو اشارت ایلمه ، یوقاری آقار ! خواجه حضرتلرینک  
مبارک لسانلرندن بو کلام صادر اولور اولمازا ! درحال ایرماغک صوی یوقاری  
آقغه باشلادی ، خواجه حضرتلری بیوردیلر که یاصو بن یوقارو آق  
دیدم ، اولوقت اولکرامتی چوق کیمسه مشاهده ایتدیلر و اولکرامت سببیه  
خواجه حضرتلرینک تصرفنی چوق منکرلر اقرار ایدوب سعاده ایردیلر !!

خواجه حضرتلرینک درویشانندن بری حکایت ایتدیکه نسفده بر سنه  
غایت قحط مطر اولدی ، آز قالدیکه زراعت جله تلف اوله ، اهل نصف  
بنی بخارایه خواجه حضرتلرینه باران طلبچون ارسال ایتدیلر ، چنکه



خواجه حضرتلرينك حضورينه واصل اولدم ، بن سويلدن اول انلر بكا  
ديديلر كه اهل نصف ايولر و خوشلر ميدير ؟ و سني بكا باران طلبي ايجونمي  
ارسال ايتديلر ؟ ايمدي انلره بو كره بوباراندن كوندروم ؛ جزوي وقتدن  
صكره باران باشلادي و اول باران هر ساعت زياده اولوب بر كون بر كچه  
ياغدي تا كيم ولايت نصف خواجه حضرتلرينك كرامتليله جمله سيرا ب  
اولدي ، اول باراندن بركات فراوان حاصل اولدي .

خواجه حضرتلري فصل شتاده بر كون دوريش حسينه امر ايتديلر كه  
بوسنه چوق قيش اولسه كرك ، چوق اودون جمع ايله ، درویش حسين  
دخی امر ايتدكلى اوزره چوق اودون جمع ايتدی ، صباحلين قار ياغغه  
باشلايوب تا قرق كونه دك ياغدي ، اول ايامده خواجه حضرتلري شيخ  
شادي بي آلوب خوارزم جانبته روان اولديلر ، يولده حرام نام بر عظيم  
ايرماق وار ایدی انك كنارينه اولاشديلر ، اولوقت خواجه حضرتلري  
شيخ شادي به ديديلر كه بو صويك اوزرندن يور يوب كج ، شيخ شادي  
خوف ايدوب چكمدی ، خواجه حضرتلري ينه كج ديو امر ايتدی شيخ  
شادي ينه خوف ايدوب چكمدی ، خواجه حضرتلري اولوقت اكا هيبتله  
بر نظر ايتديكه محمل ايدمه يوب يره دوشدی ، يهوش اولدی ، صكره كسدينه  
كلوب قالدی ، صواوزرندن يورودی ، خواجه حضرتلري دخی آنك اردنجه  
صواوزرندن يورويه رك اول ارماغ عظيمي چكديلر ! ايرماغي چكدكدن  
صكره خواجه حضرتلري شيخ شادي به يورديلر كه باق چيرمه كه صو  
اصابت ايتدیمی ؟ اولدخی باقدی ، كوردیكه الله تعالينك قدرتيله چيرمه سته  
ذره دكلو صواصابت ايتامشدر !!!

بر درویش حكایت ايتديكه خواجه حضرتلري بر كون بن فقيرك  
خانه سني تشریف ايتديلر ، تشریفلرندن غایت مسرور اولدم ، واردم  
بازاردن بر يوك اون الدم ، اول اونى خواجه حضرتلري كوردكده يورديلر كه  
بو اونى اهل و عياله اتمك و طعام ايدوب اكل ايدك و انك سرينه كيمه يي  
مطلع ايتمه ين ، خواجه حضرتلري اولوقت خانه مده ايكي آي مسافر

اولديلر و نيجه درویشان دخی آنكله مسافر ايتديلر ، اهل و عيالم و سائر  
احبابم جمله اول اوندن اكل ايتديلر ایدی ، حتی خواجه حضرتلري كيتدكدن  
صكره اول اوندن چوق زمان يدك ، اون ينه حالی اوزره باقی ایدی ، اصلا  
اكسيلمی ! صكره خواجه حضرتلرينك نفس پا كلرندن غفلت ايتدمده  
اوسرى اهل و عياله كشف ايتدم ، آنك اوزرينه اول اوندن بركت  
كسيلوب اون تو كندی !!!

درویش محمد زاهد حكایت ايتديكه اوائل طلبدده خواجه حضرتلري  
( قدس سره ) ايله بر كون صحرا ده كيدر دك ، اولكون بهار ايامندن ایدی ،  
اول وقت نفسم قارپوز آرزوسن ايتدی ، خواجه حضرتلرندن بر قارپوز  
نياز ايتدم ، اول صحرا ده بر چای آقاردی ، خواجه حضرتلري بكا  
ديديكه محمد ! چای كنارينه كيت ، بن دخی چای كنارينه كيتدم ، كوردمكه  
( بابا شيخ ) قارپوزی درلر ، بر جنس ياك و آبدار قارپوز وار ایدی ، اندن  
بر قارپوز صواوزرنده كلوب كناره پناشوب طور دى ، واروب انى  
الدم ، كوردمكه هنوز تازه بوستاندن كسپلش كي ایدی ، كتوروب  
خواجه حضرتلرينك حضورينه بر اقدم ، بيورديلر كه كس ، ايمدی آنى  
اكل ايدم لم ، بن دخی كسوب خواجه حضرتلريله آنى اكل ايتدم ،  
اول كرامت عظيمه يي اولوقت خواجه حضرتلرندن مشاهده ايتدكده  
كل تصرف ولايتلرينه يقينم زياده اولوب چوق فيضه نائل اولدم .

بر دانشمند فقيه صالح حكایت ايتديكه مولانا سعد الدين كه مقتداى اهل  
نصف ایدی ، اول نقل ايتديكه خواجه حضرتلري بر كون بو فقيره  
بيورديلر كه بو كون سرك باغه كيده لم ، اولكون ايام شتادن ایدی ، بن دخی  
آنلري آلوب باغه كتوردم ، اول باغ ايسه كوزومه اصلنده بر خارستان  
كورونوردی ، خواجه حضرتلري بكا بيورديلر كه باغكز بوميدر ؟ بن ايتدم  
بودر ، خواجه حضرتلرينك بوكلامندن بنده بر حال عجيبه ظاهر اولدی ،  
خواجه حضرتلري بيورديلر كه استرميسك باغكي بر طراوتلى سبزستان  
وكستان ايدم لم ، تا كه بزه يقينك زياده اوله ، ايمدی باغكه نظر ايله



بن دخی چنکه نظر ایتدم ، کوردم اول خارستان اولان باغ بر رنگین  
کستان و بر زمر دین چنستان اولدی ، اولوقت کولدن دیدمکه سبحان الله  
طرفه العینده حق تعالی بو باغه بو حسن بحقی و بو لطافت نضارتی بخش  
وامان ایتدی انجق خواجه حضرتلرینه مخصوص کرامتدر ! اولای  
سائر ده بویله کرامت ممکن اولمز ، اولکرامت عجیبه بی مشاهده ایتدکده  
خواجه حضرتلرینک قوت تصرفلرینه و قدرت روحانیتلرینه یقینم زیاده  
اولوب محبتلرینه مستغرق اولدم ، اول سبیدن چوق لطف و عنایتلرینه  
مظهر اولدم .

سید امیر کلال حضرتلرینک اوغلی امیر برهان الدین (قدست اسرارهما)  
حکایت ایتدیکه بر کون بخاراده خواجه حضرتلری خانقاهمه کلدیلر ،  
انهای صحبتده حال انبساطلرینی حس ایدوب التماس طریقیه دیدمکه افندم  
مولانا عارفه زیاده اشتیاق واردر اکا توجه ایدیکز که نسفدن کلسون  
کوروشهلم ، خواجه حضرتلری دخی خانقاهک سطحه چیقیدیلر ، اوج  
کره مولانا عارف دیو ندا ایتدیلر و بیوردیلر که مولانا عارف چاغردیغمی  
ایشندی عجله قالدی کلور و یارنکی کون مولانا عارف نسفدن بخارایه  
خانقاهه کلدی ، بن دخی قصه بی اکا نقل ایتدم ، اول دخی دیدیکه دونکی  
کون فلان ساعتده اصحابه مجلسده صحبت ایدرکن خواجه حضرتلرندن  
دعوت صداسی سمعه واصل اولدی بن دخی عجله ایله قالقوب کلدم .

خواجه حضرتلری اسحق نام درویشک منزله کتدیلر درویشان  
دخی تنوره چوق اودون قویوب آتش ایتدیلر ، کیدوب مطبخده طعام  
تربیه سنه مشغول اولدیلر ، تنورک آتشی زیاده اولدیغندن علو تنوردن  
طشمره چیقدی ، اول محله خواجه حضرتلرندن غیر کیسه یوق ایدی که  
تنورک آتشی تسکین ایده ، اولوقت خواجه حضرتلری قالقوب مبارک  
الری فی تنوره ادخال ایتدکده تنورک آتشی ساکن اولدی ! آندن صکره

مبارک الری فی تنوردن چیقاردیلر ! عنایت حق ایله نه لباسلری یاندی  
ونه مبارک الرندن بر توکی اینجندی !!!

### ( بیت )

خلیل الله با آتش همی گفت \* اگر موی زمن باقیست می سوز

### ( ترجمه )

خلیل الله دیدی ای نار احراق \* قالورسه بر تویم ، آنی ده یاق

بر درویش دیدیکه بن صغیر السن ایدم ، ( جنانیان ) مملکتندن بخارایه  
کلدم و انده علما و فقرا مجلسلرینه ملازمت ایدردم ، اول ائاده زیارت  
بیت الله ایله مشرف اولدم ، آندن صکره ینه بخارایه کلدم ، اولوقت نفسم  
غایت طغیان و عصیانیه میل ایتدی ، آز قالدیکه نفسم شقاوت سمته  
یوز چوپره ، بن بوضلا تده ایکن بکا بر جذبه کلوب بنی بی اختیار خواجه  
حضرتلرینک مجلسنه ایصال ایتدی ، اول مجلسده قتی چوق درویشان وار  
ایدی ، اولوقت خواجه حضرتلری بنی یانسه اوطورتدیلر و اکسمه  
برسله اوردیلر ! اول سله دن حالم متغیر اولوب بر نعره اوردم ! خواجه  
حضرتلری جلاللنوب بلند آواز ایله بکا خاموش اول دیو بیوردیلر  
وصکره دیدیلر که « اکر سن صبر ایدوب اول نعره بی اورمامش اولسهک  
بر صحبت ایله تمام اولوردی ، چونکه خاموش اولدک ! کل ایدی حالکی  
سکا کوسستریم » اولوقت بکا بر نظر ایتدیلر و اول نظر ایله حالمی کشف  
ایتدم ، کوردمکه کریز کی وجودم نجاستله مملو اولمشدر ، هر طرفدن  
نجاستلر آقوب یاتور ، اولوقت خواجه حضرتلری بکا بیوردیلر که  
طوغری سویله کندوکی نیجه کوردک ؟ بن دخی دیدمکه والله افندم کندی  
کاریز کی نجاستله مملو کودم و اطرافدن دخی نجاستلر آقوب یاتور !  
اولوقت خواجه حضرتلری یوزلرینی درویشان طرفنه چوپروب بیوردیلر که  
اگر بو بزم صحنه ایریشمه دنیادن ایمانسر کیدردی ، خواجه حضرتلری



اولوقت بکا انابت و یروب تلقین طریقت ایتدیلر ، اول ضلالت یولندن  
نجات بولوب طریق هدایت کیردم و اول شقاوتدن خواجه حضرتلرینک  
همنلریله سعادت ایشدم

غدرت ، نام قریه ده شیخ شادینک منزلده درویشان جمعیت ایدوب  
سودی آتش پیشوردیلر و قصیه قویوب سفره یه قودیلر و جله سی اوطوروب  
اکله شروع مراد ایتدیلر اما اول جماعتک قدرتی اولدیکه اول آشدن  
برنقه الوب اکل ایده ! اول حالتدن متحیر اولدیلر و دیدیلر که بونده  
بر حکمت وار ، آشی قالدیروب ینه تجریه قودیلر ، بر ساعتدن صکره خواجه  
حضرتلری اول منزلی تشریف ایتدیلر و بیوردیلر که بن قصر عارفان  
چیقوب بو سمت کورکن سز تجریه اوجاغه قودیکز و بر مقدار مسافه  
یورودم ، کوردمکه سز آشی پیشوروب قصیه قودیکز و آنی بک مراد  
ایتدیکز ، بن دخی اللریکزی و اغزیکزی طوتمکه بن کلنجه اکل ایتیه سکز !  
خواجه حضرتلرینک کرامتی درویشان کوردکده مسرور اولوب  
قالتوب اول آشی قصیه قویوب سفره یی دوشه دیلر و خواجه حضرتلریله  
جله سی اوطوروب اول آشی ذوق و شوقله یدیلر ، اول مجلسده دخی  
خواجه حضرتلرندن چوق احوال عجیبه ظهوره کلدی ، درویشان  
اول کرامتلردن چوق فیضیاب اولدیلر .

خواجه حضرتلری جماعت درویشانله بر کیمسه نک سطوح بیتده  
اوطوررلر ایدی ، خواجه حضرتلری اول مجلسده غایت کرمیتی صحبت  
ایتدیلر ، اتناى صحبتده درویشانله خطاب ایدوب دیدیلر که سز بنی  
بولدیکز بنی سزی بولدم ؟ درویشان ایتدیلر بز سنی بولدق ، خواجه  
حضرتلری چونکه سز بنی بولدیکز بو سطوحده دخی بنی بولیکز دیوب  
درویشانک نظرندن پنهان اولدیلر ! درویشان آنلری سطوحده پک  
چوق تجسس و تفحص ایتدیلر ایسه ده بولدن عاجز اولدیلر و ایتدکلی  
دعوان فارغ اولوب دیدیلر که بز سزی بولدق و سز لک جاذبه  
لطف و عنایتی اولسه کیمک شرف صحبتکزه استحقاقی واردر ، درویشان

بوگونه اعتراف و اعتذار ایتدکلی حالده خواجه حضرتلری آنلره  
کندیلر بنی اظهار ایتدی ، کوردیلر که خواجه حضرتلری همان آولا  
اوطوردقلمی یرده اوطوررلر چن درویشان آنلری اولیه مشاهده  
ایتدکده غایت خجالت چکوب حیرته دوشدیلر ، خواجه حضرتلرینک  
درویشانه بو معاملاتی ایتدن مرادی سر و حدقی آنلره افاده ایدوب حق  
بیلدیرمک ایدی .

بر درویش دیدیکه خواجه حضرتلریله بر کون قصر عارفانده کندی  
باغلرنده ایدک ، خواجه حضرتلری کیدوب بر درخته ظهرینی و یروب  
طوردیلر بر ساعتدن صکره انلرده بر هیبت ظاهر اولدیکه بن اول هیبتدن  
پیهوش اولوب یره دوشدم ، صکره کندیمه کادم ، کوردمکه خواجه  
حضرتلری حوضک اطرافنی دور ایدرلر ، اندن صکره کیدوب بر الما  
اغاجنی قوجاقلیوب طوردیلر ، بر زماندن صکره کوردمکه جسم شریفلری  
اولیه عظیم اولدیکه جله باغی طولدردی ، قنغی جهته نظر ایتدیمسه  
کوردمکه اول جهتلری دخی طولدردی ، اندن صکره ینه کوردمکه جسم  
شریفلری کوچولمکه باشلدی ، اولقدر کوچولمکه جسم شریفلرندن  
اصلا اثر قالمدی ، آزمندت صکره جسم شریفلری ینه ظهور ایتدیکه باشلدی ،  
تا کیم حالت اصلیه سنه رجوع ایتدیلر و اول الما اغاجنی قوجاقلرندن  
طوتوب طوررلر ایدی ، بن بو حالدن تحیرده قالدیم ، خواجه حضرتلری  
بیوردیلر که حضرت عز یزنده بویله حاللر واقع اولوردی !

مولانا عارف دیدیکه قیش کونلرندن بر کون خواجه حضرتلریله یولده  
کیدردک ، بن پا برهنه ایدم ، نه پاپوش و نه چیرمه کیردم ، اول یولده بزی  
عظیم قارطوتدی ، اول قار بزه زجت و یردی ، قلمدن خواجه حضرتلرینه  
دیدم که بونه حالدرکه گرفتار اولدق ، اولوقت خواجه حضرتلرنده  
بر عجب حال ظهور ایدوب هیبت نظر یله جهت سمایه نظر ایتدیلر ،  
اولحظه ده قار کسلدی ! سما آچیلوب شمس ظهور ایتدی و هوا غایت خوش  
اولدی راحت ایله محله کیتدک .



سید برهان الدین 'خواجه حضرتلرینه بر مقدار سمک هدیه کنوردیلر'  
 خواجه حضرتلری باغلرنده ایدیلر 'اول بالقلری باغده پیشورمک مراد  
 ایتدیلر 'اول کون اول بهار کونلرندن ایدی 'خواجه حضرتلری اول  
 سمکلی طبخه مشغول اولدقده بر عظیم سحاب سمایی قاپلیوب یاغور یاغغه  
 باشلادی 'اولوقت خواجه حضرتلری سید امیر برهان الدینه بیوردیکه  
 «سویله بنم اولدیغم محله یاغور یاغسون!» برهان الدین تضرع ایدوب  
 دیدیلرکه افندم بنم نه حدم وار که بوسوزی سویلیم! خواجه حضرتلری  
 تکرار بیوردیلر که بنم سکا دیدیکم سوزی سویله! برهان الدین دخی  
 خواجه حضرتلرینک امرینه امتثالا سویلیدی 'قدرت الهیه ایله خواجه  
 حضرتلرینک اولدیغی محله اصلا یاغور یاغدی 'سائر طرفه اولقدرد  
 یاغدی که اول محلا اطرافنه یاغان یاغورلرک سیلابی اول محمدن کلوب  
 جریان ایتدی!!! اولحالی مشاهده ایدنلر مخیر اولدیلر! بو کرامتندن  
 چوق کیمسه فیضیاب اولدی!!!

خواجه علاء الدین دیدیکه خواجه حضرتلرینک خدمتلرنده اولوردم  
 برکون خواجه حضرتلری درویشان ایله بخاراده (دروازه کل آباد)  
 محله سنده بر درویشک منزلنده اوطورلر ایدی 'اولدرویش (کلاه  
 نوروزی) دیکوب باشنه کیمش ایدی 'اول کلاه نوروزی حاکم ووالیلر  
 باشلرینه اورونورلر ایدی 'اتفاق اولکون خواجه حضرتلری و درویشان  
 اول کلاه نوروزی اورونورلر ایدی 'اول وقت خواجه حضرتلرنده  
 بر بسط عظیم وار ایدی 'اول بسطدن دخی درویشانه عظیم ذوق وشوق  
 حاصل اولمشیدی 'اول بسطده خواجه حضرتلری «چونکه بزم باشمزه  
 کلاه ملوک نوروزی وارد کرکدرکه مملکتده تصرف ایده لم 'ایندی  
 کندیمزی قنغی ملک وار که اکا اورملم؟» درویش (پهلوان محمود یکبار)  
 حضرتلری اول مجلسده ایدی 'دیدیکه ملک ماوراء النهر وار 'خواجه  
 حضرتلری دخی اکا اوردق بیوردیلر وجهه مجلسده حاضر اولنلر تاریخی  
 ضبط ایتدیلر 'اول مجلسده بولانلردن برکیمسه کابله کیتمک مراد ایتدی

بخارا امیری ماوراء النهر دن فرار ایدوب کابلده اولوردی 'خواجه  
 حضرتلری اول کیمسه یه مکتوب و یروب کابلده کی امیر بخارایه کوندردی  
 و یازدی که صورت حال بویله در مکتوبی کتورن کیمسه یه بیک آلنون  
 و یروب درویشانه کوندره سین دیدی 'چونکه برقاچ کون مرور ایتدی  
 خبر کلدیکه ماوراء النهرک ملک هلاک اولدی 'تاریخی تفحص ایتدیلر  
 کوردیلر که همان اول ساعت ملک هلاک اولدی 'جمله سی بو کرامت عظیمدن  
 تعجب ایتدیلر و دیدیلر که حق تعالینک خاص بنده لرندن بویله احوال صدور  
 ایدوب بو کیمی کرامتلر ظهور ایدر 'خواجه حضرتلری بو تصرفک  
 صدورنده بیوردیلر ایدیکه بومقوله تصرف بزدن واقع اولسه بز اوتاده  
 دکوز اولوقت بزدن بزلک کیدر اول تصرف بزدن واقع اولور زیرا بن  
 کی فقیر و مفلس و عاجزک انندن تقصیردن غیری نه کلور انندن!

### (بیت)

زهی سلطان بی همتا که باجا کر کند سودا  
 اگر خواهد دهد کالا و کر خواهد بر اندازد

### (ترجمه)

عجب سلطاندر اولولی ایدر چا کرلره سودا  
 کیمینه بخش ایدر کالا کیمک قور چاه زندانه

زیرا بوقدر کمال قرب قبولک وجودیله رسول الله (صلی الله علیه  
 وسلم) «وما رمیت اذ رمیت ولكن الله رمی» خطابی وارد اولش وبونده  
 بیچاره اولان امتلرک احوالری 'نیجه اوله جنی اعلام ایدلمشدر.

خواجه علاء الدین دیدیکه خواجه حضرتلرینک قبوللریله مشرف  
 اولدیغم ایامده خواجه حضرتلرینک محبتلری بنده اویله اثر ایتدیکه  
 قرار وآرام قالمدی 'بر لحظه انلرک صحبتلرندن مفارقته قدرتم اولز ایدی  
 اول حالد برکون خواجه حضرتلری بکا توجه ایدوب بیوردیلر که سنی



بنی دوست ایتدک؟ بنی سنی دوست ایتدم؟ بندخی دیدمکه سزسلطانز بنده  
فقیرینه التفات ایتدک کرک و بنده کز سزی دوست ایتدک کرکدر، خواجه  
حضرتلری بیوردیلرکه بر ساعت ساکن اول تا کیم سکا معلوم اوله، صکره  
کوردمکه خواجه حضرتلرینه بنده محبتدن اثر قالدی اول وقت بیوردیلرکه  
کوردکی دوستلق بندنیدر یا سندنیدر؟

( بیت )

اگر از جانب معشوق نباشد کشتنی \* کوشش عاشق بیچاره بیجانی نرسد

( ترجمه )

جانب معشوقدن اولمزسه محبت عاشقه \* سعی عاشق محبوبه ایصال ایلار

و اگر محبوب حقیقی نقاب قبولی ( یحبهم ) وجهندن کشف ایتدکجه  
کیم زهره سی اولورکه قدمی سر پرده ( یحبونهم ) جانینه وضع ایده .

خواجه حضرتلرینک درویشانندن بر درویش حکایت ایتدیکه بر کون  
خواجه حضرتلرینک داعیه جذبه صحبتلری درونده پیدا اولدی  
اولداعیه ایله طاشکند ولایتدن بخارایه متوجه اولدم، اولوقت اهل بیت  
بر مقدار آچه کتوروب بکا و یردی و دیدیکه بو آچه لری خواجه  
حضرتلرینه ویر، بن دخی فیچون کوندردیکندن نجسس و تفحص ایتدم،  
خبر ویرمدی، مچن خواجه حضرتلری صحبتله مشرف اولدم، اول آچه لری  
خواجه حضرتلرینک اوکلرینه وضع ایتدم، خواجه حضرتلری مچن  
اول آچه لری کوردیلر تبسم ایتدیلر و بیوردیلرکه بو آچه لردن ولد رایحه سی  
کلور، امیددرکه حق سبحانه و تعالی سکا ولد بخش ایده ! خواجه  
حضرتلرینک برکت و همتلرندن حق سبحانه و تعالی بکا بر ولد صالح احسان  
ایتدی .

شیخ زمان و قطب عزلیان ( عبد القدوس ) قدس سره دیدیکه مچن

خواجه حضرتلرینی قبر منورلرینه وضع ایتدک، کوردمکه وجه مبارک لری  
طرفندن ( القبر روضه من ریاض الجنة ) حکمی اوزره جشدن بر روزن  
قبر شریفلرینه آچلدی، اول روزندن ایکی حوری کلوب آنلره سلام  
ویردیلر، بزلی حق تعالی سزک ایچون خلق ایتدی و خلق ایتدیکی  
وقتدن بری سزله منتظرز دیدیلر ! خواجه حضرتلری آنلره دیدیکه  
بن حق تعالی حضرتلریله عهد ایتدمکه دیدار بیچونله مشرف اولدکجه  
و بکا منتسب اولنلره و بندن حق ایشیدوب عمل ایدنلره شفاعت ایتدکجه  
هیج برشی و هیچ بر کیمسه ایله مشغول اولم !!!

بر داشمند حکایت ایتدیکه خواجه حضرتلری دار فنادن دار بقایه  
رحلت بیوردقلرنده بن کیش ولایتده ایدم، خواجه حضرتلرینک وفاقی  
خبری مچن بکا ایرشدی، غایت مکسور خاطر اولدم و نفسمه دیدمکه بوندن  
صکره ینه مدرسه یه کیدرم، اولکجه خواجه حضرتلرینی رؤیاده کوردم  
بو آیت کریمه یی بکا او قودیلر « افان مات او قتل انقلبتم علی اعقابکم »  
مچن خوابدن بیدار اولدم، خواجه حضرتلرینک بو آیت کریمه یی او قومهلرندن  
بو یله فهم ایتدمکه بحسب روحانیت جمله فقرا و درویشانه امداد و اعانت  
ایدرلر، اولوقته قریب خواجه حضرتلرینی ینه رؤیاده کوردم، بیوردیلرکه  
قال زید بن حارث ( الدین واحد و دائم ) بو اشارتدن دخی فهم ایتدمکه  
بو کلام خواجه حضرتلرینک حقانیتلرینه دلیلدر و انلر حیات و مماننده  
سالک لری کتاب و سنته و اثر اصحابه شوق و تسلیک ایدوب حقه ارشاد  
ایدرلر، رضی الله عنه .

( نظم )

خواجه پیر بهاء الدین شاه نقشبند  
همشدن مرده لر بولدی حیات جاودان  
ریزه چین خان فیضی اولدی ارباب سلوک  
ظاهر و باطن ایدر امداد خلقه بی کمان



زین ایدوب نورولایتله کرامت کشورین  
 ایتدی اظهار کرامتله طریقک کلسستان  
 خواجکانک سوق عرفانک ایدوب رونق نما  
 و یردی کالای کالاته بهای حسن و آن  
 شرقله غربی احاطه ایتدی قطبانیتی  
 طولدی اسرار دروندن زمین و آسمان  
 طوغر و لقدمه بیک استرسک طریق حضرتی  
 کوی یوزنده اولدی شمال طریق کهکشان  
 عالم غیب و شهادتده تصرف ایلدی  
 اولدی فرمانبر طریقته کاهب انس و جان  
 صانمه کز اولدی کراماتی اولنجه منقطع  
 فیض روحانیتی جاری جهانده هر زمان  
 ذره افتاده یم یارب ( رفعت ) و یر بکا  
 ایلیم خورشید روحانیتده اقتران

تمت الکتاب بعون الله الملك الوهاب

﴿ حضرت پیر محمد بهاء الحق والدین افندیمز ﴾  
 ﴿ حضرتلرینک شمال شریفلری ﴾

حضرت پیر دستگیر افندیمز اورته بویلی طقنازجه و قیر صقاللی  
 یعنی بیاضی سیاهنه غالب ، وجه سعادتلری دکر می و یکاقلری  
 براز قرمزی یه یقین وایکی قاشی آره سی آچیق ، بیقلری قرقق  
 و کوزلری صاری شهدانه الا کوزکه کستانه قره سی تعیر اولنور ،  
 پوهیئت و بوشکل اوزره توجه اولنور §



اشبو پند مفید ( بهائیہ ) نسخہ اصلیه سنک برکنارنده  
کورلش اولمغله تبرکاً بورایه نقل اولندی §

### ﴿ بهاء الدین نقشبند حضر تالرینک تاریخ ارتحالی ﴾

خواجۀ اعظم بهاء الحق و الدین نقشبند  
آنکه مشهور ولایت شد کمال ملتش  
مسکن و مأوای او چون بود قصر عارفان  
قصر عرفان زین سبب آمد حساب رحلتش

### ﴿ صاحب رشحاتک ضبطی ﴾

رفت شاه نقشبند آن خواجۀ دنیا و دین  
آنکه بودی شاه راه دین و دولت ملتش  
مسکن و مأوای او چون بود قصر عارفان  
قصر عرفان زین سبب آمد حساب رحلتش

### ( ترجمه سی )

کیتدی شاه نقشبند اول خواجۀ دنیا و دین  
اولکه اولدی شاه راه دین و دولت ملت  
اولدی چون مأوا و منزل آکا قصر عارفان  
بوسبیدن ( قصر عرفان ) اولدی سال رحلتی

فی ۷۹۱ سنه

ای عزیز ! ( قل الروح من امر ربي ) تمام شرحدر ، لکن  
اهل معرفتہ ! زیرا کہ روح امر خدادن اولور ، امر خدا ارادت  
و قدرتدر ، ( اذا اراد شيئاً ان يقول له کن فيكون ) دن فهم اولور ،  
بوندندر کہ مقاتل ( رضی اللہ عنہ ) ( من امر ربي من نور ربي )  
دیمکدر دیدی ، ابو بکر محطی ( رحمة الله ) ایدر ، روح عالم  
کنده داخل دکدر ، چونکه عالم کون و مکاندن اولیه ، عالم  
مخلوقدن اولمز ، بلکه عالم خالقدن اولور ، زیرا چونکه امر  
مخلوقات و اشیای ظاهری ایلین اولیجق روح خود امرور یس  
مأمور اولمز ، بلکه فاعل اولور مفعول اولمز ، قاهر اولور مقهور  
اولمز ، ای عاشق ! حضرت موسی که حضرت حق ایلہ یوز اون  
درد بیک کلام سویلشدی ، اولوقت که امت محمد اولان  
( یا احبابی ! من امة محمد و یا مساکین امة محمد ) ( علیه السلام )  
و یا فقراء امة محمد ) خطاب مستطابی ایشتدی بو خطابک لذتندن  
بیہوش اولوب { و خر موسى صعقا } عالنه دوشدی ، چونکه  
ینه کندینه کلدی ، دعا ایدوب ( اللهم اجعلني من امة محمد )  
دیددی ! کرچه سوز هر کشیله سویلنور اما ، سری دوستدن  
غیری یه سویلمزلر §